

Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 22 Feb 2024 from source files dated 31 Aug 2023
aa19f3e3-98fb-51fa-9c53-3906edc75f11

Contents

FRT	1
INT	2
Genesis - Karena	3
Exodus - Oputawanana	24
Leviticus - Levi ai kauga	39
Numbers - Au Mutulua	41
Deuteronomy - Tarawatu Viruaina	47
Joshua	51
Judges - Taurauetara	53
1 Samuel	54
Samuel Viruaina	62
1 Kings - Gulagulau Naona	65
2 Kings - Gulagulau Viruaina	75
Chronicles Viruaina	81
Ezra	82
Nehemiah	83
Job	84
Psalms - Wela ma Pari	88
Proverbs - Nuaulaula Riwai	97
Ecclesiastes - Tauviararamana	101
Isaiah	106
Jeremiah	117
Lamentation	121
Ezekiel	123
Daniel	125
Hosea	126
Amos	127
Jonah	128
Micah	131
Zechariah	132
Mark	133
Apasol	157

**Buka Vivivireina
Parivainuaḡana Wadubona Ġuta Vinevine
ma
Mark ma Acts**

**Translation of The Gospel of Mark and Acts in the Wedau
language,
Milne Bay Provins, Papua New Guinea.**

**Buka Vjivireina
Parivainuaḡana Wadubona Ġuta Vinevine ma Mark ma Acts**

**Translation of The Gospel of Mark and Acts in the Wedau language,
Milne Bay Provins, Papua New Guinea**

© VITAL/SIL PNG 2010

Milne Bay Province
Papua New Guinea.
Printed in Ukarumpa.
2016, 700 Printed
wed
ISBN 9980 0 3979 5

© Wycliffe Bible Translators 2016

Illustrations:

By Horace Knowles and are used by permission of
© The British and Foreign Bible Society, 1954, 1967, 1972
Additions and amendments by Louise Bass
© The British and Foreign Bible Society, 1994

© VITAL/SIL PNG 2010

*Translation of The Gospel of Mark in the Wedau language,
Milne Bay Provins,
Papua New Guinea.*

Printed in Ukarumpa.

Preface - Pariverena

Nature & Purpose of book
Translation principles
Text followed
Orthography
Name location & number of speakers

Genesis Karena Pariverena

Wei bukana e ririweta ma e viviegeta da menanarena mara ma dobu i tupuane. Wei bukana maiteni e viviegeta da aiai rava i kauai ma menanarena mai Israel i tupuane. Kaua gaegaie ruağa e viviegeta wei bukana au orana.

1. Kapita 1-11 e viviegeta da menanarena mara, dobu ma rava i kauai. E viviegeta da Adam ma Eve, Cain ma Abel, Noah ma ututuva ma numa gēgetelarana au Babel.
2. Kapita 12-50 e ririweta menanarena mai Israel i tupuane. E viviegeta da Abraham natuna Isaac ma gōgana Jacob ma Jacob natunatuna 12 Israel noinonii.

Wei bukana taugirumana eğa wavana ita viegeta. Wate tauviararamana gēlaui e notanotai da Moses i girumi mai Israel aubaii da tau i ita aramanei da God i vinei da Tauna ana rava, ma aiwai i kauai mai Israel aubaii. Au gunai wei bukana Moses i girumi madeğa! 1,500 - 1,230 BC. - muriai Iesu i tupua.

Giruma rereğana

Virarautua wadubona

God, mara ma dobu i kauai (1:1 - 2:3)

God, oroto ma wavine i kauai (2:4, 7-9, 15-25)

Apoapoe mena i vikarenei (3:1-24, 4:1-12; 25-26)

Noah ana virarautua (6:5-22; 7:1-5, 17, 23; 8:15-22; 9:1-15)

Babel ana numa gēge dewadewana (11:1-9)

Mai Israel gōgōğai

Abraham, Isaac ma Jacob

God Abram i kwatuei (12:1-7)

Abram ma Lot i vilamonei (13:5-6, 8-1)

Abram, Lot i vai-melei (14:11-16)

Melkisedek, Abram i viaiaini (18-20)

God parivainuagana bagibagina Abram maiteni i kauai (15:1-6, 12-16)

Sarai ma Hagar (16:1-3, 15)

God ana mataira terenana (17:1-21)

Nelara tonuğa i nei Abraham awarina (18:1-15)

Sodom ana virarautua (23; 19:1-7, 24-26)

Isaac i tupua (21:1-5)

Hagar ma natuna Ishmael i paritawanei (21:8-14)

God Abraham ana tumağa i raudadani (22:1-19)

Esau ma Jacob i tupua (25:19-26)

Esau, natuevou ana buderi i verenei Jacob awarina (25:27-34)

God i parivainuagana da Isaac ina viaiaini (26:1-6)

Isaac, Jacob i paritawanei Laban awarina (28:1-4)

Jacob ana rauboni au Bethel (28:10-22)

God, Jacob i viaiaini (35:9-15, 16-20, 22b-29)

Joseph, tuatana maiteni ai virarautua (37:1-8, 12-35)

Joseph ana nola au Egypt (39:1-23)

Joseph, rava ai rauboni anoi i viegei (40:1-23)

Pharaoh ana rauboni (41:1-16, 25-42, 45-49, 53-57)

Jacob natunatuna i paritawanei au Egypt (42:1-10, 21-23)

Joseph i vieğana-melei (45:4-11, 25-28)

Jacob, natunatuna ma gōgōğana maiteni i nae au Egypt (46:1-7, 28-30)

Jacob, Ephraim ma Manasseh i viaiaini (48:1-6, 13-21)

Jacob, Juda i viaiaini (49:8-10, 33)

Joseph, tuatuna i vinuubai (50:15-21)

BADA, mara ma dobu i kauai

¹ Au karena, God, mara ma dobu i vitupui. ² Dobu kwakwavina ma eğa aiwai ita mamae. Gimtona, gabinou i purui. Ma God Aruana, gabinou au tepana i genagenara gaira.

³ Ma God i riwa i pa, "Ina lalai!" Ma i lalai. ⁴ Ma lalalaina i 'nanai da i ai. Ma lalalaina ma gimtona i vilamonei. ⁵ Ma lalaina i gōrei Marai ma gimtona i gōrei Au Pom. Ma au bigai i nae ma ubaubanai i nei, au pom tagogi.

- 6 Ma God i riwa i pa, “Parata mara au tepana ina mae da waira au tepana ma waira au gabaurina ina vilamonei.” 7 Ma parata mara au tepana i terei da waira au dobu ma waira au mara i vilamonei. 8 Ma parata i ġorei Mara. Ma au biga i nae ma ubaubanai i nei, nai au pom viruaina.
- 9 Ma God i riwa, “Waira, mara au gabaurina, gabu au tagogi ona vitagogiemi ma doa alalana ina eġa.” Ma nanare i tupua. 10 Ma doa alalana i ġorei, Dobu ma waira i vivitagogieia i ġorei, Boga. Ma i 'nanai da i ai.
- 11 Anina ma God i riwa i pa, “Dobu, tam modu ma ai ma vigogoi, modu rarauanoi nununai ma ai rarauanoi nununai, ma peii ina gogo ma ina rauano me aloi nanare, ma nanare i tupua.” 12 Ma dobu, modu ma ai anatapui i vigogoi. Ma i 'nanai da i ai. 13 Au bigai i nae ma ubaubanai i nei, au pom vitonuina.
- 14 Ma God i riwa i pa, “Aniravilala au mara ina mae da marai ma waguvara ina vilamonei, ma iri ina vieġeta ma nanare mara ma borima.* 15 Ma tau, mara ina ravilalai da lalaina dobu ina verei.” Ma nanare i mae. 16 Ma aniravilala ġaeġaei ruaġa i kau, voġaeġaena marai i vibadei ma voaburuna waguvara i vibadei ma ubona maiteni i kau. 17 Aniravilala au mara i terei da dobu ita ravilalai 18 da marai ma waguvara ita vibadei ma lalalaina ma waguvara ita vilamonei. Ma i 'nanai da i ai. 19 Ma au bigai i nae ma ubaubanai i nei, au pom vi-four-na.
- 20 Ma God i riwa i pa, “Sia ma lawalawai anatapui waira ona vioai ma kiu ona tupua ma ona lave au aidamo.” 21 Ma sia ġaeġae ma sia tapuna ma tapuna, boga au orana maema ma kiu tapuna ma tapuna maiteni i vitupui. Ma God, i 'nanai da i ai. 22 I viaiaini ma i riwa i pa, “Ona vinatuna ma ona vimaġaimi da boga ona vioai ma kiu ona vinatuna da ona maġa au dobu.” 23 Ma au bigai i nae ma ubaubanai i nei, au pom vi-five-na.
- 24 Ma God i riwa i pa, “Doa, ġamoġamo nununai ma vitupui, ġamoġamo maramaraġamai ma ġamoġamo moduei, ma ġamoġamo tetetei ma ina vinatuna da me tau nanare.” Ma nanare i tupua. 25 ġamoġamo nununai anatapui i vitupui ma tau ina vinatuna da me tau nanare. Ma i 'nanai da i ai.
- 26 Anina ma God i riwa i pa, “Marina, rava tana kau me tauta ma ai kua tauta nanare. Ma tau sia ma kiu ma ġamoġamo anatapui au dobu ina vibadei, ġamoġamo maramaraġamai ma ġamoġamo moduei, ġaeġaei ma muomuoi.”
- 27 *Ma God, rava i kau
Anina ma oroto ma wavine i kau,
me tauna nanare.

28 Rava i viaiaini ma i riwei i pa, “Ona vinatuna ma ona vimaġaimi da dobu ona vioai ma dobu ona vibadei. Taumi, sia, kiu ma aiwai anatapui au doa tetetei ona vibadei.

29 Lam, modu anoi ma ai uana a vereveremi ami lam. 30 Ma ġamoġamo moduei ma kiu ma ġamoġamo nununai anatapui aubai; ai rugurugu a vereveri ai lam.” Ma nanare i mae.

31 Aiwai anatapui i kaukaueia i 'nanai da i ai kua ma i vinuiai. Ma au bigai i nae ma ubaubanai i nei, aupom vi-six-na.

2

1 Ma nanare God mara ma dobu ma anataputapuna au orana i vitupui.

2 *God ana nola i vorovei ma mara au vi-seven-na i vilauvitau. 3 Ana nola i vikwai ma lamna aubaina God wei marana vi-seven-na i viaiaini ma i vovivirei.

Oroto ma Wavine

4 Wei lamna mara ma dobu ana virarautua. Menanare BADA God mara ma dobu i vitupui.

7 Ma BADA * God doa pokauna i vaia ma oroto i voai ma lavutu lawalawaina au giaganana i uveni ma oroto† i lawana.

8 Ma BADA God peipei Eden i paewi au maramatanei ma kampa orotona i vivitupuia i terei da i mae. 9 Ma BADA God ai inanana aiaina ma uana amna aiaina anatapui i paewi ma peipei au pouna ai vinevinei ruaġa i gogo. Ai tagogi uana lamna lawana tauvereina ma ai ġelauna uana lamna nota rava ina verei da metauna aiaina ma metauna apoapoen.

15 Ma BADA God oroto au peipei Eden i terei da ita nolei ma ita paini. 16 Ma BADA God riwa bagibaginei i riwei i pa, “Ai uana anatapui au peipei am ġoanei ma ani. 17 Wate a vivigam

* 1:14: Eng. Year, Madeġa tagogi. * 1:27: Mrk 10:6 * 2:2: Exo 20:11 * 2:7: Yahweh bo Jehovah Exo 3:13-15.

† 2:7: ... doa pokauna i vaia ma oroto Pona Hebrew oroto lamna Adam, ma doa lamna adamah.

da nota aiiai ma nota apoapoei aina uana eġa ma ani! Mepa da u ani, tam nai au marana ma irage!

¹⁸ BADA God i riwa i pa, “Oroto ainelana e mamae ma lamna eġa ita ai. Ana tauagu ana kauēi da ina voagui.”

¹⁹ Ma BADA God doa pokauna i vaia ma ġamoġamo anatapui ma kiu anatapui i kauēi. Ma tau i neiai oroto awarina da ita viwawai. Ma oroto aiwai i viwawai, nanare ai wava i mae.
²⁰ Ma oroto kiu ma ġamoġamo maramaraġamai ma moduei, wava i verei. Wate Adam eġa ana tauagu ita nelaġai da ita voagui.

²¹ Ma BADA God oroto i kauēi da i matave ma maranaina i raunuavuru kaua, torotorona tagogi i votawanei ma vioa i pota-melei ana au gabu. ²² Ma BADA God oroto torotoronei wavine i kauēi ma wavinena i neiai oroto awarina.

²³ Anina ma oroto i auepai ma i riwa,
“Ee wei tauna! Marina gelama tau gelamiuei

ma vioa tauvioauei,
wei tauna awariu i votawanei,
lamna aubaina, ana ġorei *Wavine*.[‡]”

²⁴ *Ma nanare i tupua ma lamna aubaina oroto, amana ma alona e vovoterei ma awana maiteni e vivitagogiei.

²⁵ Oroto awana maiteni, ana kovakovai, wate eġa ita vinimala.

3

Apoapoe mena i vikarenei

Maranai God mara ma dobu i vitupui, aiwai anatapui i ai kaua ma rava aiiai. Wei virarautu-lana lamna menanare apoapoei au dobu i rui.

¹ Anina ma mota lamna terevaideġa kaukauana eġa me ġamoġamo ġelau i kaukaueia nanare. Ma mota wavine i paridadanei i pa, “Riwa kaua bo eġa da God i riwem da eġa ai uana au pepei ma ani.”

² Ma wavine i paribelei i pa, “Tauai ai uana pepei au orana ana ani. ³ Wate God i riwa da pepei au pouna, ai uana eġa ana ani bo ana vodadani. Mepa da ana ani bo ana vodadani lamna ana irage.”

⁴ Ma mota wavine i paribelei, “Eġateni! Amapo eġa ma irage. ⁵ Nai maranai u ani, matam ina vikalai me God nanare ma aiaina ma apoapoena ona aramanei. Ma God i aramanei, lamna aubaina i viġaem da avena ma ani.”

⁶ Ma wavine i 'nana da ai uana aniam aiaina ma inanana i ai kaua, ma i ġoei da ita ani da nuaulaula ita vaini, lamna aubaina tauna ai uana i vaia da i ani. Ma ġelauna awana au ririvana i mamae i verei da i ani. ⁷ Ma matai i kala ma i aramanei da tau i ana kovakovai, lamna aubaina ai bawara rugurugui i vaia da i vaturi da tupuai i tere-ġaġari.

⁸ Au biga ubana i opuopu ma tau i nonori BADA God au pepei i bababara nae. Ma oroto awana maiteni ai au orai BADA God i raugovaġei. ⁹ Wate BADA God oroto i kwatuei i pa, “Tam mepa?”

¹⁰ Tauna i paribelei i pa, “A nonorim au pepei ma tau ana kovakovau aubaina a rovo da a raugovaġem.”

¹¹ Ma BADA God i riwa i pa, “Aiiai i riwem da tam ana kovakovam? Ai uana a viġaem da avena uta ani, ma u ani bo?”

¹² Ma oroto i paribelei i pa, “Wavine u verevereu, tauna ai uana i vereu da a ani.”

¹³ BADA God wavine i riwei i pa, “Aiwai u kauēi?”

Ma wavine i paribelei i pa, “Mota i moruii da a ani.”

BADA, Rava ai kovoġa i vinolenolei

¹⁴ BADA God mota i riwei i pa, “Wei u kauēi aubaina, kovoġa ġaeġaena tam awarim, eġa me ġamoġamo ġelau nanare, maramaraġamai ma moduei.

Manawamei ma matave-taitaina-nae

ma am lam doa ma ani
am mara au anatapuna.

¹⁵ Ana kauēi da tam ma wavine ona viġavia nonoa,
ma am epaia ma wavine ana epaia ona viġavia.

Tauna kolam ina gwadai
ma tam ae karena ma ani.”

¹⁶ Ma wavine i riwa i pa:

‡ 2:23: Au Hebrew pona oroto lamna ish ma wavine lamna ishah. * 2:24: Mrk 10:7-8

“Am nuabola ana viratai am au raumanawa,
ma am iniviarā ina rata am au vinatuna.

Tam u ǵoei da awam uta vibadei,
wate tauna tam ina vibadem.”

¹⁷ Adam i riwei i pa,

“Ma tam awam ponana u rautaniǵaneī

ma ai uana a vivigaeia u ani,

Tam am kauelei doa u viapoapoeni.

Tam ma nola guratana ma inīm ina viara da lam ma nelaǵai, am mara au anatapuna.

¹⁸ Ma doa, donadona ma modu viganaganai ina vigoǵoi aubaim
ma tam ma ipi da ma am.

¹⁹ Tam polapolam ina toi

da lam ma nelaǵai

ma nanare ma mae da ma nae me au doa.

Doa pokauna a vaia da tam a kauem

ma tam ma nae me doa au pokauna.”

²⁰ Orotō i aramaneī da awana tauna rava anatapui aloi ma lamna aubaina i ǵorei Eve.*

²¹ BADA God ǵamoǵamo opina i vaia da iniǵaǵara i kauēi Adam† awana maiteni aubai ma ini
i tere-ǵaǵari.

BADA, Adam ma Eve Edenei i viopuni

²² BADA God i riwa i pa, “Orotōna aiaina ma apoapoena i aramaneī, tauna marina tauta
nanare. Eǵa tana voterei da urana ina vilolo-melei da lawana aina uana ina vaia da ina ani
ma ina mae-nonoa.” ²³ Ma lamna aubaina peipeiei, oroto i viopuni da doa ita ipiei. BADA,
doei oroto i voai. ²⁴ Anina ma oroto i viaǵaǵana-opuneī ma *cherub*‡ biāǵa au peipei Eden au
maramataneī i terei ma ana dabaruma araratana i terei da i nenaē ma i neneī ma lawana
aina etanaina e gagaloei.

4

Cain ma Abel

¹ Ma Adam awana Eve maiteni i matave ma i duama ma tevera orotōna i tupua. Ma i riwa,
“BADA ana aǵuei natu a vaia.” Lamna aubaina i ǵorei “Cain.”* ² Ma muriai tevera orotōna
ǵelauna i ǵuni ma i ǵorei “Abel.”†

Ma maranai tauī i vilaraga, Abel tauna tauviǵamoǵamo ma Cain tauipi. ³ Mara tagoǵi Cain
doa uana ǵelau i neiāi da i puloei BADA awarina. ⁴ Wate Abel nanare sipu natuevouī i vunu-
naieī ma sia monamonai i apui BADA awarina ana pulo. BADA Abel ma ana pulo i vinuāiaieī.
⁵ Wate Cain ma ana pulo eǵa ita vinuāiaieī. Ma lamna aubaina, Cain amlona i ǵaiǵai ma naona
i peu.

⁶ Anina ma BADA Cain i riwei i pa, “Aiwai aubaina amlom i ǵaiǵai? Aiwai aubaina
naom i peu? ⁷ Mepa da kaua aiaina uta kauēi, lamna ata vinuāiaī awarim. Wate am nota
da apoapoena ma kauēi, lamna ma aramaneī da apoapoe am au metaeta e daradaraim da
ina vovaiubaim. Wate tam ma virewapana da ma vovaiubai.”

⁸ Ma muriai Cain ana tevera Abel i riwei, i pa, “Tana nae, tana babara.” Ma maranai i ǵeta
au wapu, Cain i vomairi ma ana tevera Abel i vunui da i virāǵeni.

⁹ Ma BADA Cain i paridadani i pa, “Am tevera Abel mepa?”

Ma Cain i paribelei, i pa, “Eǵa ata aramaneī! Tau au tevera taupainina bo?”

¹⁰ Ma BADA i riwa, i pa, “Aiwai u kauēi? Am tevera tarana doei e kwatukwatu raubiwa
aubaina. ¹¹ Lamna aubaina tam marina apoapoe awarim a tereterei. Am tevera tarana
uramei au doa i toi da doa i matave ǵaǵari. ¹² Ma lamna aubaina maranai u ǵoei da doa
uta ipiei, lamna uana eǵa ma am nelaǵai ma am animae eǵa. Tam ma babara labalababa.”

¹³ Cain BADA i riwei, i pa, “Au kovoǵa i rata kaua ma eǵa tagotagogina da ana avarai! ¹⁴ Tam
wei doaneī e viviopuniu da naom eǵa ana inana-melei. Tau ana babara labalababa ma eǵa au
animae. Ma rava ina nelaǵaiu ma ina virāǵeniu.”

¹⁵ Ma BADA i paribelei, i pa, “Eǵal Aiāi da i virāǵenim, ana kovoǵa ina rata guratana.” Ma ana
mataira Cain awarina i terei da rava ita viǵaei da tauna avena ita vunui, maranai i nelaǵai.

* **3:20:** Eve Wei wavana nonorana me Hebrew ponaneī lawana tauverena. † **3:21:** Au Hebrew ponana oroto lamna
adamah lamna aubaina oroto i ǵorei Adam. ‡ **3:24:** Arua lawalawaii gabu vivivireina taupaini. Tagoǵi lamna cherub

* **4:1:** Cain Wei wavana nonorana me Hebrew ponaneī anona a vaia. † **4:2:** Abel Wei wavana nonorana me Hebrew
ponaneī anona lavutuna tupona.

²⁵ Adam awana maiteni i matave ma Eve natui ġelauna i ġuni. Eve i riwa, i pa, “Cain ana tevera Abel i viraġeni. Ma lamna aubaina God natu orotona i vereu da Abel i raviepaiai.” Ma i ġorei Seth.[‡]

²⁶ Seth natuna orotona i tupua ma i ġorei Enosh. Ma nai marana, rava, BADA wavana vivivireina viborumana i vikarei.

6

Rava ai ġo'apoapoe

⁵ Ma BADA i 'nanai da rava anatapui au dobu ai ġo'apoapoe i rata kua ma aiwai i viogaterei ma i vinua-notenotei anatapui apoapoei. ⁶ BADA i 'nanai ma orana i viara kua ma i vinuabola da aiwai aubaina rava i kauēi. ⁷ Ma BADA i riwa, “Tau rava a kaukaueia ana vipupui dobu au anatapuna ma nanare ġamoġamo ġaeġaei ma ġamoġamo au doa tetetei ma kiu au aidamo. Nuanuau i bola-kauēi da tau i kauēi.” ⁸ Wate BADA Noah i 'nanai ma i vinuiaiēi.

Noah ana virarautua

⁹⁻¹⁰ Noah ma ana epaepaēia ai virarautua wenanare.

Noah natunatuna nelarai tonuġa: Shem, Ham ma Japheth. Noah ana ġo'apoapoe eġa, tauna ainelana rava aiaina eġa me aiāi ġelauna nai au marana. Ma God maiteni i bababani nonoa ma ana au viaiaina i mamae.

¹¹ Rava ai ġo'apoapoele dobu i viapoapoeni God au matana ma vigaigaiawa dobu i oai. ¹² Ma God i 'nanai da rava ai ġo'apoapoe i rata kua ma lawana apoapoena i maemaele. ¹³ Ma God Noah i riwei, “Rava pupunana a vivinua-notenotei. Aubaina rava ai ġo'apoapoe dobu i oai, lamna aubaina rava ma dobu anatapuna ana vipupui. ¹⁴ Lamna aubaina a ġoei da wei ma kauēi. Waga ġaeġaena ai bagibaginei ma voai tam aubaim. Ma babalaraġi ma koltei au orana ma au doa ma pasi. ¹⁵ Wenanare ma voai. Waga ana manawa 140 mita ma ana dabora 22 mita ma ana ġae 14 mita” ¹⁶ Ma poewi ma gavogavo aburuna ma voterei poewa ma biribiri au poui, ive ma madeġa aubaina. Ma au ririvana, metaeta ma terei. Ma vatara, au gabaurina, au poua ma au tepana ma voai.

¹⁷ —Ona rautaniġana! Tau marina ututuva ana paritawaneia i au dobu ma aiwai anatapui lawalawai ina amoa. ¹⁸ Wate marina tau parivainuaġana bagibagina ana kauēi tam maiteni. Tam, awam, ma natunatum awawai maiteni au waga ona rui. ¹⁹⁻²⁰ Ma ġamoġamo anatapui, wavinena ma orotona ma vigerui, kiu, ma ġamoġamo au doa tetetei ruaruagei ava ina rui da ina lawana. ²¹ Ma lam taputapune i ava ma vaia da taumi ma ġamoġamo aubaii.”

²² Ma God aiwai anatapuna i ririweia; Noah i kauēi.

7

Ututuva i vikarei

¹ Ma BADA Noah i riwei, “Tam ainelam rava jijimanim au dobu wei au marana. Lamna aubaina tam ma am numa ravai anatapumi au waga ona geru. ² Ma BADA ġamoġamo i vianinei aniam ma pulo aubaina, ororotoi 7 ma waivinei 7 ma vaia. Ma BADA ġamoġamo eġa ita vianinei, orotona tagogi ma wavinena tagogi ma vaia. ³ Ma nanare kiu ma vaia, ororotoi 7 ma waivinei 7. Wei ma kauēi da ġamoġamo da kiu anatapui lawalawai ina mae ma ina vinatuna. ⁴ Ma au pom 7 au murina ma garewa ana paritawaneia i da mara 40 ma au pom 40 ina atuna. Ma aiwai au dobu a kaukaueia, e mamae ma e lavulavutu anatapui ina pupu.”

⁵ Anina ma BADA anatapuna i ririweia, Noah i kauēi.

¹⁷ Ma au pom 40 au orana ututuva i rarata ma waga i tenam epa.

²³ Anina ma BADA anatapuna lawalawai au dobu i pupuna-pai, rava ma ġamoġamo ma kiu ma ġamoġamo tetetei, anatapui i viamoai. Noah ma tau i aiavoi au waga i gerugeru, tau i ava i lawana.

8

Ututuva damona

¹⁵ Ma God Noah i riwei i pa, ¹⁶ “Tam ma awam ma natunatum ana awawai waga ona oputawane. ¹⁷ Ma ġamoġamo lawalawai anatapui ma taravaina-opunei, kiu anatapui, ġamoġamo au doa tetetei da ina vinatuna ma ina maġa da dobu ina vioai.”

[‡] 4:25: Seth Wei wavana nonorana me Hebrew ponanei anona i vereu.

^{*} 6:15: Hebrew pona ana manawa 300 cubits ma ana dabora, 50 cubits ma ana ġae 30 cubits.

¹⁸ Ma Noah awana ma natunatuna ma awawai waga i opu-tawanei. ¹⁹ Ma ġamoġamo anatapu, kiu ma ġamoġamo ġelau i doa tetetei, ai au dam nununai nanare waga i opu-tawanei.

²⁰ Ma Noah pulo aniapuna i voai BADA awarina ma ġamoġamo aiiai, kiu aiiai tagotagogi ava taputapuna i apui pulo aniapuna au tepana. ²¹ Ma maranai BADA pulo ġabuna i laġoni ma au nuanuana i pa, “A aramanei da rava melamelaiei ai nota i apoapoe. Wate dobu eġa ana viapoapoeni ma eġa melanai lawalawai anatapu ana pupuna-melei me a kauai nanare.

²² Ma maranai dobu e mamae paewa ma tuaruta, ubauba ma vibola, bodu ma omra, garewa ma madeġa, maratomi ma au pom, ina mae-nonoa ma eġa ina kwa.”

9

BADA ana Parivainuaġana bagibagina Noah maiteni i kauai

¹ *Ma God Noah natunatuna maiteni i viaiaini ma i riwei i pa, “Ona vinatuna ma ona vimaġaimi da dobu ona vioai. ² Ana kauai da ġamoġamo ġaeġae ma ġamoġamo tetetei, iana ma kiu, anatapu ina rovoemi. Ma au urami ana terei da ona vibadei. ³ Aiwai anatapu lawalawai ami aniam. Modu anoi ma ai uana a veremi, wate marina aiwai anatapu a vereveremi ami aniam.

⁴ *—Wate vioa taratarana eġa ona ani, aubaina tara au orana lawana e mamae, ona voterei da tarana ina toi tawanana ma muriai ona ani. ⁵ Ma mepa da ġamoġamo rava i viragēni. Tau ana raubiwa, wate nanare rava, rava turana i viragēni. Tau ana raubiwa.

⁶ *Tau rava a kauai me tau inana nanare, ma lamna aubaina Rava aiiai i viragēna, rava ġelauna tauna ina viragēni.

⁷ *Ma tam natunatum ina maġa da am epaepaia dobu ina maena-pai.”

⁸ Ma God Noah natunatuna maiteni i riwei i pa, ⁹ “Ona rautaniġana wei marina, Tau au parivainuaġana bagibagina taumi ami epaepaia maiteni a kaukai. ¹⁰ Ma ġamoġamo lawalawai anatapu, kiu ma ġamoġamo numei ma moduei ma anatapu wagei i opuopu, ma ġamoġamo anatapu muriai au dobu ina mae. ¹¹ Wei riwanei au parivainuaġana bagibagina taumi maiteni a terei da eġa melanai ututuva ġelauna ana paritawanana-meleiai au dobu da purapura lawalawai ina vipupui.”

¹² Ma God i riwa, “Parivainuaġana bagibagina a kaukai taumi ma anatapu lawalawai maiteni anatapu muriai e nenei. Wei parivainuaġana matairana wenanare: ¹³ Warilolo au apau ana terei da ina vimataira da tau au parivainuaġana bagibagina a terei tau ma taumi ma anatapu lawalawai au dobu maemaiei. ¹⁴ Maranai mara e ġuvaġuwei ma warilolo au apau e eġaeġa, ¹⁵ lamna ina vieġeu da au parivainuaġana bagibagina tau ma taumi ma anatapu lawalawai au dobu. Ma eġa melanai ututuva lawana ina vipupui.”

11

Babel ana numa ġeġe dewadewana

¹ Au naona rava anatapu au dobu pona tagogi ma riwa tagogina i bababaniei. ² Nai maranai rava i vaġavaġai nae au maramatanei ma wapu au ġaeġaena i ġeta au Shinar * ma kampa i mae.

³ Ma i babani vivira i pa, “Ona nei, doa tana vaia ma brik tana pasi ma tana apui da ina bagibagi.” Ma nanare ai numa brikiei i voai ma koltei i ampasi. ⁴ Ma tau i riwa, “Ona nei melagai ġaeġaena tana voai tauta aubaita ma numa ġeġe dewadewana tana voai da ina ġae au mara da wavata tana kauai ma eġa tana vilamoneta dobu au anatapu.”

⁵ Anina ma BADA i ġairai da ravai melagai ġaeġaena ma numa ġeġe dewadewana i voavoai ita inana. ⁶ Ma BADA i riwa i pa, “Wei tau rava tagogi ma pona tagogina e bababaniei. Wei lamna karena, aburuna ava aiwai ai au nota anatapu ina kauana-paiei. ⁷ Ona nei tana ġaira da noi ravai ai pona tana vinua-raġaraġai ma ina babani labalababa.”

* 9:1: Gen 1:28 * 9:4: Lev 17:10-14 * 9:6: Exo 20:13; Gen 1:26 * 9:7: Gen 1:28 * 11:2: Babilon au paratana.

8-9 Anina ma BADA rava anatapui ai pona i vinua-raġaraġai ma i vilamonei dobu au anatapuna, lamna aubaina nai melagaina i ġorei Babel.† Ma melagai ġaeġaena voana i voterei. BADA tau i vilamonei dobu au anatapuna.

12

BADA, Abram i kwatuei

1* BADA Abram i riwei i pa, “Am dobu, am rava ma amam ana dam ravai ma netawanei ma ma nae dobu ana viatataiem kampa ma mae.

2 Ma am epaepaia ai dam ana viratai,
ma ana viaiaininim,

ma ana kauei da wavam ina rata,
ma tamei viaiaina ina nei rava awarii.

3 Ma aiai i viaiaininim, tau ana viaiaini,
ma aiai i parivai-apoapoenim, tauna ana parivai-apoapoeni,
ma tamei dam anatapui au dobu ana viaiaini.”

4-5 Ma BADA i ririweia nanare, Abram awana Sarai ma maiana Lot* Haran i opu-tawanei, Abram ana madeġa 75. Ai purapura, ai ġamoġamo ma ai laralaraga ma i vomairi Canaan aubaina. 6 I ġeta Canaan ana au parata ma i verautua da au gabu vinevinena, Shekem melagaina ġaeġaena au ririvana. Ma kampa au Moreh† ai ġaeġaena au ġouna i rauġaravu. (Nai maranaina mai Canaan, nai au dobuna i mamae.) 7* Kampa BADA i viatataeana-melei ma i riwa i pa, “Wei dobuna Canaan am epaepaia ana verei.” Ma Abram pulo aniapuna, i voai BADA awarina ma pulo i apui. Mepa BADA i viatataeana-melei lamna au gabuna aniamapu i voai.

13

Abram ma Lot i vilamonei

5 Maranai Lot, Abram maiteni i vaġavaġai, Lot maiteni ana ġamoġamo maġamaġai ma ana numa ravai ma ana tauvilaraga. 6 Ma tau i ġamoġamo i maġa guratana ma gabu eġa tagotagogina da anatapui ita ġamoi, 7a Ma lamna aubaina eġa tagotagogina da tau i ita maegogona.

8 Anina ma Abram, Lot i riwei i pa, “Ma rautaniġana, tauta tara tagogi ma eġa tana viparipariniġai ma ata taunola avena ita viġaiġaiawa vivira. 9 Weka tana vilamoneta ma ata naei tana nae. Doa au naota e inainanai. Metauna e ġoġoġoi ma nae ma kampa ma mae. Mepa da tam ma nae au oiena, tau ana nae au kelakela. Mepa da tam ma nae au kelakela, tau ana nae au oiena.”

10 Anina ma Lot matana i tawanei da waira Jordan wapuna ma Zoar melagaina au paratana. Ma i ’nanai da waira i maġa ma doa maumaurana me BADA ana peipei,* me doa maumaurana au Egypt. (Nai marana BADA eġa Sodom ma Gomorah ita vipupui.) 11 Ma Lot waira Jordan wapuna i vinei tauna aubaina ma i nae au maramatanei. Tau i nanare i vilamonei. 12 Abram au Canaan i mae ma Lot Sodom au ririvana i mae. 13 Ma mai Sodom ai lawana i apoapoe kaua ma ġo’apoapoe i kaukauei BADA au matana.

14 Ma Lot Abram i netawanei ma muriai BADA Abram i riwei i pa, “Mepa u mamae lana, matam ma tawanei au lavaratei ma au rauanagei ma madeġa e gogogolana ma mepa madeġa e neneulai. 15* Dobu anatapuna e inainanai tam ma am epaepaia ana vere-nonoemi. 16 Ma am epaepaia ana kauei me doa pokauna ma aiai da pokau e iaivi lamna am epaepaia tagotagogina ina iavi. 17 Dobuna anatapuna taumi a vereveremi, ma nae ma dobuna ana manawa ma ana dabora ma babarani.”

18 Ma nanare Abram ana numagara i naiei Mamre ana ai ġaeġaena au ġereġerena au Hebron i mae ma kampa pulo aniapuna i voai ma pulo i apui BADA awarina.

14

Abram, Lot i vai-melei

11-12 Gulagulau 4 Sodom ma Gomorah ai purapura ma ai lam i kwalei. Abram maiana Lot au Sodom i mamae i vaia ma ana purapura maiteni i vaia ma i nae. 13 Abram tauna Hebrewei

† 11:8-9: Babel Nonorana me Hebrew ponanei nuaragaġa. * 12:1: Act 7:2-3 * 12:4-5: Abram ana tevera Haran natuna Lot. † 12:6: Mai Canaan weka ai god morumoruna i vimae-ġaeġaeni. * 12:7: Act 7:5 * 13:10: Eden peipeina, Gen 2:8. * 13:15: Act 7:5

ma Mamre ana ai gaeḡaena au ḡereḡerena i mamae. Ai taniwagana wavana Mamre tauna Amoriei, varevareina Eskol ma Aner. Anatapui Abram ana tauagu, ḡavia au marana. Ma oroto tagogi ḡavia i rovoei da i rovo-nae ma i ḡeta Abram awarina ma i vibenabenamei. ¹⁴ Ma maranai Abram i nonori da tau maiana Lot i vaia. Tauna ana sorodia vinevinei ana au melagai tuputupuai 318 i kwatuei. Ma ḡaviḡaviai i votaḡoi da i ḡae au Dan. ¹⁵ Waguvarai ana sorodia i ḡutai ma ḡaviḡaviai i viaḡaḡei da Damaskas i verautuini da au Hobah i ḡeta ma kampa i vovaiubai. ¹⁶ Purapura anatapui i vai-melei. Maiana Lot ma ana purapura ma waivine ma rava ḡelau.

Melkisedek, Abram i viaiaini

¹⁸ Melkisedek tauna Salem† ai gulau ma God AIDAMO TELARANA ana pirisi pulo tauapuina. Palawa ma wine i nei, ¹⁹ ma Abram i viaiaini ma i pa, “God AIDAMO TELARANA mara ma dobu taukaueina, ina viaiainim.

²⁰ Ma God AIDAMO TELARANA am ḡavia au uram i terei, lamna aubaina tana voepaepai.”

Ma Abram aiwai ana sorodia maiteni i tami i vitagogiei da ḡuta 10 i kauēi. Ma ḡuta tagogi i votawanei ma Melkisedek i verei.

15

BADA, Parivainuaḡana bagibagina Abram maiteni i kauēi

¹ Ma muriai BADA Abram ana au rauboni i riwei i pa, “Abram eḡa ma rovo. Tau am taugalo am pulo gaeḡaena.”

²⁻³ Ma Abram i paribelei i pa, “Oo BADA God. Tau eḡa natunatu, ma am pulo eḡa ina voaguui. Tam eḡa natu orotona uta vereu ma lamna aubaina au iraḡe au murina, Eleasar au taunola Damaskasei au vigulau ina vaia.”

⁴ Anina ma BADA i riwana-melei i pa, “Eḡa! Tauna am vigulau eḡa ina vaia, wate natum orotona tamei ina tupua, tauna am vigulau ina vaia.”

⁵ Anina ma BADA tauna i taravaina-opunei au doa ma i riwei i pa, “Ma ḡoutata au mara ma ubona ma inanai, mepa da tam tagotagogina da uta iavi. Lamna am epaepaia ina maḡa me ubona nanare. Eḡa aiai tagotagogina da ina iavi.”

⁶ Abram, BADA riwana i vitumaḡanei ma lamna aubaina BADA i riwa da Abram rava jijimanina.

¹² Ma maranai madeḡa i neneulai ma Abram i matave-nuavuru kaua. Ma gimtona ma rovo gaeḡaena i nei ma i purui. ¹³ ✧ Ma BADA i riwei i pa, “Wei ma aramana-kauēi! Am epaepaia ina vitaomana au dobu ḡela ma kampa ina vitaunola. Ma dobuna ravai* tau i nau-iviapoapelei da madeḡa 400 ina kwa. ¹⁴ ✧ Wate muriai tau nai dobuna ravai ana kovoḡi ma am epaepaia ina vipurapura kaua ma ina nememei. ¹⁵⁻¹⁶ Ma mai Amori† ai ḡo’apoape ina rata guratana, ma nai maranaina ana kovoḡi ma ana viaḡaḡana-opunei wei au dobuna. Ma lamna aubaina am epaepaia eḡa ina nei laḡilaḡinai da kimta au vi-four-na. Wate tam, Abram ma magura kaua ma ana nuaubam ma iraḡe ma ina doboim.”

16

Sarai ma Hagar

¹⁻³ Abram au Canaan i mae madeḡa 10 i kwa, awana Sarai aipoi ma eḡa ita vinatuna. Sarai ana taunola wavinena Egyptei wavana Hagar. Ma Sarai Abram i riwei i pa, “BADA i viḡaeu da eḡa ata vinatuna. Ma nae au taunola maiteni ma matave, mepa da ina vinatuna, ma tevera ana vinatunei.” Abram, Sarai ponana i voteletelei ma Hagar i vaia ma i viawanei.

¹⁵ Ma Hagar i vinatuna da Abram natuna orotona i tupua. Ma Abram, natuna i viwawai Ishmael.

* **14:14:** Lamna melagai gaeḡaena au lavaratei Canaan ana parata au ḡereḡerena. † **14:18:** Jerusalem. ✧ **15:13:** Exo 1:1-14; Act 7:6 * **15:13:** Mai Egypt. ✧ **15:14:** Exo 12:40, 41; Act 7:7 † **15:15-16:** Nai maranai, mai Amori ma mai Canaan au dobuna Canaan i mamae.

17

BADA ana mataira terenana

¹ Maranai Abram ana madeğa 99 ma BADA i vieğana-melei Abram awarina ma i riwei i pa, “Tau God VIVIREWAPANA KAUKAUANA.* Au naou ma babara ma kaua aiaina ava ma kauēi ² da nanare au Parivainuagana bagibagina ana vovai-virewapani tau ma tam awarita ma am dam ana vimağa-guratei.”

³ Ma Abram i mae-ğaira au doa ma i raudune. Ma God Abram i riwei i pa, ⁴ “Tau au nanava au parivainuagana bagibagina tam maiteni wenanare: Ana kauēi, da dam patarana mağamağai tam ina viamanem. ⁵ Ma marina wavam Abram, † ana terevirai da Abraham;‡ aubaina marina ana kauēi da dam patarana mağamağai ina viamanem. ⁶ Ma ana kauēi da am epaepaia ina mağa ma am damei gulau mağamağai ina nei. ⁷ Au parivainuagana bagibagina ana vovai-virewapani, tau ma tam ma am epaepaia muriai e nenei da tau am God ma tau ai God. ⁸ ✧ Canaan dobuna taputapuna marina e mamae-gubai, tam am epaepaia maiteni ana vere-nonoemi aubaimi ma tau, tau ai God.”

⁹ Ma God Abraham i riwei i pa, “Ma au parivainuagana bagibagina, tam ma am epaepaia maiteni ona voteletelei. ¹⁰ ✧ Wei taumi ami au nanava parivainuagana bagibagina ona voteletelei, ami nelara anatapui inii ina bori. ¹¹ Ma taumi inimi ona bori, lamna ata parivainuagana matairana. ¹² Roaroa melamelai nelarai i tupua ma au pom 8 au murina inii ona bori. Wei kauana ona kauēi, natunatumi nelarai ma ami taunola natunatumi nelarai ma nelara anatapui am au numa e vivitaunola. ¹³ Riwa kaua, maranai roaroa nelarai i tupua am au dam bo maranai taunola o ġimarai, tau ai mataira lamna inii ona bori. Lamna au parivainuagana matairana au tupuami ina mae-nonoa. ¹⁴ Wate ai ai orotona nai matairana eğa au tupuana, lamna au parivainuagana bagibagina i viaigai ma lamna aubaina tauna ina viravağela.”

BADA, Sarai i parivainuagani

¹⁵ God Abraham i riwei i pa, “Awam eğa ma ġorei Sarai, wate ma ġorei Sarah. § ¹⁶ Tau ana viaiaini ma natum orotona ina vitupui. Anina ma ana viaiaini da ina vidam ġaegae aloi. Ma dam ai gulau mağamağai taunei ina opu.”

¹⁷ Abraham i mae-peu ma i raudune ma i mutu-kaka ma au nuanuana i pa, “Amapo oroto ana madeğa 100 ma ina vinatuna bo? Ma Sarah ana madeğa 90 ma ina vinatuna bo?” ¹⁸ Ma Abraham God i riwei i pa, “Ma Ishmael menanare, uta viaiaini bo eğa?”

¹⁹ Wate God i riwa i pa, “Eğa! Awam Sarah natum orotona ina vitupui ma ma viwavai Isaac.* Au parivainuagana bagibagina tauna awarina ma ana epaepaia awarii ina mae-nonoa. ²⁰ Ma Ishmael aubaina, am nuabola a nonori. Ana viaiaini ma natunatumi ana vimağai ma ana epaepaia ana vituai. Tauna dam 12 ai babada amai ma ana epaepaia ai dam ana vimağai. ²¹ Wate au parivainuagana bagibagina ana kauēi Isaac maiteni. Ma wei marana nanare, madeğa ġelauna Sarah, Isaac ina vinatunei.”

18

Nelara tonuğa i nei Abraham awarina.

¹ Au benai Abraham ana numagara au metaetana i kiakiala. ² I taepai ma nelara tonuğa i 'nanai i maimairi. Maranai i 'nananai i ruba da au naoi i mae-ğaira ma i raudune.

³ Ma i riwa i pa, “Au bada. Mepa da u notai da tau anina, eğa ma tutelareu. ⁴ Waira ana neiai da aemi ana oğai ma ona vilauvitau ai au ġouna. ⁵ Lam ana veremi da ina vovai-virewapanimi ma muriai ona vağai. Taumi o notaiu da o nei.”

Tau i paribelei, “Anina u ririweia ma kauēi.”

⁶ Anina ma Abraham lağilağina i nae au numagara ma Sarah i riwei i pa, “Lağilağina, am palawa aiaina baikena ma vaia ma palawa ma apui.”

⁷ Ma i ruba ma bulumakau orotona ġaubona i vaia da ana taunola i verei ma i vokaukauēi.

⁸ Anina ma Palawa ma mereki ma mereki ravi taputapui ma sia i neiai tau awarii au ġou da i am ma tauna i mae-paini.

⁹ Tau i paridadana i pa, “Awam Sarah mepa?”

Tauna i paribelei i pa, “Tauna numagara au orana.”

* **17:1:** God vivirewapana kaukauana. Hebrew El-Shaddai. † **17:5:** Abram. Wei wavana nonorana Hebrew ponaiei anona viwavalatonana. ‡ **17:5:** Abraham. Wei nonorana me Hebrew ei anona dam mağamağai amai. ✧ **17:8:** Act 7:5 ✧ **17:10:** Act 7:8 § **17:15:** Sarai - Sarah: Wei wavai ruaga anoi wavalatona natuna wavinena. God Sarai wavana vouna i verei da ita viatataiei da tauna dam ġaegae aloi. * **17:19:** Isaac. Wei wavana Hebrew ei anona i kaka.

¹⁰ Tau i tagogi Abraham i riwei i pa, “Riwa kaua da wei au marana nanare madeġa au ġelauna ana nememei, lamna awam Sarah tevera orotona ina ġuni.”

Ma Sarah, ravai au muri numagara au metaetana, i rarautaniġana. ¹¹ Sarah ma Abraham i magura kaua ma Sarah ana vinatuna ana mara i kwa. ¹² Sarah i mutu-kaka ma i riwana-melei, “Tau ma awau a magura kaua ma au vinatuna ana mara i kwa. Ma amapo tagotagogina da duama ana morelanei bo?”

¹³ BADA Abraham i paridadanei i pa, “Aiwai aubaina Sarah i kaka ma i riwa, “Tau a magura kaua ma riwa kaua da ana vinatuna bo?” ¹⁴ Aiwai i piripiri guratana BADA au matana? Me a ririwem nanare, ana nememei awarim wei marana nanare madeġa au ġelauna ma awam Sarah tevera orotona ina ġuni.”

¹⁵ Sarah i rovo ma i bovi ma i riwa i pa, “Tau eġa ata kaka.”
Tauna i paribelana i pa, “Eġa! Tam u kaka.”

Sodom ana virarautua

¹⁶ Maranai nelara tonuġa i vomairi da ita nae, Abraham tau i maiteni i nae da au etanai ita tuterei. Ma tau i 'nana ġaira au Sodom, ¹⁷⁻¹⁹ ma BADA ana au nota i pa, “Aiwai marina ana kauai, eġa ana tere-govaġi Abraham awarina. Abraham ana epaepaia ina vidam ġaeġaena ma vivirewapanana ma taunei dam anatapui au dobu ana viaiaini. Tauna a vinei da natunatuna ina riwei ma tau i natunatui ina riwei da BADA ana lawana ina votaġotaġoi da aiaina ma jijimanina, ina kaukauei da tau Abraham a paripari-vainuaġania ana kauai.”

²⁰ Ma BADA Abraham i riwei, “Tau, vikaruwaġawaġa maġamaġau i nonori da Sodom ma Gomorah melagaġi ravai ai ġo'apoapoe i rata guratana. ²¹ A ġaiġaira da ana inanai da wei vikaruwaġawaġana riwa kaua bo eġa.”

²² BADA Abraham maiteni i maimairi ma nelara ruaġa i nae au Sodom. ²³ Abraham i nei BADA awarina ma i riwa i pa, “Riwa kaua da rava aiiai ma vipupui rava apoapoei maiteni? ²⁴ Mepa da rava aiiai 50 au melagai, amapo melagaina ma vipupui bo? Ma rava 50 notaiei ma melagaina eġa ma vipupui? ²⁵ Lamna eġa ita ai, ma eġa ma kauai. Tam eġa rava aiiai ma virageini rava apoapoei maiteni. Nai kauai e kaukauei rava aiiai awarii, kauana tagogina rava apoapoei awarii e kaukauei, eġateni! Tam rava anatapui au dobu tauetareina ma ma etarana-kauelai tapa?”

²⁶ BADA i riwa i pa, “Mepa da rava 50 aiiai ana nelaġai au Sodom, dobuna ana voterei tau i ai ġo' aiiai aubaina.”

²⁷ Abraham i paribelei i pa, “Au BADA tau am molaka, wate tau wei babanina a vikarei aubaina amapo ana paridadana me. ²⁸ Mepa da rava 50 aiiai ma 5 ina deġa, amapo melagaina ma vipupui bo?”

I riwa i pa, “Mepa da rava 45 kampa ana nelaġai lamna eġa ana vipupui.”

²⁹ Abraham i paridadana me i pa, “Mepa da rava aiiai 40 ava kampa u nelaġai?”

I riwa i pa, “Mepa da kampa 40, amapo eġa ana kauai.”

³⁰ Abraham i riwa i pa, “Au BADA, eġa awariu ma ġaiawa ma vianineu da ana babani me, mepa da 30 ava kampa ma nelaġai?”

I riwa i pa, “Mepa da 30 ava ana nelaġai, amapo eġa ana kauai.”

³¹ Abraham i riwa i pa, “Tau wei babanina a vikarei, mepa da 20 ava kampa ma nelaġai?”

I riwa i pa, “Mepa da 20 ana nelaġai lamna, eġa ana vipupui.”

³² Abraham i riwa i pa, “Au BADA, eġa awariu ma ġaiawa ma vianineu da mara tagogi ava ana babani me. Mepa da 10 kampa ma nelaġai?”

I riwa i pa, “Mepa da 10 ana nelaġai, amapo eġa ana vipupui.”

³³ Maranai BADA Abraham awarina i babani vorove, tauna i nae ma Abraham i nae ana au melagai.

19

¹ Ma raviravaii anela ruaġa au Sodom i ġeta, Lot melagai au metaetana i kiakiala.* Maranai Lot tau i 'nana, i vomairi da i nae awarii ma i raudune. ² Ma i riwa i pa, “Au babada, tau ami taunola a nei, ona nei au au numa. Aemi ona oġai ma ona matave. Maratomtomi au vomairi da ami au aninae ona nae.”

Ma tau i paribelei i pa, “Eġa! Tauai weka au deba ana matave.”

³ Ma i riwana bagibagi da maiteni i nae ana au numa. Lot, palawa eġa *yist*† maiteni i apui ma tau i am.

⁴ Ma ita matave ma mai Sodom nelarai laralaragai ma magumaguri anatapui i nei da numa i kwaipipini, ⁵ ma tau i Lot i kwatuei i pa, “Nelara ruaġa waguvarai i nenei awarim, tau mepa? Ma opuneiai awarii da ana viawane!”

* **19:1:** Melagai, ġaimi i gari-kwavirooi; ma metaeta tagogi bo ruaġa i tereterei. Weka i kiakiala gimara bo viboruboru ma i vivioġatara. † **19:3:** Eng. Yeast.

⁶ Ma Lot i opu tau awarii ma au murina metaeta i gudi. ⁷ Ma i riwei i pa, “Au rava a vivibağaimi, ega wei kauai apoapoei ona kauai. ⁸ Ona rautaniğaneu, tau natunatu waivinei ruağa, tau matatapu. Ana opuneiai awarimi da ami ġoana nanare ona kauai. Wei nelarai a neiai au numa lamna tau au taomana ma ega aiwai awarii ona kauai.”

⁹ Ma Sodom nelarai i paribelei i pa, “Ma maeria! Tam dobu ġela ravam weka e mamae-gubai ma marina u goei da ma vibadabada. Marina ana viapoapoena-kauem ega me tau ruağa!” Ma tau Lot au metaeta i dudu ratui da gudu ita rikai. ¹⁰ Wate nelara ruağa numa au orana urai i tere-opuneia ma Lot i taina-ruiei awarii ma metaeta i gudi. ¹¹ Ma nelara anatapu i metaeta matai i viaipotai mara tupona ava da ega tagotagogina metaeta ita inanai.

¹²⁻¹³ Anina ma nelara ruağa Lot i riwei i pa, “Tauai marina wei dobuna ana pupuni. BADA, vikaruwağawağa mağamağai i nonori wei melagina ravai awarii ma Tauna, tauai i paritawanelai da dobuna ana pupuni. Am dam ravai ġelau weka e mamae bo ega? Natunatum nelarai ma waivinei ma poipoiam ma am rava aiavoi au melagai maemaie; ma taravaina-opuneia!” ¹⁴ Ma Lot i opu natunatuna ai ġopapara awarii ma i riwei i pa, “BADA marina dobuna ina pupuni. Lağilağina, wei dobuna ona oputawanei.” Ma tau i notai da tauna i vivinama.

¹⁵ Ma mara karena i tereterei ma anela Lot i vivibağai da ita volağilağina. Ma i riwa i pa, “Ega ita ai da ma irağe maranai BADA wei dobuna ina pupuni. Lağilağina awam ma natunatum maiteni ona opu.” ¹⁶ Wate Lot i tatavira. BADA i goei da Lot ita vilawani. Ma anela Lot awana maiteni ma natunatu urai i vojijini ma melagaiei i taravaina-opuneia.

¹⁷ Maranai melagai i opu-tawanei ma anela tagogi tau i riwei i pa, “Ona ruba ami lawana aubaina! Ega au murimi ona inana ma ega au wapu ona tumairi dadana. Ola aubaina ona ruba da ami lawana ega ona vine-boai.”

²³ Ma madeğa i gogogo ma Lot ana numa ravai maiteni au melagai Zoar i ġeta.[‡]

²⁴ Lamna maranai BADA salpa araratana marei i paritawanana ġaireiai me garewa, Sodom ma Gomora melagai au tepai. § ²⁵ Ma melagai, wapu, rava anatapu ma aiwai gogogoi i aragibui. ²⁶ Ma Lot awana i vivimuri, i mae-tavirei ma i ravi-taputapu.

²⁷ Ma ubaubanai boiboği Abraham i vomairi ma i nae mepa BADA maiteni i bababani lana. ²⁸ Ma i nana ġaira Sodom ma Gomora ma wapuna ana taputapuna ma kampa bau potopotona i nana i ġeğae. ²⁹ Maranai God nai melagai ma wapuna i pupuni, tauna Abraham ega ita notavai-nuavurui. Ma lamna aubaina God Lot i paritawana-opuneia ma muriai nai melagina i vipupui.

21

Isaac i tupua

¹ Ma BADA Sarah i viaiaini ma i paripari-vainuağani nanare i kauai. ² Ma God mara i vinevineia nanare, Sarah i duama ma i vinatuna. Natuna orotona i tupua, Abraham i magura ma natuna i tupua. ³ Abraham natuna i viwavai Isaac. ⁴ *Ma au pom 8 au murina Abraham natuna inina i bori me God i ririweia nanare. ⁵ Abraham ana madeğa 100 maranai wei kauai i tupua.

Abraham, Hagar ma natuna Ishmael i paritawanei

⁸ Isaac i rata ma i viedai ma Abraham lam ġaeğaeana i vokaukauei ma i am gogona. ⁹ Ma Sarah Ishmael i nana Isaac i vivinamei. Ishmael lamna Abraham natuna ġelauna, ana taunola Hagar Egyptei i ġuniğunia. ¹⁰ Ma Sarah Abraham i riwei, “Taunola wavinena ma natuna ma viopuni! Ega ata goei da tauna am buderi ina vaia. Natu Isaac ainelana am buderi ina vaia.”

¹¹ Abraham wei riwana i nonori ma i vinuabola kaua aubaina tauna natuna Ishmael. ¹² Wate God Abraham i riwei i pa, “Ega natum ma alona ma vinuabolei. Am epaia Isaac wavam ina mairiei. Aiwai Sarah i ririwem ma kauai. ¹³ Wate am taunola wavinena natuna ana epaepaia ana vimağai ma ana dam ina rata aubaina tauna tam natum.” ¹⁴ Ubaubanai boiboği Abraham tamaina i vokaukauei ma waira i ġui ma Hagar i viavarai. Ma wavine natuna maiteni i paritawanei da i nelabalababa au mutulua.

22

BADA, Abraham ana tumağana i raudadani

‡ 19:23: Hebrewei wava Zoar anona Aburu. § 19:24: Salpa lamna ġaima logalogana. Maranaina e ararata, lamna i vibola kaua ma puğuna i apoapoei. * 21:4: Gen 17:12; Act 7:8

¹ Madeġa maġamaġa i kwa ma muriai God Abraham ana tumaġana i raudadani. God i riwa i pa, “Abraham!”

Abraham i paribelei i pa, “Tau weka!”

² Ma God i riwa i pa, “Natum tagotago Isaac nuanuam pouna, ma taravaini ma ona nae au dobu Moriah. Ma ola ana viatataem, kampa natum ma puloei aniamapu.”

³ Mara i tom ma ubaubanai boiboġi, Abraham i vomairi, ai i edari pulo apunana aubaina ma ana donki i vokaukauei. Ma ana taunola ruaġa ma natuna Isaac i taravaini ma anatapui i nae gabu God i ririweiana kampa. ⁴ Taui au pom tonuġa i babara ma Abraham i taepai ma gabu aueia i 'nanai. ⁵ Ana taunola i riwei i pa, “Weka ona mae. Donki ona paini. Tau natu maiteni ana nae nore ma God ana viborumei. Ma airuaġa ana nememei awarimi.”

⁶ Ma Abraham ai i tavana Isaac i viavarai. Tauna naipi ma ai mutuara i voai ma i negogona. ⁷ Taui i nenaie ma Isaac i riwa i pa, “Amau!”

Abraham i riwa, “Ee, ma babani natu!”

Isaac i riwa, “Ai ma ai mutuara awarita wate pulo aubaina sipu natuna mepa?”

⁸ Abraham i paribelei i pa, “Natu, God sipu ina vereta pulo aubaina.” Ma airuaġa i babara nae. ⁹ Maranai gabu God i ririweiana i ġeta, kampa aniamapu ġaimi i voai ma ai i vatari. Ma natuna Isaac urana ma aena i raġini ma aniamapu au tepana, ai i vatavataria kampa i vimataveni.

¹⁰ Abraham urana i viloloi da naipi i vaia da natuna ita viraġeni. ¹¹ Wate lamna maranaina BADA ana anela marei i riwa, “Abraham, Abraham!”

Abraham i paribelei, “Tau weka!”

¹² Ma BADA ana anela i riwa, “Eġa natum ma viraġeni! Eġa aiwai apoapoena awarina ma kauiei! Tam natum tagotago eġa uta nuanei ma marina a aramanei da tam anina God e vivivirei.” ¹³ Abraham i taepai ma sipu orotona i 'nanai, donana ai raġaraġai potopotona au orana i tapaiei. Ma i nae ma sipu i viraġeni ma sia taputapuna i apui ana pulo God awarina, natuna epaiana.

¹⁴ Ma lamna aubaina wei dobuna i ġorei, “BADA ina verena.” Lamna marana da marina rava e ririwa, “BADA ana au ola ina verena.”

¹⁵ Ma BADA ana anela marei Abraham i ġorei ¹⁶ “BADA i riwa, “Tam u voteleteleu ma natum tagotago eġa uta nuanei. Tau wavauiei a paripari-vainuaganim da ¹⁷ anina ana viaiainim ma am epaepaia ana vimaġai me ubona au mara ma bubu au gera. Taui ai ġavia ina vovaiubai ma ai melagaġi ina vaia. ¹⁸ *Ma am epaepaia wavaiei dam anatapui au dobu ana viaiaini. Tam u voteleteleu aubaina wei ana kauiei.” ¹⁹ Ma Abraham natuna maiteni i nae me ana taunola awari ma anatapui i nae me au Beersheba. Ma kampa i mae.

25

Esau ma Jacob i tupua

¹⁹ Wei lamna Abraham natuna Isaac ana virarautua. Isaac amana Abraham ²⁰ Isaac ana madeġa 40 ma Rebekah i ravaġi. Rebekah tauna Leban novuna aburuna; amai Bethuel. Taui mai Aram au Padan-Aram i mamae. ²¹ Rebekah aipoi ma Isaac i raupari BADA awarina da awana ita voagui. BADA ana pari i nonori ma Rebekah i duama. ²² Raġaraġa i vivitua au manawa aubaina Rebekah i nae ma BADA i vibaġai, “Aiwai aubaina wei e tuputupua awariu?” ²³ BADA i riwa i pa:

“Roarora ruaġa au manawam ina vidam ruaġa,
ma vinatuna da dam ruaġa ma taui ina viġavia vivira.
Tagogi ina virewapana telara
ma magurina aburuna awarina ina vitaunola.”

²⁴ Ana vinatuna ana mara i ġeta ma riwa kaua da raġaraġa nelarai i ġuni. ²⁵ Natuevou opina lebalebarina ma inina ororona ma lamna aubaina i viwavai Esau.^{*} ²⁶ Natuna ġelauna i tuputupua turana au ae karena i vojijina ma i opu ma i viwavai Jacob.[†] Isaac ana madeġa 60 ma awana raġaraġa i vinatunei.

Esau, natuevou ana buderi i verenei Jacob awarina

²⁷ Maranai raġaraġa i vilaraga, Esau tauna rava aroarona. Wate Jacob rava genugenu-anana ma au numa maemaena. ²⁸ Isaac ana ġoana ġaeġaena Esau, aubaina sia moduei i vunuvunui amna i ġoei. Wate Rebekah, Jacob i ġoana-kauiei.

* 22:18: Act 3:25 * 25:25: Mai Hebrew ai pona, inina ororona nonorana me Esau. † 25:26: Mai Hebrew ai pona, Jacob anona ae karena i vojijini. Wei lamna awanaina, anona lamna amkwalakwalana.

²⁹ Mara tagogi Jacob gwada i vivitavi ma Esau i aroaro da i nei ma inina i garigari ma am i 'raḡe-kaua. ³⁰ Ma Jacob i riwei i pa, "Tau am a iraḡe kaua. Nai gwada lebelebarina ma taraḡui da ana ani!" (Wenanare i riwa aubaina wava i verei Edom.[‡])

³¹ Ma Jacob i riwa i pa, "Tam natuevou, Mara muriai amata ana buderi voḡaeḡaena ma vaia. Marina ma riweu da am buderi tau ma vereu ma gwada ana verem."

³² Esau i riwa i pa, "Tau am a iraḡe kaua ma natuevou buderina amapo eḡa ina voaguii, anina ma vaia!"

³³ Ma Jacob i riwa i pa, "Marina ma parivai-nuaḡaniu da am buderi tau ma vereu." Ma Esau i parivainuaḡana da natuevou buderina Jacob ina verei.

³⁴ Ma Jacob gwada i taraḡui ma palawa da Esau i verei ma Esau i am ma i uma ma i vomairi da i nae. Wenanare i kauai lamna Esau ana buderi eḡa ita vinuabolei.

26

BADA i parivainuaḡana da Isaac ina viaiaini me Abraham

¹ Gomara ḡaeḡaena i nei au Canaan, me wariḡa Abraham ana au mara i tupua nanare. Ma Isaac ana dam maiteni i ḡaira au melagai ḡaeḡaena wavana Gerar, kampa mai Philistia ai gulau Abimelek i mae. ² Ma BADA Isaac awarina i eḡa ma i riwa i pa, "Eḡa ma ḡaira au Egypt, ma dobu ana riwem kampa ma mae. ³ *Weka ma mae-gubai, tam maiteni ana mae ma ana viaiainim. Wei dobuna anapuna tam ma am epaepaia ana veremi. Ma Abraham aiwai a parivainuaḡani ana kauai aubaimi. ⁴ Am epaepaia ana vimaḡai, ai maḡa me ubona au mara ma wei dobuna anapuna tau i ana verei. Am epaepaia awariei dam anapui au dobu ana viaiaini. ⁵ Abraham ponau i nonori ma au babani ma au viararamana ma au tarawatu i voteletei, lamna aubaina wei ana kauai am epaepaia aubai." ⁶ Anina ma Isaac au Gerar i mae.

28

Muriai Isaac i nae da au Beersheba i mae. Maranai tauna i magura kaua (ma matana i oaoa) natuna orotona keikeina Jacob, amana i morui tauna i viaiaini me tauna natuevou. Maranai tuana Esau wei i nonori, tauna amlona i ḡaiḡai kaua ma i ḡoei da Jacob ita viraḡeni.

Isaac, Jacob i paritawanei Laban awarina.

¹ Isaac Jacob i kwatuei, i viaiaini ma i riwei i pa, "Eḡa au Canaan awam ma vaia, ² wate ma vomairi ma ma nelaḡilaḡina au Padan-Aram, ḡoḡam Bethuel ana au dam ma kampa avum Leban natunatuna waivinei e mamae, kampa awam ma vaia. ³ Ma God VIVIRE-WAPANA KAUKAUANA am tavine ina viaiaini ma ina viuaim ma natunatum ina vimaḡai ma tam dam borui ḡaeḡaei ina viamanem. ⁴ *Ma tam am epaepaia maiteni ina viaiainim me Abraham i viaiaini nanare, da dobu marina e mamae-gubai, God Abraham i vereverei tam ma vibuderiei!"

Jacob ana rauboni au Bethel.

¹⁰ Jacob Beersheba i netawanei ma i nenae au Haran. ¹¹ Madēḡa i neulai ma gabu au tagogi,* i ḡeta ma i raurirai da i matave ma ḡaima tagogi i vaia ma i viuutaneai. ¹² Ma i rauboni da tete i 'nanai, karena au dobu ma damona au mara ma God ana anela i ḡeḡae ma i ḡaiḡaira. ¹³ *Ma BADA, au ririvana i maimairi ma i riwa i pa, "Tau BADA, Abraham ma Isaac ai God, dobu e matamatave lana tam ma am epaepaia ana veremi. ¹⁴ *Ma am dam ana vimaḡai da me doa pokaua ma ai parata ana viratai au lavaratei, rauanagei ma karuwabuei. Ma am epaepaia maiteni taumiei rava anapui au dobu ana viaiaini. ¹⁵ Ma notai da tau au ririvam a mamae ma ana painim am au vaḡai. Ma ana neiana-meleiaim wei au dobuna. Eḡa ana vooterem da aiwai a parivainuaḡanim ana kauai."

¹⁶ Jacob i matave vomairi ma i riwa i pa, "BADA anina weka e mamae ma tau eḡa ata aramanei!" ¹⁷ Jacob i rovo kaua ma i riwa i pa, "Wei dobuna i vinirovorovo ḡaḡa! Wei anina God ana numa, Mara ana metaeta."

¹⁸ Ubaubanai boibog[†] Jacob i vomairi ma ḡaima i viviuutaneia i vaia ma i vitura-mairini da ita vimataira. Ma Olive monamonana i buloi ḡaima au tepana da i vovivirei God aubaina. ¹⁹ Dobuna i ḡorei Bethel[†] (Melagaina au naona i ḡoreḡorei Luz).

‡ 25:30: Mai Hebrew au pona, Edom anona Lebelebarina. * 26:3: Gen 22:16-18 * 28:4: Gen 17:4-8 * 28:11: Gabu vivivireina. * 28:13: Gen 13:14-15 * 28:14: Gen 12:3; 22:18 † 28:19: Wavana Hebrewi anona God ana numa.

²⁰ Ma Jacob, BADA awarina i parivainuaḡana, “Mepa da tam au ririvau ma mae ma ma inana vaiteteu au vaḡai, lam ma gara ma vereu. ²¹ Ma lawalawaiu ana nememei amau awarina, lamna maranaina Tam tau au God. ²² Ma wei matairana a tereterei, weka ana viborumem, Ma aiwai u verevere ana gimai da ḡuta 10 ma ḡuta tagogi ana veremelem.”

35

BADA, Jacob i viaiaini

⁹ Jacob, Padan-Aramei* i nememei au Bethel. God i eḡa me Jacob awarina ma i viaiaini ¹⁰ ma i riwei i pa:

“Tam wavam Jacob,

wate marina eḡa ina ḡorei Jacob

ma wavam vouna Israel.†”

Ma i viwawai Israel

¹¹ *ma i pa:

“Tau God VIVIREWAPANA KAUKAUANA

Ma vinatuna guratana ma ma vimaḡaimi

Am epaepaia ina virava-ḡaeḡaei ma dam borui ḡaeḡaei awarime i ina tupua

ma gulagulai maḡamaḡau i viamanei.

¹² Dobu, Abraham ma Isaac a verei,

marina tam ana verem

ma am epaepaia

muriai wei dobuna ana verei.”

¹³ Ma God i babani vorovei ma i netawanei. ¹⁴ *God weka Jacob awarina i babani lamna matairana Jacob gana i vimairini. Ma au tepana *wine* i waḡi ana pulo‡ ma Olive monamonana i buloi.§ ¹⁵ Weka God Jacob awarina i babani ma lamna aubaina wei gabuna i ḡorei Bethel.*

Rachel ana iraḡe

¹⁶ Muriai Jacob ana dam maiteni Bethel i voterei ma i vaḡai, ma tau i uama i rata da au Ephrath ita ḡeta. Ma Rachel malana i vaia da ina vinatuna ma vinatuna i voiana-guratei ma ana iniviara i rata kaua. ¹⁷ Ma i voivoia ma iniviara i rata ma tauvipipiavo i riwa, “Eḡa ma rovo! Tevera orotona gelauna i tupua!” ¹⁸ Wate Rachel i'rairaḡe ma ana lavutu au damona ma tevera i viwawai “Ben-Oni.”† Wate amana i viwawai, “Benjamin.”‡ ¹⁹ Ma Rachel i 'raḡe ma eta e nena e au Ephrath (marina wavana Bethlehem) au ririvana i doboi. ²⁰ Ma Jacob gana i vimairini Rachel ana kokoaga au tepana da i vimataira. Matairana amadodo e mamae.

Isaac ana i 'raḡe

^{22b} Jacob natunatuna nelarai 12:

²³ Leah natunatuna:

Reuben; Jacob ana natuevou

Simeon, Levi, Judah, Isakar, ma Zebulun.

²⁴ Rachel natunatuna:

Joseph ma Benjamin.

²⁵ Bilhah - Rachel ana taunola wavine natunatuna:

Dan ma Naphtali.

²⁶ Zilpah - Leah ana taunola wavine natunatuna:

Gad ma Asher.

Wei lamna Jacob natunatuna anatapui au Padan-Aram i ḡuni.

* **35:9:** Padan-Aram Wei dobuna Aram au wapuna au Mesopotamia. Haran lamna melagai tagogi wei au dobuna.

† **35:10:** Jacob anona amkwalakwalana. Israel anona God maiteni i viḡaiḡaiawa. * **35:11:** Gen 17:4-8 * **35:14:**

Gen 28:18, 19 ‡ **35:14:** Wine i puloei pulo ḡelau maiteni. Jacob mataira i kau ei da tauna i verena-melei God awarina.

§ **35:14:** Jacob wei gabuna i vovivirei God viborumana aubaina. * **35:15:** Bethel anona God ana numa. † **35:18:**

Ben-Oni lamna anona au iniviara natuna. ‡ **35:18:** Benjamin lamna anona au oiena natuna. Lamna anona au ḡoana bo au tauagu ḡaeḡaena.

²⁷ ✧Ma Jacob i nememei amana Isaac awarina au Mamre au Kiriath-Arba; marina e ġoreġorei Hebron. Abraham ma Isaac wariaġa wei dobuna i mae-gubai. ²⁸ Isaac i mae da ana madeġa 180 ²⁹ ma i magura kaula, i lavutu tawanana ma iraqe ma amamana i votaġoi. Natunatuna Esau ma Jacob amai i doboi.

37

Joseph, tuatuna maiteni ai virarautua

¹ Jacob ana dam maiteni kampa i mae, wariaġa amana weka i mae, mai Canaan ai au dobu.

² Wei lamna Jacob natunatuna maiteni ai virarautua.

Joseph tauna laraga ana madeġa 17. Tauna tuatuna maiteni, amai awawana Bilhah ma Zilpah natunatui, amai ana sipu ma *gote* i paipaini. Wate Joseph tuatuna ai kaula apoapoe ġelau amai i vibenabenamei.

³ Jacob ana au magura Joseph i tupua ma lamna aubaina natuna nuanuana i vai-kauei, eġa me natunatuna ġelau nanare. Ma gara girugirumana, maiana ġaeġaena i kauei ma Joseph i verei. ⁴ Maranai tuatuna i 'nanai da amai Joseph i ġoana-guratei eġa me tau, ma ai ora-apoapoe ai tevera awarina i rata ma eġa ita bababani kaula awarina.

⁵ Waguvara tagogi Joseph i rauboni ma maranai tuatuna ana rauboni i riwei, tau ai ora-apoapoe i virata-guratei. ⁶ Joseph i riwa, "Ona rautaniġana ma au rauboni ana riwemi. ⁷ Anataputa au wapu *witi* ta bawabawai. Ma tau au bawa au pouna i mairi ma taumi ami bawa i kwaviviroi ma i rauduneeil!" ⁸ Ma tuatuna i riwa, "Tam u notai da ma vibada bo? Ma tam ma vibadelai bo?" Ma Joseph ana babani ma ana rauboni aubaina tau amloi i ġaiġai guratana.

Joseph i ġimarei

¹² Mara tagogi Joseph tuatuna amai ana sipu ma *gote* i taravaini ma i naiei au Shekem ma kampa i paini. ¹³ Ma Israel (wavana ġelauna Jacob) Joseph i riwei i pa, "Tuatuum au Shekem sipu ma *gote* e paipaini. A ġoem da ma nae tau awari."

Joseph i vianina ma i riwa, "Anina ana nae."

¹⁴ Amana i riwa i pa, "Ma nae tuatuum ma ġamoġamo ma i 'nanai, tau anina bo eġa, ma ma nememei da ma riweu." Ma Joseph i paritawanei. Hebron wapuna i netawanei ma i nae.

Maranai au Shekem i ġeta, ¹⁵ ma kampa au wapu i kwavikwaviviro ma oroto tagogi tauna i 'nanai ma i riwei, "Aiwai e baibaiei?"

¹⁶ Joseph i paribelei, "Tau tuatuu a baibaiei, tau ai sipu ma *gote* e paipaini. Uta riweu tau mepa?"

¹⁷ Tauna i paribelei i pa, "Tau i nae. A nonori i bababani i pa, "Tana nae au Dothan."

Anina ma Joseph tuatuna i votaġoi da au Dothan i nelaġai.

¹⁸ Maranai tuatuna matai i tawanei ma Joseph i 'nanai i nenei ma i aramanei da tauna. Muriai da ita ġetai tau ai oga i tarai da tauna ita viraqeni. ¹⁹ Tau i babani vivira i pa, "Tau-rauboni e nenei. ²⁰ Ana nei tana vunui ma waira dogona paipairana au orana tana tawana ġairei. Ma tana riwa da ġamoġamo moduei tauna i viraqeni. Ma tana inana ana rauboni mena ina ġoa."

²¹ Wate Reuben ai ogatara i nonori, ma i ġoei da ana tevera ita galaloei ma i riwa i pa, "Eġa ana lawana tana waitawanei." ²² "Eġa tana viraqeni. Tana tawana ġairei waira dogona paipairana au orana weka au mutulua ma eġa tupuana tana vodadani." Reuben wenanare i babani aubaina i ġoei da ana tevera ita naiana-melei amana awarina.

²³ Maranai Joseph i ġeta tuatuna awarii, tauna i vojġini ma ana gara girugirumana i ġiġi-tawanei. ²⁴ Ma i vaia ma i tawana ġairei waira dogona au orana.

²⁵ Ma tau i kiala da i amam ma i taepai da dam mai Ishmael i 'nanai au Gilead da i nenei au Egypt. Tau ai ġimara lam anitavidagjai ma bunama *mur** au kamel i vigerui.

²⁶ Judah varevareina i riwei i pa, "Aiwai aiaina tana vaia mepa da ata tevera tana viraqeni ma tana moru. ²⁷ Ona nei ma tana ġimarei dam mai Ishmael awarii ma eġa urataiei tarana ina toi, tauna ata tevera, tara tagogi." Ma varevareina i vianina. ²⁸ ✧Ma maranai taugimara

✧ 35:27: Gen 13:18

* 37:25: MurMyrrh. Wei dobuna ravai ai bunama ġabuabuna ma ana nola i maġa.

✧ 37:28:

mai Midian[†] i ġetai, Joseph tuatuna tauna dogoei i taina-epai ma i gimarei mai Ishmael awarii maiana silva 20 ana ruva nanare ma tau i naiei au Egypt.

²⁹ Muriai Reuben i nememei da au dogo i 'nana ġaira, ma Joseph kampa eġa ma i vinuabola kaula ma ana gara i sikai. ³⁰ Ma i nae me ana roaroa awari ma i riwa, "Ata tevera kampa eġa. Aiwai ana kauiei?"

³¹ Anina ma tau i gote i vunui ma au tarana ana gara i virai. ³² Ma ana gara i naiei amai awarina ma i riwei i pa, "Tauai wei garana a nelaġai. Ma inamai wei natum ġarinei bo eġa?"

³³ Amai gara i 'nanai ma i riwa, "Anina wei tau natu ana gara. Ġamoġamo ġaġaiawai natui i vunui. Oo natu! Ġamoġamo natu i uta-sikasikai."

³⁴ Ma Jacob i vinuabola kaula ma ana gara i sikai. Ma ġamoġamo opina i oteni ma natuna i moguei da nawaravi biaġa i kwa. ³⁵ Ana numa ravai i nae awarina da ita vinuabola. Wate tauna vinuabola i geduaiei ma i riwa i pa, "Ana tou ma natu ana moguei da au dogo ina tereġaireu ma ana nae mepa natu i nenelana." Ma natuna i touei.

39

Potiphar awana, Joseph i rauoġarei

¹ Dam mai Ishmael Joseph i ġairei au Egypt, ma Potiphar tauna i gimara i da ana taunola. Potiphar tauna Egyptei ma sorodia ai bada ġaġaena. ² *BADA Joseph i mae-ratui ma i voagui da anapuna aiaina i kaukauei ana bada aubaina. Tauna Potiphar ana au numa i mae. ³ Potiphar i 'nanai da BADA Joseph i mae-ratui ma i voagui da aiwai anapuna i kauana-kauiei, ⁴ ma wei Potiphar i vinuaiaiei ma Joseph i terei da tauna aubaina ina nola, ma ana taunola numa au orana, ma ana purapura anapuna ina vibadei. ⁵ Nai marana da i nenai, Joseph awarinei ma BADA Potiphar ana numa orana ravai ma ana purapura anapui au numa ma ana au wapu i viaiaini.

⁶ Anina ma Joseph vaivai i verei da Potiphar ana purapura anapui i paini, ma ana bada ana nola da am ava ina paipaini.

Joseph i tupua da karawata ma inananai aiaina. ⁷ Kampa eġa ita mae-pora ma ana bada awana Joseph i 'nana rauoġarei ma i riwei i pa, "Ma nei tana matave."

⁸ Wate Joseph i geduai ma wavine i riwei i pa, "Ma i 'nana, tau au bada weka i tereu da a vivipaipai ma lamna aubaina tauna eġa aiwai numa au orana ina vinuabolei. Tauna ana purapura anapuna au urau i terei. ⁹ Tau au rewapana wei au numana nanare tauna, ma eġa aiwai ita nuanei anina tam ainelam. Menanare da kaula apoapoenana ana kauiei da God au matana au goa ina apoapoe." ¹⁰ Wavine marana patapatui Joseph i raruuelari da maiteni ita matave, wate Joseph i gedugeduai ma i nene-tawanei.

¹¹ Mara tagoġi Joseph i nae au numa da ita nola, ma kampa eġa taunola ġelau. ¹² Ma Potiphar awana i nae ma Joseph ana au kareko i voa ma i riwa i pa, "Ma nei tana matave!" Wate Joseph i ruba-opu au doa ma kareko wavine au urana i voterei.

¹³ Wavine i 'nanai da Joseph i ruba-opu ma ana gara au urana i voterei, ¹⁴ ma wavine ana taunola i kwatuei da i nei ma i riwa i pa, "Weka ona inana! Wei Hebrewaina awau i neiai awarita, i vinameta. I nei awariu ma i ġoei da ita viawawaneu wate tau garara a vikarei. ¹⁵ Ma i nonori a garagarara ma i ruba-opu ma ana kareko i ruba-tawanei."

¹⁶ Ma wavine kareko i paini da awana i nememei au numa. ¹⁷ Ma wavine riwana tagogina awana i riwei i pa, "Wei Hebrewaina tam u neiai awarita, i vinameta. I nei ma i ġoei da ita viawawaneu. ¹⁸ Wate maranaina a garagarara, tauna i ruba-opu ma ana kareko au ririvau i voterei."

¹⁹ Potiphar awana ana babana i nonori ma amlona i ġaiġai kaula. ²⁰ Anina ma tauna Joseph i vaia ma panipani au numana i tawana-ruiei, mepa gulau ana panipani e mammae ma kampa i mae.

Maranai Joseph au panipani-numana ²¹ *BADA Joseph i mae-ratui ma i viaiaini, lamna aubaina da panipani taupainina Joseph i vinuaiaiei. ²² Ma tauna Joseph i terei da panipani ravai ita vibadei ma nola au urana i terei. ²³ Panipani taupainina ana nuabola eġa aiwai, aubaina Joseph aiwai anapuna i paipaini. Ma BADA tauna i mae-ratui ma i voagui da aiwai anapuna i kauana-kauiei.

[†] 37:28: Buka taugirumana dam wawai ruaga i terei, mai Ishmael ma Midian, wate mepa da tau i dam tagoġi. [☆] 39:2: Act 7:9 [☆] 39:21: Act 7:9

40

Joseph, tau i rauboni anoi i vieḡei.

¹ Ma mara tagogi Pharaoh * ana *wine* taupainina ma palawa tauapuina babadai, i kauana-boai Pharaoh awarina. ² Pharaoh amlona i ḡaiḡai babadai ruaḡai awari. ³ Ma i vaia ma panipani au numana i terei mepa Joseph i maeae lana, sorodia ai bada ana au numana. ⁴ Sorodia ai bada wei ruaḡai i naiei Joseph awarina ma tauna ravai i paini. Tau i mae-guratana au panipani numana.

⁵ Waguvara tagogi babadai ruaḡai panipani au numana i rauboni. Ma ai rauboni anoi taputapunei ava.

⁶ Ma ubaubanai maranai Joseph i nei awari ma i 'nanai da tau i eḡa ita vinuaiai. ⁷ Ma ruaḡai i paridadanei, "Aiwai aubaina naomi i pe?"

⁸ Tau i paribelei, "Tauai airuaḡa a rauboni ma eḡa ai ai da ai rauboni anona ita vieḡelai."

Joseph i riwa, "God ainelana rauboni e vieviegai. Ami rauboni ona riweu."

⁹ Anina ma *wine* taupainina ana rauboni Joseph i riwei, "Au rauboni au orana grape ḡoroḡorovana a inanai au naou. ¹⁰ Ma ḡoroḡorovana raḡaraḡana tonuḡa. Ma i raurugu ma i talai ma anona tapina i magura. ¹¹ Pharaoh ana aniuma kelakana a vovojijini ma grape a purai ma au kelaka a buloi da Pharaoh a verei."

¹² Ma Joseph tauna i riwei, "Am rauboni anona wei. Grape raḡaraḡana tonuḡa, anona lamna au pom tonuḡa. ¹³ Au pom tonuḡa au murina, Pharaoh ina tere-opunem ma am au nola ina tere-melem. Ma tam, Pharaoh ana aniuma kelakana au urana ina tere-melei, me au noana nanare. ¹⁴ Wate maranai wei gabuna u opu-tawanei ma aiwai anatapuna ina aime. Tau ma notaiu, am i viaiai ma kau ei da au nuabola Pharaoh ma pariverei da panipani-numanei ina tere-opuneu. ¹⁵ Pharaoh ma riwei aiwai awariu i tupua. Mai Hebrew ai au dobu i daneneu ma weka i nei ai, wate tau eḡa aiwai ata kauana-boai ma weka au dogo i tawaneu."

¹⁶ Ma palawa tauapuina i 'nanai da Joseph nuai ai riwana i vieḡai ma i riwa, "Tau nanare a rauboni. Palawa irigana tonuḡa au kolau a terei. ¹⁷ Iriga au tepana, lamna palawa apuapunana tapuna ma tapuna Pharaoh aubaina, wate kiu i nei ma au kolau, au iriga palawa i amam."

¹⁸ Joseph i paribelei i pa, "Am rauboni anona wei. Iriga tonuḡa lamna au pom tonuḡa.

¹⁹ Aupom au vitonuina, Pharaoh panipani-numanei ina tere-opunem da uam ina borituini ma tupuam ai au tepana ina vitakei ma kiu ina nei ma vioam ina ani."

²⁰ Ma au pom au vitonuina, lamna Pharaoh ana tupua marana ma torela ḡaeḡaena i kau ei, ana gabemani babadai aubaii. Ma ana *wine* taupainina ma palawa tauapuina panipani-numanei i tere-opunei ma i nei ai Pharaoh awarina, ana gabemani babadai au matai. ²¹ Ana *wine* taupainina, ana au nola i tere-melei me au naona nanare. Ma tauna, Pharaoh ana aniuma kelakana au urana i tere-melei. ²² Wate ana sorodia i egari da ana palawa tauapuina uana i borituini ma tupana ai au tepana i vitakei. Joseph menanare rauboni i vievieganei, nanare i tupua.

²³ Wate *wine* taupainina, Joseph nuanuana i vuru ma eḡa ita vinua-notenotei.

41

Pharaoh ana rauboni

¹ Ma madeḡa ruaḡa i kwa, ma Pharaoh i rauboni da tauna waira Nile au adana i maimairi. ² Ma bulumakau 7 aiiai ma dododoi wairei i ḡeta ma waira au adana gidagida i amam. ³ Ma bulumakau 7 apoapoei ma kirakiramai wairei i ḡetai da bulumakau aiiai au ririvai i raumairiei waira au adana. ⁴ Bulumakau 7 apoapoei ma kirakiramai i vomairi da bulumakau 7 aiiai ma dododoi i lawana-pai. Anina, ma Pharaoh matana i kala.

⁵ Ma i matave me ma mara viruaina i rauboni da *witi* aina tagogi ma rovei 7 aiiai ma dododoi i 'nanai. ⁶ Anina ma *witi* rovei 7 muriai i gogogo wate rauanaḡa i ravi da i jinajina. ⁷ Ma *witi* rovei jinajinai 7 i vomairi da *witi* rovei dododoi 7 i lawani. Anina ma Pharaoh matana i kala ma i aramanei da i rauboni.

⁸ Ubaubanai Pharaoh nuanuana i bolai ma riwa i paritawanei da rauboni tauvieḡai ma nuaulaulai anatapui au Egypt i nei. Ma ana rauboni i riwei ma eḡa ai ai ravana da ana rauboni anona ita vieḡei.

⁹ Ma *wine* taupainina Pharaoh i riwei, "Amadodo ana rupena da tau a kauana-boai. ¹⁰ Mara tagogi tam amlom i ḡaiḡai palawa tauapuina ma tau awariu, da u paniai ma sorodia ai bada

* 40:1: Mai Egypt ai wavalatona i ḡorei Pharaoh. Wei lamna ana vaivai ma eḡa wavana.

ana au numa a mae. ¹¹ Ma waguvara tagogi tauai tagotagogi ava a rauboni ma ai rauboni anoi taputapunei ava. ¹² Laraga Heburei kampa tauai maiteni, tauna sorodia ai bada ana taunola. Ai rauboni a riwei ma tauna ai rauboni anona i vieḡelai ¹³ Ma tauna aiwai i ririweia nanarena i tupua. Tau u tere-meleu au au nola ma palawa tauapuina u viragēni.”

¹⁴ Ma Pharaoh, Joseph ana riwa i paritawanei ma panipani-numanei lagilagina i neiai. Joseph i viamḡari ma ana gara aiaina i oteni. Ma i naiei Pharaoh awarina.

¹⁵ Ma Pharaoh Joseph i riwei, “Waguvarai a rauboni ma eḡa aiwai au rauboni anona ita vieḡeu. Wate rava i riwa da maranai tam rauboni e nononori, lamna anona e vivieḡai.”

¹⁶ Joseph i paribelana, “Tau eḡa tagotagoga, wate God am rauboni anona ina verem da oram ina viubai.”

²⁵ Joseph i paribelei, i pa, “Oo bada, rauboni ruaḡai anoi tagogina. God aburuna ava da aiwai ina kauai lamna gulau i viatataiei. ²⁶ Bulumakau dododoi 7, ma *witi* rovei aiwai 7, lamna maura madeḡana 7. ²⁷ Bulumakau kirakiramai 7 muriai i nei, ma *witi* rovei jinajinai 7, lamna anona amapo madeḡana 7 au orana gomara.

²⁸ —Aiwai a ririweia, nanare ina tupua. God i viatataiem da aiwai ina kauai. ²⁹ Madeḡa 7 au orana, lamna maura ḡaeḡaena Egypt au anatapuna. ³⁰ Wate au murina, gomara ḡaeḡaena ina mae da madeḡa 7 da Egypt ana maura marana rava nuauwai ina vuru ma gomara rava ina vipupui. ³¹ Gomara ina rata kaua da maura marana nuauata ina vuru. ³² God i vianina da wei ina tupua ma eḡa barana ina uama, lamna aubaina rauboni ruaḡa i verei.

³³ —Au bada, tam, oroto nuaulaulana ma notanotana uta vinei da Egypt ita vibadei. ³⁴ Wei uta kauai, babada uta terei Egypt au anatapuna da tuaruta au marana ḡuta vi-five-na ita vaia madeḡa 7 maura au marana. ³⁵ Ma rewapana ma verei da au maura, tau lam ina tami da au anara ina vidamni ma ina paini. ³⁶ Wei lamii ina tereriei rava aubai maranai madeḡa 7 gomara au Egypt ina nei. Ma wei taunei, mai Egypt eḡa am ina irage.”

³⁷ Anina, ma Pharaoh ana gabemani maiteni oga-tarana i vianinei. ³⁸ Ma i riwei i pa, “Mepa rava ḡelauna tana nelaḡai me Joseph ma God Aruana tauna au orana e mamae?”

³⁹ Anina ma Pharaoh, Joseph i riwei, “God wei anatapuna i viatataiem, eḡa aiwai ḡelauna nuaulaulana ma notanota kauana me tam. ⁴⁰ *Tam ana terem da au dobu ma vibadei ma au rava anatapui am riwa ina voteletelei. Tau Pharaoh, ma am rewapana tau ainelau au rewapana eḡa ina ḡetawanei.”

⁴¹ Ma Pharaoh i riwa, “Marina tau a vinem da Egypt anatapuna ma vibadei.” ⁴² Ma Pharaoh au urana ana vigulau *ringna* i votawanei ma Joseph au urana i terei,* ma gara maiana ḡaeḡaena i vioteni ma sein goldei au uana i tere-taḡonei.

⁴⁵ Ma Pharaoh Joseph wava Zaphenath-Paneah,† i verei ma mai On ai pirisi Potiphera ‡ natuna guguinina Asenath, Joseph i verei da awana. Anina ma Joseph, dobu Egypt i vibadei.

⁴⁶ Joseph ana madeḡa 30 ma wei vibadana i vaia. Ma Joseph, Pharaoh i netawanei ma Egypt i naeni ma i tivirevirei. ⁴⁷ Maura ḡaeḡaena i nelaḡai madeḡa 7 au orana. ⁴⁸ Joseph ai maura ḡelai i tami maura madeḡana 7 au orana au Egypt, ma au melagai nununai i tere-kauai ma i paini. Melagai anatapui ai lam au anara i terei. ⁴⁹ Joseph lam i vidamni da olana i mairi me bubu au gera ma iavana i kauana-avei aubaina lam i rata dewadewa.

⁵³ Ma maura madeḡana 7 au Egypt au damona i ḡeta. ⁵⁴ *Ma gomara madeḡana 7 i raukarei, me Joseph i ririweia nanare. Gomara dobu au anatapuna, wate Egypt au anatapuna lam i mamae. ⁵⁵ Maranai mai Egypt raumolaḡau i vikarei, tau Pharaoh i vibaḡai lam aubaina. Ma tau i riwei da ita nae Joseph awarina ma tauna aiwai i ririweia ita kauai.

⁵⁶⁻⁵⁷ Maranai gomara Egypt anatapuna i vaia, Joseph anara i votawatawanei ma lam mai Egypt awari i gimarei. Anina ma gomara i rata kaua dobu au anatapuna da rava anatapui i nei Joseph awarina au Egypt lam gimarana aubaina.

☆ **41:40:** Act 7:10 * **41:42:** Mataira da Joseph, Pharaoh ana rewapanei ma ana riwei i nolnola. † **41:45:** Safenat-panea Egypt ai ponei anona God i bababani ma i lawana. ‡ **41:45:** On Wei lamna dobu wavana, ma wavana ḡelauna lamna Heliopolis. Wei au dobu rava, madeḡa i raudunelei. ☆ **41:54:** Act 7:11

42

Jacob, natunatuna i paritawanei au Egypt

¹ Ma au Canaan Jacob i nonori da au Egypt lam ma natunatuna nelarai i riwei, “Aiwaina da o mamae labalababa?” ² *Anina ona rautaniġana! A nonori da lam au Egypt. Ona ġaira kampa ma aubaita lam ona gimarai da tana lawana ma eġa tana iraġe.”

³ Anina ma Joseph varevareina ten i ġaira au Egypt da lam ita gimarai. ⁴ Wate Jacob eġa Joseph ana tevera oiena Benjamin ita paritawanei aubaina i rovo mepa da aiwai apoapoena awarina ita tupua. ⁵ Taui rava ġelau maiteni i nae au Egypt da lam ita gimarai aubaina gomara ġaeġaena dobu Canaan maiteni i vaia.

⁶ Joseph i vibada ġaeġaena au Egypt ma tauna lam i gimagimarei dobu anatapui ravai awari. Varevareina i ġetai ma Joseph au naona i mae-ġaira au doa ma i raudune. ⁷ Joseph taui i 'nanai ma maratagogi i aramanei da taui aiavoi ma i kauana-melei da apamina taui eġa ita aramanei. Ma riwa bagibaginei i vitara-virevirei, “Taumi meiei o nei?”

Taui i paribelei, “Tauai Canaan a nei da lam ata gimarai.”

⁸ Joseph tuatuaana i 'nanai da i aramanei, wate taui ai tevera i vinua-nainei. ⁹ *Ma ana rauboni wariaġana i notai ma i riwei, “Taumi i paritawanemi da ai dobu ana ġokokokara ota inana bo.”

¹⁰ Taui i paribelei, “Oo bada eġa! Tauai am laralaraga a nei da lam ana gimarai.”

²¹ Ma taui i babani vivira, “Nai maranaina ata tevera ana ora-viarana agu i toutouei awarita ma, eġa tata rau-nu'apoapoelei. Tauta ata wavu lamna kovoġana marina ta vaivaia.”

²² *Reuben i paribelei, “Nai maranaina a riwemi, ‘Eġa ata tevera ona vodadani!’ Wate taumi eġa ota rautaniġaneu. Marina ata tevera tarana kovoġana ta vaivaia.” ²³ Joseph Egypt ponanei i bababani ma rava ġelauna taui ai ponei i paripari-verei. Wate taui eġa ita aramanei da Joseph ai babani i nononori.

45

Joseph i vieġana-melei

⁴ Joseph varevareina i riwei, “Ona nei au ġereġereu.” Ma taui i nei au ġereġereu. Ma i babani, i pa, “Tau ami tevera Joseph, mai Egypt awari o gimareu. ⁵ Wate eġa orami ina bolai, ma eġa ami rava maiteni tau o gimareu aubaina ona viamparipari. Wate God au naona i paritawaneu da rava ata vilawani. ⁶ Wei gomarana dobu e viviapoapoeni marina madeġa ruaġa i kwa. Wate madeġa five ġelauna e mamae da eġa tana ipi bo tana tuaruta. ⁷ God i aipari-tawaneu da taumi ma ami dam ravai maiteni ata vilawanimi, ma ami dam avena ita pupu. ⁸ Ma eġa taumi weka ota paritawaneu wate God, ma tauna i tereu da Pharaoh ana taunola ai bada ġaeġaena ma ana numa ma aiwai anatapuna au Egypt a vivibadei. ⁹ *Marina laġilaġina ona nae me amau awarina ma ona riwei, ‘Natum Joseph wenanare i riwa, God i tereu da Egypt anatapuna a vivibadei, ma tam laġilaġina ma ġairai awariu. ¹⁰ Tam au ġeġereu ma mae au Goshen; ma nanare natunatum ma ġoġoġam ma am ġamoġamo ma aiwai anatapuna ġarime. ¹¹ Gomara madeġana five amapo e mamae, aubaina tau lam ana verem. Mepa da wei eġa ana kaeui tam ma am dam ma am laraga ma am ġamoġamo anatapui ina vinuapoapoe ma ina raumolaġau.”

²⁵ Anina ma Joseph tuatuaana Egypt i opu-tawanei ma i nae me amai Jacob awarina au Canaan. ²⁶ Ma taui Jacob i riwei, “Natum Joseph lawalawaina e mamae, ma tauna marina Egypt e vivibadei.” Jacob i vinuanaina ma nai babani eġa ita vitumaġanei.

²⁷ Wate taui aiwai anatapuna Joseph i ririweia amai i pariverei. Ma Joseph ana anigeru i paritawanei da Jacob ita vigerui da ita naiei au Egypt. Maranai wei i 'nanai, Jacob ana nota i nememe. ²⁸ I pa, “Tau marina a aramanei da natu lawalawaina e mamae, ma ana nae da ana inana ma muriai da ana iraġe.”

46

Jacob, natunatuna ma ġoġoġana maiteni i nae au Egypt.

¹ Anina ma Jacob ġarinei anapapuna maiteni i nae au Egypt. Ma au Beersheba i ġeta, ma kampa pulo i apui amana Isaac ana God awarina. ² Ma waguvarai God raubonie i awarina i babani i pa, “Jacob! Jacob!”

Ma tauna i paribei, “Tau weka.”

³ God i riwa, “Tau God, amam ana God. Egypt ġairana eġa ma rovoei, aubaina tau am epaepaia ai dam boruna ana vimaġai kampa. ⁴ Tau maiteni tana nae au Egypt ma am epaepaia ana neiana-meleiai wei au dobuna. Joseph amapo au ririvam, maranai ma iraġe.”

⁵ Jacob, Beersheba i voterei, ma natunatuna nelarai amai i vojijini, ma anapapui awawai ma natunatui maiteni, au anivigeru Pharaoh i paripari-tawaneiana i geru. ⁶⁻⁷ *Ai ġamoġamo ma ġariei anapapuna au Canaan i vaivainia i naiei au Egypt. Anina ma Jacob, natunatuna nelarai ma waivinei ma ġoġoġai ma ana numa ravai anapapui i nae au Egypt.

²⁸ Jacob Judah i aiparitawane i au Egypt da Joseph ita riwei da au Goshen ita nebelei. Maranai i ġeta. ²⁹ Joseph ana chariot i gerui ma i nae au Goshen. Maranai amana i nebelei, i taragwabai ma i tou guratana. ³⁰ Jacob Joseph i riwei, “Naom a inanai ma a aramane i da tam lawalawaim, marina ana nuaubau ana iraġe.”

48

Jacob, Ephraim ma Manasseh i viaiaini

¹ Wei kauai au murina, rava Joseph i riwei, “Amam i doria.” Anina ma natunatuna Manasseh ma Ephraim i taravaini ma i nae amana da ita inanai.

² Rava tagoġi Jacob i riwei, “Natum Joseph i ġetai da ina inanim.” Jacob doridoriani ma i voguratei da i vomairi ma ana animatave au tepanai i kiala.

³ *Anina ma Jacob natuna Joseph i riwei, “GOD VIVIREWAPANA KAUKAUANA awariu i eġa au Luz (Bethel) au Canaan ma i viaiainiu. ⁴ Ma i riweu, ‘Natunatum ana vimaġai ma am epaepaia ai dam ana viratai; wei dobuna am epaepaia ana verei da ina viġariana-nonoei.’

⁵ —Ma lamna aubaina goġoġau ruoġa Manasseh ma Ephraim au Egypt tuputupuai muriai da a nei; lamna tau ana vaia da natunatu me natunatu Reuben ma Simeon. ⁶ Roaroa muriai e tuputupua lamna tam ġarime; ma ai buderi Ephraim ma Manasseh awarie i ina vaia.”

¹³ Anina ma Joseph natunatuna ruoġa i neiai Jacob awarina, Ephraim amana au oiena lamna Jacob au kelakelauna ma Manasseh amana au kelakelauna lamna Jacob au oiena

¹⁴ Wate Jacob uraoiena i tere-taġone i ma Ephraim au kolana i terei avena da tauna umau, ma ura-kelakelauna i tere-taġone i da Manasseh au kolana i terei avena da tauna natuevou.*

¹⁵ Anina ma Joseph[†] i viaiaini i pa,

“God. Tam Amau Isaac ma ġoġau Abraham ai God,

God taupainiu au lawana au anapapuna,

¹⁶ Ma am anela taugaloewi au anapapuna wei roaroai ma viaiaini!

Ma wavau ma amamau wavai awarii ina mae-nonoa

ma a raruapari da ai dam ma viratai au dobu.”

¹⁷ Wate maranai Joseph i ‘nanai da amana aiwai i kaukaue i ma tauna eġa ita vinuiai; ma amana urana Ephraim au kolana ita vaitawane i ma Manasseh au kolana ita terei. ¹⁸ Joseph amana i riwei, “Amau eġa nanare. Wei tauna natuevou uraoiem au kolana ma terei!”

¹⁹ Wate Amana i riwa, “Natu! Tau a aramane aiwai i kaukaue. Manasseh maiteni ana dam ina rata kaua. Wate ana tevera wavana ina rata ma ana dam ina rata dewadewa eġa me tuana.” ²⁰ Anina ma Jacob roaroa nai marana i viaiaini i pa,

“Mai Israel wavam ina latoni maranai e viviaiaina, tau i riwa,

‘Tauai a raruapari da God ina viaiainim me Ephraim ma Manasseh i viaiaini nanare.”

Wenanare lamna Ephraim wavana i ailatoni ma muriai Manasseh wavana.

* **46:6-7:** Act 7:15 * **48:3:** Gen 28:13-14 * **48:14:** Tau i nota da au oiena kialana lamna kaua bo nota ġaegæana ma eġa me au kelakelauna kialana nanare. Lamna aubaina Jacob nimana au oiena tevera au kolana i tereterei tauna amapo viaiaina ġaegæana ina vaia eġa me ġelauna nanare. Lamna aubaina Joseph i baiei maranai Jacob nimana au oiena tevera umauna au kolana i terei. † **48:15:** Maranai Jacob goġoġana i viaiaini, tauna Joseph i viaiaini.

²¹ Ma Israel, Joseph i riwei, “Tau aburuna ava da ana iraḡe. Wate God awarim ina mae da ina naiana-melem au Canaan, amamam ai au dobu.”

49

Jacob, Judah i viaitani

⁸ “Judah, varevareim ina voepaepaim,

ma amam natunatuna ina raudunelem
aubaina tam am ḡavia au uai ma voa ma ma vovaiubai.

⁹ Judah natu, tam me lion natuna,

ana sia i am vorovei da i amruruna ma e matamatave,
eḡa ai ai ana matave ina viapoapoeni!

¹⁰ Gulau ana jḡona Judah ina vojijini

ma ana epaepaia ina vibada nonoa,
anina da jḡona taniwagana ina nei
maranaina dobu anatapai ravai tauna ina raudunelei ma ina viborumei!”

³³ *Ma Jacob natunatuna awarii i babani vorovei, ma tauna ana au animatave i rauvirai ma i raḡe.

50

Joseph, tuatuaana i vinuubai

¹⁵ Ma maranai Jacob i raḡe, Joseph tuatuaana i rovo ma i riwa, “Mepa da Joseph am-lona ina ḡaiḡai ma ina raubiwa, kaua apoapoena awarina ta kauai aubaina.” ¹⁶ Ma lamna aubaina riwa i paritawanei Joseph awarina i pa, “Amata maeninai ma wenanare i riwelai i pa, ¹⁷ Joseph wenanare ona riwei, “Tuatuam kaua apoapoe kaukauana awarim i kauai. Wate a ḡoei da ai kaua apoapoe ma nota-tawanei.” “Tauai amam ana God a vovoepaepai, ma a vivibaḡa-guratem da ai ḡo’apoapoe ma nota-tawanei.” Maranai Joseph wei riwana i nonori tauna orana i viara kaua ma i tou.

¹⁸ Anina ma tuatuaana i nei ma au naona i mae-peu ma i riwa, “Ma inanaia i tauai am taunola a nei.”

¹⁹ Wate Joseph tau i wenanare i riwei, “Tau eḡa ona rovoeu, tau eḡa God da ana kovogimi. ²⁰ Wariaḡa o ḡoei da ota viapoapoeniu wate God i virai da aiaina i kauai da rava maḡamaḡau i ina vilawani ma eḡa ina pupu. ²¹ Anina, eḡa ona rovo! Tau ana painimi, natunatumi maiteni.” Ma nanare i babani da orai i rauai.

Exodus Oputawanana

Jacob dam gaegeaena i vitupui au Egypt

¹ Jacob natunatuna ana awawai ma natunatui anapui maiteni i gaira au Egypt. Tauu wawai wenanare: ² Reuben, Simeon, Levi, Judah; ³ Isakar, Zebulun ma Benjamin; ⁴ Dan, Naphtali, Gad ma Asher. ⁵ Jacob natunatuna ma gogogana nelarai, anapui ai maga 70 i gaira, Joseph au Egypt maemaena maiteni i 'avi.

⁶ Muriai Joseph ma varevareina ma nai kimtana i 'rage-pai, ⁷ *Wate ai epaepaia - mai Israel, i vinatuna guratana da dam gaegeaena i vitupui ma Egypt anapuna i vioai.

Pharaoh mai Israel i rau-iviapoapelei

⁸ *Madega magamagau i murina Pharaoh vouna i vibada au Egypt, ma Joseph ma aiwai i kauai ega ita aramanei. ⁹ Pharaoh ana rava i riwei, "Ona inana, mai Israel i maga guratana ma i viwapana kaua ega me tauta. ¹⁰ *Tauta tana viogatara da menanare tana kauanei da ai vinatuna ega ina rata guratana. Ma mepa da wei ega tana kauai ma maranai gavia ina nei, ma tauu gavia maiteni ina vitagoei da ina vigavieta, ma ina opu-tawaneta."

¹¹ Ma nola babadai i terei da mai Israel nolei i vunuvunui. Wei babadai mai Israel i egari da taon gaegeai ruaga i voai wawai Pithom ma Rameses, ma kampa Pharaoh ana lam ma purapura gelau i vidamni. ¹² Mai Egypt amapo da tauu i rau-iviapoapelei, wate mai Israel amapo da i vivinatuna ma ai dam i rarata au Egypt. Ma lamna aubaina mai Egypt mai Israel i roveoi. ¹³⁻¹⁴ Ma tauu mai Israel i egari da nola vivitaina i kaukauei ma i vinuapoape. Ma brik i kaukauei ma doa i gwadai da brik anipasina, ma wapu nolai maiteni i kaukauei. Mai Egypt nolei mai Israel i vunuvunui ma ega ita rau-nuapoapelei.

²² *Pharaoh ana rava i riwei, "Maranai wavine Hebrowei tevera orotona i guni, teverana au waira Nile ona tawanei. Wate maranai tevera wavinena i tupua, ona voterei da ina mae."

2

Moses i tupua

¹ Maranai wei kauai i tuputupua, oroto tagogi Levi ana damei ma wavine ana damei i ravagi, ² *wavine i raumanawa ma natuna orotona i guni. Ma wavine i 'nanai da natuna inanana aiaina i tupua, ma natuna i tere-govaigi da nawaravi tonuga i kwa. ³ Wate ega tagotagogina da ita teregovaiga-nonoiei ma iriga waira modunei* voavoana i vaia ma koltei gavogavo i pasi-tomeni da waira ega ina rui. Ma tevera au iriga i poai ma waira modui au orai i terei au waira Nile. ⁴ Tevera tuana wavinena aueia i mae ma ana tevera i vinenegeanei da ita inana awarina aiwai ita tupua.

⁵ Ma Pharaoh natuna gugunina i gairai da ita toa. Ma ana taunola waivinei waira au adana i bababara-nae. Pharaoh natuna iriga i 'nanai modu au orana ma ana taunola i paritawanei da irigana ita nei. ⁶ Maranai Pharaoh natuna iriga i votawanei ma tevera i toutou i 'nanai, nuanuana i bolai ma i riwa, "Wei mai Hebrew natui."

⁷ Tevera tuana wavinena i nae ma Pharaoh natuna i vibaigi, "Anina bo ega da ana nae ma tataoavo Hebrowei ana baiei da tevera ina viguui ma ina gamoi?"

⁸ Wavine i vianina ma i riwa, "Anina, ma nae!" Ma tevera i nae ma alo oina i taravainiai. ⁹ Ma Pharaoh natuna wavinena i riwei, "Wei teverana ma viguui aubaiu ma ana vimaiei." Ma wavine teverana i naiei ana au numa ma i gamoi. ¹⁰ *Ma tevera i eda ma i naiei Pharaoh natuna awarina ma tauna i vaini da natuna. Ma Pharaoh natuna i riwa, "Au waira a sinaepai." Lamna aubaina ana viwawai Moses.†

Moses ana rovona Egypt i ruba-tawanei.

¹¹ *Maranai Moses i vilaraga, ma i nae da ana rava oina ita raugenari, ma i 'nanai menanare mai Egypt ana rava i egari da i nolanola ma i rau-iviapoapelei, ma i 'nanai Egyptei Hebrewei i vunuvunui. ¹² Moses i 'nana viravira ma ega ai ai ita inana, anina ma Egyptei i virageni ma au bubu i doboi. ¹³ Ma marana i tom Moses i naeme, da ana rava ruaga

* 1:7: Act 7:17 * 1:8: Act 7:18 * 1:10: Act 7:19 * 1:22: Act 7:19 * 2:2: Act 7:20 * 2:3: Papyrus
* 2:10: Act 7:21 † 2:10: Moses Au Hebrew ponana ana nonora me sinaepai. * 2:11: Act 7:23-28

i viġaiġaiawa i 'nanai ma ġaiawa tauvikareina i riwei, "Aiwai aubaina turam Hebriewe e raviravi?"

¹⁴ Ma orotona i riwa, "Aiai i terem da ma vibadelai bo ma raueratalai? Tam ma viraġeniu me Egyptei u viraġeni nanare bo?" Kampa Moses i rovo ma i riwa, "Rava boiboġi i aramane i tau aiwai a kauē." ¹⁵ *Pharaoh wei riwana i nonori ma i ġoei da menanare Moses ina viraġenane i, wate Moses Egypt i ruba-tawane i ma i nae au Midian ma waira dogona au adana i kiala.

3

Moses kampa mai Midian ai pirisi pulo tauapuna maiteni i mae, ma natuna Zippora i ravaġi.

God Moses awarina i babani

¹ Moses poi ana Jethro ana sipu ma gote i ġamoġamo i -Jethro lamna mai Midian ai pirisi pulo tauapuna. Mara tagoġi Moses ġamoġamo i naiei au mutulua au ġia dewadewana ma au Sinai i ġeta, God ana au ola. ² *Kampa BADA ana anela Moses awarina i eġa, inanana me ai menamenana, ai rugurugui au orana da i ġeġeae. Moses ai i lebalebara i 'nanai wate aina ruguruguna maiteni eġa ita ararai. ³ Moses i vinua-notanota, "Wei lamna aiwai? Aiwai aubaina ai e lebalebara wate ai eġa ita ararai? Ana nae au ġereġerena ma ana tuvirevirei."

⁴ Maranai BADA i 'nanai da Moses i nenei au ġereġere da ita tuvirevirei, God ai menamenana au orana Moses i ġorei, "Moses! Moses!"

Ma i paribelei, "Ee, Tau weka."

⁵ BADA i riwa, "Eġa ma neguratanai. Wei gabuna au tepana e maimairi lamna doa vivivireina, lamna aubaina am ae uma ma votawane i. ⁶ Tau amamam Abraham ma Isaac ma Jacob ai God." Maranai Moses wei babanina i nonori i rovo kava ma naona i tere-govaġi da avena God naona ita inana i.

⁷ Anina ma BADA i riwa, "A inana i menanare mai Egypt natunatu e rarau-iviapoopolei. Ma ai tou agu aubaina i ġetai awariu da vibadabada i awarii ata vaitawane i. Menanare e vinua-apoapoei a aramane i. ⁸ Lamna aubaina a ġairai da natunatu Egypt awari ana vaitawane i ma ana opunei da dobu wapuna ġaeġaena ma doana maumaurana ina maeni. Kampa marina mai Canaan, mai Hitti, mai Amori, mai Perisi, mai Hivi ma mai Jebus e mamae. ⁹ Ai tou a nonori. A inana i menanare mai Egypt tui e rarau-iviapoopolei. ¹⁰ Tau a paripari-tawanem, marina ma nae vibadabadana Pharaoh awarina da mai Israel au Egypt ma taravaina-opunei."

¹¹ Wate Moses i riwa, "Tau ai ai da ata nae Pharaoh awarina ma mai Israel ata taravaina-opunei?"

¹² Ma God i paribelei, "Tau tam maiteni ana mae. Maranai ravai Egyptei ma taravaina-opunei. Taumi wei au olana ona rauduneleu. Lamna ina vimataira da Tau a pari-tawanem."

¹³ Wate Moses i riwa, "Maranai ana nae au rava awarii ma ana riwei, 'Amamata ai God i paritawane i awarimi.' Ma tui ina paridadaneu, 'Tauna wavana ai ai?' Ma aiwai ana riwei?"

¹⁴ God Moses i riwei, "TAU MAEMAE-NONOAU.* Wei mai Israel ma riwei, Tauna wavana, TAU MAEMAE NONOAU. i paritawane i awarimi. ¹⁵ Mai Israel ma riwei, 'TAU BADA, amamami ai God, Abraham, Isaac ma Jacob ai God, tauna i paritawane i awarimi.'

—Wei Tau wavau Maemae-Nonoana, kimta anatapu i wenanare wavau ina ġorei."

Wei au murina Moses i naeme poi ana ana au dobu, ma i nae au Egypt. Ma kava anatapu i tuputupua tuana Aaron ma Israel babada i riwei. Ma Moses ma Aaron i nae Pharaoh awarina ma i riwei, "BADA i paritawane i awarim da ata riwem da natunatuna mai Israel ma vianine i da ina opu au mutulua da pulo ina opu tauna awarina."

Egypt gulauna i riwa, "Tau eġa ana vianine i da nanare ina kauē. Tui eġa aiwai ġelauna ina kauē ma ina nola."

Ma God kava maġamaġauna aniba ma vi'nirovorovi i kaukave i mai Egypt awarii, wate Egypt ai gulau amapo da i viviva. Waira i vitara wate amapo da Egypt ai gulau kolana i vobagibagi. Mai Egypt ai ġamoġamo i vi'raiaġelana ma mai Egypt tupuai paramaitua i oai, Wate amapo da mai Egypt ai gulau eġa mai Israel ita voterei da ita nae.

* 2:15: Act 7:29 * 3:2: Act 7:30-34 * 3:14: Pona Hebriewe, *Tau maemae-nonoau* nonorana me *Yahweh*. Vipanipani au Babilon i kwa ma mai Jew i nememei au murina, tui i vitumaġana da wava *Yahweh* lamna vivivireina ma eġa ai ai ina latoni. Aubaina da ai au buka giruma ġaeġaei wei wavana i girumi da eġa melani ina latoni ma *Adonai* (bada) i latolaton i epaiana. Ma riwa BADA muomuone i girumi lamna God wavana.

11

Moses, natuevou au Egypt ai iraġe i vinolenolei

¹ Ma BADA Moses i riwei, “Anivinuabola tagogi ava ana neiai Pharaoh ma Egypt awarii. Ma au murina tauna ina voteremi da ona nae ma lamna maranaina ina viaġaġana-opunemi. ² Ma nae ma mai Israel ma riwei, ‘Anatapumi ona nae ma mae-turami Egypte ona vibaġai da ai via goldei ma silvei ina veremi.’ ³ BADA i kauei da mai Egypt mai Israel i vivirei. Pharaoh ana gabemani babadai ma rava anatapui au Egypt Moses i vivirana-kauei.

⁴ Ma Moses i nae ma Pharaoh i riwei, “BADA e ririwa, ‘Nubautuva nanare tau Egypt anatapuna ana babarani. ⁵ Natuevou nelarai au Egypt anatapui ina iraġe, Pharaoh natuevouna orotona, amana ana epaepaia, awarina ina vikarei, ma ina ġaira da taunola awarina ina ġeta, waivinewiti taugudaina natunatui maiteni. Ġamoġamo natuevou anatapui ina iraġe. ⁶ Ma dobu Egypt au anatapuna tou ġaeġaena ina ġae, rorova eġa nanare ma eġa melanai nanare ina tupua me.’ ⁷ Wate eġa aiwai apoapoena mai Israel awari ina tupua, eġa auou tagogi, rava tagogi, bo ġamoġamo ina gwauei. Ma kampa ona aramanei da TAU BADA, mai Israel ma mai Egypt awariei a vivilamonei. ⁸ Am gabemani babadai anatapui ina ġairai awariu ma au naou ina mae-ġaira ma ina raudune ma ina riwa, ‘Laġilaġina ma ruba-nae am rava tauvotaġotaġoim anatapui maiteni.’ Lamna au murina tau ana nae.” Moses meji orana i oai ma Pharaoh i netawanei.

⁹ BADA Moses i riwei, “Pharaoh tam eġa ina rautaniġanem. Wenanare ina tupua da tau kaua babai ana kauei au Egypt.” ¹⁰ Moses ma Aaron kaua ġaeġaei ma babai i kauei Pharaoh au matana wate BADA Pharaoh orana i vibadoi da mai Israel eġa ita paritawanei.

12

Raġona karena

¹ BADA, wenanare i babani Moses ma Aaron awarii au Egypt, ² * “Marina da e nenai wei nawaravina lamna nawaravi tagogi ma weka ona vikarei da ami madeġa ona iavi. ³ Ona vinolanola mai Israel anatapui awarii, ‘Au pom ^v*i*—10⁻ na wei au nawaravina oroto tagotagogi ava sipu ġaubona bo *gote* ġaubona ina rautani ana numa ravai aubai. Ġamoġamo tagoġi numa tagoġi aubaina.’ ⁴ Mepa da numa tagoġi ana rava i viruaġa ma sia i rata guratana, lamna mae-turai maiteni sia ina ġutai rava ai maġa ma ai am ana au ruva nanare. ⁵ Ġamoġamo e rarautani lamna orotona ma ana madeġa tagogi ma aiaina eġa ana apoapoe aiwai. ⁶ Ona ġamo-kauei da au pom ^v*i*—14⁻ na wei au nawaravina. Ma maranai madeġa e arearere, mai Israel anatapui ai ġamoġamo ina viragei. ⁷ Metauna au numana sia e aniani kampa tara ina taraiġui ma metaeta au tepana, au gabaurina ma au ririvana ina pasi-naiei. ⁸ Waguvaranaina tagogina tau siana ai moniana au tepana ina apui, ma palawa eġa *yist* maiteni ma sipeni vivigorai maiteni ina ani

¹¹ Anatapumi wenanare ona am, vaġai vigara ona vigarei: Ami ae uma ona oteni, ami jiġona au urami, Ma ona am laġilaġina. Wei lamna BADA ana Raġona torelana.

¹² —Wei waguvaraina, Tau Egypt ana naeni ma ġamoġamo da rava natuevou ororotoi anatapui ana viragei, ma Egypt ai god anatapui ana tuvaidoedoei. Tau BADA. ¹³ Wate tara au metaeta ina vimataira da taumi kampa o mamae. Ma maranai wei matairana ana inanai, ana raġonimi. Ma eġa aiwai apoapoena awarimi ina tupua maranai mai Egypt ana kovoġi, ¹⁴ Wei torelana ona nota-nonoei madeġana patapatana, da TAU BADA aiwai a kauei nuanuami eġa melanai ina vuru. Ami epaepaia anatapui wei marana ina vivirei ai mara au anatapuna.”

Palawa eġa yist maiteni ana torela

¹⁵ “Au pom 7 au orana Palawa eġa *yist* maiteni ona ani. Ma torela au karena, au numa *yist* anatapui ona tawanei. Ai dai palawa *yist* maiteni i apui ma i ani, wei ravana anina da mai Israel ai damei ona viopuni. ¹⁶ Au pom tagogi torela au karena ona vitagogiemi ma nanare torela au damona, ma BADA ona voepapai ma ona viborumei. Wei au marai eġa ai ai na nola dadana, Wate ami lam ava ona lauvoa.

¹⁷ —Taumi palawa eġa *yist* maiteni torelana ona kauei da eġa nuanuami ina vuru aubaina wei au marana, mai Israel au Egypt a taravaina-opunei. Am epaepaia wei torelana ina kaukauei madeġana au patapatana.”

* **12:2:** Ai madeġa iavana (Calenda) weka i vikarei

Raḡona

²¹ Ma Moses Israel dam nununai babadai i kwatuei ma i riwei, “Ona nae ma sipu bo gote natuna orotona ona vunui ma ami numa ravai maiteni Raḡona torelana ona ani. ²² Rugurugu ona turautuvi sipu au tarana au aboma ma ami numa metaetana au tepana ma au adana ona pasi. Ma eḡa ai ai numa ina opu-tawanei da ubaubanai. ²³ Ma waguvarai BADA Egypt anatapuna ina naeni ma mai Egypt ai natuevou ina virageḡeni. Wate maranai tara ina inana metaeta au tepana ma au adana, BADA wei numana ina raḡoni ma irage-anelana ina viḡaei da eḡa ina rui da ina virageḡenimi.

²⁴⁻²⁵ —Ma maranai BADA dobu i paripari-vainuaḡaniami ona ḡeta, taumi eḡa nuanuami ina vuru da madeḡana patapatana Raḡona torelana ona kaukauei. Taumi natunatumi maiteni wei tarawatuna ona vojijina-nonoei. ²⁶ Maranai natunatumi ina paridadana, “Wei torelana anona aiwai?” ²⁷ Ma taumi ona paribelei, “Wei torelana lamna Raḡona viegualau pulona BADA awarina, aubaina wariḡa au Egypt BADA mai Israel ai numa i raḡoni, ma mai Egypt ai natuevou i pupuni, ma tauai natunatuia i voterei.” Ma mai Israel i mae-ḡaira au doa ma BADA i raudunelei. ²⁸ Ma mai Israel i nae ma BADA aiwai Moses ma Aaron i riweia i kauai.

Natuevou nelarai i 'raḡe

²⁹ Waguvarai nubautuva BADA natuevou nelarai anatapui i virageḡeni au Egypt. Pharaoh natuna, ana epaia awarina i vikarei, ma i ḡaira da panipani ai natuevou nelarai awari. Ma ḡamoḡamo ororotoi natuevou anatapui maiteni i pupuni. ³⁰ Waguvara au pouna Pharaoh ma ana gabemani babada ma mai Egypt anatapui i vomairi. Numa tagotagoga ava au Egypt tevera tagogi i 'raḡe, ma tou ma tarakwatu ḡaeḡaena i ḡae. ³¹ Pharaoh wei waguvaraina Moses ma Aaron ai riwa i paritawanei da i nei awarina ma i egari, “Ami rava mai Israel maiteni ona vomairi ma au dobu ona oputawanei! O vivibaḡei nanare ona nae ma ami BADA ona voepaepai! ³² Taumi ami ḡamoḡamo anatapui ona vaia ma ona opu, ona nae, wate ami God ona vibaḡai da ina viaiainiu.”

³³ Mai Egypt anatapui mai Israel i egari da ina vipaparana ma Egypt ina opu-tawanei ma i riwa, “Mepa da eḡa ona nae tauai anatapui ai ana irageḡe.”

³⁷ Mai Israel dobu Rameses i netawanei ma i babara-nae au Sukoth. Nelara anatapui 600,000 nanare, waivine ma roaroa eḡa ita iavi. ³⁸ Patara ḡaeḡaena ḡelauna i vomairi mai Israel maiteni. Tau i ḡamoḡamo boruna ḡaeḡaena maiteni i nae. ³⁹ Maranai mai Egypt i viaḡaḡana-opunei tau eḡa ai tamaina ita vokaukauei ma laḡilaḡina i opu, tau palawa pasipasi nonoana eḡa *yist* maiteni i vaia ma palawa bagibagina i apui.

⁴⁰ *Mai Israel madeḡa 430 i mae au Egypt.

Raḡona torelana ana tarawatu

⁴³ Ma BADA Moses ma Aaron i riwei,

Raḡona torelana ana tarawatu wenanare:

Dobu ḡela wei torelana eḡa ina ani.

⁴⁴ Ami taunola gimagimarana ma inibori i vaia wei torelana ina ani.

⁴⁵ Taomana ma taunola maia aubaina e nolanela tau eḡa ina ani.

⁴⁶ Raḡona sipuna numa tagogiava au orana ona ani, ma eḡa sia aiwaina ona opunei au doa ma gelamina eḡa ona gai.

⁴⁷ Mai Israel anatapui Raḡona torelana ina ani.

13*Natuevou vovivirana*

¹ BADA Moses i riwei, ² “Natuevou nelarai au Israel anatapui ona vovivirei Tau awariu. Roaroa ma ḡamoḡamo natuevou ororotoi au Israel anatapui, Tau ḡariuei.”

Moses mai Israel i riwei, ¹¹ “BADA ina ruiemi mai Canaan ai au dobu ma dobuna ina veremi, noinoimi i paripari-vainuaḡani nanare. ¹² Natuevoumi nelarai ma ami ḡamoḡamo natuevou ororotoi anatapui BADA ona verei, ¹³ Wate sipu orotona BADA ona verei ma awarina *donki* natuevouna ona gimara-melei, ma mepa da eḡa ona gimara-melei, lamna *donkina* uana ona gomui. Taumi natunatumi nelarai natuevoumi ona gimara-melei.

¹⁴ —Ma mara au murina, natunatumi ina vitara-viravira, ‘Aiwai aubaina wei ta kaukauei?’ Tam ma paribelei, ‘BADA urana vivirewapananei i taravaina-opunelai, panipani numanei au Egypt. ¹⁵ Pharaoh orana i bagibagi ma eḡa mai Israel ita voterei da ita nae. Lamna aubaina

BADA natuevou anapapai au Egypt i viraġeni, rava ma ġamoġamo anapapai. Lamna aubaina tau ġamoġamo natuevouna BADA a vereveri ma natuevou orotona a gimagimara-melei.¹⁶ Wei gimara melanana lamna me mataira au uram ma au murum e oteoteni ma wei e vivimataira da BADA urana vivirewapananei Egyptei i taravaina-opunelai.”

²⁰ Mai Israel Sukoth i voterei ma mutulua au giana au Etham i mae-gubai. ²¹ Ma marai BADA i vinoa me apau maimairina ma waguvarai BADA i vinoa me tuatua araratana maimairina ma lalalainei tau i rau-etaraveni. Ma lamnei, tau marai ma waguvarai i bababara.

14

Pharaoh mai Israel i viaġaġana-opunei

⁵ Maranai riwa i ġeta Pharaoh awarina, da mai Israel i ruba. Pharaoh ana gabegabemani maiteni ai nota i virai ma i riwa, “Tauta aiwai ta kauai? Ma ata taunola ta voterei da i nepail!” ⁶ Anina ma Pharaoh ana chariot i vokaukauei, ma ana sorodia i vaia ma i nae. ⁷ Ana sorodia anapapai 600 vinevinei ai au chariot i geru, ma chariot ġelau i Egypt maiteni i nae. ⁸ BADA, i kauai da Pharaoh, Egypt ai ġulau nuanuana i vopotai ma mai Israel i viaġaġana-taġoei, Mai Israel ana tepatorai i nena. ⁹ Mai Egypt ana sorodia i viaġaġa, Pharaoh ana horse ma chariot anapapai ma horse babadai ma ana sorodia anapapai, maiteni i viaġaġa da au gera i mamaelana, i votani dobu Pi-Hahiroth, Baal-Sephon au baba ġelauna.

¹⁰ Maranai Pharaoh i tuturiai, mai Israel i taepai da i 'nanai ma i rovo kaukua da orai i sisi, ma BADA awarina i garara agu aubaina. ¹¹ Ma mai Israel Moses awarina amlai i ġaġai i pa, “Au Egypt eġa kokoaga da u taravaina-opunelai da weka au mutulua ana iraġe bo? Aiwai u kauai awariai?” ¹² Tauai au Egypt a riwem, ‘Ma voterelai ma ana mae ma Egypt ai taunola!’ I ai kava da tauai ata mae Egypt ai panipani, ma eġa au mutulua ata iraġe.”

¹³ Moses ana rava i paribelei, “Eġa ona rovo! Ona mairi jijina ma ona inana menanarena BADA ina vilawanimi amadodo. Mai Egypt amadodo o inainanai eġa melanai ona inana-melei. ¹⁴ BADA aubaimi ina viġavia. Taumi ona mae-genuatau.”

Israel boga au pouna i babara damana

¹⁵ Ma BADA, Moses i riwei, “Aiwai aubaina awariu agu e toutouei? Mai Israel ma riwei da ina vidagu. ¹⁶ Am jiġona ma voepai da ma viloloi boga au tepana ma boga ina vilamonei, ma mai Israel boga au pouna doa au alalana ina babara damana. ¹⁷ Tam ma raubiga, Tau mai Egypt a vitepatorai da mai Israel ina viaġaġei. Maranai Pharaoh ana vovaiubai, ana sorodia, chariot ma ana horse sorodiai, rava Tau ina voepaepai. ¹⁸ Tau Pharaoh ana vovaiubai, ana chariot ma ana horse sorodiai da mai Egypt ina vivivireu ma ina aramane i da TAU BADA.”

¹⁹ Anina ma God ana anela, mai Israel ai eta tauravenia i nae ma mai Israel au muri i mairi. Ma apau maimairina au naoi i nei ma tau i muri i mairi. ²⁰ Apau mai Israel ma mai Egypt au poui i mairi, ma maranai au i pom, apau lalalaina mai Israel i verei ma mai Egypt au waguwaguvareina i mae. Ma lamna aubaina mai Israel ma mai Egypt ai au gabu i mae-genuatau.

²¹ Moses ana jiġona i viloloi boga au tepana ma BADA kariwabu ġaġaena i paritawanei, ma boga i vilamonei, kariwabu i ruba da mara i tom da doa boga au pouna i alala. ²² Ma mai Israel boga i damani doa au alalana, Ma boga olana i mairi au oiei ma au kelakelau.

²³ Anina ma mai Egypt, Pharaoh ana horse ġelau, chariot ma taurubeina mai Israel i votaġoi da au boga i rui, mai Israel au murii. ²⁴ Ubaubanai boiboġi BADA apau maimairina ma ai tuatua araratana au orana ma i 'nana ġaira ma mai Egypt i viaiġoaġoi. ²⁵ Ma chariot ana aniruba i viapoepeni da ruba i kauana-avei. Ma mai Egypt i riwa, “BADA mai Israel e vovoagui, ma e viviviġavieta, lamna aubaina tana ruba-tawaneil!”

²⁶ Ma BADA Moses i riwei, “Am jiġona ma viloloi boga au tepana da boga ina nememei, mai Egypt au chariot ma sorodia horse au tepana anapapai ina puru-pai.” ²⁷ Madeġa i ġoġoġo ma Moses urana i viloloi boga au tepana, ma laġilaġina boga i naeme ana au gabu. Mai Egypt ita ruba wate BADA tau i boga i viorereni. ²⁸ Boga i naeme ana au gabu ma mai Egypt sorodia anapapina i ruirui au boga i monu. Eġa ai ai tagogi ita lawana.

³¹ Maranai mai Israel i 'nanai da BADA wei kauana vivirewapanana i kauai mai Egypt awarii, tau BADA i vivirana-kauai ma i vitumaġane i taunola Moses maiteni.

15

Moses ana wela

¹ Anina ma Moses mai Israel maiteni wei voepaepa welana i ravi BADA awarina: Tau ana wela BADA awarina ma ana voepaepai, aubaina ana ġavia i vipupui,

ma horse ma chariot taugeruii au boga i viorerena-naiei,

² BADA au rewapana ġaeġaena,
ma welei ana voepaepai;

Tauna i vilawaniu Tauna au God ma ana voepaepai,

Amamau ai God ma lamna aubaina ana vimae-ġaeġaeni ma ana voepaepai.

³ Tauna wavana BADA.

Tauna ġavia ravana.

⁴ Pharaoh ana chariot ma ana sorodia au boga i viorereni;

Ana sorodia vinevinei au Boga Lebalebarina i monui.

⁵ Gabinou i wanaiwagi da tau i purui;

ma i monu boga au gabaurina me ġaima.

⁶ Oo BADA ura-oiem vivirewapana kaukauana,
ura-oiem am ġavia e viviaimutumutui.

⁷ Tam ġeġetelaram

ma tau i viġaviem u vovaiubai.

Am meji araratana u paritawanei

da tau i aragibui me ai ragorago.

⁸ Boga au tepana u uvena ma boga olana i mairi,

i mairi genuatau me biribiri,

ma gabinou i alala.

⁹ Am ġavia i riwa, “Ana viaġaġei,

ana vojijini,

ai purapura ma ai maura anatapai ana ġutai,

ma aiwai a ġoeġoei ana vaia,

Au sod ana lavui ma ana vipupui.”

¹⁰ Wate lavutumei u uvena,

ma gabinou tau i purui;

i monu me ġaima rabama au ġaeġaena.

¹¹ BADA, mepa god ġelau me tam bo eġa? Eġateni!

Tam anina vivivirem,

am rewapana i rata dewadewa da tauai a rovorovoem,

Tam kauga babai ma virewapanai taukaueina.

¹² Tam uraoiem u viloloi,

ma doa am ġavia i lawani.

¹³ Am rava u vaimelai ma u rauetaraveni am nuavaina patupatutunei,

Ma am rewapanei u taravaina-naiei am au animae vivivireina.

¹⁴ Dobu ġelau wei riwana i nonori ma orai i sisi kauga.

Mai Philistia orai rovo ina vioai.

¹⁵ Edom gulagulau ina rovo kaukaua,

Moab nelara rewapana ini ina sisi.

Canaan maemaei anatapai inii i wanagwadai.

¹⁶ Rovo ġaeġaena anatapai orai i oai,

uram ana rewapanei tau i mairi kwakwa me kokoitau,

ma am rava ina verautua BADA,

da ravai u vaivai-melei ina verautua.

¹⁷ BADA ma taravaina da am au ola ina raunuma,

Gabu u vinevineiana,

tam uramei voavoaina.

¹⁸ BADA ina vibada nonoa.

¹⁹ Mai Israel doa au alalana i babara damana. Wate maranai mai Egypt ai horse ma ai chariot taugeruii rui au boga, BADA waira i neiana-meleia da anatapai i purui *Lamna aubaina Moses ana rava maiteni wei welana i ravi.*

Miriam ana wela

²⁰ Peroveta Miriam, Aaron novuna tambourine i vaia ma waivine anatapai, tauna i votaġotaġoi ma tambourine i vikalokaloei ma i ara. ²¹ Miriam wei welana i ravi, “Tana rava

BADA awarina, aubaina tauna ġavia i vilamolamonei ma horse ma chariot taugerui au boga i viorereni.”

Waira viviġorana i aii

²² Anina ma Moses mai Israel i taravaini da Boga lebalebarina i netawanei ma i nae au Shur mutuluana. Aupom tonuġa au mutulua i babara wate waira eġa ita nelaġai. ²³ Maranai au waira vuvura Marah i ġeta da ita uma wate wairana umana i viġora da eġa ita uma, lamna aubaina wei dobu wavana Marah. * ²⁴ Ma rava Moses awarina i pariġai i pa, “Aiwai tana umai?”

²⁵ Anina ma Moses i paritou BADA awarina agu aubaina, ma BADA ai tupona i viatataiei. Ma wei aina i tawanei au waira ma waira i viaini aniuma aubaina.

Nai au gabuna BADA ana tarawatu rava i verei ai lawana aubaina, ma ai votelatela i raudadani. ²⁶ BADA i riwa, “Mepa da riwau ona nonora-kauēi ma kaua aiaii ona kauēi au matau ma riwau anapapuna ona voteletelei, da kovoġa mai Egypt a vereverei, eġa ana veremi. Tau BADA tauvilawaniami.”

²⁷ Muriai tau i nei au Elim kampa vuvura 12 ma mutulua ai me pa 70 i maimairi ma kampa waira au adana i mae mara aburuna.

16

God Israel lam i verei

¹ Anina ma mai Israel Elim i netawanei ma i nae au mutulua wavana Sin, wei dobuna lamna Elim ma Sinai au poui. Egypt i opu-tawanei nawaravi tagogi ma wiki ruaġa i kwa ma wei au dobuna i ġeta.* ² Mai Israel Moses ma Aaron awarii i ġaiġaiawa. ³ Ma i riwei, “BADA boiboġi au Egypt ita viraġeniai! Kampa sia nauii a kiala kwaviviroi ma ai ġoanei a amam, wate taumi o taravaina-opunelai au mutulua da am-iraġe ana iraġelei.”

⁴ Anina ma BADA Moses i riwei, “Lam marei ana paritawana-ġaireiai me garewa. Au pom patapatana rava ina opu ma lam au pom tagogi ruvana ava ina vaia. Wei taunei rava ana raudadani da riwau bagibagina ina voteletelei bo eġa.” ⁵ Au pom ^v*i*—6⁻ na au pom ruaġa ruvana ina tami da ina vokaukauei.

¹¹ BADA Moses i riwei, ¹² “Mai Israel ai ġaiawa a nonori. Ma riwei, ‘Raviraviai taumi sia ona ani, ma ubaubanai lam ona maurei.’ Ma lamna maranai ona aramanei da Tau BADA ami God.”

¹³ Raviraviai kiu iviki boruna i nei da tau i maemae lana gabuna i vioai. Ma ubaubanai ġelauna doa anapapuna turuvani i vioai. ¹⁴ Maranai turuvani i paira ma purapura avavai me palawa nanare doa au tepana i mae. ¹⁵ Maranai mai Israel wei purapurai i ‘nanai ma i vinuanaina ma i vitara-viravira vivira i pa, “Wei aiwai?”

Ma Moses rava i riwei, “Wei aniam BADA i veremi.” ¹⁶ BADA riwana bagibagina lamna wei, “Rava tagogi lam ana au ruva ina tuarui. Nau muomuoi ruaġa[†] ruvana ona tuarui, rava tagogi au numa aubaina.”

¹⁷ Aiwai i ririweia nanare mai Israel i kauēi, ġelau ruva ġaeġaena i tami ma ġelau ruva aburuna i vaia. ¹⁸ Wate maranai i ruvai ma i ‘nanai da rava anapapui ruva i vaia da tagotagogina, Tau da ruva ġaeġaena i tami eġa aiwai ita mae-terei ma tau da aburuna i tami ma i nelaġai da lamna tagotagogina tau aubaii. Numa nununai ravai lam ruvaruvana i vaia.

¹⁹ Anina ma Moses i riwa, “Eġa aiai lam ina tereriei da au maratomi aubaina.”

²⁰ Wate rava ġelau Moses eġa ita rautaniġane i ma lam ġelau i tereriei ma ubaubanai motamota lam i oai ma i bova, ma Moses amlona i ġaiġai tau awarii.

²¹ Ubaubanai patapatana tau lam ai au ruva i tuarui, ma maranai madeġa i vibola ma lam i viwaira da i amoa. ²² Ma au pom ^v*i*—6⁻ na tau au pom ruaġa ruvana nanare i tuarui, ma melagai babadai i nei da Moses i pariverei. ²³ *Moses tau i riwei, “BADA riwa bagibaginei wenanare i riwa, ‘Maratom lauvitau vivireina Sabate ana mara, Tau aubaiu. Aiwai apuna o ġoeġoia amadodo ona apui ma aiwai vitavana o ġoeġoie amadodo ona vitavi. Ma aiwai i mae-terei, ona tereriei au maratomi aubaina.”

²⁴ Ma tau lam i tereriei ma eġa ita bova ma ita motamota me Moses i ririwa nanare, ²⁵ Moses i riwa, “Wei lamna amadodo ona ani, aubaina amadodo Sabate, lauvitau ana mara vivivireina i terei BADA aubaina. Ma amadodo amapo lam au doa eġa ona nelaġai. ²⁶ Au pom 6 lam ona tuarui, wate au pom ^v*i*—7⁻ na Sabate, amapo lam eġa ona nelaġai.”

* **15:23:** Au Hebrew pona Mara nonorana me viġora. * **16:1:** Mai Israel au pom 15 nawaravi tagogi (madeġa weka iavana i vikare) ma Egypt i opu-tawanei. † **16:16:** Hebrew ai ponei Iomer ana ruva lamna 2 Ltr ruaġa wei lamna ruva tagogi ana ruva. * **16:23:** Exo 20:8-11

²⁷ Ma au pom ^v*i*—⁷*na* rava ġelau i opu da lam ita tuarui wate eġa aiwai ita nelaġai. ²⁸ Anina ma BADA, Moses i riwei da rava i riwei i pa, “Mara biaġa au tarawatu ma au viararamana ona rau-aġaiġai? ²⁹ Ona notai da Tau BADA, Sabate a veremi, ma au pom ^v*i*—⁶*na* lam a veremi da au pom ruaġa aubaina. Ma rava anatapui au numa ita mae ma avena ita opu.” ³⁰ Ma au pom ^v*i*—⁷*na* rava i vilauvitau. ³¹ Rava mai Israel wei lamna i ġorei “*manna*.”

³⁵ *Ma mai Israel manna i amam da madeġa 40 i kwa. Taiu manna i amam da Canaan ana au parata i ġeta.

17

Waira kirei i opu

¹ *Mai Israel mutulua Sin i netawanei, ma mepa BADA i ririweia nanare kampa i mae-nae. Taiu au Rephidim i rauġaravu, wate kampa eġa waira da rava ita uma. ² Anina ma taiu Moses maiteni i vipariparinġai i pa, “Waira ma verelai da ana uma!”

Ma Moses i paribelei, “Aiwai aubaina o pariparinġai? Aiwai aubaina BADA o raraudadani?”

³ Wate rava nuanuai i arelana-kauei waira aubaina ma Moses i eni i pa, “Aiwai aubaina Egyptei u tere-opunelai da natunatuiai ma ai ġamoġamo maiteni nuarelana ana iragelei?”

⁴ Ma Moses i paritoutou BADA awarina i pa, “Aiwai ana kauei wei ravai awarii? Taiu ġaimi marina ina viraġeniu.”

⁵ BADA Moses i paribelei, “Israel babadai ġelau ma taravaini ma kwapu taunei Nile u raviravia ma vaia ma ma vnao. ⁶ Tau kampa au naom u kira ana maimairi au Horeb. Kira ma ravi da waira ina opu da rava ina uma.” Ma Moses nanare i kauei Israel babadai au matai. ⁷ Moses wei dobuna i ġorei Massah * ma Meribah, † aubaina weka mai Israel Moses maiteni i vipariparinġai ma BADA i raudadani maranai i riwa, “BADA weka tauta maiteni bo eġa?”

Mai Israel ma mai Amalek i viġaiġaiawa

⁸ Mai Amalek i nei ma Mai Israel maiteni i viġaiġaiawa au Rephidim. ⁹ Moses Joshua i riwei, “Rava ma vinei da ona nae mai Amalek maiteni ina viġaiġaiawa. Au maratom tau ola au tepana ana mairi ma God ana kwapu ana vovojjini.”

¹⁰ Ma Joshua mai Amalek maiteni i viġaiġaiawa me Moses i ririweia nanare. Moses, Aaron ma Hur i ġae ola au tepana. ¹¹ Maranai Moses urana ana kwapuna i voepai mai Israel i vivirewapana wate maranai urana i teretere-ġairei mai Amalek i vivirewapana. ¹² Moses urana i garigari ma Aaron ma Hur ġaima i neiai da i terei ma au tepana Moses i kiala. Aaron ma Hur, Moses au ririvana i mae, tagoġi au navanavana ma ġelauna au navanavana ġelauna ma urana i voepai ma i vovojjini da madeġa i neulai. ¹³ Ma Joshua ana sorodia maiteni Amalek ai sorodia sodiei i vovaiubai.

18

Jethro poiana Moses i raugenari

¹ Moses poiana Jethro, mai Midian ai pirisi pulo tauapuna i nonori aiwai anatapuna BADA i kaukaueia Moses ma mai Israel awarii; ma menanare Egyptei i taravaina-opunei.

⁵ Moses poiana - Jethro, Moses awana ma natunatuna nelarai ruaġa i nei da Moses ita raugenari au mutulua. Weka Moses ana rava maiteni i rauġaravu God ana ola au ġereġerena. ⁶ Jethro riwa i paritawanei Moses awarina da taiu i nenei. ⁷ Ma Moses i opu da poiana ita nebelei. Tauna i mae-ġaira ma poiana i raudunelei ma i vigia-laġolaġonei. Taiu i vieġalau vivira ma i rui Moses ana au numagara. ⁸ Ma BADA aiwai i kaukaueia Pharaoh ma mai Egypt awari mai Israel aubai; ma apoapoe anatapui au eta i nebelei; ma menanare God taiu i vilawani; anatapui poiana i parivere. ⁹ Ma Jethro nuanuana i ai kava maranai i nonori menanare BADA aiwai anatapuna aiaii i kauei mai Israel aubai maranai Egypt urai vivirewapanana awariei i tere-opunei.

¹⁰ Jethro i riwa i pa, “Voepaepa BADA awarina. Tauna Pharaoh ma mai Egypt awarii i vai-tawanemi. Ee, Egypt urai vivirewapanana awariei i vai-tawanemi. ¹¹ Marina a aramanei da

* 16:35: Jos 5:12 * 17:1: Num 20:2-13 * 17:7: Hebrew ponanei, Massah anona raudadana † 17:7: Pona Hebrew, Meribah anona vipariparinġai

BADA i ġetelara eġa me god ġelau nanare. Aubaina BADA ġoġogulagulai mai Egypt ai kaua apoapoe mai Israel awarii aubaina i kovoġi.”

Jethro Moses i vinua-terenei

¹³ Ma marana i tom, Moses ana au anikiala i kiala da ita rautetara. Ma rava Moses i mairi-kwavirovi ma i vipaipai ubaubanai da madega i ġaira. ¹⁴ Maranai Jethro i nanai aiwai anatapuna Moses i kaukauei rava aubaii. Tauna i vitara-viravira i pa, “Wei aiwai rava awarii e kaukauei? Aiwai aubaina ainelam wei e kaukauei, ma wei ravai e maimairi pompom da am riwa ita nonori?”

¹⁵ Moses i paribelei i pa, “Tau wei a kaukauei aubaina rava e nenei awariu da ita aramani aiwai God e ġoġoei da ita kau. ¹⁶ Maranai rava ruaga e viviamparipari. Taui e nenei awariu da a teretere-vaijijimani; ma God ana riwa ma ana tarawatu a ririwei.”

¹⁷ Moses poiana i riwa i pa, “Aiwai tam e kaukauei lamna eġa ita ai. ¹⁸ Nola e kaukauei i vitai kaua da tam ainelam eġa tagotagogina uta kau. Tam ma rava ona voirairaġe. ¹⁹ Ma rautaniġana ma ana vinuaterenem; ma God awarim ina mae. Tam anina da rava ma raviepaiai God au naona ma ai viamparipari ma neiai awarina. ²⁰ God ana parivai-araramana ma ana tarawatu ma viararamani ma taui ma viatataiei da menanare ita maenei ma aiwai ita kau. ²¹ Wate am patara awariei nelara ġelau araramanii ma God e viviborumei ma eġa amkwalakwalai ma vinei da rava ina vibadei: ġelau rava 1,000 ina vibadei; ma ġelau rava 100; ma ġelau rava 50; ma ġelau rava 10 ina vibadei. ²² Taui rava ai viamparipari ina tere-vaijijimani. Wate aiwai da i pipiripi, ina neiai awarim. Taui ina voaguim da am vita ina avari ma ina votelatelai. ²³ Mepa da God i ririweia ma kau e amapo eġa ma voirairaġe ma rava anatapu ana nuaii ina nae ai au numa.”

²⁴ Moses, poiana i rautaniġanei ma aiwai anatapuna i ririweia i kau. ²⁵ Ma Moses mai Israel araramani i vinei da rava 1,000 i vibadei, ma 100, ma 50 ma 10 i vibadei. ²⁶ Wei babadai, rava ai viamparipari i teretere-vaijijimani ma aiwai da i pipiripi i neneiai Moses awarina. Ma kau telatelai i teretere-vaijijimani.

²⁷ Anina ma Moses, poiana Jethro i viegualaei, ma Jethro i naeme ana au dobu.

19

BADA i vieġana-melei au ola Sinai

² Mai Israel Rephidim i netawanei da i nae au mutulua wavana Sinai. Ma kampa ola au karna i rauġaravu.

³ Ma Moses i ġae au ola da God ita nebelei. Ma BADA ola au tepana ma Moses i ġorei i pa, “Wei mai Israel Jacob noinoina ma riwei.

⁴—Taumi matamiei o inana aiwai mai Egypt awarii a kau e ma me manubada natunatuna au papena e avavara nanare a avaraimi ma a neiana-melemi awariu. ⁵ Mepa da ona voteleteleu ma au parivainuagana bagibagina ona vojijina-kau e, lamna dam anatapu ai dobu awariei taumi ana vinemi nuanuu pouna. Avena da dobu anatapuna Tau ġariuei. ⁶ Wate taumi aubaiu ona vipirisi, ma ami dam ona vovivirei tau ainelau aubaiu, wei babani mai Israel ma riwei.”

⁷ Ma Moses i ġaira me ma dogadogara i kwatuei ma aiwai anatapuna BADA i ririwei i parivere. ⁸ Ma rava anatapu i paribelana gogona i pa, “Tauai aiwai anatapuna BADA i ririwei ana kau. Ma Moses ai paribelana i ġaiana-melei BADA awarina.

⁹ BADA, Moses i riwei, “Tau apau potopotona au orana ana nei, da rava ina nonoriu Awarim ana babani da ina vitumaġana-nonoem.” Anina ma aiwai rava i ririwei Moses BADA i riwei.

¹⁰ Ma BADA Moses i riwei, “Ma ġaira ma rava ma voagui amadodo ma au maratom da orai ina oġai da tau ina viborumeu. Ma ai gara ina oġai. ¹¹ Ma ina vokaukauei au pom vitonuina aubaina. Nai maranaina Tau ana ġairai au Ola Sinai, rava anatapu ai matai. ¹² Parata ma tere-kwavirovi au ola. Ma riwa bagibaginei ma riwei ma pa, ‘Ona inana-kaua da eġa au ola ona ġae bo ola ona tapedadani. Ai dai da ola i tapedadani ina iraġe.’ ¹³ Mepa da rava bo ġamoġamo wei paratana i voragōni, taumi eġa nai ravana bo ġamoġamona ona vodadani wate ġaimie bo aierei ona viraġeni. Wate maranai taure ponana i rarata lamna rava ina ġae au ola.”

¹⁴ Ma Moses olei i ġaira memei ma ana rava i riwei da orai i vokaukauei da God ina viborumei ma ai gara i oġai. ¹⁵ Ma i riwei, “Ona vokaukauei mara vitonuina aubaina, marina da nai marana eġa ona viawawana.”

¹⁶ Ubaubanai au pom vitonuina, waiparara, namanamara ma apau potopotona ola i purui, ma taure i tou. Maratagōgi rava anatapu kampa i mamae i rovo kaukauei ma i sisi.

¹⁷ Ma Moses rava i ravena-opunei da God ita nebelei. Taui ola au karena i mairi. ¹⁸ BADA ai araratanei i ġairai ola Sinai au tepana. Ma hau potopotona olana i puru-pai. Bau kampa i ġeġae me modu potopotona e ararai nanare, ma olana anapuna i vigugui. ¹⁹ Ma taure ponana i rarata. Ma Moses i babani ma God i paribelei ponana nonorana me waiparara. ²⁰ BADA i ġairai ola Sinai au tepana ma Moses i kwatuei da ita ġei ola au tepana. Ma Moses i ġae.

20

God ana tarawatu 10

- ¹ Ma God i babani ma wei riwai i latoni,
² TAU BADA ami God, panipaniei au Egypt a tarawaina-opunemi.
³ Taumi eġa god ġelau ona raudunelei, Tau ainelau ona rauduneleu.
⁴ Taumi eġa aiwai au mara bo au dobu bo boga au orana dobu au gabaurina kokoitau
 ona kau ei da ona raudunelei. ⁵ *Taumi eġa kokoitau ona raudunelei bo ona viborumei,
 aubaina TAU BADA ami God ununurana. Ma taui i gedugeduaieu ana kovoġi da kimta
 au ^v*i*-4⁻*na*. ⁶ Wate taui aiavoi nuanuau e vaivaini ma au tarawatu e vovojijini au
 nuavaina maemae-nonoana ana verei da kimta tausand nanare.
⁷ Taumi eġa BADA ami God wavana ona vinamei. Aiai da BADA wavana e vivinamei
 ina kovoġi.
⁸ *Sabate eġa nuanuami ina vuru ma ona notanotai ma ona vovivirei tau awariu. ⁹ Aupom
 6 ami nola ona kau ei. ¹⁰ Wate au pom ^v*i*-7⁻*na* lamna Sabate, lau vitau marana,
 i vovivirei BADA ami God aubaina. Wei au marana eġa aiai ina nola: eġa tam, natum
 orotona bo wavinena, am taunola orotona ma wavinena, bo am ġamoġamo, ma
 dobuġela ravai awarim e mamae. ¹¹ *Aubaina au pom six au orana BADA mara ma dobu
 i kau ei; boga ma anapui au orana. Wate i vilau vitau au pom au ^v*i*-7⁻*na*. Lamna
 aubaina BADA Sabate i viaiaini ma i vovivirei.
¹² *Amam ma alom ma vivirei, da am lawana ina manawa au dobu, BADA am God
 e vereverem.
¹³ *Eġa ma viragena.
¹⁴ *Eġa ravaġela awana ma viawawanei.
¹⁵ *Eġa ma danene.
¹⁶ *Eġa ma viwavu-moru
¹⁷ Eġa ravaġela ana numma ma vikwinei. Eġa ravaġela awana ma vikwinei, bo ana taunola
 orotona bo wavinena, ana bulumakau, ana donki, bo aiwai ġelau ġarieni.

21

Rau iviapoapoe ai Tarawatu

- ¹² "Aiai rava ġelauna i ravi da i virageni, nai ravana ina virageni. ¹³ *Wate mepa da
 i vunu-boai da i virageni. Tauna ina ruba dobu a vinevineia kampa. ¹⁴ Wate rava i vioga da
 i viragena, ma ana lawana aubaina i ruba pulo au aniapuna, ravana ina tarawaina-opunei ma
 ina virageni.
¹⁵ —Aiai amana bo alona i ravi, nai ravana ina virageni.
¹⁶ —Aiai da rava ġelauna i danenei da i gimarei bo awarina ma i nelaġai, nai ravana
 ina virageni.
¹⁷ *—Aiai da amana bo alona e parivai-apoapoeni nai ravana ina virageni."

22

Tarawatu am lawana aubaina

- ¹⁶ "Mepa da oroto wavine matatapu i gwalai da i viawawanei, ma eġa aiai wei wavinena
 ita rautani da ita ravaġi. Nai orotona wavine mataopana ina vimaiei ma ina ravaġi. ¹⁷ Wate
 mepa da amana i viġa, lamna maranai oroto matatapu ana mataopa ina vimaiei wavine
 amana awarina. ¹⁸ *Aiai wavinena e paraparauma lamna ina virageni.
¹⁹ *—Aiai ġamoġamo i viawawanei lamna orotona ina virageni.

* **20:5:** Exo 34:6-7; Deu 7:9-10 * **20:8:** Exo 16:23-30 * **20:11:** Gen 2:1-3 * **20:12:** Mrk 7:10; 10:19 * **20:13:**
 Gen 9:6; Mrk 10:19 * **20:14:** Mrk 10:19 * **20:15:** Mrk 10:19 * **20:16:** Exo 23:1; Mrk 10:19 * **21:13:** Num
 35:10-34 * **21:17:** Mrk 7:10 * **22:18:** Deu 18:10-11 * **22:19:** Lev 18:23

²⁰ —Aiai pulo i apui god ġelauna awarina ma eġa tau BADA awariu lamna nai ravana ina viraġeni.

²¹ —Eġa dobuġela ravai ona ġoa-boai, ona notai da taumi mara tagogi o mae dobuġela ravami au Egypt.

²² —Eġa kaikaiababa ma kedakeda ona ġoa-boai. ²³ Mepa da nanare ona kauai ma tui ina tou awariu agu aubaina, Tau BADA, ai tou anina ana nonori ma ana voagui. ²⁴ Ma Tau ana meji guratana ma ġavia au orana ana viraġenimi. Awawami ina vikaiababa ma natunatumi eġa amamai.

²⁵ —Mepa da mane u unelei molamolakana awarina, lamna eġa mane ġelauna au tepana ma vibaġei. ²⁶ Mepa da rava ġelauna ana kwama u vaia da manena ina veremelem ma muriai ma vere-melei, ana kwama ma vere-melei muriai da madeġa ina ġaira. ²⁷ Kwamana lamnei e purupuru da inina e vivibola. Bo aiwai ġelauna e mamea da ina vipuruei? Mepa da kwama eġa uta veremelei ma tauna awariu i tou agu aubaina ma Tau ana paribelei aubaina Tau rau-nuapoapoe.”

23

Rau-nuapoapoe

¹ *Eġa riwa moru ma vituai. Ma eġa au numa-etara moruei kaua apoapoe ravana ma voagui. ² Eġa patara ma ġovaivaitei ma ġo'apoapoe ma kaukauei. Maranai au numa etara e maimairi eġa moruei ġo'apoapoe patarai ma voagui.

24

Israel BADA ana parivainuagana i vianinei

³ Moses i nae mai Israel awari ma BADA ana viararamana ma ana tarawatu anatapui i riwei ma rava anatapui pona tagoginei i paribelei i pa, “Tauai BADA aiwai i ririwei anatapuna ana kauai.”

⁴ Ma Moses, BADA aiwai i ririwei anatapuna i girumi. Ubaubana i boiboġi i vomairi ma pulo aniapuna i voai ola au karena ma ġaima ġaeġae 12 i vimairini Israel ana dam 12 i vimatarei. ⁵ Anina ma Israel laralaragai i paritawane da ġamoġamo i vununaiei ma pulo i apui BADA awarina ma bulumakau ġelau i vunui da ai viturana ma mae-kaua pulona. ⁶ Moses ġamoġamo tarai navanavana i ġunaiei au aboma ma navanavana ġelauna pulo aniapuna au tepana i voiwaiwaġi. ⁷ Ma parivainuagana bagibagina bukana i vaia ma rava awarii i 'avi. Tui i paribelei, “Tauai aiwai anatapuna BADA i ririwei ana kauai, ana babani ana voteletelei.”

⁸ *Ma Moses aboma i vaia ma tara i voiwaiwaġi rava au tepai. Ma i riwa i pa, “Wei taranei ata tarawatu i vovai-virewapani ma i vianinei.

—Maranai BADA tarawatu i veremi, Tauna parivainuagana bagibagina taumi maiteni i kauai.” ¹² BADA, Moses i riwei, “Ma ġei awariu au ola ma weka ma mae, ma ġaima dabadabai ruagā au tepai, riwau ma au tarawatu a girugirumia ana verem da mai Israel ma viararamani.”

¹³⁻¹⁴ Ma Moses ana taunola Joshua maiteni i vokaukaua da ita ġae au ola. Ma Moses babada awarii i babani i pa, “Weka ona painiai da ana opu-memei. Aaron ma Hur e mamea, mepa da ami paripariġai aiwai da ona nae awarii.”

¹⁵ Ma Moses i ġeġae au ola ma apau ola i purui ¹⁶ Ma BADA ana boruma i peu au ola Sinai. Ma au pom six apau ola i purui, ma au pom au ^{v_i-7} na BADA apau au orana ma Moses i ġorei. ¹⁷ Mai Israel i taepai ma ola au tepana BADA ana boruma i 'nanai me ai arata ġaeġaena ai menamenana ma bauna potopotona. ¹⁸ Ma Moses i ġae au ola ma apau au orana i rui. Ma au ola i mae au pom 40 ma waguvarai 40.

25

God ana numagara vivivireina

God Moses i riwei da rava ita parivere i da ai ġoanei ita verena, kaua maġamaġauiei da God ana numagara vivivireina aubaina.

⁸ “Rava Numa Gara Vivivireina ina voai, da tui maiteni ana mae. ⁹ Numa gara ma orana purapurai ana viatataiem nanare ona voai.”

Parivainuagana bokisina

¹⁰“Ma bokisi ai *acaciei* ina voai, ana manawa 110 cm, ma ana dabora 66 cm, ma ana *gāe* 66 cm. ¹¹Ma gold aiainei ma viaitani au orana ma au doa, ma au tepana ana via goldei ma terekwaviro. ¹²Ma ana loji 4 ma vokaukauei ma au aena 4 ma terei; ma au baba *gēlauna* loji rua^ā ina mae ma au baba *gēlauna* loji rua^ā ina mae. ¹³Ma ai *acaciei* anipawe ma kauē, ma goldei ma viaitani. ¹⁴Ma anipawe au loji bokisi au babana ma ravai, da ina pawei. ¹⁵Anipawe au loji ina mae, e^ā ina taina-lavui. ¹⁶Ma au tarawatu *gāima* dabadabai rua^ā au tepai a girugirumia bokisi au orana ma terei.

¹⁷—Ma u^ā, gold aiainei ma kauē, ana manawa 110 cm, ma ana dabora 66 cm. ¹⁸Ma Cherub rua^ā ma kauē gold gudagudanei ma u^ā au giana rua^ā ma terei. ¹⁹Ma Cherubim *gēlauna* au *gā* *gēlauna* ma Cherubim *gēlauna* au *gā* *gēlauna* ma kauē da u^ā maiteni ina vitagogi. ²⁰Ma Cherubim papei au aidamo ina viloloi, ma ina vinao vereverena, da *gō*’apoapoe tauvaitawaneina u^ā ina gagaloei. ²¹U^ā au tepana ma terei, ma *gāima* dabadabai rua^ā bokisi au orana ma terei. ²²Ma u^ā au tepana, Cherubim rua^ā au poui kampa tana vinenebelana da au tarawatu ana verem rava mai Israel aubaii.”

28

Ma God nanare Moses i riwei da wei purapurai i voai, kepakepa vinevinena ma incense aniapuna goldei, ma rampa anivojijnana rampa seven aubaii. Ma i viaramani menanare BADA ana numagara vivivireina ina voai ma au orana gara gāmo^ā opinei ina babalarāgi da gabu rua^ā, ma gabuna ana gari ina kauē da wei gabuna ina gari-kwaikwaipipini. Ma wate maiteni i riwei da pulo aniapuna bronzei, ma aboma gāe^ā ina kauē anio^ā aubaina.

Pirisi ai gara

¹Ma God i riwa, Tuam Aaron natunatuna Nadab, Abihu, Eleasar ma Ithamar maiteni mai Israel awariei ma tereriei. Ma ma viaiaini da Tau aubaii ina vipirisi pulo tauapuina. ²Ma pirisi ana *gāra* vivivireina ma popoi vareim aubaina da inananana ina vinualaulauna ma rava ina vivirei, ³Rava rarau-*gāro^ā*gari ma nuaulaulai, ma *gōreiai* da Aaron ana pirisi garana ina popoi da ina oteni ma ina viaiaini da aubaii ina vipirisi.

31

God ana numagara taukaueina

¹Ma BADA Moses i riwei, ²“Ma inana, Tau Besalel, Judah ana damei a vinei, tauna Uri natuna, ma Hur *gōgāna*, ³ma Aruau Vivivireina a verei. Ma nuaulaula ma nota ma aramana a verei da rau-*gāro^ā*gari anapui awari tauna tagotagogina. ⁴Tauna taurau^āgāro amai, *Gold*, *Silver* ma *Bronze* taunoleina aiaina. ⁵Tauna i ai kava *gāima* e boribori ma e la^āgā^ā, ma amtai awarina. Tauna rau-*gāro^ā*gari anapuna awarina tagotagogina. ⁶Ma nanare Oholiab a vinei, tauna Ahisamak natuna, Dan ana au dam da ana tauagu. Ma nanare taurau^āgāro nuaula ma aramana a verei da aiwai anapuna a ririwem ina kauē. ⁷Numagara Vivivireina ma parivainuagāna bokisi ma u^ā ma numagara ana purapura: ⁸kepakepa ma ana purapura; rampa gold aiainei ma purapura *gēlaui* ma incense aniapunana. ⁹Pulo aniapuna *gāmo^ā* taputapuna apuna aubaina. ¹⁰Ma gara vinualaulaunai ina popoi, gara vivireina ina popoi Pirisi *Ge^ātelarana* Aaron aubaina ma natunatuna pirisi nolana aubaina aubaii, ¹¹monamona viaiaina aubaina ma incense BADA ana numa aubaina. Taurau^āgāro wei purapurai ina rau^āgāro^ā me a ririwei nanare.”

32

Bull natuna goldei

¹✠Maranai rava i 'nanai da Moses barana i uama au ola, tau i nei Aaron awarina ma i riwei, “Ma nei ma god ma voai da ina painita. Wei ravana Moses, Egypte i nei^ā ita weka, e^ā ata aramanei aiwai i tupua awarina.”

²Aaron i paribelei, “Awawami ma natunatumi waivinei ma nelarai ai loji goldei ona nei^ā awariu!” ³Anina ma rava anapui ai loji i votawatawanei ma i nei^ā Aaron awarina. ⁴✠Tauna i vaia ma ai au menamenana i apui da i wanagwada ma bull natuna kokoitauna i voai. Maranai rava wei i 'nanai ma i riwa, “Oo mai Israel wei ami god, Egypte i tere-opunemi.”

⁵Maranai Aaron wei i 'nanai ma pulo aniapuna i voai bull au naona ma i vinolanola i pa, “Au maratom tana torela BADA aubaina.” ⁶Ma Ūaubana boibo^āgi rava i vomairi da *gāmo^ā*

* 25:17: u^ā *gō*’apoapoei e viviaitani ✠ 32:1: Act 7:40 ✠ 32:4: 1Ki 12:28; Act 7:41

taputapuna i apui ma viturana maiteni pulona i terei. Muriai i kiala da i am gogona ma i uma-bua guratana da i kua labalababa.

⁷ Anina ma BADA Moses i riwei, “Ma ġaira ma am rava Egyptei u tere-opunei. Tau i geduaieu ma kua apoapoena i kauēi. ⁸ Tau i me marana au tarawatu i geduaiei ma bull natuna kokoitauna i kauēi. Ma i raudunelei ma pulo i apui awarina ma i riwa, ‘Wei ami god, Oo Israel, Egyptei i tere-opunemi.’”

⁹ Ma BADA Moses i riwei, “Wei ravai a inanai ma a aramane i tau i kolai bagibagii, ma nuapoui eġa. ¹⁰ Ma votereu da au meji ana vikwai tau i awarii ma ana pupuni. Ma tam Moses ana terem da am epaepaia maiteni dam patarai ġaeġaena ona vitupui.”

¹¹ Wate Moses God i vigigimane i pa, “Oo BADA am rewapana ġaeġaenei am rava Egyptei u tere-opunei lamna aubaina eġa am rava awarii ma meji ma ma pupuni. ¹² Mepa da ma pupuni, Mai Egypt ina riwa, ‘Ana nota apoapoena maranai i tere-opunei da au ola anata-pui ita pupuni.’ Meji avena, oram ina uba, ma eġa ma vipupui. ¹³ Am taunola Abraham, Isaac ma Israel ma notai, tam wavamei u parivainuagani, ‘Tau am epaepaia ana vimaġai me ubona au mara ma wei dobuna a paripari-vainuagani ami epaepaia ana vere-nonoei.’ ¹⁴ Anina ma BADA orana i uba ma eġa apoapoena ita neiai awarii.”

¹⁵ Ma Moses i ġaira me, au urana ġaima ruagā dabadabai. God ana tarawatu wei ġaimai au naoi ma au murii i girumi. ¹⁶ Ġaima dabadabai lamna God ana kua. Tauna ainelana i girumi.

¹⁹ Maranai Moses i turiai mepa rava i rauġaravu ma bull natuna goldei i ‘nanai i maimairi ma rava i arara i ‘nanai. Tauna meji orana i oai ma ġaima dabadabai ruagā i viorereni au doa. I viaigimaimai ola au karena. ²⁰ Moses bull natuna goldei i vaia ma i apui ma i tutu-gwadagwadi da i vipokau ma au waira i tawane i ma mai Israel i egari da i uma.

²¹ Ma Aaron i riwei, “Rava aiwai i kauēi awarim da u kauēi da kua apoapoe kaukauna i kauēi.”

²² Aaron i paribelei, “Au bada eġa ma ġaiawa, rava ai kua u aramane i, kua apoapoe ai ġai. ²³ Ma i riweu, ‘god ma kauēi da ina ravenita. Ma wei ravana Moses, Egyptei i tere-opunelai, tauai eġa ata aramane aiwai awarina i tupua.’ ²⁴ Lamna aubaina rava a riwei, ‘Aiaia awarina via goldei ona votawane ma i vereu.’ Ma ai au menamenana a tawana-ruiei ma wei bull natuna i opui!”

²⁵ Moses i ‘nanai da Aaron eġa tagotagogina da rava ita vibadei, ma ana ġavia ai aniv-inama i kauēi. ²⁶ Lamna aubaina ai rauġaravu au metaetana i mairi ma i garara, “Aiai da BADA au murina, ona nei awariu!” Ma Levi ana dam i nae Moses au murina.

²⁷ Ma Moses tau i riwei, “BADA, Israel ana God e ririwa. Nelara sod ona lavui ma ona nae ġaravu au giana da ona nenememei ma dam turam ma vareim ma mae-turam ma viraġeni.”

²⁸ Levi ana dam Moses i voteletei ma nai au marana nelara 3,000 i viraġeni. ²⁹ Ma Moses i riwa, “Amadodo BADA taumi i voviviremi ma i viaiainimi da aubaina ona vipirisi pulo tauapuina, aubaina taumi BADA o voteletei da natunatumi ma vevareimi o viraġeni.”

³⁰ Ma maratomma Moses rava i riwei, “Taumi ġo’apoapoe ġaeġaena o kauēi wate ana ġae BADA awarina da ana kauana dadane da ami ġo’apoapoe ina nota-tawane.”

³¹ Anina ma Moses i ġae me BADA awarina ma i riwa, “Au rava kua i apoapoe ġaġa i kauēi. Tau i ai god goldei i kauēi ma i raudunelei! ³² Wate marina BADA a vivibaġaim da ai ġo’apoapoe ma nota-tawane ma mepa da eġa lamna avena ma wavau am au buka ma boa-tawane.”

³³ Ma BADA Moses i paribelei, “Aiaivoi ġo’apoapoe i kauēi awariu, Tau wavai au buka ana boai. ³⁴ Marina ma nae, rava ma naiei dobu a ririweia ma au anela ina ravenim. Wate mara ina ġeta da ana kovoġa, tau i ai ġo’apoapoe aubaina ana kovoġi.”

³⁵ Ma BADA doria apoapoenei rava i kovoġi aubaina tau i god bull natuna Aaron i voai i raudunelei.

34

Ġaima ruagā

¹ BADA, Moses i riwei, “Ġaima ruagā dabadabai ma bori inanana me ruagā u wamawamaia, ma au tepana riwana tagogina ana girumi me au naona. ² Ma vokaukua ma ubaubanai ma ġei ola Sinai au tepana ma nebeleu.”

⁴ Ma Moses, ġaima ruagā i bori me au naona nanare. Ubaubanai boiboġi ġaimai i voai ma i ġae au ola BADA i ririwei nanare. ⁵ Ma BADA apauei i ġairai ma au ririvana i raumairiei, ma wavana i latoni, “BADA!” ⁶ Ma Moses au naona i babara ma i viġoreġore, “TAU MAEMAE

NONOANA! Tau rarau-nuapoapoeu ma iviu aiaina, tau eġa laġilaġina amlou ita voġaiġai. ⁷ Au nuavaina maemaena ina mae au rava awarii da kimta tausan ina kwa ma kauga apoapoe, mae-ġaeġae ma ġo'apoapoe ina nota-tawanei. Wate tauna eġa kauga apoapoe taukauei ita inana-tawanei, natunatui ma ġoġoġai, amamai i kaukauei kovogana e vaivaia da kimta vitonuina da vi-four-na."

⁸ Moses maratagogi i mae-peu au doa ma BADA i viborumei. ⁹ I riwa, "Au bada mepa da riwa kauga da tam nuanuau u vaia, a vivibaġaim da uta vinoa ma tata nae. Wei ravai orai badobadoi, wate ai kauga apoapoe ma ai ġo'apoapoei ma nota-tawanei, ma ma vai-meleiai am buderi."

Parivainuaġana bagibagina i ravivouni

¹⁰ BADA, Moses i riwei, "Ma rautaniġana! Au parivainuaġana bagibagina tam maiteni a kaukauei am patara Israel maiteni. Ma au matami kauga ġaeġae aniba kauai ana kauei. Eġa melanai ai ai wenanare ita kauei au dobu. Rava anatapui au ririvami e mamae, au rewapana ina inana da tau, BADA kauga ġaeġae ana kauei aubaimi."

²⁸ Moses kampa i mae BADA maiteni au pom 40 ma waguvarai 40, eġa ita am ma eġa ita uma nai au marana. Ma BADA ġaima au tepana parivainuaġana riwai - Tarawatu 10 i girumi.

Moses naona i lalai

²⁹ Moses ġaima ruaġa au tepai parivainuaġana riwai i vinimavoei ma ola Sinaiei i ġairai. Wate eġa malana ita vaia da naona i lalalai aubaina tauna BADA maiteni i babani. ³⁰ Aaron ma Israel patarai i 'nanai da Moses naona i lalalai ma awarina naena i rovoei. ³¹ Wate Moses tau i ġorei, ma Aaron ma dogadogara i nei awarina, ma awarii i babani. ³² Ma mai Israel i riei Moses awarina ma tarawatu ola au tepana i vereverei rava i pariverei.

³³ Moses naona garei i purui maranai awari i babani-vorovei. ³⁴ Maranai Moses e ruirui au numagara da BADA maiteni ina babani, ġarana naona i purupurui lamna, e vovotawanei. Ma e opuopu memei ma BADA aiwai i riwei mai Israel e paripariverei, ³⁵ ma mai Israel, i 'nanai da Moses naona i lalalai. Lamna maranai Moses naona i puru-melei da ina rui me da BADA awarina ina babani.

40

Ma Moses rava i vibaġai numa voa purapurai BADA ana numa ġara vivivireina voana aubaina, ma wate purapura vivivirei numa au orana bada vimae-ġaeġaenana aubaina, ma pirisi ai gara popona aubaina, ma rava i amverena da tagotagogina da nola ita vikwai. Bezalel ma Oholiab ma rava nolanolai nelara ma waivine wei purapurai i kauei me BADA i ririwei nanare.

Numa gara vivivireina i vikwai

¹ Ma BADA Moses i riwei, ² "Au Numa Gara Vivivireina ma vimairini aupom tagogi, madeġa au vouna. ³ Tarawatu 10, Parivainuaġana bokisina au orana ma poi, ma au naona anitereġaġara ma teretaġonei da numa garana ina babalaraġi. ⁴ Teibol ma ruiei ma au tepana aiwai i kaukauei aubaina ma terei. Ma rampa anivovijjinana ma ruiei, ma rampa ma terei ⁵ Ma incense aniapuna goldei ma terei bokisi au naona ma anitereġaġara ġelauna ma terei da BADA ana numa gara vivivireina ina gudui. ⁶ Numa gara au metaetana, au doa, pulo aniapuna ma terei. ⁷ Anirauoġa numa gara ma pulo aniapuna au poui ma terei ma waira ma vioai. ⁸ Numa gara ma pulo aniapuna anitereġaġara ma tere-kwawiviroi da dobuna ma gari. Ma au anirui anitereġaġara ma vidawei.

⁹ —Ma oil viaianana ma vaia ma numa gara ma purapura anatapui au orana ma buloi ma ma vovivirei da vivivireina. ¹⁰ Ma pulo aniapuna ma ana purapura maiteni ma buloi ma ma vovivirei da vivivireina. ¹¹ Anioġa abomana ma ana animairi maiteni ma buloi ma ma vovivirei da vivivirei.

¹² —Aaron natunatuna ma neiai numa gara vivivireina au metaetana ma wairei ma oġai. ¹³ Ma Aaron pirisi ana gara vivivireina ma vioteni ma oilei ma vovivirei da aubaiu ina vipirisi pulo tauapuina. ¹⁴ Ma natunatuna ma neiai ma pirisi pulo tauapuina ai gara ma vioteni. ¹⁵ Ma ma buloi me amai u buloi nanare da ina vipirisi pulo tauapuina. Wei viaianana Aaron ana epaepaia i vovivirei da mara nonoa kimtana patapatana awari ina vipirisi pulo tauapuina. ¹⁶ Moses anatapuna i kauana-paiei me BADA i ririwa nanare.

¹⁷ —Anina ma madeġa au viruaina au pom tagogi nawaravi tagogi, taui numa gara vivivireina i vimairini. ¹⁸ Moses dogo i ġarai ma tuatua i tonei ma terewaba ma anitapejjinana i ragini. ¹⁹ Ma gara ġamoġamo opinei i ġauġauri au tepana i ebani, BADA i ririwei nanare."

²⁰ Anina ma Moses gaima dabadabai ruaḡa bokisi au orana i terei. Ma anipawe loji au orana i vionaḡi bokisi au adana, ma uḡuna i viaitani. ²¹ Ma bokisi i ruiei God ana au numa gara vivivireina ma anitereḡaḡara i terei da bokisi i mae-ḡaḡari, BADA i ririwei nanare.

²² Ma nanare teibol i ruiei God ana au numa gara, anitereḡaḡara i mae ma au doei, au laubadei i terei ²³ ma teibol au tepana palawa i pulopuloei BADA awarina i terei, BADA i ririwei nanare.

²⁴ Rampa aniterenana i vaia ma au numa gara teibol au naona, au babaḡela au rauanaḡei i vikialai. ²⁵ Ma rampa i apui BADA awarina, me i ririwei nanare.

²⁶ Incense aniapuna goldei anitereḡaḡara au naona i terei numa gara vivivireina au orana. ²⁷ Anina ma au tepana incense ḡabuḡabui i apui, BADA i ririwei nanare. ²⁸ Ma anitereḡaḡara i terei da aninae au numa gara vivivireina i gudu.

²⁹ Pulo aniapuna BADA ana numa gara vivivireina au metaetana. Au tepana ḡamoḡamo ma palawa i apui me BADA i ririwei nanare.

³⁰ Ma aboma ḡaeḡaena numa gara ma pulo aniapuna au poui i terei, ma au orana waira i waḡi anioḡa aubaina, ³¹ ma kampa Moses ma Aaron ma natunatuna urai ma aei i oḡai. ³² Tau i aei ma urai e oḡaoḡai maranai e ruirui au numa gara bo e nena pulo au aniapuna.

³³ Ma Moses Numa gara ma Pulo aniapuna i gari-kwaviviroi. Ma anitereḡaḡara i terei au anirui. Anina ma Moses ana nola i kwa.

BADA ana Numa Gara Vivivireina viborumana

³⁴ *Ma apau BADA ana Numa Gara Vivivireina i purui ma ana boruma numana i vioai.

³⁵ Apau numa gara vivivireina au tepana i kiala ma BADA ana boruma numana i vioai ma lamna aubaina Moses eḡa tagotagogina da ita rui. ³⁶ Ma apau i vovoepa lamna maranai mai Israel ina vaḡai au dobuḡela. ³⁷ Ma mepa da apau eḡa ita voepa lana tau i eḡa ina nae.

³⁸ Maranai mai Israel e vaḡavaḡai, BADA ana animae apau au orana numa gara vivivireina au tepana ma waguvarai tauna ai apau au orana e ararata.

Leviticus Levi ai kua

Wei bukana wavana Leviticus, aubaina Levi ana dam e bababaniei. Tau i pirisi pulo tauapuna i vovoagui. Ma BADA ana Numa Gara Vivivireina i paipaini.

Pulo taputapuna apuna

¹ BADA au Numa gara Vivivireina ma Moses i kwatuei ma i riwei i pa, ² “Wei au pariverena pulo apunana aubaina. Mai Israel ma riwei ma pa, ‘Ai ai da BADA awarina gamogamo e apuapui, lamna bulumakau tagogi bo sipu bo gote i gamogamo ina nei ai ana pulo.

³ —‘Mepa da gamogamo taputapuna e apuapui am pulo, ma inanai da gamogamo orotona aiaina ma ega ana apoapoe aiwai. Ma nei ai Numa gara Vivivireina ana au anirui, da BADA ina vianinem.’ ⁴ Ma uram gamogamo au kolana ma terei, wei e vivimaitara da gamogamo i raviepaiaam da ina iraḡe am ḡo’apoapoe ina oḡa-tawanei. ⁵ Ma bulumakau BADA au naona ma viraḡeni, ma pirisi Aaron natunatuna tara, ina nei ai da pulo aniapuna au adana ina voiwaiwaḡa-naiei. ⁶ Anina ma Gamogamo ma opai ma ma api. ⁷ Ma Aaron natunatuna, ai ina viviri pulo aniapuna au tepana. ⁸⁻⁹ Tau i sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oḡai, ma pirisi siana anatapuna ina apui. Wei pulona apuapunana lamna ḡabuna aiaina BADA ina vinuaiaini.”

Wate God Moses i riwei da rava sipu bo gote, gabubu bo bunebune ita puloei me pulo e apuapui nanarena. Tauna wate Moses i riwei da menanare wei ina puloana-nei.

3

Vieḡualau pulona

¹ BADA Moses awarina i babani i pa, “Ai ai da nuuba amna aubaina ana pulo bulumakau e apuapui, ma inana-kauei da burumakauna orotona bo wavinena, aiaina ma ega ana apoapoe aiwai. ² Ma urana gamogamo au kolana ina terei ma ina viraḡeni Numa Gara Vivivireina ana au anirui. Ma pirisi Aaron natunatuna tara pulo aniapuna au adana ina voiwaiwaḡa-naiei. ³⁻⁴ Ma amoamo monamona ava ma kaina monamona ma ganigani ana monamonana, pirisi ina terei da ina apui nuuba pulona. ⁵ Ma Aaron natunatuna wei monamonai sia taputapuna e ararai au tepana ina terei ma ina apu-tagogiei, pulo aniapuna au tepana. Wei amgogona pulona ma ḡabuna i ai kua BADA awarina.”

Ma gamogamo taupuloina ana numa ravai maiteni ma ai rava ḡelau i sia mae-terenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.

13

Opi dorianana tarawatu

¹ BADA Moses ma Aaron i riwei i pa, ² “Mepa da ai ai kero bo paramaitua i vaia bo opina i lebara ma e notanotai da wei kerona e vivipidoriana, lamna ana rava tauna ina naiei pirisi Aaron bo natuna tagogi awarina. ³ Pirisi kero vioana ina inanai. Mepa da apara au kero e vivimairiana i arapoira ma dogona i ḡaira lamna opidoriana. Ma pirisi ina riwa da tauna ega aiaina BADA au matana.

⁴⁵ —Rava ai ai opidoriana i vaia, tauna gara wanasikasikana ina oteni, aparana ega ina jinai ma naona ina purui ma ina kwatu ina pa, ‘Tau ega ai ai! Ega ona nei au ririvau!’ ⁴⁶ Maranai dorianana awarina e mamae lamna tauna anina miramirana, Tauna ainelana ina mae au tano.”

17

Tara ana tarawatu

¹⁰ *Ai ai Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei. ¹¹ Aiwai anatapui da lawalawai ai lawana au tarai e mamae ma lamna aubaina BADA i riwa da tara pulo au aniapuna ona voiwaiwaḡi da rava ai ḡo’apoapoe ina vaitawanei. Tara lamna lawana, ma lamnei ḡo’apoapoe e vaivai-tawanei.

18

Viawawana ana tarawatu

¹ BADA Moses i riwei i pa, ² “Mai Israel awari ma babani ma ma riwei, ‘TAU BADA ami God.’ ³ Mai Egypt ai kaua eġa ona ġovaivaitei, Wariġa kampa o mae, marina a tarataravainanaiei au Canaan ma ai kaua eġa ona ġovaivaitei. Eġa ai lawana ona vogaġotaġoi. ⁴ Taumi au tarawatu ona voteletelei ma riwau ona vogaġotaġoi. Tau BADA ami God. ⁵ Mepa da au tarawatu ma riwau ona voteletelei taumi lawana ona nelaġai. TAU BADA a riwa.”

⁶ TAU BADA wei au babani bagibagii a vereveremi, “Eġa aiai novuna bo vareina ina viawawanei.

¹⁹ —Maranai wavine nawaravi i vunui tauna miramirana, eġa maiteni ma viawawana.

²⁰ —Eġa oroto ġelauna awana maiteni ma viawawana, lamna tam u vimira-melem.

²¹ —Natunatumi eġa ona puloei god Molek* awarina, aubaina TAU BADA ma vinimala e neinei awariu.

²² —Eġa aiai orotona, oroto ġelauna ina viawawanei, me oroto waivine e viawawanei, wei lamna ġo’apoapoe kaukauana God au matana.

²³ ✧—Eġa aiai orotona ġamoġamo ina viawawanei bo wavine ina verena-melei da ġamoġamo ina viawawanei. Mepa da wei u kauai tam u vimira-melem.

²⁴ —Eġa wei kauai ona kauai da ina vimiramiraimi. Dam au Canaan maemaiei anatapui wei kauai i kauai ma i vimira-melei. Lamna aubaina ana viaġaġana-opunei ma taumi ona rui.”

19

Apoapoe terevai-ġijimanina riwai

¹ Ma BADA Moses i riwei i pa, ² “Dam Israel anatapui ma tuarui ma ma riwei, ‘Taumi lawana vivivireina ona maeni. Aubaina Tau BADA ami God vivivireiu.’

¹⁷ —Eġa oram ina raviapi ai kaua apoapoen a ravana awarina, wate maiteni ona kiala da kaua ona tere-vaiġijimani, da eġa ġo’apoapoe ona kauai.

¹⁸ ✧—Eġa ma raubiwa am rava awarii, eġa aiai ma ġoaġaiei, wate rava turam nuanuam ina vaia me tam nuanuam e vaivai-melei. TAU BADA.”

20

Konaġa riwana

⁶ Aiai ravana i ġoei da kaua anoi ita aramanei, lamna Tau ina vibaġaiu. Eġa vinuaterena aubaina ina nae konakonaga awarii ina bababani. Mepa da aiai wei i kauai, nai ravana ana mae-puputei, ma au rava awariei ana viopuni.

24

Vimaimaia riwana

¹⁹ Mepa da aiai turana i vikeroi, aiwai i kaukaueia awarina nanare ina kauai. ²⁰ Mepa da gelama i viaigai, gelamina tagogi ina wanagai, mepa da mata tagogi i viapoapoeni, matana tagogi ina apoapoei. Mepa da ivo tagogi i viaigai, ivona tagogi ina wanagai. Aiwai keron a rava ġelauna i verei, tauna nanare ina kero. ²¹ Aiai ravana ġamoġamo i viraġeni ina vimaiei, wate aiai da rava i viraġeni, tauna ina iraġe. ²² Wei tarawatuna taumi anatapumi aubaimi, mai Israel ma dobu ġela ravai, aubaii TAU BADA ami God.

* 18:21: Molek lamna mai Ammon ai god ✧ 18:23: Exo 22:19 ✧ 19:18: Mrk 12:31

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biāga sorodia. Wei bukana nanare Mai Israel ai mae au mutulua madega 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

²² BADA Moses i riwei i pa, ²³ “Aaron ma natunatuna ma riwei da wenanare mai Israel ina viaiaini ina pa,
²⁴ BADA ina viaiainimi
ma ina gagaloemi.
²⁵ BADA ivina ina ai awarimi
ma ina paina-kauemi.
²⁶ BADA ana nuaiaina ina mae-tavirei awarimi
ma nuuba ina veremi.
²⁷ Ma nanarena, maranai Aaron ma natunatuna Tau wavauei mai Israel e viviaiaini, ma Tau ana viaiaini.”

13

Taurauivu Canaan i tuvirevirei

¹ BADA Moses i riwei i pa, ² “Mai Israel ai dam 12 au orai rewapana tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”
³ Ma BADA i ririweia nanare Moses i kauai. Mai Israel ai dam 12 babadai i paritawanei. Tau i garavu au mutulua Paran i voterei da i nae au Canaan.

¹⁷ Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu violaolana ona naeni da au navanava gelauna. ¹⁸ Dobu ona tuvirevirei, ma ana patara ona inana menanare, rava ai maga ma ai rewapana bo ai gōkokokara? ¹⁹ Doa maumaurana bo ega? Ai melagai ona tuvirevirei, garigarina bo e mamae lota? ²⁰ Doa maumaurana bo ega? Ai e gogogo bo ega? Ma ona kauana-guratei da ai anoi gelau i ona purai da ona neiai.”

²¹ Anina ma tau i dobuna i naeni, au mutulua Zin* i vikarei ma dobuna i naeni da au gila dewadewana au Rehob, wei lamna Lebo Hamath au geregerena.

Taurauivu i nememei

²⁵ Au pom 40 taurauivu dobu i tuvirevirei ma i nememei, ²⁶⁻²⁷ I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i parivere i pa, “U paritawanelai da dobuna a ivui, marina grape ana gōu marana ma a inana da ani ipi gabuna aiaina ma doa maumaurana, ma aina anoi gelau i neiai da ona inana. ²⁸ Wate kampa rava gāigaiawai e mamae, ma ai melagai i rata kaua ma i gari-kwaviroiro da ega gavia ina rui. Ma kampa mai Anak a inana. ²⁹ Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

³⁰ Ma Caleb, rava i riwei da i genuana ma i riwa i pa, “Tana nae dobuna ravai tana virubai ma dobuna tana vaia!”

³¹ Wate taurauivu maiteni i gēgae i pa, “Ega! Ravai i virewapana kaua ega me tauta. Ega tana viḡaviei.” ³² Ma nanare tau i nai dobuna ana apōpōe riwana i vibabarai mai Israel awari i pa, “Nai ega ani ipi doana aiaina ma rava manamanai ma gāigaiawai kampa e mamae. ³³ Ma kampa rava gāigaiawai Mai Nephili† a inana (Mai Anak noinoii) tauai a inana-meleiai lamna me kapau ma nanare tauai au matai lamna tauai me kapau.”

* **13:21:** Wei lamna dobu gaeḡaena Negev au paratana i vikarei da i nae da ola Hermon au geregerena ma Hamath melagaina. † **13:33:** Mai Nephili ega tata aramana-kauai, wate tau rava gogogobui. Gen 6:4 e ririweta da tau meiei i nei.

14

Mai Israel Moses ma Aaron i viġaviei

¹ Ma nai waguvaraina rava anatapui i tou mara. ² Taui anatapui Moses ma Aaron i viġaviei i pa, “Airake au Egypt ata irage ota! Bo weka au mutulua. ³ Aiwai aubaina BADA e nainaieta wei au dobuna da ravai sodei ina viraġenita ma awawata ma natunatuta ina pani-naiei. I ai kaula da tata wanaviraite au Egypt.” ⁴ Ma taui i babani vivira i pa, “Bada tana vinei da ina naiana-meleta au Egypt.”

⁵ Anina ma Moses ma Aaron i mae-ġaira da naoi au doa Israel patarana au matai. ⁶ Nun natuna Joshua ma Jephune natuna Caleb ruagai, taui maiteni dobu i tuvirevirei, ai gara i sikai, ⁷ ma mai Israel anatapui i riwei, “Dobuna anatapunana a naeni ma a tuvirevirei ma dobu maumaurana. ⁸ Mepa da BADA nuanuana ina ai awarita ma ina ruieta dobuna maumaurana awarina, weka sia ma lam eġa anibaiana. ⁹ Wate BADA eġa ona viġaviei. Ma ravai dobuna e maemaeni eġa ona rovoei, tana viaġaġana-opunei. Taui ai agu eġa. Tauta BADA maiteni ta mamae! Ravai eġa ona rovoei!”

¹⁰ Mai Israel Caleb ma Joshua ġaimie ita viraġeni wate BADA ana borumana i eġa numagara au tepana.

God Moses i riwei da ita wanaviraite ma ana rava ita taravaina-naiei au mutulua da etanai e nenaie au Boga lebalearina ita naeni.

God i riwa da rava ina kovoġi

²⁶ BADA Moses ma Aaron i riwei, ²⁷ “Wei ravai apoapoe ai beura awariu a nonora, iauiei! Mai Israel ai pariviravira awariu a nonori.” ²⁸ Wenanare ma paribelei, “BADA i riwa, ‘Tau wavauei a ririwa da aiwai o vivibagei, nanare ana kaei.’” ²⁹ Taumi au mutulua tupuami urabovai ina nae. O pari-virevireu aubaina taumi ami madeġa 20 ma e ġeġae ona irage. ³⁰ A parivainuaġami da wei au dobuna ota mae wate eġa aiwi tagogi wei au dobuna ina rui anina Jephune natuna Caleb ma Nun natuna Joshua.

³¹ Ma o ririwa da natunatumi ina vaia ai panipani, wate taui kampa ana ruiie da dobuna o gedugeduiaieia ina maeni. ³² Wate taumi patarami tupuami au mutulua ina bova-nae. ³³ *Eġa ota vipatutu ma lamna aubaina natunatumi ina vinuapoapoe au mutulua ma ina kovoġi da ina viġamoġamo-nae da madeġa 40 ina kwa nai maranaina taumi kimta magurimi ona irage-pai. ³⁴ Aupom 40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo'apoapoei aubai au kovoġa malana ona vaia. ³⁵ TAU BADA, A riwa! Tau wei ana kaei taumi ġo'apoapoe ravami anatapumi awarimi. Ami rava maiteni o vitagogiemi ma o viġavieu. Taumi anatapumi au mutulua ona kwa, taumi weka ona irage.

20

Miriam i 'rage

¹ Nawaravi au vouna mai Israel anatapui au mutulua Zin i ġeta ma au Kadesh i rauġaravu. Weka Miriam i 'rage da i doboi.

Mai Israel Moses maiteni i viparipariniġai

² *Kampa Waira eġa ma lamna aubaina taui i vitagogiei ma Moses ma Aaron ai ġavia i vomairi, ³ ma Moses maiteni i viparipariniġai i pa, “Rorova varevareiai maiteni ata irage tagogi BADA au matana!” ⁴ Aiwai aubaina BADA ana rava u neiai au mutulua ana ġamoġamoi da ina irage ⁵ Aiwai aubaina Egypte i tere-opunelai ma u neiai wei dobuna apoapoena awarina? Weka eġa ani ipi doana aiaina da witi da damala aina bo grape warami bo Pomegranates aina ina gogo, ma eġa waira aniuma!

⁶ Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i eġa. ⁷ Ma BADA Moses i riwei, ⁸ “Am jiġona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai ġamoġamo maiteni. ⁹ Anina ma Moses jiġona BADA au naona i vaia, i ririwei nanare.”

Moses kira i ravi

¹⁰ Ma Moses ma Aaron dam Israel i vitagogiei kira au naona ma Moses i riwa, “Ora potapotami! Ona genuana! Tauai waira kira au orana ana tere-opuniai aubaimi!”

¹¹ Ma Moses ana jiġona i voepai ma kira i ravi mara ruagā. Ma waira ġaeġaena i ruba-opu da rava ma ġamoġamo i uma.

¹² Anina ma BADA, Moses ma Aaron i riwei, “Taumi eġa ota vitumaġana-kauēu da Tau vivivireu ami dam Israel au matai, ma lamna aubaina taumi eġa wei ravai ona ruiei dobuna a vereveremiana awarina.”

Aaron i 'raġe

²³ Au ola Hor, Edom ana au parata, kampa BADA Moses ma Aaron i riwei, ²⁴ “Taumi riwau o rauaġaġaie au Meribah ma lamna aubaina, dobu mai Israel a vereveiea, Aaron kampa eġa ina rui. Tauna noinoina ina votaġoi. ²⁵ Aaron ma natuna Eleasar ma taravaia ma ma ġaei au ola Hor. ²⁶ Kampa Aaron ana pirisi garana ma votawanei ma natuna Eleasar ma vioteni. Aaron kampa ina iraġe ma noinoina ina votaġoi.”

²⁷ Moses BADA i ririwei i kauēi. Tauī ola i ġaeni, mai Israel anatapui au matai. ²⁸ Moses Aaron ana pirisi garai i votawanei ma natuna Eleasar i vioteni. Ma kampa ola au tepana Aaron i 'raġe. Ma Moses ma Eleasar i ġaira memēi.

²⁹ Maranai patarana i aramanei da Aaron i 'raġe ma i touēi da au pom 30.

21

Mota bronzei i kauēi

⁴ Tauī ola Hor i netawanei ma boga lebalebarina etanaina i vaia da Edom ita vorei. Au etanai rava amlōi i ġaġai aubaina ai vaġai i manawa, ⁵ ma Moses ma God i eni i pa, “Aiwai aubaina Egypte o taravaina-opunelai da au mutulua ana iraġe? Ai lam eġa! Ai waira eġa! Ma wei lam tagogina manna a amġeduaiei.”

⁶ Ma BADA mota ġaġaġaiewai i paritawanei awari ma maġamaġau i ani ma i 'raġe. ⁷ Rava i nei Moses awarina ma i riwa, “Tauai ġo'apoapoena a kauēi maranai BADA ma tam a parivireviremi. Ma raupari da BADA mota ina vaitawanei.” Ma Moses i raupari rava aubaii.

⁸ Ma BADA Moses i riwei i pa, “Mota ġaġaġaiewana kokoitauna ma kauēi ma ai au damona ma raġini. Maranai mota, rava aiāi i ani ma i taepai da mota kokoitauna i 'nanai, ma tauna ina lawana.” ⁹ *Ma Moses mota bronzei i kauēi ma ai au damona i raġini. Maranai mota aiāi i ani ma ravana i taepai da mota i 'nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauġaravu. ¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei. ¹² Kampa da i nae Zered au wapuna i rauġaravu. ¹³ Ma wei dobuna i netawanei ma i nae waira Arnon au baba ġelauna au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i vovaiubai

²¹ Ma mai Israel taupariverena i paritawanei da Sihon mai Amori ai gulau i pariverei i pa, ²² “Tauai a ġoēi da am au dobu ata verautua. Tauai eġa ana deġa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei.”

²³ Wate gulau Sihon mai Israel eġa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ġeta da Israel maiteni i viġaġaġaiewa. ²⁴ Wate mai Israel i virewapana ma gulau Sihon i viubai ma ai dobu waira Arnon i ġae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauēi ma lamna aubaina mai Israel eġa ai au dobuna ita rui. ²⁵ Ma mai Israel i viġavia da, mai Amori ai melagai i vaipai da i maeni, taon Heshbon ma melagai ġelau kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae ³² Ma Moses tauivu i paritawanei da Jaser taon i tuvirevirei, ma muriai mai Israel i nae ma ai melagai anatapui i vaia ma mai Amori kampa maemaēi i viaġaġana-opunei. ³³ Ma mai Israel i vira ma etanaiei i ġae au Bashane. Ma Bashan ai gulau Og ai sorodia anatapui maiteni i opui da tauī i nebelei au Edrei. ³⁴ Ma BADA Moses i riwei i pa, “Eġa tauna ma rovoēi, aubaina tauna, ana rava anatapui, ma ai dobu maiteni au uram a teretere. Aiwai u kauēi Amori ai gulau Sihon awarina, au Heshbon taon, nanare gulau Og awarina ma kauēi.” ³⁵ Ma gulau Og i viraġeni

* 21:9: 2Ki 18:4

natunatuna nelarai ma rava anapapai i viragena-pai, ega ai ai ita mae. Ma mai Israel dohuba i vaia da ai dohu.

22

Balaam Israel gāgalana i geduaiei

¹ Ma mai Israel i vomairi da Moab au wapuna, Waira Jordan au adana i raugaravu, ma au baba gelauna Jeriko taon. ² Ma mai Israel aiwai i kauēi mai Amori awari, Zippor natuna Balak anapuna i 'nana-pai. ³ Mai Israel i mağa kua ma lamna aubaina mai Moab i rovo kaukaia, rovo ita iragelei. ⁴ Ma mai Moab mai Midian babadai i riwei i pa, "Aburuna ava ma wei patarana aiwai anapuna au ririvata ina pupuna-pai, me bulumakau au wapu modu e amam."

⁵ Anina ma Moab ai gulau Balak, Beor natuna Balaam ana riwa i paritawanei au Pethor, waira gaegeaena wavana Euphrates au ririvana. Ana riwa wenanare, "Dam tagogi Egypte i opu, ma dohu anapuna e vaivaia ma marina au ririvau i raugaravu. ⁶ Tau i virewapana kaua ega me tau, ma nei ma ravai ma parivai-iviapoapoeni, mepa da tau ravai ana vovaiubai ma wei dohubenei ana viağağana-opune. Aramanei da maranai tam rava e viviaiaini tauna viaiaina e vaivaia ma maranai u parivai-apoapoeni tauna ina apoapoe." ⁷ Ma Midian ma Moab babadai mane i vaia Balaam vimaiana aubaina ma i vomairi. Ma i geta Balaam awarina ma Balak ana riwa i pariverēi. ⁸ Balaam ravai i paribelei i pa, "Weka ona matave ma au maratom BADA aiwai ina riweu ana pariveremi." Ma babadai kampa Balaam maiteni i mae. ⁹ God i nei ma Balaam i vitara-virevirei i pa, "Aiavoi i nei awarim?"

¹⁰ Balaam i paribelei, "Zippor natuna Balak, Moab ai gulau wei riwana i paritawaneiai i pa, ¹¹ 'Ma rautaniğana dam gaegeaena Egypte i opu ma dohu anapuna e vivioai. Ma nei ma aubaiu ravai ma gāgalei, da maiteni ana viğaiğaiawa ma ana viagagei da ina vinelana."

¹² Wate God Balaam i riwei i pa, "Ega maiteni ma nae. Ega wei ravai ma gāgalei aubaina Tau au viaiaina awarii."

¹³ Ubaubana Balaam i nae ma Balak ana taupariverena i riwei, "Ona nae me ami au melağail BADA ega ita vianineu da maitemi tana nae."

¹⁴ Ma Moab babadai i nae me ai bada Balak awarina ma i riwei i pa, "Balaam ega ita goei da ita nei."

Anina ma Balak babada gaegeae i paritawanei Balaam awarina. Ma i riwei da pulo gaegeaena ita verei mepa da tauna ita nei da mai Israel ita gāgalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauēi.

²¹ Ma ubaubana Balaam i vomairi ana donki i vokaukauei ma Moab babadai maiteni i nae. ²² Wate God amlona i gāiğai kaua da Balaam i nenaē, ma ana anela i paritawanei da ana etana i mae-tomeni. Balaam donki i gerui ma ana taunola ruağa maiteni i nenaē. ²³ Ma maranai donki BADA ana anela i 'nanai ana sodna au etana i maimairi ma i tawana-ruiei au ririva. Balaam donki i kwakwapui da ita opu me au etana i.

²⁴ Ma BADA ana anela etana i ġuriğuririna i mae-potai, Grape ġoroğorovai epaepana ruağa ġaime i garigaria au poui. ²⁵ Maranai donki BADA ana anela i 'nanai ma ita değa lamna Balaam aena au gari i viairaturatui. Ma Balaam donki i kwapu-melei. ²⁶ Ma BADA ana anela i nae ma etana i ġuriğuririna i mairi, weka ega gabu ita maae-dadana da tau i ita değa. ²⁷ Maranai donki anela i 'nanai, i mae-ğaira da i kiala, Balaam amlona i gāiğai kaua ma ana iğonei donki i kwapui.

²⁸ Anina ma BADA donki gamona i votawanei da i babani i pa, "Aiwai apoapoena a kauēi awarim da mara tonuğa u kwapui?"

²⁹ Balaam donki i riwei i pa, "Tam u vikalokaloē me bua! Awariu sod lamna marina ata viragenim."

³⁰ Ma donki Balaam i riwei i pa, "Tau donkina tagogina marana patapatai u gerugerui bo? Wenanare a kauana dadanei awarim bo ega?"

Balaam i riwa, "Eğai!"

³¹ Ma BADA Balaam matana i vikalai da ana anela i 'nanai ana sodna i maimairi au etana i. Ma i mae-ğaira au doa ma i raudune.

³² Ma BADA ana anela i riwa i pa, "Aiwai aubaina am donki mara tonuğa u ravi? Ma nonori am vağai lamna ega aiaina, Tau a nei da ata viğaeam.

³³ —Mara tonuğa am donki i 'nanai ma mara tonuğai i degeu. Mepa da ega, lamna tau ata viragenim ma donki ata voterei."

³⁴ Ma Balaam BADA ana anela i riwei i pa, "A kauana-boai. Ega ata aramanei da tam au etana i u maimairi da uta viğaeui. Marina mepa da u notai da ega ita ai au matam, tau ana nae me."

³⁵ BADA ana anela i riwa i pa, “Ravai maiteni ma nae, wate aiwai ana riwem lamna ava ma latoni.” Anina ma Balaam, Balak ana babadai maiteni i nae.

23

Mara tonuḡa Balak pulo i apui Balaam ana god awarina da mai Israel ita ḡaḡalei. Wate marana patapatai Balaam eḡa mai Israel ita ḡaḡalei. Ma God aiaina ita kauēi mai Israel awarii lamna ava i babaniei. Balaam mara 4 God ana babani mai Israel awarii i babaniei. Wei lamna ana babani viruaina.

¹⁸ Ma Balaam wei riwana i riwei i pa,
“Balak, Zippor natuna ma vomairi;

ma Ma rautaniḡana kaua.

¹⁹ God eḡa rava ota, Tauna eḡa ita morumoru.
Bo ana nota ita viravirai.

Tauna aiwai i babaniei,
nanare ina tupua

Aiwai i parivainuḡani;
nanare ina kauēi.

²⁰ I riweu da wei ravai ana viaiaini;
maranai God e viaiaina, tau eḡa tagotagogina da ana virai.

²¹ BADA ai God
taui maiteni e mamae, ma tau i vovoepaepai da Tauna ai gulau.

Tauna eḡa nuabola bo apoapoe ita neinei i Jacob ḡoḡoḡana - mai Israel awari.

²² God tau i Egypte i tere-opunei,
Aubai i viḡavia me bulumakau moduei.

²³ Eḡa ai i Israel ina ḡaḡalei,
bo ina baravui.

Marina rava ina riwa,
‘Ona inana i God aiwai i kauēi mai Israel aubai.’

²⁴ Mai Israel lamna me Lion vivirewapanana.
E vovomairi da ana ḡavia e viviraḡeni
ma tarana e umaumai,

Anina ma ina rauvirai da ina matave.”

24

Anina ma Balaam mara vi-four-na God riwana i babaniei, i pa:

¹⁷ “God i viatataieu da rava muriai e nenei,
a inana i wate eḡa laḡilaḡina ita nenei,

Jacob ana damei gulau ana jiḡona

Ana borumana me ubona gamrina Israelie e opuopu.

Moab muruai ma Seth natunatuna
anatapui kolai ina viaigwadagwadai.

¹⁸ Ana ḡavia Edom ina vovaiubai
ma ai dobu ina vaia,
ma mai Israel ina virewapana guratana.

¹⁹ Gulau, Jacob ana damei ina nei
ma mai Moab mae-teretere ai au melagai ina pupuni.”

25

Mai Israel, Baal i raudunelei

¹ Maranai mai Israel au Shittim i mamae, nelara i vikarei da Moab waivinei i viawawanei.

² Wei waivine, nelara i riwei da i nei da ai god awarii puloi i apuapui.* Ma anatapui i am gogona ma ai godna i raudunelei. ³ Wei kauanei mai Israel Baal-Peor i voepaepai ma lamnei BADA ana meji i vikalai.

⁴ BADA Moses i riwei i pa, “Babadai anatapui ona vaia ma madeḡai BADA au matana ona viragena-naiei, da tau au meji awarimi ina dauva.”

* **25:2:** Wei kauai lamna god ḡelauna i raudunelei, ma lamnei Moab waivinei ai vitumaḡana nanare i eraerawa. Maranai Israel nelarai wei waivinei maiteni i viawawana, tau ai god Baal i raudunelei ma i vovogui da ai dobu ita viaiaini da ita maura.

⁵ Ma Moses Israel babadai i riwei i pa, “Taumi tagotagogi ava ami au dam anatapui da Baal-Peor i raudunelei ona viraḡeni.”

⁶ Moses ma Israel patarana BADA ana numa gara au metaeta i toutou, ma au matai oroto Israeliei wavine Midianei i taravaina-ruiei ana au numa gara. ⁷ Maranai Aaron ḡoḡana pirisi wavana Phineas wei kauana i nananai, boru i voterei ma pawasi i lavui, ⁸ ma Israel iei i votaḡoi da ana au numa gara ma pawasiei uporana i tonai da wavine au uporana i opuvivira. Ma doriana apoapoena au Israel i kwa. ⁹ Wate wei gimna rava 24,000 i viraḡeni.

¹⁰ BADA Moses i riwei i pa, ¹¹ “Aaron ḡoḡana pirisi Phineas au meji mai Israel awari i viubai; da tau i eḡa ata pupuni aubaina tauna ana nota me tau au nota, rava eḡa ḡod ḡelau i voepaepaei anina Tau ava. ¹² Lamna aubaina tauna ma riwei da maiteni parivainuaḡana bagigabina ana kauēi da ata ruaḡa tana viturana vivira. ¹³ Tau aubaiu ina vipirisi nonoa.”

27

God Joshua i vinei

¹⁸ *Muriai BADA Moses i riwei i pa, “Aruau Nun natuna - Joshua awarina, lamna aubaina ma taravaini ma uram au tepana ma terei da ma vovivirei au nola aubaina. ¹⁹ Ma naei Pirisi Eleasar awarina, Israel patarana anatapui au matai ma ma viaiaini da ina raviepaiem. ²⁰ Ma vovai-virewapani da Israel patarana tauna ina rautaniḡanei. ²¹ Tauna Pirisi Eleasar maiteni ina nola da ḡaima e ḡoreḡorei *urim*, * awarinei au nota ina vvaivaia. Wei taunei Eleasar, ma Joshua ina aḡui Israel ai au lawana.”

²² Ma BADA aiwai i ririwei, Moses nanare i kauēi. Joshua i taravaini ma Pirisi Eleasar ma Israel patarana au naoi i vimairini. ²³ Ma urana au tepana i terei ma i vinei da ana raviepaia.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana i mamae ma, mai Jeriko au baba ḡelauna. Ma BADA Moses i riwei, ⁵¹ “Wei riwai mai Israel ma riwei, ‘Maranai Jordan o damani da au Canaan, ⁵² Dobuna taumaenina anatapui ona viaḡaḡana-opunei. Ai gana da ai kokoitau anatapui ona rika-viamoamoai. ⁵³ Dobu a veremi ona vaia, ḡariemi da ona maeni. ⁵⁴ Doa ona ḡutai dam damai awarii, au ḡaima ina viatataiem nanare. Doa vounaina dam vounaina ona verei ma dam voaburuna nanare ana ḡuta voaburuna. Wate ḡaimei ana pariveremi metauna damna, metauna doana ina vaia. Dam anatapui doa ina vaia.

⁵⁵ —‘Wate mepa da nai dobuna taumaenina eḡa ona viaḡaḡana-opunei ma o vianinei da ina mae, tau lamna me vunavuna au matami bo donadona au ririvami maemaena, ma wei vita ḡaeḡaena ina veremi wei au doana. ⁵⁶ Mepa da ravai eḡa ona viaḡaḡana-opunei. Lamna taumi ana pupunimi me a vioge i da tau i ana pupuni.”

35

Anigagalo melagai

⁹ Ma BADA Moses i riwei i pa, ¹⁰ “Mai Israel ma riwei, ‘Maranai Waira Jordan o damani da au Canaan o rui, ¹¹ melagai ḡelau i vinei da rava ai aniḡaḡalo. Maranai rava turana i vunuboi da i ‘raḡe, tau i weka ina ruba da ina gagaloei.’ ¹² Ona riwei, ‘Weka ma mae da raubiwa ravai eḡa ina vodadanim ma rauetara ma paini.”

* 27:18: Exo 24:13 * 27:21: Urim lamna ḡaima aburuna. Ma nai ḡaemana pirisi e viviatataiei da God ana nota i ririweta. Tauta ega tata aramanei 29-30 Exodus ma inanai.

Deuteronomy Tarawatu Viruaina

Pariverena

Moses wei au *bukana* mai Israel i parivere i menanare ina kauanei maranai au Canaan ina rui da ina vaia da ina viġariei. Moses eġa maiteni au dobuna ina rui ma lamna aubaina i vitauririwei muriai da tauna ita iraġe. I parivainotai menanare God tau i Egyptei i taravainaponeia ma au mutulua i 'nana-vaitetei. I riwana-melei menanare God ina voteletelana-kauai maranai i rui au Keinan.

Mai Greece ai ponei, wei *bukana* wavana* anona Tarawatu Viruaina, aubaina Moses marina mara viruaina God ana tarawatu mai Israel e vereverei. Wei lamna eġa tarawatu vouna bo tarawatu tapuna ma tagogina.

4

Moses mai Israel i egari da God ina voteletelei

¹ Ma Moses, Israel i riwei i pa, "Mai Israel Ona rautaniġana kua! Au Tarawatu ma au viararamana anapui ona votelatelana-kauai da ona lawana da BADA, noinoita ai God, dobu i vereveremi, ona vaia da ina viġarimiei. ²BADA ana tarawatu a ririwemi, eġa tarawatu ġelau i tepana ona viruini ma eġa ona vaitawanei. Anina ona voteletelei."

⁶ Tarawatu i ona vojijina-kauai da dam ġelau i ami nuaulaula ma ami aramana ina inana. Ma tarawatu ina nonori ma ina riwa, "Riwa kua da dam Israel lamna dam nuauaulaula ma araramani. ⁷ Ata BADA au ririvata ma e vovoaguita maranai ta raruapari awarina. Metauna damna ġelau, ġaeġae bo muomuoi, ai God nanare ai rava awarii e kaukai. ⁸ Tarawatu ai ai ma jijimani anapui amadodo a ririwemi, Eġa mepa dam ġelauna aburuna bo ġaeġaena ana tarawatu jijimanina me wei."

³²⁻³⁴ Maranai BADA urana vivirewapananei Egypt ei i tereopunemi, tauna kua babai ma viwapanai i kauai. Mai Egypt i vipupui aubaimi. Ma i vainimi da natunatuna, ma au ola Sinai o nonori awarimi i babani, ma o nonori ai menamena au orana ma awarimi i babani, ma lawalawaimi o mae! Wenanare wariġa i tupua dadana awarii bo eġa? Eġa! Ona nae me da au karena, maranai God oroto ma wavine i kauai da marina; ma dobu au giana da dobu ġela au giana ona baiei. Kua wenanare aniba i tupua-dadana bo eġa?

³⁹ Amadodo ona aramane i ma eġa melanai nuanuami ina vuru da BADA lamna God au mara ma au dobu. Eġa god ġelauna ita mamae. ⁴⁰ Ana tarawatu amadodo a vereveremi anapuna ona voteletelei. Da aiwai anapuna ina ai taumi ma ami epaepaia au murimi ma ami mae ina manawa wei au dobuna BADA e verevere-nonoemi.

6

BADA ami God nuanuami ina vaia

⁴*Ona rautaniġana Oo Israel! BADA ata God, Tauna ava BADA. ⁵*Nuanuami ina vaia orami anapune i ma aruami anapune i, ma ami rewapana anapune i. ⁶*Wei tarawatuna amadodo a vereveremi ona vojijina-kauai. ⁷ Natunatumi ona viararamani. Ona babanie i maranai o viboruboru numa au orana bo o bababara-nae, bo muriai da ona matave bo o matave-vomairi."

7

BADA ana rava vinevinei mai Israel

¹*Ma Moses mai Israel i riwei, "Maranai BADA ami God i ruiemi dobuna i vereveremiana; Tauna au naomi ami ġavia anapui ina viaġaġana-opune i: mai Hitti, mai Girgash, mai Amori, mai Canaan, mai Perisi, mai Hivi, ma mai Jebus. Dam seven ġaeġae ma vivirewapanau kauai eġa me taumi. ² Ma maranai BADA ami God tau au urami i terei ma o vovaiubai lamna taumi wei ravi on pupuni. Eġa maiteni aiwai babanina ona kauai; ma eġa ona rau-naupoapelei. ³ Eġa awarii ona tavine. Eġa natunatumi gugunii bo laragai ona verei da ina ravaġi. ⁴ Aubaina natunatumi ina ravine da BADA ina voterei ma god ġelau ina raudunelei.

* :: Deuteronomy ✧ 6:4: Mrk 12:29 ✧ 6:5: Mrk 12:30 ✧ 6:6: Deu 11:18-20 ✧ 7:1: Act 13:19

Ma BADA ana amloḡaiḡai awarimi ina nei ma ina pupunimi. ⁵ Wenanare awari ona kauē. Ai pulo aniapuna ona viairikarikai ma ganai ona viaigwadagwadai; ma Asherah kokoitauī ona viaiḡaiḡai ma ai au menamenana ona apui. ⁶ *Aubaina BADA taumi i vinemi ma i viaiainimi Tauna aubaina. BADA rava maḡamaḡai au dobu ma taumi i vinemi da ḡarinei.

⁷ —Ma BADA eḡa ita rauoḡarem ma ita vinem aubaina taumi dam patarana ḡaeḡaena, eḡa me dam ḡelauī. Riwa kaua da taumi dam aburuoina au dobu. ⁸ Wate BADA nuanuami i vaia ma parivainuaḡana bagigabina noinoimi maiteni i kauē. Ma lamna aubaina urana virewapananei panipani au orana i vai-melemi, Pharaoh - mai Egypt ai gulau awarina. ⁹ *Ona aramana-kauē da BADA ami God. Tauna ava God ma tauna God vipatutuna ma aiwai e ririwei e kaukauei. Taui da nuanuana e vaivaia ma ana babani e vovoteletelei, Tauna taui nuanuana e vaivai-kauē ma e viviaiaina-kauē i parivainuaḡani nanare da kimta tausau. ¹⁰ Wate taumi da BADA o rauaḡaiḡai; Tauna eḡa ina volatelatemi ma ina pupunimi. ¹¹ Nanare taumi ona inana-kauē da tarawatu ma viararamana anapui amadodo a vereveremi ona voteletelei.”

8

BADA ami God eḡa nuanuami ina vuru

² Moses ana rava i riwei i pa, “Nuanuami eḡa ina vuru; menanare BADA ami God au mutulua i ravenimi da madeḡai 40 da volaḡota ota aramanei ma orami ana rewapana ita inanai. Ma ita aramanei ana tarawatu ona voteletelei bo eḡa. ³ Ee nanare! I viamiraḡenimi da o volaḡota ma mannei i viambagibagim. Amamami maiteni manna o vinuanainei; eḡa mepa ota amdadani. I kauē da ita viararamanimi da rava eḡa lam ava awarinei ita mamae, wate riwa anapui BADA gamonei e opuopu.

¹² —Maranai o amam kaua, ma numa aiaii o maemaeni, ¹³ ma maranai ami bulumakau ma sipu borui e maḡamaḡa, ma e vivipurapura; ma e maumaura-kaua. ¹⁴ Ona inana-kaua da eḡa ona mae-ḡaeḡae, ma nuanuami ina vuru! Da BADA menanare Egypt ei panipani au dobuna i tere-opunemi. ¹⁵ I taravaina-naieimi au mutulua ḡaeḡaena ma vi'nirovorovona mota ḡaiḡaiawai ma tanara ai dobu. Dobu paipairana ma eḡa waira. Wate i kauē da kira i ravi ma waira i ruba-opu taumi aubaimi. ¹⁶ Au mutulua *manna* i veremi da o am; amamami nai lamna eḡa ita am-dadani. Wei lamnei i raudadanimi da ota volaḡota; da au damona ami lawana ita ai. ¹⁷ Ona inana-kaua da eḡa au nuanuami ona riwa, 'Tauai ai rewapanei ma ai egolei a vipurapura ma a maura.' ¹⁸ Wate BADA am God eḡa nuanuami ina vuru aubaina tauna tepanei ta maumaura, ma lamnei parivainuaḡana bagigabina noinoimi maiteni i kaukauei e rarauano.”

11

God aiwai i kaukaueia ona notai

¹⁸ *Moses mai Israel i riwei, “BADA riwana eḡa nuanuami ina vuvuvuru ma ae-tuḡuna ona rereḡi. Ona girumi da au urami ona raḡini ma ḡelauī au muruami ona raḡini ami mataira. ¹⁹ Natunatumi ona viararamani, ona babaniei: ami au viboruboru bo maranai o bababara bo o vililauvitau ma maranai o vovobagibagi.

²⁶ —Ona inana! Au naomi viaiaina ma kovoḡa a tereterei, ma tam am ḡoana. ²⁷ Marina BADA ami God ana tarawatu a vereveremi. Mepa da Ona votaḡotaḡoi; tauna ina viaiainimi. ²⁸ Mepa da ana tarawatu ona geduaiei ma ona mae-taviremi ma god ḡelauī ona viborumei; BADA ina kovoḡimi. ³² Lamna aubaina tarawatu ma viararamana a vereveremi, ona kauana-kauē da ona voteletelei.”

17

Gulau vinena

¹⁴ *Maranai BADA ami God dobu e vereveremia o ruiruiana, ma o vaia, ma numa o voanaiei da o maeni. Ma ona riwa, 'Dam ḡelauī ai gulau e mamae ma tauta menanare?' ¹⁵ Ona inana-kauē da BADA ami dam nununai awariei ami gulau ina vineinei, ma eḡa dobu ḡela ravai ona vinei. ¹⁶ Ma tauna eḡa ana horse maḡamaḡai ina ḡamoi. Ma eḡa rava ina paritawanei au Egypt da horse ina gimarai. Aubaina BADA i riwa da natunatuna eḡa melanai ina naeme kampa. ¹⁷ *Ma gulau eḡa awawana ina maḡa, ma eḡa gold ma silver ina maurei da nuapouna

ina vinua-raġaraġai. ¹⁸Ma maranai i vigulau, tauna pirisi Levi ana damei maiteni ina kiala da nimanei tarawatu bukana ina giruma tauna aubaina. ¹⁹Wei bukana au ririvana ina mae ma ina iava-nonoei ma lamnei BADA ina vivirei ma ana tarawatu ina vipatutuei. ²⁰Ma lamnei eġa ina terepa-melei ma ana rava ina inana-ġairei bo eġa tarawatu ina mae-puputei ma ina deġa au kelakelauna bo au oiena. Ma tauna ma ana epaepaia ina mae gulau au Israel da kimta maġamaġai ina kwa.”

18

BADA wei kauai i geduaina-kauei

⁹Maranai BADA dobu i vereveremiana o ruirui, eġa dobuna taumaeni ai kaua apoapoe ma viminalamai ona ġovaivaitai. ¹⁰*Eġa melanai:

ai ai tam natum orotona bo wavinena ma verenei da pulo aubaina ina apui;
bo ma vimata gamgam, mataira aiwai ma inainanai ma muriai aiwai ina tupua, rava ma ririwei;
bo ma parauma;
bo ma ġaġala;
bo ma vigwerigweri;

¹¹ma eġa konaga bo arua maiteni ma babani bo arua ma ġorei da ina rui awarim.

¹²BADA tau i da wei kauai apoapoe e kaukauei, i geduaina-kauei. Ma lamna aubaina aburuna ava Tauna rava wei dobuna maemaeni ina viaġaġana-opunei au naomi. ¹³Marana patapatana BADA ami God ona voteletei. ¹⁴Wei ravai barabaravui ma paraparaumi. Wate aburuna ava da ai doa anatapuna ona kwalei. Ma BADA ami God e viviġaemi da wei ravai eġa ai kaua ona ġovaivaitai.

God Peroveta me Moses ina paritawaneiai

¹⁵*BADA ami God, Peroveta me tau ami damei ina paritawaneiai. Taumi nai ravana ona rautaniġanei. ¹⁶Aubaina taumi wei lamna o vivibaġei maranai o vitagogiemi ola Horeb au karena ma o riwa, “Eġa BADA ponana tana nonori bo ai ġaeġaena menamenana tana inana-melei da tana vi’raġeraġelana.”

¹⁷BADA i riweu, “Ai vibaġa i ai. ¹⁸Tau ai damei peroveta ana terepai me tam nanare, Ma riwau au gamona ana terei, da aubaiu ina vitau-vibabani. ¹⁹*Tauna wavavei ina jima, ma pariviravirai ana kovoġi. ²⁰Wate maranai peroveta i mae-ġaeġa ma e ririwa da wavavei e jimajima wate tau eġa babani ata verei, bo god ġelauai aubai e nolanola, Nai perovetana ona viraġeni. ²¹Mepa da o vinuanaina, ‘Menanare tana aramane i da lamna eġa BADA ita babani?’ ²²Wenanare ona aramane. Maranai peroveta i babani BADA au wavane i ma anona eġa ita tupua lamna nai babanina tauna ana babani ma eġa BADA. Lamna tauna ana vinuanotanota, nai ravana eġa ona rovoei.”

31

Joshua Moses i raviepaiai

⁷Ma Moses Joshua i kwatuei da i nei. Ma Israel patarai au matai i riwei i pa, “Ma virewapana ma tepam ina tora. Tam wei patarai ma ruiei dobu BADA noinoim i verevereiana. Dobuna ma ġutai da Israel dam ma patai ma ma voagui da ina viġariei. ⁸*BADA Tauoina awarim ina mae ma am etanai ina raveni. Eġa melanai ina netawanem bo ina voterem. Lamna aubaina eġa ma rovo bo oram ina peul”

34

Moses i 'raġe

¹Ma Moses Moab wapuna i netawane i ma ola Nebo i ġaeni da au tepa dewadewana e ġoreġorei Pisgah, ma au navanava ġelauna lamna Jeriko. Weka au Pisgah BADA Moses dobu anatapuna i viatataiei, au Gilead i vikarei da i ġae au Dan. ²Ma dobu Naphtali, dobu Ephraim ma dobu Manasseh, dobu Judah, ma i nae da au Mediterranean bogana. ³Ma BADA Moses mutulua e ġoreġorei Negev i viatataiei; ma Jordan gaubana da i nae da au Jeriko da i nae da au uama Zoar melagaina. ⁴*Ma BADA i riwa, “Wei dobuna lamna Abraham, Isaac ma Jacob

* 18:10: Exo 22:18 * 18:15: Act 3:22; 7:37 * 18:19: Act 3:23 * 31:8: Jos 1:5 * 34:4: Gen 12:7; Gen 26:3; Gen 28:13

a parivainuaḡani da 'ami epaepaipaia ana verei.' A voterem da dobu matamei u inanai, wate au dobuna eḡa ma rui."

⁵⁻⁹ Muriai Moses urana Joshua, Nun natuna au kolana i terei ma i viaiaini ma nuaulaula orana i ruini. Ma lamna aubaina mai Israel Joshua i voteletelei Moses i ririweia nanare. Ma BADA ana taunola Moses, i 'raḡe mai Moab ai au dobu, BADA i ririwei nanare.

Joshua

Pariverena

Wei *bukana* e ririweta da menanare mai Israel i rui au Canaan da rava kampa maemaei i vovaiubai. Ma nanare e ririweta da mai Israel menanare dobu i ġutanei ai dam 12 awari. Wei *bukanawavana* Joshua aubaina bukana au karena e ririweta da aiwai aubaina da Joshua i terei da mai Israel ai bada, maranai Moses i 'rage.

BADA, Joshua i vinei

¹ Maranai BADA ana taunola Moses i 'rage; ma Joshua, Nun natuna ma Moses ana tauagu i riwei, ² "Au taunola Moses i 'rage. Marina mai Israel maiteni ona vokaukama ma Jordan ona damani da dobu a vereveremiana kampa ona ġeta. ³ Metaui dobuti ae-lapalapami o terei, lamna ina viġarimie, Moses wenanare a parivainuagani. ⁴ Ami dobu lamna mutulua Negev da Lebanon; au waira Euphrates (au maramatanei) da mai Hitti ai dobu anapuna da i ġaira madegħa e arearere lana Mediterranean au bogana. ⁵ *Eġa ai ai ina vobelem bo ina viubaim am au lawana. Tau awarim ana mae, me Moses awarina a kaukauei nanare. Tau eġa melanai ana tere-ġairem bo ana voterem.

⁶*—Parivainuagana bagigagina a kau ei wei ravai noinonii maiteni da wei dobuna ana verei. Lamna aubaina ma virewapana ma tepam ina tora ma am rava ma ruiei wei au dobuna. ⁷ Anina ma virewapana ma tepam ina tora; ma nuanuam eġa ina vuru da tarawatu Moses i verem, anapuna ma voteletelei. Ma ma vojġina-kau ei da awarina eġa ma deġa au oiem bo au kelakelaum da aiwai anapuna e kaukauei ina ai. ⁸ Marana patapatai wei tarawatuna ma iaia vi. Ma marai da waguvarai ma vinua-notenotei; wei lamnei tarawatu anapuna ma aramane. Mepa da wenanare ma kau ei lamna tam ma maura ma nuaia i ġaeġaena ma nelaġai kaua au anapuna."

5

Raġona naona au Canaan

¹⁰ *Mai Israel au Gilgal i mae Jeriko au wapuna. Ma Aupom vi-14-na aubigai nawaravi naona tau i raġona torelana i apui. ¹¹⁻¹² *Ma ubaubanai ġelauna, raġona au murina, tau i witi au wapu i tuarui ma palawa dabadabai i apui ma i am. Ma ubaubanai ġelauna Manna raua i voterei, tau i wei lamna eġa ita am-melei, ma ai lam wapuei i tuarui. Mai Israel eġa manna ita am-melei, lam ai au doa au dobu Canaan i vaia da i amam.

24

Muriai Joshua ma mai Israel mai Canaan maiteni i viġaiġaiawa, dobu au giana da au giana. Ma dobuna ravai i viragēni, wate ġelau i eġa ita viragēni ma maiteni i mae. Muriai Joshua dobu i ġutai Israel ana dam twelve awari. Tau i nae ma ai doa i maeni melagāi nonoana mai Canaan i voavoai. Madegħa maġamaġai i kwa ma Joshua mai Israel i vitagogiana-melei.

Mai Israel i riwa da BADA ina vitaunolei

¹ Muriai Joshua dam anapui i ġorei da au Shekem ita vitagogiei. Maranai kampa i ġeta Joshua, dogadogara, dam babadai ma melagāi babadai i ġoreiai da ita nae BADA au naona ita mairi.

² Joshua rava anapui i riwei i pa, "BADA mai Israel ai God e ririwa, 'Wariaġa noimi Terah ma natunatuna Abraham ma Nahor waira Euphrates au baba ġelauna i mae, ma god maġamaġai i raraudunelei. ³ *Wate noimi Abraham nai dobune i a vaitawane i ma i naiei da Canaan doana ana tapuna a viatataiei, ma ana epaepaia a vimaġai. Ma natuna Isaac a verei.

¹³ —'Tau dobu a veremi ana debagauna ma ana peipeina, doana eġa ota nolei ma taon gaegaei a vereoi, marina o maemaeni, eġa ota voai, ma grape ma olive o amam wate eġa, tau i ota paewi.'

¹⁴ —Lamna aubaina BADA ona voteletelei ma orami taputapune i ona vipatutu. Noinoimi god morumori kokoitau, i raraudunelei au Egypt bo au waira Euphrates ona kwajiei au

* 1:5: Deu 31:6, 8 * 1:6: Deu 31:6-7, 23 * 5:10: Exo 12:1-13 * 5:11-12: Exo 16:35 * 24:3: Gen 12:1-9; Gen 21:1-3

modu ma BADA ainelana ona viborumei. ¹⁵ Wate mepa da BADA viborumeina o geduaiei, lamna amadodo ona vine da noinoimi ai god waira Euphrates au baba gelauna bo marina ravai ai au dobu o mamae mai Amori ai god ona nolei. Wate tau au numa ravai maiteni BADA ana viborumei.”

¹⁶ Ma rava i paribelei, “Tauai ega melanai ai BADA ana voterei ma god gelai ana viborumei. ¹⁷ BADA ata God tauoina au Egypt i tere-opuneta noinoita maiteni maranai au Egypt ta vilaraga. Ma kua vivirewapanai ma aniba i kauei au mataiai. Ma ai au vagai manamanaina i painiai dam gelai au poui da wei au paratana. ¹⁸ Mai Amori ma dam gelai wei au dobuna i mamae wate BADA aubaiiai ravai i viaḡaḡana-opunei. Lamna aubaina tauai BADA ana borumei, aubaina tauna ainelana ata God.”

Judges Taurauetara

Pariverena

Wei au bukana Joshua ana iraġe marana ma i nae da Samuel ana tupua marana e ririweta.
Vinevinena

Joshua au murina aiwai i tupua (Jdg 2:7-19).

2

Joshua au murina

⁷ Mai Israel BADA i viborumei maranai Joshua lawalawaina i mamae ma i 'raġe ma kimtana magumagurii biaġa i mamae i 'raġe-pai, wei ravai BADA kua ġaeġae i kauē i vimatematei.

⁸ Nun natuna - Joshua BADA ana taunola ana madeġa 110 ma i 'raġe. ⁹ Ma doa i vereverea au Timnat Herek i doboi, Ephraim au olana, wei lamna Ola Gaash ana au laubadei.

¹⁰ Anina ma wei kimtana i nepai amamai awarii ma kimta ġelauna ai gabu i vaia. Wate tau i BADA eġa ita aramane i nanare aiwai i kauē mai Israel aubai. ¹¹ Ma kua apoapoei i kauē BADA awarina ma Baal kokoitau i raudunelei. ¹² Tau i BADA amamai ai God i votere-tawane; Wei Godna tau i Egypte i taravaina-opunei. Ma i nae ma dobuġela ravai au ririvai maemae ai god i viborumei. Wei kauana BADA i viamlo-ġaiġaini. ¹³ Tau i BADA i voterei ma Baal ma awana Ashtoreth kokoitau i viborumei. ¹⁴ Ma BADA amlona i ġaiġai kua mai Israel awari, da i veredamane ai ġavia awari ma tau ai purapura i tama-naiei. Ma i voterei ai ġaviai maġamaġau au ririvai awari, ma tau eġa tagotagogina da ita vobelei. ¹⁵ BADA mai Israel i viġaviei maranai i opuopu viġavia aubaina. Lamna aubaina eġa ita vovaiuba BADA i ririwei nanare. Ma tau i vinuabola kua.

¹⁶ Anina ma BADA taurauetara bo ġavia babadai i terepai, da i voagui da ai ġavia i vovaiubai. ¹⁷ Wate tau ai taurauetara i parivirevirei ma god ġelau i erawei ma i raudunelei. Tau i laġilaġina amamai i bababara lana i voterei ma BADA i rau-aġaiġaiei. ¹⁸ BADA mai Israel ai tou i nonori menanare ai ġavia tau i rau-iviapoapoelei. BADA taurauetara i terei ma i voagui ma i gagaloei. Maranai taurauetara i mae, BADA mai Israel i raunuapoapolei. ¹⁹ Wate maranai taurauetara i 'raġe, rava, BADA i mae-puputei ma i apoapoe kua eġa me amamai nanare ma god ġelau i vitaunolei ma i raudunelei. Tau i geduai kua da ai kauai apoapoei ma ai ora pota ita voterei.

Mai Israel kua apoapoei i kaukuei lamna ai parivainuagana bagibagina BADA maiteni i kaukuei i viviaigai. BADA amlona i ġaiġai ma ana nota i terei da mai Israel ita raudadani da ita voagui da dobuġela ravai ita viaġaġana-opunei. Dobuġela ravai mai Israel i raudadani da tau BADA ina votaġotaġoi bo eġa me amamai i kauē nanare.

1 Samuel Samuel ana buka tagogi Pariverena

Buka 4 ma Samuel ana buka i vinoa da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai *taurauetara* damona. Tauna, Saul ma David au kolai monamona i waği da i vigulau, lamna aubaina wei bukana i viwawai Samuel. Wei bukana mai Israel ai kaua e bababaniei i nae da Saul ana au irage.

Vinevinei

Samuel ana tupua (1; 2:1-11; 3:1-21)

Mai Israel gulau i vibaği (8:1-22a)

Samuel Saul i buloi (9:1-3, 15-16, 10:1-2, 5-24)

Saul i vivibada (11:14-15; 13:13-14; 15:1-4)

BADA Saul i geduaiei (15:7-23, 27-29, 34-35)

Samuel David i buloi (16:1-7)

Saul David i unurei (18:7-9)

David Saul i ruba-tawanei (21:1-6)

Saul ana irage (31:1-5)

Samuel i tupua

¹ Orototagogi wavana Elkanah, ana dam Ephraim ma ana melağai Ramah, Ephraim au olana i mae. Elkanah amana Jeroham, ġoğana Elihu ma noina Tohu, ma ai bariawa Zuph, ai dam Ephraim. ² Tauna awawana ruağa Hannah ma Peninah. Peninah i vinatuna ma Hannah aipoi.

³ Madeğana patapatana Elkanah Ramah i netawanei ma i nae au Shiloh da BADA VIVIRE-WAPANA KAUKAUANA ita voepaepai ma pulo ita apui awarina. Weka Eli natunatuna Hophni ma Phineas BADA ana pirisi pulo tauapui i mae. ⁴ Maranai Elkanah pulo i apuapui ma sia sikasikana i gutai da awana Peninah ma natunatuna i patai. ⁵ Wate awana Hannah sia vinevinena i verei aubaina awana nuanuana i vai-kauai avena da BADA i kauai da tauna aipoi. ⁶ BADA Hannah manawana i gudui ma lamna aubaina turana i vivinamei ma i vivijiboga-nonoei da ita vinuabolai. ⁷ Wei kauana i mae madeğana patapatana. Maranai Hannah i nae BADA ana au numa, Peninah tauna i vivinuabolai ma i vitoutouni da eğa ita amam. ⁸ Maranai Elkanah awana Hannah i paripari-dadanei, “Hannah aiwai e toutouei? Aiwai aubaina eğa uta amam? Aiwai aubaina e vivinuabola, natunatum eğa lamna e vivinuabolei bo? Tau weka! Natunatum nelarai 10 epaiiai!”

⁹⁻¹⁰ Mara tagogi maranai tau i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirisi Eli kampa ana au gabu tempol ma metaetana i kiakiala. ¹¹ Ma i parivainuağana i pa, “Oo BADA VIVIREWAPANA KAUKAUAM. Ma inanai am taunola au ora-tou uta inanai! Ma uta notai ma eğa nuanuam ina vuru. Mepa da natu orotona uta vereu lamna teverana ana veremelem da ina vilaragem ana au lawana au anatapuna, ma aparana eğa ina bori-dadanei.”

¹² Ma i raraupari BADA awarina ma Eli tauna ipirina i 'nainanai. ¹³ Hannah au nuanuana i raraupari ma ipirina ava i vidagudagu wate eğa babani ita opuopu. Ma Eli i notai da tauna i uma-bua, ¹⁴ ma awarina i riwa, “Ina baem bo, uma bua ma voterei!”

¹⁵ Wate Hannah i paribelei, “Eğa nanare au bada tau eğa waira bagibagina ata umai, tau au nuabola i rata kaua ma lamna aubaina a toutou BADA awarina. ¹⁶ Wenanare a raraupari aubaina nuanuau i bola-kauai ma eğa ma notai da tau wavine apoapoou.”

¹⁷ Eli i paribelei, “Ana nuubam ma nae! Ma BADA Israel ana God am vibağa ina kauai.”

¹⁸ Tauna i paribelei, “Au bada egualau kaua ma eğa ma nota-boaii.” Ma i nae ma i am da orana i uba.

¹⁹ Ma ubaubanai boibogi Elkanah ana numa ravai i vomairi ma i nae da BADA i raudunelei ma i ġaira me au Ramah. Elkanah awana Hannah maiteni i matave ma BADA wavine ana pari i paribelei. ²⁰ Hannah i duama ma natuna orotona i ġuni ma wavana i ġorei Samuel ma i riwa, “Wei lamna aubaina BADA a vibağai.*”

Samuel i puloei BADA awarina

* 1:20: Samuel pona Hebrewi nonorana me God awarina agu i vibaği.

²¹ Ma madeğa ġelauna i ġetai ma Elkanah ana numa ravai maiteni i ġae au Shiloh da pulo ita apui BADA awarina ma pulo ġelauna BADA i parivainuaġani ita kauēi. ²² Hannah eġa maiteni ita nae ma awana i riwei, “Maranai tevera ina eda ma ana ġaiei BADA ana au numa ma kampa ina mae-nonoa.”

²³ Elkanah i paribelei, “Ee nanare aiwai e notanotai da i ai ma kauēi, ma weka ma mae da tevera ina eda. Ma BADA ina vogauium da am parivainuaġana anona ina tupua.” Ma wavine au numa i mae da natuna i eda.

²⁴ Maranai tevera i viedai ma alona i naiei au Shiloh, bulumakau orotona ana madeğa tonuġa, palawa baikena tagogi ma wine wagina ġaeġaena maiteni. Avena da tevera melamelana ma alona i naiei da Eli au urana i terei. ²⁵ Ma burumakauna i apui God awarina ma tevera i naiei Eli awarina. ²⁶ Ma Hannah i riwa, “Oo BADA e notanotai rorova tau weka a raruapari BADA awarina. ²⁷ BADA a vibaġai wei teverana aubaina ma a vivibaġei i veru. ²⁸ Lamna aubaina marina natu a vererevei BADA awarina. Ana lawana anatapuna BADA ina verei.” Ma kampa tau i BADA i voepaepai.

2

Hannah ana voepaepa

¹ Ma Hannah i raupari BADA awarina i pa,

Tau a vinuaiai kua BADA awarina;

Tauna rewapana i veru.

A vinuaiai aubaina Tam u vilawaniu

ma lamna aubaina au ġavia a vivinamei.

² Oo BADA eġa ai ai ġelauna vivivireina me tam;

eġa mepa god ġelau i anina tam ava;

eġa taugagalo ġelauna me tam, ai God.

³ Tau a ririwa, “Vogulagulau ma pari-gulagulau ona voterei;

Mae-ġaeġae babanina ona voterei.

Aubaina BADA ami kua anatapui e araramanei

ma ina kovoġimi.”

⁴ BADA Tam sorodia vivirewapanai ai pidu u viaigaigai;

wate vovokokarai u vovai-virewapani

⁵ Amam iauai marina ina nola da ina am;

am-irairaġei eġa am ina iraġe.

Wavine aipoina roaroa 7 i ġuni;

wate roaroa maġamaġau aloi i netawanei ma tauna ava e mamae.

⁶ BADA, iraġe ma lawana e neineiai;

Tauna rava au kokoaga e teretere-ġairei ma e vovovai-mairini.

⁷ BADA rava ġelau i vivimaurai ma ġelau i vivigomari;

ma ġelau i teretere-ġairei ma ġelau i teretere-ġaiei.

⁸ Tam rava molamolakai pokau au orana e sinasina-epai;

ma rava vigigimanai loġiloġi au orana e sinasina-epai; da gulagulau maiteni e kiakiala

ma vigulau tau i ina viġariei.

Dobu anatapuna tam ġarimej;

ma aiwai anatapuna ana au animae u terei

⁹ Tam am rava patupatutui e gagaloei;

ma apoapoe taukauei e amoamoau au iraġe

Rava eġa ai rewapanēi ita vovaiuba;

¹⁰ Tam am ġavia ma pupuni;

am meji ina viarapawa me waiparara

BADA tam dobu ma rautareai

ma am gulau ma vovai-virewapani,

ma am vinevine bulobulona ina virewapana kua.

¹¹ Elkanah natuna Samuel i voterei ma i nae me ana au melagau au Ramah. Samuel pirisi Eli au urana i mae au Shiloh ma BADA aubaina i vitaunola.

Maranai Samuel i rarata tauna au numa gara i vovoaġu da God ana nola i kaukauei. God ma rava Samuel ana nola i ġoama-kauēi. Eli natunatuna ruaġa pulo tauapui, pirisi apoapoei. Maranai rava i nei da ai ġoa apoapoe aubaina pulo i apui BADA awarina, tau i siasi vovivirana i voviviri da i amam. Ma lamna aubaina Bada peroveta i paritawanei da Eli i riwei da tauna

natunatuna eġa ita vinua-terenei aubaina ġo'apoapoe i kaukauei, ma natunatuna ina viragēna ruaġei. Wei au murina Eli ana epaepaia laragai ma anatapui ina iraġe-pai.

3

BADA Samuel i ġorei

¹ Wei au marai BADA eġa rava awari ita bababani bo ai au rauboni bo ai au inana ita vivieġana-melei, mara tagotagogi ava wei i tuputupua. Tevera Samuel Eli i voagui ma BADA awarina i vitaunola.

² Eli matana i apoapoe kaua ma eġa ita inainana kaua. Ma waguvara tagogi ana au gabu i matamatave. ³ Ma Samuel BADA ana au numa i matamatave Parivainuagana bokisina au ririvana ma God ana rampa au Gabu vivivireina i ararata. ⁴ Ma BADA Samuel i ġorei, "Samuel!"

Ma Samuel i paribelei i pa, "Ee tau weka!"

⁵ Ma i vomairi ma i ruba Eli awarina ma i riwa, "U ġoreu da a nei."

Eli i riwa, "Eġa ata ġorem, ma nae me da ma matave."

⁶ Ma BADA i viġore me, "Samuel!"

Samuel i vomairi me ma i ruba Eli awarina ma i riwa, "U ġoreu da a nei."

Eli i riwa, "Natu tau eġa ata ġorem ma nae me da ma matave."

⁷ BADA eġa Samuel awarina ita babani dadana lamna aubaina ponana eġa ita aramanei.

⁸ Anina ma mara vitonuina BADA i viġore ma Samuel i vomairi ma i nae Eli awarina ma i riwei, "U ġoreiu da a nei."

Anina ma Eli i aramanei da lamna BADA tevera i ġoreġorei. ⁹ Ma Samuel i riwei, "Ma nae me da ma matave. Mepa da ina viġore me lamna wenanare ma riwei, 'BADA ma babani, am taunola a rarautaniġana."

Anina ma Samuel i nae me da i matave.

¹⁰ Ma BADA i nei ma i mairi ma i viġore me au naona i kaukaueia nanare, "Samuel, Samuel!" Samuel i paribelei i pa, "Ma babani am taunola a rarautaniġana."

¹¹ Ma BADA Samuel i riwei, "Tau kaua vivi-inirovorovo kaukauana ana kauai mai Israel awarii ma maranai rava riwana ina nonori tau i orai ina sisi. ¹² Rorova a riwa nanare, Eli ana numa ravai maiteni ana kovoġi. ¹³ A riwana-guratei da ana numa ravai ana kovoġa-nonoei aubaina natunatuna i vijiboġiu ma i viminalamalaiu ma tauna natunatuna i vibae-naenaeei. ¹⁴ Riwa bagibaginei a ririwa da Eli ana numa ravai ai ġo'apoapoe eġa melanai ana nota-tawanei. Avena da pulo ina apui awariu."

¹⁵ Samuel ana au aravi i mae da mara i tom ma BADA ana numagara metaetai i votawatawanei. BADA aiwai Samuel i riwei tauna i rovo da Eli ita pariveri. ¹⁶ Wate Eli Samuel i ġorei i pa, "Samuel natu."

Ma i paribelei i pa, "Tau weka."

¹⁷ Eli i paridadana, "BADA aiwai i riwem? Anatapuna ma riweiu ma eġa lamna BADA ina kovoġa-guratei!" ¹⁸ Anina ma Samuel anatapuna i riwei, eġa aiwai ita tajjini. Ma Eli i riwa, "Tauna BADA, ma aiwai awarina i jijimana ina kauai."

¹⁹ BADA Samuel i mae-ratui maranai i rarata ma Samuel aiwai i ririweia ma nanare i tuputupua. ²⁰ Ma Israel au giana da au giana, au Dan i vikarei da au Beersheba, anatapui i aramanei da Samuel lamna BADA ana peroveta. ²¹ Mara i maġa BADA au Shiloh Samuel awarina i eġa ma i babani.

8

Mai Israel Gulau i vibagēi

¹⁻² Samuel natunatuna ruaġa, natuevou wavana Joel ma umauna Abijah. Maranai Samuel i magura ma natunatuna i vinei taurauetara au Israel ma i terei da au Beersheba i nola. ³ Wate tau i eġa amai ana kaua ita vaia ma ai nuavaina mane ma lamna aubaina manelei i gwalai ma rautara i vibarai.

⁴ Ma lamna aubaina Israel babadai i riei Samuel awarina au Ramah. ⁵ *Ma i riwei, "Ma rautaniġana bada! Tam u magura ma natunatum eġa am kaua ita ġovaiwaiti. Ma lamna aubaina tauai a ġoei da gulau ma verelai da ina raveniai, me dobu ġelau i ravai e kaukauei nanare."

⁶ Wate maranai wenanare i riwa Samuel eġa ita vinuaii dadana, ma i raupari BADA awarina. ⁷ BADA i paribelei i pa, "Aiwai anatapuna ravai e ririwem ma kauai, tau i eġa tam ita geduaiem wate Tau ai gulau i geduaiem. ⁸ Maranai Egyptei a teretere-opunei da wei paratana, tau marana patapatana i mae-puputeu ma god ġelau i rarausunelei; marina nanare

tam awarim e kaukauei. ⁹ Ai ġoana ma verei wate riwa bagibaginei ma riwei menanare gulau ina kauanei tauī awari.”

¹⁰ Samuel BADA ana babani anapapuna tauī gulau i vivibaġei i riwei ¹¹ i pa, “Maranai gulau ina vibademi lamna awarimi wenanare ina kauēi. Tauna natunatumi ina tama-naiei sorodia da ana chariot ma ana horse ina gerui ma ġelauī ana chariot au naona ina ruba. ¹² Ġelauī sorodia 1,000 ma ġelauī 50 ina vibadei. Ġelauī ana wapu ina ipiei ma ana lam ina tuarui. Ġelauī ġavia apiai iramei ma chariot iramai ina kaukauei. ¹³ Gulau, natunatumi guguiī ina egari da ana monamona ġabuġabui ina kaukauei ma ġelauī ana palawa ina apuapui ma ana taulauvoa. ¹⁴ Am wapu ma grape wapu ma nanare olive wapu aiāi avavai ina vaia da ana gabemani babadai ina verei. ¹⁵ Ma maranai ami witi ma grape ma olive o tuarui ma ġuta 10 ona terei ma tauna ġuta tagogi ina vaia ma ana gabemani babadai ina ġutei. ¹⁶ Ami laraga nelarai ma guguiī ma am bulumakau ma donkey vinevinei ina vaia tauna aubaina. ¹⁷ Ma ami sipu ma gote ġuta 10 o terei ma tauna ġuta tagogi ina vaia tauna aubaina, ma taumi ina vainimi ana taunola. ¹⁸ Maranai wei kauai i tupua ma ona tou guratana BADA awarina da gulau taumi o teretere awarimi ina vaitawanei, wate BADA eġa ina voaguimi.”

¹⁹ Wate rava Samuel ana babani bagibagina eġa ita rautaniġanei. Tauī i riwa, “Tauai anatapuiai a ġoei da gulau ina vibadelai, ²⁰ da tauai me dobu ġelauī ravai nanare ma ai gulau ina ravenai ma ana opu viġavia aubaina.”

²¹ Anina ma Samuel BADA i riwei aiwai ravai i ririweia ²² ma BADA i paribelei i pa, “Ai ġoana ma kauēi, gulau ma verei.”

Ma Samuel ravai i paritawanei ai au numa.

9

Samuel, Saul i buloi gulau

¹ Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ġoġana Zeror ma noina Bekorath ma ai magura Aphiah, Benjamin ana damei. ² Kish natuna Saul i tupua kaua ma laraga inanana aiaina eġa me laraga ġelauī au Israel, ma tevera ae manawa.

³ Maratagogi Kish ana donkey i kwako ma natuna Saul i riwei, “Am taunola ma taravaini ma ona nae donkey ona baiei!”

Saul ma ana taunola donkina i baiana-guratei wate eġa ita nelaġai ma i nae da peroveta Samuel ita raugenari da ita vibaġai da mepa donkey ita baiei.

¹⁵ Ma maratonna da Saul ana taunola maiteni ita ġeta Samuel awarina, BADA Samuel i riwei, ¹⁶ “Wenanare marana au maratomo oroto laragana Benjamin ana damei ana paritawaneiai. Olive monamonanei kolana ma buloi da ina vimataira da tauna a tereriei da au rava Israel ina vibadei. Tauna mai Israel ina voagui da mai Philistia ina vovaiubai. Au rava mai Israel a inana i vivinuoapope ma ai tou awariu agu aubaina a nonori.”

10

¹ Ma Samuel olive monamonana wagina i vaia ma monamona i waġi Saul au kolana. Ma i vigia-laġolaġonei ma i riwei, “Wei a kaukauei aubaina BADA i terem ana rava vidualaulaunai Israel ma vibadei. ² Amadodo rava ruāġa ma nebelei Rachel ana kokoaga au ririvana au Zelsah, Benjamin ana au dobu. Tauī ina riwem, ‘Donkina o baibaiei i nelaġai. Ma marina amam eġa donkey ita baibaiei wate tam e vivinuoabolem, e paripari-dadana, Menanare natu ana nelaġanei.’

⁵—Ma ona nae God ana au Gibeah ola aburuna, weka mai Philistia ai sorodia i rauġaravu. Ma ona ruirui au taon ma Peroveta borui olei ina ġaiġairai. Tauī gitar³ ma harp, tambourine ma duraio ina vikalokaloēi ma BADA ana babani ina garagararei. ⁶ BADA Aruana Vivivireina ana rewapanana oram ina naeni da ina vibadem, ma tauī maiteni BADA ana babani ona jimej. Ma oram ina ravivouni da tam me rava ġela. ⁷ Maranai wei kauai i tupua, aiwai BADA e viviatataiem ma kauēi.”

⁸ Samuel i riwa, “Tam ma vinoa au Gilgal, ma kampa ana nebelem da ġamoġamo ana vunui ma taputapuna ana apui ma ġamoġamo ġelauī ana apui viturana pulona. Wate kampa ma vipaipai aupom 7 da ana ġetai ma riwa ġelauī ana riwei.”

Saul i terei gulau

⁹ Ma Saul i mae-tavirei da i nenaē ma God ana nota i ruini ma orana i ravivouni. Wei marana aiwai anapapuna Samuel i ririwei i tupua. ¹⁰ Maranai Saul ana taunola maiteni au ola Gibeah

* 10:5: Eng. lyre

i ġeta, peroveta borui i 'nanai i nenei awarui. Anina ma God Aruana Saul i ruini ma i vibadei da tauna maiteni God ana babani i garagaraei. ¹¹ Maranai ravai Saul i araramaneia Saul i 'nanai peroveta au borui i jimajima tau orai i auepai ma ai rava i ririwei, "Riwa kaua bo aiwai i tupua Kish natuna awarina? Saul i viperoveta bo?"

¹² Ma nai dobuna ravana i paribelei i pa, "Amana ai ai lamna avenu aubaina maraġela ravarava ota e viviperoveta." Anina ma wei babanina i mae kampa, "Moina riwa kaua da Saul peroveta?" ¹³ Ma Saul jima i voterei ma i ġae au ola au dobu vivivireina.

¹⁴ Muriai maiana Saul ana taunola maiteni i nelaġai ma i paridadanei i pa, "Mepa o nae?"

Saul i riwa, "Donkey a baibaiei ma a baiana-avei da a nae Samuel awarina da ata paridadanei ġamogamoi mepa."

¹⁵ Maiana i riwa i pa, "Ma riweu Samuel aiwai i riwem."

¹⁶ Saul i paribelei, "I riwelai da donkina i nelaġai." Wate maiana eġa ita riwei Samuel aiwai i riwei, da tauna ina vigulau Israel aubaii.

¹⁷ Muriai Samuel mai Israel anatapui i ġorei da ita riei au Mispa da BADA riwana ita nonori.

¹⁸ Ma Samuel i riwa, "BADA Israel ai God wei e ririwemi, 'Tau noinoimi mai Egypt vivirewapana i urai a vaitawanei. Ma a neiaimi wei au dobuna ma nanare ami ġavia au ririvami a vovaiubai. ¹⁹ Wate amadodo tau ami God o geduaiei, i kauana-guratei ami au nuabola ma ami au piripiri.' Ma o riwa, 'Egal Tauai gulau a ġoeġoei da ina vibadelai! Lamna aubaina dam damai ona opui tau ami BADA au naou."

²⁰ Maranai Samuel damdamai i neiai BADA au naona ma BADA Benjamin ana dam i vinei.

²¹ Ma Benjamin ana dam i neiai au naona ma BADA Matri ana epaepaia i vinei ma kampa BADA Kish natuna Saul i vinei. Ma maranai i baibaiei tauna kampa eġa. ²² Ma lamna aubaina i raupari BADA awarina, "Tauna mepa?"

BADA i paribelei, "Tauna kampa purapura au orai e raraugovaġa."

²³ Tau i nae da i taravaini da i neiai, tauna rava aena manamanaina ma i mairi ma rava anatapui i votani. ²⁴ Samuel rava anatapui i riwei, "BADA rava i terereti da ami gulau, o inainai bo eġa? Eġa ai ai ġelauna au orata me wei orotona." Ma rava anatapui i garara, "Gulau ana lawana ina manawa."

11

Saul ana vigulau i vianinei

¹⁴ Muriai Samuel mai Israel i riwei, "Ona nei ma anaputa tana nae au Gilgal ma Saul ana vigulau tana vianinei ma tana amei. ¹⁵ Anina ma anatapui i nae au Gilgal ma BADA i voepaepai ma i riwei da Saul lamna tau ai gulau. Ma tau viturana ma mae-kaua pulona i apui Bada awarina ma mai Israel siana i am ma i uma ma i vinuaiiai-kaua."

Saul ana madeġa 30 maranai i vigulau. Tauna sorodia mai Israel i rau-etaraveni da mai Ammon maiteni i viġaġaiawa da i vovaiubai. Muriai tau i Philistia maiteni i viġaġaiawa, Wate nai ravai ai sorodia i maġa guratana aubaina da mai Israel i rovo. Saul i vipaipi da Samuel ita nae da BADA ita puloi ma muriai ita nae ita viġaġaiawa. Wate Samuel eġa laġilaġina ita nei. Lamna aubaina Saul pulo i apui BADA awarina. Ma BADA i viamlo-ġaiġaini. Ma muriai Samuel i ġetai.

13

Saul BADA i rau-aġaiġaiei

¹³ Samuel Saul i riwei, "Tam u bua! Tam Eġa BADA ana tarawatu uta voteletelei. Uta votelata lamna am epaepaia maiteni ita terem da ota vigulau nonoa au Israel. ¹⁴ *Wate marina tam am vibada eġa ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA eġa uta voteletelei."

15

BADA Saul i geduaiei

¹ *Muriai Samuel Saul i riwei, "BADA tau i paritawaneu da a buloim da u vigulau Israel aubaii. Lamna aubaina BADA ana riwa ma nonora-kauai. ² *BADA Vivirewapana Kaukauana i riwa i pa, "Tau mai Amalek ana kovoġi aubaina amamai mai Israel i viġaviei maranai Egypt i opu da i nenei. ³ Marina ona nae mai Amalek ona viġaviei ma ona pupuni, eġa tagoġi ona voterei, nelara, waivine, roaroa melamelai, bulumakau, sipu, kamel ma donkey."

4 Ma Saul ana sorodia ai riwa i paritawanei da ita nei. Ma anatapu i au Telaim taon i vinenebelana. Sorodia 10,000 Judah ana damei i nei ma 200,000 mai Israel gelauei i nei.

7 Ma Saul ana sorodia maiteni i opu ma Amalek i vununaie i ma i vovaiubai, i viġavia au Havilah ma au Shur i vikwai Egypt au ġeregerena. 8 Agag mai Amalek ai gulau lawalawaina i vojijini wate rava anatapu i viraġeni. 9 Wate Saul ana sorodia maiteni Agag eġa ita viraġeni ma ai sipu ma bulumakau vinevinei ma bulumakau ma sipu natunatu aiiai eġa ita viraġeni. Tau i ġamoġamo kirakiramai ava i viraġeni.

10 Ma BADA Samuel i riwei, 11 “Tau orau i viara kaua da Saul a terei Gulau aubaina tauna i mae-puputeu ma riwau i rau-aġaiġaiei.” Samuel nuanuana i bola-kauei maranai wei riwana i nonori ma BADA awarina i tou-maratom.

12 Ubaubana boiboġi Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepaepai, ma i ġaira me au Gilgal.

13 Ma Samuel i ġeta Saul awarina, Saul, tauna i viegualaei ma i pa, “Samuel, BADA ina viaiainim. Tau BADA riwana a voteletelei.”

14 Samuel i paribelei, “Aiwai aubaina sipu ma bulumakau e vivitouana a nononori?”

15 Saul i pa, “Sorodia mai Amalek awarii i vaia, bulumakau ma sipu vinevinei i vojijini da ina puloei BADA am God awarina wate ġelau anatapu i viraġena-naiei.”

16 Anina ma Samuel Saul i riwei, “Ma genuana! Waguvarai BADA awarii i babani ana riwem.” Saul i paridadanei, “Ma riweul!”

17 Samuel i paribelei, “Avena da u nota-melem da tam rava labalababa, tam marina mai Israel ai rauetaravena. BADA i tereriem da mai Israel ai gulau. 18 Riwa bagibagina i riwem ma i paritawanem da taniġa potapotai mai Amalek uta viġaviei da anatapu uta pupunapai. 19 Aiwai aubaina BADA eġa uta voteletelei? I riwem da eġa purapura i 'rairaġe-tawanei ona tami, wate tam vipurapura u ġoei ma u vai-labalababai da u nuanei, wei lamna kaua apoapoe BADA au matana.”

20 Saul i paribelei, “Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiai. 21 Wate au sorodia sipu ma bulumakau aiiai eġa ita viraġeni wate i neiai weka au Gilgal da ita apui pulo BADA am God awarina.”

22 Anina ma Samuel i riwa,
“BADA metauna e vinuiaiiei?”

Votelatela bo pulo ma ġamoġamo apuapunana.

Votelatela i ai-telara, eġa me pulo apuapunana;

Ma rautaniġana i ai-telara, eġa me sipu monamonana.

23 Pariviravira BADA awarina lamna me parauma
ma mae-gaegae lamna me god ġelau i viviborumei

Ma tam BADA riwana u geduaiei;

lamna aubaina BADA am viġulau i geduaiei,

Tam am viġulau i vai-tawanei.”

27 *Ma Samuel i mae-tavirei da ita nae ma Saul i ġoei da ita viġaei ma ana kwama adana i vojijini ma i sikai. 28 Samuel i riwa, “Me au ġara u sikasikai nanare amadodo BADA am vibada mai Israel awarii i vai-tawanei ma rava ġelauna aiaina eġa me tam i verei. 29 Israel ai God vinuialaunana eġa morumoruna bo nuanuana ita viravirai. Tauna eġa rava da nuanuana ita viravirai.”

34 Ma Samuel i nae au Ramah ma Saul i nae me ana au numa au Gibeah. 35 Samuel eġa Saul ita inana-melei da i 'raġe wate Saul i vinuabolana-maelei. Ma BADA nuanuana i bola-kauei da Saul i terei mai Israel ai gulau.

16

BADA David i terei gulau

1 BADA Samuel i riwei, “Amapo da Saul ma mogumoguet bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awariei gulau a vinei.”

2 Wate Samuel i paribelei, “Menanare ana naenei? Saul riwana ina nonori ma ina viraġeniu.”

BADA i riwa, “Cow ġaubona ma vinimavoei ma nae da ma riwa, “Tau a nei viturana pulona ana apui BADA awarina.”³ Jesse ma raḡorei viturana pulona aubaina ma ana viatataiem aiwai ma kauei, rava ana viatataiem ma buloi Tau aubaiu.”

⁴ BADA Samuel i ririwei nanare i kauei. Samuel au Bethlehem i ġeta ma taun babadai ana sisisi i nebelei. Ma i paridadanei, “Ana nuaubam u nei bo?”

⁵ Samuel i paribelei, “Ee! A nei da pulo ana apui BADA awarina. Anatapumi ona vokaukauana-melemi ma tana nae pulo aubaina. Ma Jesse natunatuna maiteni i viaiaini ma i paritawanei da i nae pulo apuna aubaina.”

⁶ Maranai tau i ġeta ma Samuel Jesse ana natuevou Eliab i 'nanai ma ana au nota i riwa i pa, “Wei teverana e maimairi BADA au naona lamna anina ana vinevine.”

⁷ Wate BADA Samuel i riwei, “Tau ravana a geduaiei, eġa inanana bo ana manawa ma notanotai. BADA aiwai e inainanai, rava eġa ita inananai. Rava tupua e inainanai wate Tau nuapou a inainanai.”

¹⁰ Nanare da natunatuna anatapui 7 i nei, ma Samuel i riwa, “BADA eġa ai ai ita vinei.”

¹¹ Ma Jesse i paridadanei, “Natunatum anatapui weka bo?”

Jesse i riwa, “Natu umau e mamae wate tauna sipu e paipaini.” Samuel Jesse i riwei, “Riwa ma paritawanei da ina ġetai da tana am.”

¹² Ma Jesse riwa i paritawanei da i nei. Tauna i tupua karawata, tevera inanana aiaina ma matana namanamarana. BADA Samuel i riwei, “Wei tauna! Ma nae ma au kolana olive monamonana ma iwaġi.”

¹³ Anina ma Samuel olive monamonana i vaia ma David au kolana i waġi, kampa tau i au matai, ma nai au marana da i nena BADA ana Arua Vivivireina David maiteni i mae. Ma Samuel i nae au Ramah.

¹⁴ Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovoi.

David marina Gulau Saul ana sorodia.

18

Saul David i unurei

⁵ Saul, David ġavia au anatapuna i paripari-tawanei ma i kaukauana-kauei ma ġavia i vovovaiubai ma lamna aubaina i terei da ai sorodia ai bada ġaġaena. Ma wei kauana patara ma sorodia babadai i vinuiaiiei. ⁶ David oroto Philistiei ġaġaena ma inanana vi'nirovorovona i viraġeni ma i nenememei ma waivine taon anatapui i nei ma ketaketara ma gita i vikalokalo i ma i arara ma gulau Saul i nebelei. ⁷ Waivine i vikalokalo ma i welawela i pa;

“Saul ġavia tausan i vunui
ma David tausan dam viriviri i vunui.”

⁸ Wei welana Saul i vimeji-kauei ma ana au nota i pa, “Tauri David e vovoeapaepai ma e ririwa da tauna rava tausan dam viriviri i vunui ma tau tausan av.” Ma marina ina terei ai gulau.

⁹ Ma lamna aubaina tauna David i unurana-kauei ma i 'nana-vaitetei.

Wei au marana Saul David i vivigaviei ma i goei da ita viraġeni. Saul natuna Jonathan, David i vibenabenamei. Lamna aubaina i rovorovo-nae ma i rauraugovaġa-nae.

21

Wei marana au murina Saul David i vigaviei ma i goei da ita viraġeni. Saul natuna - Jonathan David i vibenabenamei ma David i ruba au dobu ġela da Saul ita raugovaġei.

Ahimelek David i voaġui

¹ David i nae au Nob da Pirisi pulo tauapuna Ahimelek ita inanai. Tauna ana rovona i opu da David i viegualaei, ma i riwa, “Aiwai aubaina u nei, ma am rava mepa?”

² David pirisi Ahimelek i paribei i pa, “Gulau Saul nola tagoġi aubaina i paritawaneu wate wenanare i riwei, ‘Eġa ai ai ina aramane aiwai a kaukauei.’ Au sorodia a riwei da e paipaini. ³ Awarim lam da uta vereu? Palawa apuapunana 5 ma vereu bo aiwai ġelauna kampa.”

⁴ Wate pirisi i riwa, “Awariai eġa palawa ota ita mamae, wate vovivirana BADA awarina. Wei palawana ma vaia mepa da am sorodia aupom biaga eġa waivine maiteni ita viawawana.”

⁵ David i paribelei, Riwa kua tauai eġa waivine maiteni ata matamatave, maranai a opuopu ġavia aubaina au nelara e ujuji. Amadodo lamna gulau ana nola a kaukauei ma wei nolana aubaina a vokaukauei kua. ⁶ Nai marana palawa waduboi i votawanaei ma palawa voui i terei BADA au naona au tempol. Kampa eġa lam ġelauna ita mamae ma pirisi palawa vovivirana David i verei.

Anina ma David rava i tama-naiei ma nai au dobuna i raugovaġa nae ma i terei ai bada. Maranai Saul i nonori da pirisi ġeġetelarana Ahimelech David i voagui, Tauna pulo tauapui pirisi i vunupai ma Abiathar lawalawaina i voterei, ma tauna i ruba govaġa da David awarina i ġeta. Maranai dobuġela ai sorodia Israel i viġaviei, lamna David ana sorodia maiteni tau i viġaviei ma Israel i gagaloiei. Saul ana sorodia maiteni dobuna i naeni ma David i baiei da ita viragēni, wate eġa ita nelaġai. Mara tagogi David Saul ita viragēni wate lamna eġa ita kauie aubaina tauna God ana vinevine. Wate Saul amapo i ġoei da David ina viragēni.

31

Saul ana iragē

¹ Mai Philistia mai Israel i viġaviei au ola Gilboa ma tau i mai Israel i virubai ma maġamaġau i viragēni. ² Mai Philistia Saul ma natunatuna i viaġaġei da natunatuna Jonathan, Abinadab ma Malki-Shua i viragēni. ³ Gavia i potopoto kua Saul au ririvana ma ġavia ana piduei Saul i tonai ma i vikero-kauie.

⁴ Ma Saul ana apia tauavaraina i riwei, “Am sodei ma viragēniu. Eġa ata ġoei da Philistia-eteni ina vijiboġiu ma ina viragēniu.”

Wate tauna i rovo da viragēnana i kauana-avei. Ma Saul ana sod i lavui da au manawana i tonei ma au tepana i peu da i 'raġe. ⁵ Maranai ana apia tauavaraina wei i 'nanai ma tauna nanare ana sod au tepana i peu ma gulau au ririvana i 'raġe.

2 Samuel ana buka viruaina Pariverena

Wei bukana lamna David ana vibadana marana e ririweta. Kapita 1 da au 4 e ririweta da David menanarena Judah au rauanagei lamna ava i vibadei. Ma kapita 5-24 Israel au lavaratei maiteni i vibadei. Wei girumana e ririweta da menanare David ana gavia Israel au orana ma dobu gelauei i vigaviana-nei ma e viviatataieta menanare David God nuanuana i vaia ma i vitumaḡanei, wate maiteni ana ḡo'apoapoe ma ana ḡokokokara ḡelau i viatataieta. Tauta ta inanai menanare God David i kovogi maranai ana ḡoa i apoapoei, wate maiteni ta inanai menanare David i rupena-nei ma God tauna ana ḡo'apoapoe i nota-tawanei. David pipiripi magamaḡai i nelaḡai maranai Israel i vibadei wate God tauna i gagaloei ma parivainuaḡana awarina ma ana epaepaia awarii i vojijini.

Vinevinei

David mai Israel ai gulau (5:1-4)

God ana parivainuaḡana bagibagina David awarina (7:1-5, 8-17)

David Bathsheba maiteni i matave (11:1-17, 26-27)

Peroveta Nathan ana pariverena (12:1-25)

5

David mai Israel ma Judah ai gulau

¹ Israel dam damai i nei David awarina au Hebron ma i pa, "Tauta tara tagogi ² Au naona maranai Saul ata gulau, tam sorodia u rauetaraveni ma o vigavia.

—Ma BADA i riwem, "Tam au dam Israel ma paini me sipu taupaini ai sipu e paipaini ma aubaii ma vibada."

³ Maranai dam babadai i ḡeta gulau David awarina au Hebron, David parivainuaḡana bagibagina tau maiteni i kauai BADA au matana. Ma olive monamonanei David i buloi da Israel ai gulau.

⁴ *David ana madeḡa 30 ma i vigulau ma i vibada da madeḡa 40 i kwa.

Ma David ana sorodia i egari ma Jerusalem mai Jebu awariei i vaia. Kampa David ana gulau numana i voai. Anina ma rava i tami ma i nae ma God ana parivainuaḡana bokisina i vaia ma i naei au Jerusalem ma kampa au numagara i terei.

7

BADA parivainuaḡana i kauai David maiteni

¹ Ma BADA David i gagaloei ma nanare ana gavia anapui i vovaiubai. Ma ana nuaubana i mae. ² Ma David peroveta Nathan i riwei i pa, "Tau numa vigulauna, ai cedei voavoana a maemaeni wate God ana parivainuaḡana bokisina au numa gara e mamae."

³ Nathan i paribelei, "Aiwai e notanotaia ma kauai aubaina BADA i mae-ratuim."

⁴ Wate lamna waguvaraina BADA Nathan i riwei i pa, ⁵ "Ma nae ma au taunola David ma riwei ma pa, BADA wei e ririwei 'Eḡa tam numa ma voai da Tau au animae."

⁸ BADA i riwa me, i pa, "Au taunola David ma riwei, 'BADA VIVIREWAPANA KAUKAUANA wei i riwei:

Tam au naona ravarava ota sipu u paipaini au wapu, wate Tau a terepaim da mai Israel ai bada. ⁹ Mepa u nenelana, Tau tam a mae-ratuim ma au matam am gavia anapui a pupunapai. Ma marina wavam ana voepai, me rava wavai naenaeni au dobu. ¹⁰⁻¹¹ Ma au rava Israel dobu ana verei da ina raunuma ma ana nuaubai ina mae. Au naona i vivikareiana da marina babada a terei da mai Israel ita vibadei, wate rava apoapoei tau i vigaviei ma marina amapo ega ina kauana-melei. TAU BADA a ririwem da am epaepaia ana vimaḡai ma tam ma am epaepaia ona vivigulau.

¹² *Ma am epaia tagogi ana vinei, tam natuoim tagogi da ina vigulau maranai tam am mara damona ina ḡetai da amanam ma votagoi. Ma tauna ana kauai da ina vibada ḡaeḡaena, ¹³ ma ega aiai ana vigulau ina vaitawanei. Ma tauna tempol ina voai Tau aubaiu,

¹⁴ Tau ina viamaneu ma tauna ana vinatunei. Ma maranai i kauana-boai, ana kovogi me ama natuna e kovokovogi nanare. ¹⁵ Wate eḡa melanai au nuavaina awarina ana vaitawanei me Saul awarina a vaitawanei, tauna ana vigulau a vaitawanei ma epaiana tam a terem. ¹⁶ Am numa ravai rereḡana eḡa melanai ina kwa ma am epaepaia ina vigulau ma ina vibada nonoa."

¹⁷Ma BADA aiwai Nathan ana au rauboni i riwei anatapuna David i parivere.

11

David turana awana i kwalei

¹Omra e tomtom maranaina gulagulau e opuopu ġavia aubaina. David sorodia ai bada Joab ma Israel ana sorodia i paritawanei da mai Ammon ai sorodia ita vipupui. Ma ai taon Rabbah etanaina i matave-potai da ravai eġa ita rui bo ita opu, David eġa ita nae ma au Jerusalem i mae.

David ma Bathsheba

²⁻⁴Mara tagogi aubigai David i matave-vomairi ma ana au poewa vatavatarana i bababara-nae. Ma i'nana damana da wavine i'nana i toatoa, i oġa oġa-melei aubaina marina ana nawaravi doriana i kwa, wavine inanana aiai kaukauana anina ma David, rava i paritawanei da ita aramanei tauna aiai. Ravana i ġeta memei ma i parivere i pa, "Wavine wavana Bathsheba, Eliam natuna ma Uriah Hitti ei awana." Ma David ana taunola i paritawanei da wavinena i nei ai awarina ma tauna maiteni i matave ma i nae me au numa. ⁵Wavinena i duama ma riwa i paritawanei David awarina i pa, "Tau a duama."

⁶David riwa i paritawanei Joab awarina i pa, "Uriah Hitti ei ma paritawanei awariu."

Ma Uriah i paritawanei David awarina. ⁷Maranai i ġeta David awarina ma David tauna i paridadanei, "Joab ana sorodia maiteni menanare, anina bo eġa? Ma ġavia menanare?"

⁸Ma David Uriah i riwei, "Ma nae au numa ma ma vilauvitau."

Ma Uriah gulau ana numa i opu-tawanei da i nae ma au murina David ana pulo i paritawanei Uriah ana au numa. ⁹Wate Uriah eġa ita nae ana au numa, ma kampa ana au metaeta ana bada ana taunola maiteni i vimatave lana.

¹⁰Ma tau David i riwei, "Uriah eġa ita nae au numa." David Uriah i riwei, "Tam u vaġavaġai da u nei. Aiwai aubaina eġa uta nae am au numa?"

¹¹Uriah David i riwei i pa, "Parivainuagana bokisina, mai Israel ma Judah ai sorodia au numa gara e matamatave. Au bada Joab ana sorodia maiteni au wapu i rauġaravu, wei lamna aubaina eġa ata nae au numa da ata am ma ata uma ma awau maiteni ata matave. Lamna eġa ana kau ei, eġateni!"

¹²Anina ma David Uriah i riwei, "Weka ma mae amadodo ma au maratoma ana paritawana-melem."

Uriah au Jerusalem i mae da au pom ġela. ¹³Ma David Uriah i rauġorei da maiteni i am ma i viuma-buai. Wate waguvarai Uriah i opu David ana taunola awarii da ana au aravi i matave; eġa ita nae ana au numa.

¹⁴Ma ubaubanaina David pepa i girumi ma i paritawanei Joab awarina. ¹⁵Pepa au orana i giruma i pa, "Mepa ġavia potopotona kampa Uriah ma terei ma am sorodia ma tere-opunei da tauna ava ina mae ma ina kero ma ina irage."

¹⁶Joab Rabbah taona i vivineneġanei da i aramanei mepa ġavia i virewapana kua ma kampa Uriah i terei. ¹⁷Ġavia taonei i opui ma Joab ana sorodia maiteni i viġavia ma David ana sorodia ġelau i virage. Tau Uriah oroto Hitti ei maiteni i virage.

²⁶Ma Uriah awana riwana i vaia da awana Uriah i 'rage ma i touei ma i moguei. ²⁷Maranai i mogu-vorovei David rava i paritawanei da i nei ai ana au numa da awana ġelauna, ma tauna David natuna orotona i ġuni. Wate David aiwai i kau ei, BADA eġa ita vinuaiaiei.

12

Peroveta Nathan David i eni

¹✧Anina ma BADA peroveta Nathan i paritawanei David awarina ma i riwei i pa, "Nelara ruaġa au taon tagogina i mae, oroto tagogi manemanena ma maumaurana ma gelauna molamolakana. ²Ravana manemanena awarina sipu ma bulumakau maġamaġau. ³Wate ravana molamolakana sipu natuna wavinena i gimara, ma natunatuna maiteni i ġamoi da i rata, molamolakana ana sipu tagotago. Ana lam momoġina sipu i aniani ma waira ana au kelaka i umaumi ma au arona i matamatave, wei lamna me tauna natuna guguinina.

⁴—Marina taomana i nei oroto manemanena ana au numa, ma oroto manemanena eġa ita ġoei da ana sipu bo bulumakau ita vunui da ana taomana ana lam ita vokaukauei. Eġa,

tauna oroto molamolakana ana sipu natuna wavinena i vunui ma i vitavi ma ana taomana i verei.”

⁵ Nai maranaina David i meji guratana ma Nathan awarina i ġaiawa, “BADA lawalawaina wavanei a ririwa da aiai wei kauana i kauai anina ina iraġe! ⁶ Kaua apoapoe kaukauana i kauai lamna aubaina sipu ġaubona 4, orotona molamolakana ina verei.”

⁷ Anina ma Nathan David i riwei, “Tam nai ravana! Wei lamna aiwai BADA Israel ana God i riwei, ‘A vinem da Israel ana gulau ma Saul au urana a vaitawanem. ⁸ Ma am bada Saul ana vibadana ma ana buderi a vere-tawanem ma awawana au uram a terei. Ma nanare a terem da Israel ma Judah u vibadei. Mepa da wei anatapui i muomuo ġuratana awarim, tagotagogina au tepana ata viaitepatepani. ⁹ Aiwai aubaina riwau bagibagina u rau-aġaiġai? Aiwai aubaina wei kauana apoapoena u kauai? Uriah Hitti ei sodei u piaġi; awana mai Ammon ai sodei u viraġeni. Ma awana u vaia da awam. ¹⁰ U rau-aġaiġai u Uriah awana u vaia da awam lamna aubaina am au numa viġaiġaiawa ina mae-nonoa.’

¹¹ —BADA wei e ririwei, ‘Tau aburuna ava da apoapoena ana neiai am au numa. Au matam awawam ana vaia ma oroto au ririvam ana verei. Ma tauna awawam maiteni ina matave, patara au matai. ¹² Tam u kauana-ġovaġei wate tau madeġai ana kauai, mai Israel au matai.”

¹³ David Nathan i riwei, “Tau, BADA awarina a kauana-boai!”

Nathan, David i riwei, “Ee wate God am apoapoe e vaivai-tawanei. Tam eġa ma iraġe. ¹⁴ Wate kaua apoapoena u kauai ma lamnei BADA u vijiboġa-kauai lamna aubaina natum ina iraġe.”

¹⁵ Nathan i nae ana au numa. Ma BADA doria i paritawanei David ma Uriah awana, natui awarina ma i doria kaua. ¹⁶ David i raupari guratana God awarina natuna aubaina. Am i voterei ma i rui ana au numa ma au debidebi i matamatave. ¹⁷ Ana numa babadai i nei awarina, da au debidebi ita voepai ma maiteni ita am, wate i geduai.

¹⁸ Aupom 7 au murina tevera i raġe ma ana numa babadai i rovo da David eġa ita pariverei. Tau i ava i babani vivira i pa, “Maranai tevera lawalawaina David eġa ita rautaniġaneta ma marina menanare tana riwanei da natuna i raġe? Mepa da ina viapoapoena-melei!”

¹⁹ David i ‘nanai ana taunola i pari-ararava ma i aramanei da natuna i raġe.

Ma i paridadana, “Tevera i raġe bo?” Ma tau i paribelei, “Ee tauna i raġe.”

²⁰ Anina ma David debidebiei i vomairi ma i toa ma i vigara ma monamona gabugabui i toai ma i nae au numa gara da i voepaepa. Ma i nae me au numa ma lam i vibaġei da i neiai ma i am.

²¹ Ana numa babadai i baiei ma i riwa, “Maranai tevera lawalawaina, tam u uji ma u mogu, ma tevera i raġe, tam u vomairi da e amam!”

²² David i paribelana, “Ee tau a uji ma a mogu maranai natu lawalawaina. A notai da BADA ina rau-nuapoapoeleu ma natu ina lawana. ²³ Wate marina i raġe aiwai aubaina ana u uji? Ana neiana-melei bo? Amapo ana nae awarina wate tauna eġa ina nei awariu.”

²⁴ Anina ma David awana Bathsheba i vinuau bai ma maiteni i matave. Ma tevera orotona i ġuni ma David i ġorei Solomon. BADA tevera nuanuana i vaia, ²⁵ ma lamna aubaina BADA peroveta Nathan i paritawanei da tevera wavana i ġorei Jedidiah *.

* 12:25: Wei anona Bada ana nuavainana

1 Kings Gulagulau Naona

Pariverena

Wei bukana ana ġuta tonuġa, ġuta tagogi (Kapita 1-2) lamna gulau David ana irāġe i bababaniei ma natuna Solomon tauna ana gabu i viaia da i vigulau. Ġuta viruaina (Kapita 3-11) Solomon ana vibada mai Israel awari lamna e vivieġeta ma menanare ana vibada nai au dobona i tua-nae ma i rata. Ma maiteni e ririweta da tauna menanarena God ana tempol i voanei au Jerusalem. Ma ġuta damona (Kapita 12-22) e ririweta da menanare mai Israel i kai da navanava ruaġa, Israel ana dam ma Judah ana dam. Ma dam tagotagogi ava ai gulau i mae. Wei bukana lamna nai gulau ai virarautua e bababaniei ma e viviatataieta da metau i gulau Bada riwana i votaġotaġoi me David i kauai nanare, ma metau i gulau Bada i mae-puputei ma god ġelau i raudunelei.

Wei bukana au orana.

Gulau David i'raġe ma natuna Solomon i vigulau (2:10-12)

Solomon God i vibaġai da nualaula ma nota aiaina ita verei (9:3-5, 7-4, 16-18)

Solomon ana vibada i tua nae (4:20-21, 25)

Solomon God ana tempol i voai ma i raupariei (5:1-6, 6:1-7, 11-14, 8:1, 3-6, 10-11, 22-23, 27-30, 41-43)

Mai Sheba ai gulau wavinena Solomon i raugenari (10:1-9)

Solomon God i mae-puputei (11:1-5, 7-13, 26-33, 35, 40)

Solomon i'raġe ma natuna Rehoboam gabu i vaini (11:42-43)

Rava i kai da dam ruaġa, Israel ma Judah (12:1-20)

Israel ai Gulau Ahab God i mae-puputei ma god ġelau i raudunelei (16:30-33)

Peroveta Elijah kaiababa ma natuna orotona i voaġui (17:1, 8-16, 17-24)

Bada Baal ana peroveta i vovaiubai au ola Kamel (18:1-2, 17-46, 19:1-21)

2

David i'raġe

¹⁰⁻¹¹ *David Israel i vibadei madeġa 40; au Hebron madeġa 7 ma au Jerusalem madeġa 33.

David ana mara i kwa ma au Jerusalem au kokoaga noinoina au ririvai i vimataveni. ¹² Ma Solomon amana ana gabu i vaia da Israel ai gulau ma God i kauai da ana vibada i virewapana.

3

Solomon nuaulaula i vibaġei

³ Solomon, BADA nuanuana i vaia ma lamna aubaina amana David ana tarawatu i vojijina-kauai. Wate kaua tagogi i kaukauana-boai lamna pulo i apuapu labalababai nai dobona ravai ai pulo ai au aniamapuna. * ⁴ Wei lamna pulo aniapuna gabuna, wavana nae-naena i mae au Gibeon. Solomon i nae weka da ġamoġamo 1,000 i apu-tapui BADA awarina. ⁵ Waguvara tagogi BADA, Solomon ana au rauboni i riwei i pa, "Aiwai e ġoeġoei, ma vibaġei ma ana verem?"

⁷ Solomon i paribelei, "BADA au God, tam u tereu da amau a raviepaiai da gulau, wate tau tevera ota ma eġa ata aramanei menanare ana vibadanei. ⁸ Ma tau weka am rava u vinevineia au poui, tauti i maġa dewadewa da eġa aniavana. ⁹ Eġa aiiai ainelana tagotagogina am rava, u vinevineia ina vibadei. Lamna aubaina nuaulula ma vereu da ana aramanei metauna aiaina ma metauna apoapoena."

¹⁰ BADA i vinuiai da Solomon nuaulaula i vibaġei. ¹¹ Ma Solomon i riwei, "Tam eġa lawana manamanaina bo mane, uta vibaġei bo uta vibaġaiu da am ġavia ata viraġeni. Eġa! Tam u vibaġaiu nuaulaula aubaina da au rava ma vibadana-kauai. ¹² Aiwai u vibaġei ana verem! Nota aiaina ma nuaulaula ana verem, eġa me aiiai ġelauna au naona nanare bo aiiai ġelauna muriai ina vaia nanare. ¹³ Avena da mane ma vipurapura ma wavam vimae-ġaeġaenana aubaina, eġa uta vibaġei, wate ana verem, da am au lawana eġa aiiai ġulauna am vigulau ina votani. ¹⁴ Ma mepa da ma rautaniġaneu ma au tarawatu ma voteletelei me amam David i kauakauai nanare, tam am lawana ina manawa."

* 2:10-11: 2Sa 5:4-5 * 3:3: Eng. High places Weka ola muomuou au tepai pulo aniapuna i voa-naiei Canaan

Solomon ana nuaulaula i vieḡai

¹⁶ Muriāi etanai waivinei ruaḡa i ḡeta gulau awarina da tauna ai ḡaiawa ita okei. ¹⁷ Wavine tagogi i riwa, “Au bada tauai airuaḡa ai numa tagogi. Ma tau tevera orotona a vinatunei au numa, maranai noi wavinena kampa. ¹⁸ Ma aupom tonuḡa au murina wavine viruaina nanare tevera orotona i vinatunei. Eḡa aiāi ḡelauna au numa anina airuaḡa ava.

¹⁹ —Ma waguvara tagogi wavine natuna i matave-jjini da i 'raḡe. ²⁰ Ma waguvarai au pouna i vomairi, ma natu au ririvau i matamatave i vaia. Tauna natuna irairaḡena au ririvau i vimataveni ma tau natu lawalawaina i vaia da au ririvana. ²¹ Ubaubani a vomairi da natu ata viḡuḡui, lamna a baei da natu i 'rairaḡena. Ma mara i tom kaua ma ata inana-kauēi lamna eḡa tau natu.”

²² Wate wavinena ḡelauna i riwa, “Eḡa! Tau natu lawalawaina; tam natum irairaḡena.”

Ma wavine au naona i vinatuna i riwa bagibagi i pa, “Tevera irairaḡena lamna tam natum ma lawalawaina lamna tau natu! Ma nanare airuaḡa i viḡeḡae.”

²³ Anina ma gulau Solomon i riwa, “Wei tauna e ririwa, ‘Eḡa! Tam natu lawalawaina ma tam natum irairaḡena.’ Ma noi tauna e ririwa, ‘Eḡa! Tam natum irairaḡena ma tau lawalawaina.”

²⁴ Ma gulau i riwa, “Sod ona neiāi.” Ma i neiāi gulau awarina.

²⁵ Ma i eḡara, “Tevera lawalawaina au pouna ona viailaraḡi da navanava tagogi wavine tagogi ma navanava ḡelauna wavine ḡelauna.”

²⁶ Tevera lawalawaina alo oina, nuanuana i bola-kauēi ma gulau i riwei, “Au gulau a vivibaḡaim da tevera lawalawaina noi wavinena ma verei! Eḡa ma viraḡeni!”

Wate wavinena ḡelauna i riwa, “Eḡa tam bo tau teverana tana vaia. Tevera au pouna ma viailaraḡi!”

²⁷ Anina ma gulau ana paribelana i tere-ḡairei i pa, “Eḡa tevera ona viraḡeni ma wavine au naona i vivinatuna ona verei, tauna tevera alo oina.”

²⁸ Maranai mai Israel Solomon ana etara riwana i nonori, marina tau Solomon ina vivirei, ma i aramanei da God, Solomon nuaulaula i verei da lawana ina tere-vaijjimani.

4*Solomon i vibada kaua*

²⁰ Mai Judah ma mai Israel ai patara i maḡa dewadewa me bubu au gera. Tau ai lam ma ai uma tagotagogina ma i vinuaiāi kaua. ²¹ Ma Solomon dobuna anapapuna i vibadei. Ana parata au waira Euphrates i vikarei da i ḡaira au Philistia ma kampa da i ḡaira Egypt ana au parata. Wei ravai tax i vivimaiei gulau Solomon awarina ma i voteletelei maranai lawalawaina.

²⁵ Maranai Solomon i vibada mai Judah ma Israel ana nuaubai i mae, ai nuabola eḡa aiwai. Au lavaratei Dan ana dam ai au dobu i vikarei da i ḡaira au Beersheba au rauanaḡei, numa nununai ravai anapapui ai numa ma ai wapu i mae.

5*Solomon Tempol voana aubaina i vokaukaua*

¹ Maranai David maemaenaini, tura-kauana lamna Gulau Hiram, Tyre ai gulau. Maranai gulau Hiram riwana i vaia da Solomon i vigulau au Israel, amana David epaiana, Tauna ana taunola i paritawane da gulau vouna i viegualaei.

² Ma gulau Solomon wei riwana i paritawane gulau Hiram awarina i pa:

³ Tam u aramanei da amau dam maḡamaḡai au ririvaia i mae-kwaviro i ma maiteni i viḡaiḡaiawa nonoa. Ma lamna aubaina eḡa tagotagogina da tempol ita voai Bada ana God, viborumana aubaina. Wate i vivipaipi da au naona Bada ana aguei ana ḡavia ita vipupui.

⁴ Wate marina Bada nuaba i vereu. Au ḡavia ma au nuabola eḡa. ⁵ *A vinua-notanota da tempol ana voai, Bada God viborumana ma vimae-ḡaeḡaenana aubaina. Me Bada amau i ririwei nanare maranai i riwa i pa, “Natum orotona ana terei gulau, am au gabu, ma tauna numa ina voai tau viborumau aubaina.”

⁶ Lamna aubaina am taunola ma paritawane au ola Lebanon, da aubai ai bagibagi cedar ina tarai. Tam am nelara ai tarana i aramana-kauēi. Tau au nelara ana paritawaneai da ina tara agui. Am nelara ana vimaiei, biaḡa e vivibaḡei nanare ana vimaia.

Anina ma gulau Solomon ai cedar i vimaiei. Ma mai Israel nelara 30,000 i vaia ma i voagui da ai ma purapura ḡelau numavao aubaina i vivaneia i Jerusalem.

Solomon wate nanare nelara 150,000 i terei da i nola, wei ravai ai nola da ġaima ina wamawamai ma ina boribori numa voa aubaina.

6

Solomon tempol i voai

¹ Solomon mai Israel i vibadei da madeġa tonuġa ma au vi-4-na, nawaravi au viruaina e ġoreġorei Ziv, tauna BADA ana tempol voana i vikarei. Wei lamna madeġa 480 i kwa maranai mai Israel, Egypt i opu-tawanei.

⁷ Ġaima ġaeġaei numa voana aubaina anapui au weia i ġarai ma kampa i bori-naiei, da eġa irama bo aniambori gugurai numavoa gabuna ita vitaniġa-potai.

¹¹ Ma BADA Solomon i riwei, ¹² “Wei Tempolna voana aubaina ana riwem, mepa da riwau ma rautaniġanei, ma au tarawatu anapui ma votaġotaġoi, ma aiwai a ririwem ma kaukauei, Tau aiwai amam David a parivainuagani ana kauai aubaim. ¹³ Ma tau au rava mai Israel maiteni ana mae, ma eġa melanai ana netawanei.”

¹⁴ Anina ma Solomon tempol i voa-pai.

8

BADA ana Parivainuagana bokisina i ruiei au tempol

¹ BADA ana parivainuagana bokisina au Zion, David ana taon* ita vaia da ita neiai au Tempol. Gulau Solomon, Israel babadai ma dam nununai babadai anapui i ġoreiai awarina au Jerusalem.

³ Maranai Israel babadai i ġetai, pirisi parivainuagana bokisina i voepai. ⁴ Pirisi ma Levi ana dam ravai parivainuagana bokisina ma numa gara ma ana purapura vivivirei i avarenaiei au Tempol. ⁵ Gulau Solomon ma mai Israel anapui parivainuagana bokisina au naona; sipu da bulumakau i vunuvunu-naiei, ġamoġamo i maġa guratana da iavana i kauana-avei.

⁶ Ma pirisi parivainuagana bokisina i ruiei tempol au orana da ana au gabu vivivira dewadewana cherub* ruaġa papei au gabaurina i vikialai.

¹⁰* Maranai pirisi gabu vivivireina i opu-tawanei, bau potopotona i ġairai, ma ana boruma numana i purui. ¹¹ Pirisi eġa tagotagogina da ai nola ita kauai aubaina bau potopotona; BADA ana boruma, tempol i vioai.

Solomon Israel aubaina i raupari

²² Ma Solomon pulo aniapuna au naona i mairi, ma au murina Israel patarana. Urana i voepai au mara, ²³ ma i raupari i pa, “Oo BADA, Israel ana God, eġa mepa God ġelauna me tam nanare, au tepana au mara bo au gabaura au dobu! Tam am parivainuagana anapuna e kaukauei, ma mara nonoa am rava nuanuai e vaivaia maranai orai taputapunei e votaġotaġoim.

²⁷ —Wate amapo God au dobu ina mae bo eġa? Eġateni! Mara, ma nanare mara ġedewadewa eġa tagotagogina da tauna ina vojijini. Wei tempolna a voavoia lamna anina bo eġa?

²⁸ —Wate au pari ma nonori. BADA au God, tau am taunola ma aiwai amadodo a vivibaġei ma vereu. ²⁹ Am tempol ma inana-vaitetei, marai ma waguvarai, wei gabuna aubaina u riwa u pa, “Tau wavau kampa.” Lamna aubaina au pari weka ana pariparitawaneiai ma i rautaniġanei. ³⁰ Au pari ma nanare am rava mai Israel ai pari ma nonori, maranai naoi i tereiai weka ma i raupari. Au mara ai pari ma nonori ma ai apoapoe ma nota-tawanei.

⁴¹⁻⁴² —Ma maranai jentail aueia maemaiei, riwam ma am rewapana ma kaua ġaeġaei u kaukaueia riwai ina nonori; ma ina nei da ina vimae-ġaeġaenim. Ma am numa au naona ina mairi ma ina raupari ⁴³ am au animae au mara, ai pari ma nonori ma ai ġoana ma kauai. Ma jentail wavam ina aramanei ma ina vimae-ġaeġaenim me am rava oina mai Israel. Ma jentail ina aramanei da wei tempolna a voai. Tam vimae-ġaeġaenam aubaina.”

* **8:1:** Zion lamna melagai aburuna, Jerusalem taon garina au orana. † **8:6:** Cherubwei purapurai lawalawaii wate ruaġa ai Olivei i tai ma i vimairini (4 mtr) ma papei i terei da numa au giana da ġia ġelauna i tonei. ✪ **8:10:** Exo 40:34-35

10

Sheba ai Gulau wavinena Solomon i raugenari

¹ Solomon ana vigulau wavana naenaena ma lamnei Bada i vimaē-ḡaeḡaeni. Ma Sheba ai gulau wavinena, wei riwana i nonori ma i ḡei au Jerusalem da paridadana piripirinei Solomon ana nuaulaula ita raudadani. ² Wavine ana taunola ma kamel maḡamaḡau ai pulo i vigerui ma ana borui i derirui. Taui ai pulo lam tauvidagiai, ḡaima maiāi ḡaeḡaei ma gold ḡaeḡaena. Wavine i nei Solomon awarina ma kaula maḡamaḡau i vinua-notenotei Solomon i paridadanei. ³ Solomon ana paridadana anapuna i paribelei, kampa eḡa aiwai tagogi ita piripiri guratana awarina. ⁴ Sheba ai gulau i aramanei da Solomon nuanuana i ulaula kaula ma; i 'nanai ana gulau-numana, vigulauna i voai, ⁵ lam au kepakepa, ana gabemani babadai ai gara, ana wine taupainii, ma pulo i apuapui Bada ana au tempol. Ma wavine ana nota i kwa.

⁶ Ma Solomon i riwei, “Am kaula anapuna ma am nuaulaula au au dobu a nononoria lamna anapuna riwa kaula! ⁷ Au naona eḡa ata vitumaḡanei wate marina a nei da matauei a inanai da a vitumaḡana. Ma a inanai da aiwai a nononoria lamna eḡa. Tam am vigulau i rata dewadewa. ⁸ Am taunola* i vinuaiaai kaula! Am gabemani babadai au naom e maimairi marana patapatai ma am nuaulaula e rarautaniḡanei. ⁹ Bada am God ana voepaepai, i vinuaiaiem ma i terem Israel ai gulau. Bada ana nuavaina maemaena mai Israel aubai i terem gulau, da riwa kauēi ma kaula jijimaninei ma vibada.”

¹³ Solomon, Sheba ai gulau aiwai anapuna i rarau-oḡarei ma i vivibaḡei, i verei, wate ḡelau i vereoi. Anina ma gulau wavinena i wanavira-melei ana au dobu ana taubagibagi maiteni.

11

Solomon Awawana

¹ [⊕] Gulau Solomon, Egypt ai gulau* natuna i ravaḡi ma nanare jentail waivinei i ravaḡa-naiei, ḡelau mai Moab, mai Ammon, mai Edom, mai Sidon ma, mai Hitti. ² [⊕] Au naona BADA mai Israel i riwana-guratei i pa, “Jentail waivinei eḡa ona ravaḡi aubaina tau nuanuami ina vovirai da ai god ona voepaepai.” Wate Solomon nai eḡa ita rautaniḡanei, ma awawana nuanuai i vai-kauēi. ³ Tauna awawana 700, anapui gulagulau natunatui, wate awawana ḡelau 300 lamna me ana taunola. Taui Solomon ana vitumaḡana BADA awarina i vikwakoi.

⁴ Maranai Solomon i magura, awawana ana nota i virai da god ḡelau i votaḡotaḡoi, ma eḡa BADA awarina ita vipatutu me amana David. ⁵ Tauna mai Sidon ai god wavinena Ashtoreth, ma mai Ammon ai god apoapoe kaukauana Milkom[†] i viviborumei.

⁷ Au Ola Olive au Jerusalem kampa Solomon voepaepa gabuna i voai mai Moab ai god apoapoe kaukauana, Chemosh aubaina ma ḡelauna mai Ammon ai god apoapoe kaukauana, Molek aubaina. ⁸ Voepaepa gabui wenanare i voanaiei awawana anapui aubai da tau i weka incense ma ai pulo ita apuapui ai god awarii.

⁹⁻¹⁰ Maraotai BADA, Solomon awarina mara ruaḡa i eḡa ma i riwana-guratei da god ḡelau viborumai ina voterei. Wate tauna eḡa ita voteletelei, ma Israel ai God viborumana i voterei. Lamna aubaina BADA amlona i ḡaiḡai kaula Solomon awarina. ¹¹ Ma i riwei i pa, “Wei kauai i visina-viraviraim ma au parivainuaḡana bagibagina ma au tarawatu eḡa uta votaḡotaḡoi, lamna aubaina vibada au uram ana vaitawanei ma am taunola tagogi ana verei. ¹² Wate amam David notanei wei eḡa ana kauēi maranai tam lawalawaim. Wate natum au urana ana vaitawanei.”

Jeroboam ma Solomon ai virarautua

²⁶ Solomon ana gabemani taunoleina wavana Jeroboam maiteni gulau Solomon i viḡaviei. Tauna Nebath natuna, ana taon Zeredah au Ephraim, ma alona kaiababa wavana Zeruah.

²⁷ Jeroboam ana virarautua wenanare: Solomon ana taunola doa i taratarai da gwagwa i purupurui ma Jerusalem taon garina ḡaimēi gavogavoi i vopotapota-naiei. ²⁸ Jeroboam oroto araramanina ma maranai Solomon i 'nanai da tauna i nola kaula, ma i terei da Joseph noinoi dam Ephraim ma Manasseh, ai taunola i vibadei.

* 10:8: Giruma ḡelau i ririwa awawana ⊕ 11:1: Deu 17:17 * 11:1: Pharaoh ⊕ 11:2: Deu 7:3-4 † 11:5: Hebrew Milkomwate giruma ravai maḡamaḡau i notanotai da wei lamna mai Ammon ai god wavana ḡelauna Molek

²⁹ Mara tagogi, Jeroboam Jerusalem i voterei da i nenaē ma au mutulua peroveta Shilohei wavana Ahijah maiteni airuağa ava i vinenebelana, Jeroboam kwama vouna i oteoteni. ³⁰ Ahijah, Jeroboam ana kwama vouna i vojijini ma i sikanaiei da 12. ³¹ Ma i riwei, “Wei garai sikasikai 10 ma vaia aubaim, BADA Israel ana God e ririwa, ‘Tau Israel ana vidadana Solomon au urana ana sikatawanei ma ana dam 10 au uram ana terei.’ ³²⁻³³ Solomon Tau i geduaieu ma mai Sidon ai god wavinena, Ashtoreth, Moab ai god, Chemosh ma mai Ammon ai god, Milkom i vovoepapai ma eğa au iviu ita babara bo ita kauana-kauēi au matau bo riwau bo au tarawatu ita votağotağoi me amana David i kaukauei nanare. Wate au taunola David ma Jerusalem notaiei, Jerusalem a vinei da Tau ġariuei, lamna aubaina Solomon dam tagogi ana verei da ina vibadei.

³⁵ –“Wate Solomon natuna au urana Israel ana dam 10[‡] ana verem.”

⁴⁰ Solomon i ġoei da Jeroboam ita virağeni, wate tauna i ruba au Egypt, ai gulau Shishak awarina ma kampa i mae da Solomon i ‘rağe.

⁴² Solomon au Israel i vigulau da madeğa 40 i kwa.

12

Rehoboam

¹ Mai Israel anatapui i nae au Shekem ma i vipaipai da Rehoboam ita nei ma ita terei ai gulau. ² Maranai au Egypt, Nebath natuna Jeroboam, wei riwana i nonori ma Egypt i voterei ma i naeme. (Tauna au naona Solomon i rovoei da kampa i ruba nae.) ³ Ma Israel babadai riwa i paritawane i da Jeroboam i nei ma anatapui i nae Rehoboam awarina ma i riwei, i pa, ⁴ “Amam nola vitaikaukauai au tepaiai i terei, wate ai vita marina uta votelatelai, ma ana vitaunoem.”

⁵ Rehoboam i paribelei i pa, “Ona nae ma aupom vitonuina ona nememei ma ana paribeleimi.” Ma rava i vilamonei.

⁶ Ma gulau Rehoboam, dogadogara awari vinuaterena i vaia, tau i amana Solomon ana taunola maranai lawalawaininai. I paridadanei i pa, “Wei ravai menanarena ana paribelana-nei?”

⁷ Tau i paribelei i pa, “Mepa da u ġoei da rava ma voagui, ai vibağa ma vianinei, ma tau i aubaim ina vitaunola nonoa.”

⁸ Wate Rehoboam dogodogara ai vinuaterena i geduaiei ma i nae ana kimta awarii, maiteni i rata tagogi, ma marina tauna e vivitaunoiei ⁹ Tauna i paridadana, “Ami nota aiwai? Menanare tana kauanei, wei ravai e ririwa da ai vita tana viaburui?”

¹⁰ Ma ana kimta i paribelei i pa, “Nai ravai awarim i ririwa, ‘Amam vita ġaeğaeana i vereverelai marina ai vita ma viaburui.’ Wenanare ma riwei, ‘Tau vita ġaeğaeana ana veremi eğa me amau!’ ¹¹ Amau vita ġaeğaeana i veremi wate tau ġaeğaeotana ana terei au tepana! Tauna kwapuei i ravimi wate tau ġoroğorova donadonanei ana kwapuimi.”

¹² Aupom tonuğa au murina i riwa nanare Jeroboam ana babada maiteni i nememei Rehoboam awarina. ¹³ Gulau Rehoboam dogadogara ai vinuaterena eğa ita vaia ma pona bağibağinei rava awari i babani. ¹⁴ Tauna ana kimta ai vinuaterena i rautaniğanei ma nanare i riwa, “Amau vita ġaeğaeana i veremi; wate tau ana viaitepatepani. Amau i ravimi wate tau ġoroğorova donadonanei opimi ana sikai.”

¹⁵ Au naona God ana peroveta Ahijah, Shilohei aiwai Nebath natuna Jeroboam i pariverei marina anona i tupua. Gulau rava ai vinuaterena eğa nonorana ita ġoei, wate lamna BADA i kaukauei da aiwai peroveta i ririwei nanare ina tupua*.

¹⁶ Maranai Israel patarana i ‘nanai da gulau tau i babani i parivirevire, ma gulau i riwei i pa:

“Tauta eğa Jesse natuna David ana damei!

Eğa ana dam ravai!

Oo Israel ona naeme me ami au numa

Oo David am dam oina ma inanai!”

[‡] 11:35: Dam ruağa Judah ma Benjamin i voterei

* 12:15: ...da vigulau Solomon natunatuna awariei ina vaitawane i

Anina ma mai Israel i nae ai au numa. ¹⁷ Wate Rehoboam mai Israel au Judah maemaei i vibadei.

¹⁸ Adoniram, mai Israel anatapui ai taunola i vibadei. Gulau Rehoboam, Adoniram i paritawanei au Israel da ai taunola ita neiai au Jerusalem wate tau i gāime i virauraei da i viraḡeni. Gulau Rehoboam laḡilaḡina ana chariot i gerui ma i nae me au Jerusalem. ¹⁹ Ma wei marana da i nae mai Israel David ana dam ma ai vigulau i geduaiei ma i parivirevirei.

²⁰ Maranai mai Israel anatapui i aramanei da Jeroboam Egypte i nememei, tau i riwa i paritawanei da i nei awarii ma i terei Israel dam anatapuna ai gulau. Dam tagogiava, Judah ava, i mae David maiteni.

Jeroboam bulumakau goldei i kauē

²⁵ Ma ḡavia rovona aubaina Jeroboam Shekem taon ḡaimei i gari kwaviviroi ma kampa i mae. Wei lamna dobu violaolana, dam Ephraim ai dobu. Muriai i nae ma nanare Penuel taon i gari-kwaviviroi.

²⁶⁻²⁷ Mara tagogi gulau Jeroboam wenanare i vinua-notanota, “Mai Israel anatapui e ḡeḡae au Jerusalem da au tempol pulo e apuapui BADA awarina. Ma mepa da nuanuai ina virai ma ina audamana Judah gulauna Rehoboam awarina amapo tau ina viraḡeniu.” Ma wei vigulauna ina nae me David ana epaepaia awarii.

²⁸ *Ma ana dogadogara maiteni i babani da i vinua-terenei ma bulumakau ruaḡa goldei i kauē ma ana rava i riwei, “Jerusalem ḡaena i vinigarigari, Oo Israel wei ami god, tauna Egypte i tere-opunemi.” ²⁹ Ma bulumakau goldei tagogi au Bethel ma ḡelauna au Dan i terei.† ³⁰ Wei lamnei i ḡo’apoapoe; aubaina rava ḡelau uama ḡaeḡaena i naeni da au Dan da burumakauna i voepaepai.

³¹ Jeroboam maiteni voepaepa gabui ma pulo aniapuni i voanaiei ola au tepai ma rava labalababa eḡa mai Levi i vinei da pirisi, pulo tauapuna.

Rehoboam au Judah i vigulau, ma i vigulau da madeḡa 17 i kwa. Maranai tauna gulau i maemae, mai Judah god morumorui i raradunelei. Ma mai Egypt i nei da Judah i viḡaviei ma ai tempol purapurai maiai ḡaeḡaei ma gulau ana numa purapurai maiai ḡaeḡaei anatapui i pupuni da i vivanei.

Rehoboam ma Jeroboam i viḡaiḡaiawa nonoa. Maranai Rehoboam i 'raḡe, natuna Abijah au Judah i vigulau madeḡa tonuḡa i kwa. Tauna maiteni Jeroboam i viḡaviei. Maranai Abijah i 'raḡe, natuna Asa au Judah i vigulau da madeḡa 41 i kwa. Tauna gulau aiaina, ma God i raudunelei ma mai Judah ai god morumorui i viparipariei. Tauna mara nonoa mai Israel ai gulau Baasha maiteni i viḡaiḡaiawa. Maranai Asa i 'raḡe natuna Jehoshaphat i vigulau mai Judah awari.

Au Israel Jeroboam natuna Nadad lamna gulau apoapoena, ma nanare aiavoi da tauna au murina i vivigulau anatapui gulau apoapoei. Nadab mai Israel i vibadei da madeḡa ruaḡa i kwa ma Baasha tauna i viraḡeni, ma Jeroboam ana dam mamae-terenanai maiteni. Wate rava wavana Baasha i vigulau da madeḡa 24 i kwa ma i 'raḡe. Ma natuna Elah i vigulau da Israel i vibadei da madeḡa ruaḡa i kwa ma ana sorodia badana tagogi, wavana Zimri, tauna i viraḡeni ma i terepa-melei da i vigulau. Wate wiki tagogi au murina mai Israel ai sorodia Omri i terei da gulau, ana ma Zimri i viraḡena-melei. Omri i vigulau da madeḡa 12 i kwa, anina ma natuna Ahab tauna Israel ana gulau ma i mae da madeḡa 22 i kwa.

16

Israel ana Gulau Ahab

³⁰ Omri natuna Ahab, ana ḡo’apoapoe i rata guratana BADA awarina eḡa me gulau anatapui au naona i vivibada nanare. ³¹ Tauna i notai da lamna kaua labalababa da i ḡo’apoapoe me Nebath natuna Jeroboam i kaukauei nanare. Wate tauna i kauana-guratei maranai mai Sidon ai Gulau Ethbaal natuna Jezebel i ravaḡi ma i vikarei da ai god Baal i raudunelei. ³² Ma Baal ana voepaepa gabuna pulo tauapuna au Samaria i voai ma au orana pulo aniapuna i voai. ³³ Ahab god wavinena Asherah kokoitauna i vituramairini*. Ma kaua maḡamaḡaui

* **12:28:** Exo 32:4 † **12:29:** Mai Israel ai nota da Dan ma Bethel lamna dobu vivivirei. Bethel lamna au Israel (dam 10) au laubadei ma lamna 16 kilometer ota Jerusalem au kolanana. Wei eḡa uama, ma wei lamna Jerusalem e teretere-ḡairei ma rava e ririwei da au Bethel ina voepaepa. Dan lamna Israel au kolana au lavaratei. * **16:33:** Asherah lamna god wavinena, Baal awana; mai Canaan, mai Egypt ma Phonisia anatapui wei godna e viviburumei.

i kauēi da BADA, mai Israel ai God ita viamloḡaiḡaini, me mai Israel ai gulau au naona i kaukauei nanare.

17

Elijah ma Ahab

¹ Peroveta Tishbelei wavana Elijah* ana dobu Tishbe au Gilead, Ahab i riwei, “Riwa kaua! BADA Israel ana God lawalawaina, ma tauna a vivilaragei. Wavanei a riwa da turuvani eḡa ina peu ma garewa eḡa ina atuna madeḡa biāḡa da tau ana riwa da nanare.†”

Ma nanare i mae. Madeḡa biāḡa garewa eḡa ita atuna, marapoi i ḡetai ma eḡa lam.

⁸ Ma BADA Elijah i riwei ⁹ “Laḡilaḡina ma nae au taon Zarephath, Sidon au ḡereḡerena‡ ma kampa ma mae. Kampa kaiababa e mamae, a riwei da ina viambagibagim.”

¹⁰ Ma Elijah i nae au Zarephath. Maranai i ḡetai taon ana au anirui, ma kaiababa i 'nanai ai i ḡunaḡuna, ma i riwei, “A vivibaḡaim da waira aburuna uta neiāi da ata uma!” ¹¹ Ma i nenaē vainana aubaina ma orotona i garara me i pa, “Ma palawa apuapunana aburuna maiteni uta neiāi.”

¹² Kaiababa i paribelana i pa, “Riwa kaua! Am BADA God lawalawaina ma wavanei a ririwa, tau awariu eḡa palawa apuapunana. Awariu palawa aburu kaimojina ma monamona aburuna. Ai a ḡunaḡuna da ana nae au numa ma lam damona ana vitavi da natu maiteni ana am ma au murina ana raumolaḡau da ana iraḡe.”

¹³⁻¹⁴ Wate Elijah kaiababa i riwei, “Eḡa ma vinuabola! BADA Israel ana God e ririwa, ‘Am palawa abomana eḡa ma monamona wagina eḡa ina kwakwava ma BADA garewa ina paritawaneiaī da wapu ina gogo me!’ Anina ma nae au numa ma u ririwa nanare ma kauēi, wate au naona palawa aburuna ma apui aubaiu. Ma mae-terenana ma apui aubaimi.”

¹⁵ I nae ma menanare Elijah i ririwei, nanare i kauēi. Ma awari lam i mae da aupom biāḡa i kwa. ¹⁶ Ma me BADA Elijah i parivainuaḡani nanare palawa au aboma eḡa ita kwa ma monamona au wagi eḡa ita kwa.

¹⁷ Muriāi kaiababa natuna i doria ma ana doria i vovoguratei anina ma i 'raḡe. ¹⁸ Ma wavine Elijah awarina i riwa, i pa, “God ana taunola, Aiwai aubaina wei u kauēi awariu?

U nei weka da au ḡo'apoapoe uta vieḡai ma natu uta vi'raḡeni bo?” S

¹⁹ Elijah i paribelei i pa, “Natum ma vereu.” Elijah taubeu, alona au urana i vaia ma i avara-ḡaie i vatavatara mepa i mamae lana ma ana au animatave i vimataveni. ²⁰ Anina ma ponana i rata ma i raupari BADA awarina, “Oo BADA au God, aiwai aubaina kaua apoapoe kaukauana u kauēi kaiababa awarina? Tauna i taravainiu da ana au numa a mamae, ma u kauēi da natuna i 'raḡe?” ²¹ Anina ma Elijah i taduru ma mara tonuḡa taubeu au tepana i matave ma ponana i rata ma i raupari BADA awarina i pa, “Oo BADA au God, A viabaḡaim da tevera ana lawana ma veremeleī!”

²² BADA Elijah ana pari i nonori ma tevera lavutu i vikarei ma i lawana. ²³ Elijah tevera i voepai ma i avara ḡairei alona awarina ma i riwei, “Ma inanaī natum lawalawaina.”

²⁴ Wavine i riwa, “Marina aramana-kauēi da tam God ana taunola, ma BADA ana riwa gamomei e opuopu lamna riwa kaua!”

18

Elijah ma Baal ana peroveta

¹⁻² Madeḡa tonuḡa garewa eḡa ma gomara ḡaeḡaena i mae. Madeḡa au vitonuina BADA Elijah i riwei, i pa, “Ma nae gulau Ahab ma inanaī. Ma tau garewa ana paritawaneiaī.” Ma Elijah i nae da gulau Ahab ita inanaī.

¹⁷ Maranai tauna Elijah i 'nanai ma i riwa, “Wei tam bo, mai Israel rauaḡaiḡai amai?”

* **17:1:** Elijah anona BADA lamna God. † **17:1:** Mai Canaan e vivitumaḡana da ai god Baal garewa e vivibadei, wate maraḡela god ḡelauna wavana Mot anona iraḡetauna Baal i viraḡeni. Mepa da Baal i lawana me, lamna tauna dobu ina vituvaneī. Lamna aubaina, Elijah Baal i vimarumarui ma i ririwa da tauna God lawalawaina awarina i vitaunola, ma God garewa ma iraḡe i vibadei, muriāi tana inanaī maranai ina vomairi da kaiababa natuna ina vilawana-meleī ‡ **17:9:** BADA Elijah i paritawaneī au Sidon - kampa rava Baal i raudunelana-guratei. Wei lamna Ahab poiana orotona Ethbaal ana gabu, ma wei au marana, Elijah Ahab i raruḡovaḡei. S **17:18:** Nai marana rava i vitumaḡana da doria ma iraḡe lamna God ana kovoḡa ḡo'apoapoe aubaina. Kaiababa i vitumaḡana da Elijah tauna ana au numa i mamae ma lamna BADA matana i taini awarina ma lamna i kauēi da natuna orotona i 'raḡe.

¹⁸ Elijah i paribelei, “Tau eġa ata rauaġaiġai au Jerusalem, wate tam, ma amam ana numa rava! maiteni o rauaġaiġai. Taumi BADA ana tarawatu o geduaiei, ma Baal kokoitau i vivivorumei.” ¹⁹ Marina mai Israel anapupui ma ġorei da ina nae au ola Carmel ina nebeleu. Baal ana peroveta 450 ma Asherah god wavinena ana peroveta 400 Jezebel ana au aboma e amam, anapupupui ma neiai.

²⁰ Ma Ahab mai Israel anapupui ma Baal ana peroveta i ġorei da au ola Carmel ina vinenebelana. ²¹ Elijah patara au naoi i mairi ma i riwei, “Wei vinua-raġaraġai mara aiwai ina kwa, ona vinuanaina nae ma ona vianuanaina nei, metauna notana ona vaia? Mepa da BADA God, tauna ona raudunelei. Mepa da Baal god, tauna ona raudunelei.” Wate rava eġa aiwai ita riwei.

²² Ma Elijah tauri awarii i riwa, “BADA ana peroveta anina tau a mamae. Wate Baal ana peroveta 450.* ²³ Aubaita bull ruġa ona neiai, ma tau ai sia ina rautani ma ina bori muomuoi ma ai au tepana ina terei, wate eġa ina ravivoai. Ma tau nanare ana kauai. ²⁴ Ma taumi ona raupari ami god awarina, ma tau ana raupari BADA awarina. Metauna godna ai araratane i paribelana tauna God ririwa kauana!” Ma rava anapupui i vianina.

²⁵ Elijah Baal ana peroveta i riwei, “Taumi o maġa aubaina ona vinoa, Bull tagogi ona vinei ma ona vokaukauei. Ami god awarina ona raupari ma eġa ai ona ravivoai.” ²⁶ Ma tau ai bull i vaia ma i vokaukauei. Anina ma Baal awarina i raupari, ubaubanai i vikarei da i raviaubenai. Tau i garagarara, “Oo Baal, ma paribelelai!” Ma pulo aniapuna i arara kwaviviroi, Wate eġa paribelana; eġa aiwai ita paribelei.

²⁷ Aubenai Elijah i vikarei da i vimarumarui i pa, “Ona raupari guratana! Tauna god! Mepa da e raraboni bo i nae au ririva bo e vaġavaġai bo e matamatave! Ona ravidagudagui!” ²⁸ Ma tau garara i voguragurati ma me ai au kaua nanare, naipiei ma aierei tupuai i boribori-melei ma tara i toitoi. ²⁹ Tau i garagarara da i garagarara da aubigai pulo apuna ana mara. Wate amapo da eġa paribelana, eġa aiwai ita paribelei, eġa aiwai ita nonori.

³⁰ Ma Elijah rava i riwei, “Ona nei awariu.” Ma anapupui i nei ma Elijah i mae-kwaviviroi, tauna BADA ana pulo aniapuna i voavoa-melei. ³¹ *Elijah ġaima 12 i vaia, ġaima tagogi da Israel ana dam tagogi aubaina. Wava Israel BADA tau noii Jacob i verei. ³² Ma ġaimanei pulo aniapuna i voa-melei BADA viborimana aubaina. Ma au adana doba i ġarai da waira ana ruva 14 Ltr nanare ina vojijini. ³³ Pulo aniapuna au tepana ai i vatari, bull i bori-naiei ma siana ai au tepana i terei. Ma i riwa, “Nau 4 ġaeġaei waira ona vioai, ma sia ma ai au tepana ona iwaġi.”

³⁴ Ma nanare i kauai, ma i riwei, “Ona kauana-melei.” Ma nanare i kauai. Ma i riwei, “Mara vitonuina ona kauana-melei.” Ma nanare mara vitonuina i kauai. ³⁵ Waira i toi ġaira da dogo maiteni i vioai.

³⁶ Ma aubigai pulo apuna ana mara i ġetai, Elijah i babara-ġae pulo aniapuna au ririvana ma i raupari i pa, “Oo BADA, Abraham, Isaac ma Jacob ai God, amadodo rava ma viataie i da tam God au Israel ma tau am taunola, ma anapupuna u ririwei a kauai. ³⁷ BADA ma paribeleu, Oo BADA ma paribeleu da rava ina aramei da tam, au BADA, tam anina God, ma marina rava orai e taitaina-melei awarim.”

³⁸ Maratagogi BADA ana ai marei i ġairai ma pulo bull, ai, ġaima ma doa i aragibui. Ma waira i waiwaġia i ġuġuva-pai.

³⁹ Maranai rava wei i 'nanai tau i mae-ġaira au doa da i matave-taitaina ma i garara BADA awarina, “BADA anina God! BADA ainelana anina God!”

⁴⁰ Ma Elijah rava i egari, “Baal ana peroveta ona vojijini; Eġa tagogi ona voterei da ina ruba!” Peroveta anapupui i vojijini ma Elijah tau i riwei da i ġairei au Kishon gaugaubana ma anapupui i viraġeni.

⁴¹ Ma Elijah gulau Ahab i riwei, “Ma nae da ma am ma garewa ġaeġaena gugurana a nononori.” ⁴² Ma Ahab i nae da ita am ma Elijah i ġae ola Carmel au tepana, ma i mae-ġaira au doa ma kolana au ae-tutuna ma i raupari.

⁴³ Ma ana taunola i riwei, “Ma nae ma au bogei ma inana.” Ana taunola i nae da i nememei Elijah awarina ma i riwei, “Eġa aiwai ata inana!” Anapupuna mara 7 i paritawane i da inana.

⁴⁴ Ma mara vi-7-na i nememei ma i riwa, “Apau aburuna ana rata me oroto urana a inana bogei i ġeġae.”

* **18:22:** Elijah ana babani lamna gulau wavinena Jezebel e ririwei, tauna i ġoei da God ana peroveta anapupuna ina viraġeni. Ahab ana taunola Obadiah i voagu da God ana peroveta ġelau au guba i tere-govaġi ma waira ma lam i vereverei wate eġa tata aramane i biaġa lawalawai e mamae. * **18:31:** Gen 35:10

Ma Elijah i riwa, “Ma nae ma Ahab ma riwei, ‘Am chariot ma gerui ma ma ġaira muriai da garewa ina rautomenim.”

⁴⁵ Ma aburuna ava ma lada i ġei ma dobu i waguwarei ma ivena i ruba ma garewa ġaēġaē otana i toi. Ahab ana chariot i gerui ma i ruba au Jesreel. ⁴⁶ Ma BADA ana rewapana i rui Elijah awarina; ma ana gara giana i taini da ana au ġigoraġita i raġita-jijini ma i lavui da Ahab i votani da i aġeta au Jesreel.

19

Elijah i ruba govaġa au Sinai

¹ Ma Ahab awana Jezebel i vibenabenamei, aiwai anatapuna Elijah i kaukauei ma menanarena Baal ana peroveta anatapui i vununaiei. ² Ma Jezebel taupariverena i paritawanei Elijah awarina ma i pa, “Wenanarena marana au maratomi, tau ana viraġenim me au peroveta u viraġenane nanare. Mepa da wenanare eġa ana kauai, a raraupari da god ina kovoġa-kauuei bo ina viraġeniu.”

³ Elijah i rovo ma ana lawana aubaina i ruba. I nae au Beersheba au Judah, ma kampa ana taunola i voterei. ⁴ *Ma tauna ainelana i nae aupom au mutulua, ma i ġeta ai *brum* au ġouna ma i kiala ma i raupari da ita iraġe. I riwa i pa, “BADA, tau malau a vai-avei. Au lawana ma vaitawanei marina, tau irairaġeu, me noinoiu.” ⁵ Ma i mae-ġaera ai *brum* au karena ma i matave. Ma maratagogi BADA ana anela Elijah i vodadani ma i riwa, “Ma vomairi, ma am.” ⁶ I nana viravira ma i matamatave lana au kolanei palawa apuapunana ma waira aniuma. I am ma i uma ma i matave me.

⁷ BADA ana anela i nememei, i vodadani ma i riwei, “Ma vomairi ma ma am aubaina am vaġai ina manawa guratana.” ⁸ Elijah i vomairi da i am ma lamnei rewapana i vaia da ina babara aupom 40 ma maratomi 40 da au Sinai*, BADA ana au ola i ġeta. ⁹ Ma kampa i ġeta au guba ma i matave. Wate BADA i riwa, “Elijah weka aiwai e kaukauei?”

BADA Elijah awarina i eġa

¹⁰ Elijah i paribelei, “Oo BADA vivirewapana kaukauam, Tau mara nonoa tam a viborumem - tam ainelam. Mai Israel am parivainuaġana bagibagina i viaigai, am pulo aniapuna i viairikarikai, ma am peroveta i viraġena-pai, tau ainelau i votereu, ma marina i ġoei da tau maiteni ina viraġeniu!”

¹¹ BADA i riwa, “Ma opu au ola ma au naoi ma mairi.”

Ma Elijah kampa i maimairi ma labu ġaēġaena olana i ravi, da i gunevi, wate bada eġa nai kojikojirana au orana. I ve au murina lolo, wate BADA eġa nai lolona au orana.

¹² Lolo au murina ai araratana, wate BADA eġa nai aina au orana. Ma ai au murina pariararava jinajinana i nonori. ¹³ Maranai Elijah wei i nonori ana kwama i vaia da naona i purui† ma i opu guba au naona i mairi. Ma pona i riwa, “Elijah weka aiwai e kaukauei?”

¹⁴ I paribelei, “Oo BADA God, vivirewapana kaukauam, mara nonoa tam ainelam aubaim a vivilaraġa. Wate Israel ravai am parivainuaġana bagibagina i geduaiei, am pulo aniapuna i rikanaiei, ma am peroveta anatapui i viraġeni. Tau ainelau a mame. Ma marina i ġoei da tau maiteni ina viraġeniu.”

¹⁵ BADA i riwa, “Meiei e nenei nanare ma nae me, ma ma-rui au mutulua Damaskas, maranai u ġeta au taon, Hasael ma buloi, mai Syria ai gulau; ¹⁶ Nimshi natuna Jehu ma buloi Israel ai gulau, ma Shaphat natuna Elisha, ana taon Abel-Mehola ma buloi peroveta da am gabu ina vaia. ¹⁷ Aiavoi da Hasael i rovoei da e rubaruba, Jehu tau i viraġeni ma aiavoi da Jehu i rovoei da e rubaruba, Elisha tau i viraġeni!‡ ¹⁸ Wate mai Israel ai maġa 7,000 eġa melana Baal ita raudunelei bo kokoitau ita vigia-laġolaġonei, ina lawana!”

BADA Elisha i kwatuei

¹⁹ Ma Elijah i nae da Shaphat natuna Elisha i viaroni doa i uauatai, bulumakau 12 ru-aruagei ava raġiraġitai aniuata i taitaini ma i uauata. § Elisha ana bulumakau, au murioina i nolanola. Elijah i ġaira awarina ma ana kwama i votawanei ma Elisha i vioteni.* ²⁰ Elisha

* **19:4:** Jon 4:3 * **19:8:** Sinai wavana ġelauna lamna Horeb Weka BADA i viatataiana-meiei mai Israel awarii ma ana tarawatu i verei. (Exo 19:20) † **19:13:** Mai Israel i vitumaġana da eġa ai ai BADA ita inana ma lawalawaina ita mae. (Exo 3:6) ‡ **19:17:** BADA ana rava ina kovoġi ana parivainuaġana bagibagina i gai aubaina. § **19:19:** Mai Israel burumakau i pa iramei e taitaini da e uauata. * **19:19:** Wei lamna mataira da Elisha Elijah ana gabu i vaia da peroveta.

bulumakau i votere-tawanei ma Elijah i rubei, ma i riwa, "Au naona ma votereu da ana nae amau ma alou ana inanai ma ana vigia-lagolagonei ma tana nae."

Elijah i paribelei, "Anina ma nae wate aiwai a kauei awarim ma vinuanotenotei!"

²¹Ma Elisha i nae da ana bulumakau ruagai i virageni, pawe bulumakau au uai i viaigaigai da ai i viviri da sia i apui ma rava i verei da i am. Anina ma i opu da Elijah i votagotagai.

2 King Gulagulau Viruaina

Pariverena

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruağa gulagulau naona ma viruaina e ririweta. Gulagulau bukana naona e ririweta David au murina Solomon menanarena da i vigulau.

Solomon i'raġe ma au murina Israel i kai da baba ruağa. Dobuna au rauanaġei i ġorei Judah ma au lavaratei i ġorei Israel. Maranai mai Judah ma mai Israel gulagulau, God i voteletelei lamna nuaua i mae. Wate maraġela gulagulau God i rawaġaiġaiei ma god ġelau i raudunelei. Anina ma nuabola i tupua.

Maranai mai Israel God votelatelana i voterei, Tauna peroveta i paritawanei awari. Ma Gulagulau bukana viruaina au orana lamna peroveta wavana naenaena Elisha. Tauna God ana rewapanei kua ġaeġaei i kaukauei, ma rava awari i jimajima da ita mae-tavirei God awarina.

Elisha i'raġe ma au murina, gulagulau maġamaġau i apoapoe kua. Anina ma God ana rava i kovoġi ma lamnei ai ġavia tau i vovaiubai ma i pani ma i naiei. Au naona mai Israel awari i tupua ma muriai mai Judah awari i tupua. God ana rava mai Judah eġa ita vianinei da ita nae me ai au dobu da madeġa 70 i kwa.

Virarautua rereġana

Israel i kai da Vibadana ruağa, Israel ma Judah 1:1–17:41

Peroveta Elijah ana virarautua 1:1–13:20

Judah gulagulau i mai Israel gulagulau i virarautua 8:16–17:4

Assyria gulauna Samaria i vovaiubai ma Israeli i pupuna-naiei ma ana vibadana i kwa 17:5-40

Judah gulagulau i virarautua 18:1–21:26

Gulau Hezekiah ana au vibada i raukarei ma i nae da gulau Josiah ana au vibada 18:1–21:26

Judah gulagulau damona i virarautua 23:31–24:20

Babilon gulauna Jerusalem i vovaiubai da Judah ana vibadana i vikwai 25:1-30.

2

Elijah i ġaiei au mara

¹ Ma mara i ġetai da BADA Elijah labuei ita ġaiei au mara. Elijah ma Elisha Gilgal i voterei ma i nena. ² Ma Elijah, Elisha i riwei i pa, “Weka ma mae ma BADA i riweu da ana nae au Bethel.”

Wate Elisha i paribelei, “Riwa kua da BADA lawalawaina ma nanare tam lawalawaim, tau nanare eġa melanai ana voterem.” Anina ma airuaġa i ġaira au Bethel.

³ God ana peroveta borui au Bethel maemaiei i opui Elisha awarina ma i riwei i pa, “Tam u aramanei da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eġa ona babaniei.”

⁴ Ma Elijah, Elisha i riwei, “Weka ma mae, BADA i riweu da ana nae au Jeriko.”

Wate Elisha i riwa, “Riwa kua da BADA lawalawaina ma nanare tam lawalawaim, tau nanare eġa melanai ana voterem.” Anina ma tau i nae au Jeriko.

⁵ Ma God ana peroveta borui kampa au Jeriko maemaiei i opui ma Elisha i nebele i riwei, “Tam u aramanei bo da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eġa ona babaniei.”

⁶ Ma Elijah i riwei, “Weka ma mae, BADA i paripari-tawaneu au Waira Jordan.”

Wate Elisha i paribelei i pa, “Riwa kua da BADA lawalawaina ma nanare tam lawalawaim, tau nanare eġa melanai ana voterem.” Ma airuaġa i babara nae.

⁷ God ana peroveta 50 tau i votaġotaġoi, ma au muri i tumairi maranai Elijah ma Elisha Waira Jordan au adana i tumairi. ⁸ Elijah ana kwama i votawanei ma i piri ma lamnei waira tepana i ravi. Da i vilamonei au oiena ma au kelakelauna ma tau i pouna au alalana i babara damana.

⁹ Maranai au baba ġelauna i ġeta Elijah, Elisha i riwei, “Ma riweu aiwai ana kau i aubaim muriai da ina ġaieu.”

Ma Elisha i paribelei, "Tau am gabu ana vaia da peroveta ai bada lamna aubaina a ġoei da am rewapana ġaēgaena, ma viaitepatepani ma ma veredamaneu."

¹⁰ Elijah i riwa, "Lamna kaua piripirina e vivibaġei, wate mepa da u inanai ina ġaiġaie, lamna u vivibaġei u vaia ma eġa, lamna eġa."

¹¹ Ma airuāġa i bababara ma i vibababani ma hosi araratana, chariot araratana i taina ġetei ma tau i raviġori. Ma Elijah ma Elisha au poui i ruba ma BADA Elijah labuei i ġaie au mara.

¹² Elisha wei i 'nanai ma i garara, "Amau! Amau! Mai Israel taugaloecina vivirewapana! Tam u nael!" Ma Elijah eġa ita inana-melei. Nuanuana i bola-kauei ma ana kwama au pouna i sikai.

¹³ Ma Elisha i nae ma Elijah ana kwama au doa i vivipeunia, maranai i ġaiġaie au mara, i voepai ma i nae me waira au adana. ¹⁴ Ma kwamana i peupeu i vaia ma waira tepana i ravi ma i riwa, "BADA Elijah ana God mepa?" Maranai waira i ravi, waira i vilamonei ma au pouna au alalana i babara damana.

¹⁵ Jeriko ai peroveta boruna 50 au weia ma i 'nanai aiwai i tupua ma i riwa, "Elijah ana rewapana i damana Elisha awarina." Ma i nae da ita nebelel ma i mae-ġaira au doa ma i raudune. ¹⁶ Ma i riwa i pa, "Tauai rewapana 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugauba i teretawanei."

Elisha i paribelei, "Eġa! Eġa ona nae."

¹⁷ Wate tau i voġirigiri da tauna i vinimala da i paritawanei i pa, "Anina ona nae." Wate tau 50 aupom tonuġa i baia ma eġa ita nelaġai. ¹⁸ Maranai tau i nememei au Jeriko, Elisha tau i riwei, "A riwemi da avena ota nael!"

4

Elisha wavine Shunemei i voagui

⁸ Mara tagoġi Elisha i nae au Shunem taon. * Weka wavine manemanena i mae, ma Elisha i vibaġa-guratei da ita mae da ita am. Ma maranai Elisha wei au dobuna e vaġavaġai, tauna weka i amam. ⁹ Wavine awana i riwei, "Aramanei da orotona weka e nenei lamna BADA ana peroveta vivivireina. ¹⁰ Ana numa aburuna au poewa† tana voai ma ani matave, kepakepa, ani kiala ma rampa tana terei au orana tauna aubaina. Ma kampa ina mae maranai e nenei."

¹¹ Mara tagoġi Elisha i nei ma i ġae ana au numa da i rauvirai.

¹⁴ Muriai Elisha ana taunola wavana Gehasi i paridadanei, "Aiwai ana kauei wavinena aubaina."

Ma Gehasi i paribelei, "Tauna eġa natuna orotona ma awana i magura."

¹⁵ Ma Elisha i riwa, "Ma ġoreiai!" Ma Gehasi wavine i ġoreiai ma i nei da au metaeta i raumairiei. ¹⁶ Ma Elisha wavine i riwei, "Wenanare marana madeġa au ġelauna tam natum orotona ma ġuniġuni."

Wavine i paribelei, "Eġa au bada. Tam peroveta ma tau am taunola, eġa ma morui!"

¹⁷ Wate wavine i raumanawa. Ma marana wenanare madeġana au ġelauna wavinena natuna orotona i ġuniġuni, Elisha i ririweia nanare.

Elisha rava 100 i viambagibagi

⁴² Mara ġelauna, oroto tagoġi melagai Baal-Shalishahei i nei. Tauna nai madeġana witana naona i labai ma palawa i apui da iavana 20. Ma witi majġai baikena maiteni i neiai da Elisha i verei. Elisha ana taunola i riwei, "Rava lam‡ ma verei da ina am."

⁴³ Ma ana taunola i garara, "Aiwai! Wei lam eġa tagotagogina da rava 100 tana viambagibagi?" Wate i paribelei i pa, "BADA i riwa da rava ma verei da ina am ma lam ina mae-terei."

⁴⁴ Ma lam au naoi i terei ma tau i am ma lam i mae-terei, BADA i ririweia nanare.

5

Elisha Namaan i vilawani

¹ Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kauei ma i vitumaġanei. Namaan sorodia wavana nanaena wate doria lepera i vaia.

* 4:8: Shunem taun 50 Km da au Samaria taun. † 4:10: Mai Israel ai poewa dabadabai. ✧ 4:16: Gen 18:14

‡ 4:42: Peroveta ġelau Elisha maiteni i mame, kampa gomara i peu ma rava i vinuapoapoe.

² Marana patapatāi mai Syria i nenei au Israel i viviġavia. Mara tagogi tevera guguinina i pani da i naiei da ai bada Namaan awana i verei da ana taunola. ³ Mara tagogi guguinina ana bada wavinena i riwei, “Au bada, am bada uta riwana-dadanei mepa da ita nae perovetana au Samaria maemaena awarina. Tauna ana doria ita inana ma ita vilawani.”

⁹ Ma Namaan ana hosi ma chariot borui i nae ma Elisha ana au metaeta i raumairiei. ¹⁰ Wate Elisha taupariverena i paritawanei da i riwei i pa, “Ma nae da au waira Jordan ma oġamelem mara seven ma lepera doria ana voterem ma opim ina ai-me.”

¹¹ Wate Namaan amlona i ġaiġai kua ma i riwa i pa, “Tau au nota ġaeġaena da peroveta ita opui da ita inana i da urana, opui au tepana mataira ita kauēi ma ana BADA God awarina ita raupari da ata lawana. ¹² Wate waira Amanah ma Pharpar au Syria i ai telera eġa me Israel wairai. Tau kampa ata toa ma ata lawana.” Ma Namaan i mae-tavirei ma ana amloġaiġaina i nae.

¹³ Ana laralaraga i nae awarina ma i riwei, “Au bada mepa da ita riwem da aiwai piri-pirina uta kauēi, lamna uta kauēi tapa? Wei lamna kua telatelana i ririwei nanare, ‘Ma toa ma ma lawana.’ ¹⁴ Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera doria i kwa.

¹⁵ Ma Namaan ana laralaraga maiteni i nae me Elisha awarina ma i riwa, “Marina aramane i da au dobu, god eġa ita mamae anina Israel ana God tauna ava; lamna aubaina au bada pulo a vereverem ma vaia.”

¹⁶ Wate Elisha i paribelei, “Riwa kua da BADA a vivitaunolei lamna BADA lawalawaina, ma wavane i ririwa tau eġa pulo ana vaia.” Ma Namaan i babani bagibagi da Elisha pulona ita vaia, wate tauna pulona i geduaiei.

¹⁷ Ma Namaan i riwa, “Mepa da nanare lamna ma vianineu da donki ruġa ai vita ruvana Israel doana ana vigerui da ana naiei au numa. Ma marina da e nena, eġa melana pulo ana apui bo sia taputapuna ana apui god ġelau awarii, anina BADA ainelana awarina. ¹⁸ Tau am taunola ma a ġoei da BADA au ġoa apoapoei ina nota-tawane, kua tagogi ava awarinei; marana i gulau a riruie i ana au tempol ma tauna au urau e vovojjina ma maiteni a mamae-ġaira ma Syria ai god Rimmon a viviborumei.”

¹⁹ Elisha i riwa, “Ana nuubam ma nae.” Ma Namaan i nae.

Mai Israel ai gulau Ahab au 851 BC. i'raġe. Au murina gulagulau ġelau i mae ma tau i au Samaria i mae. Marana Hoshea i vigulau. Au 724 BC. mai Assyria ai sorodia Israel i viġaviei.

17

Samaria i peu

Mai Israel ai gulau damona lamna Hoshea. Tauna i mae gulau au Israel madeġa 9, wate Assyria ai gulau i paripariniġaiei ma lamna aubaina i pani.

⁵⁻⁶ Assyria ai gulau Israel anatapuna i naeni, da i ġeta da Samaria taon I mae-kwaviro, ma i gudu-tomeni da madeġa tonuġa i kwa. Marana Hosea ana vigulau madeġana 9 i ġetai, Mai Assyria Samaria taon i ruini mai Israel i pupuna-naiei au Assyria. Ma au Halah, taon, waira Habor au ririvana ma mai Mede ai au taon nununai i verei da i raunuma.

⁷⁻⁸ Wei kovoġai i nei mai Israel awari aubaina tau i god ġelau i viviborumei. Tau i ai ġoa apoapoe i rata kua BADA ai God awarina, Wariaġa Tauna Egypt ai gulau Pharaoh au urana Israel i vai-tawane ma ai i ravena-opune. Mai Israel ai God eteni i pupuna-opune ai kua i votaġotaġoi da i kaukauei ma kua waduboi ġelau Israel ai gulagulau i kaukauei. ⁹⁻¹⁰ Mai Israel kua apoapoe i kaukauei BADA ai God awarina ma BADA wei kauai eġa ita vinuaiaiei. Tau i voepaepa gabui i voanaiei god morumorui voepaepaei aubaina au taon nununai, melagai aburuoina da au taon ġaeġaei. Ola muomuoi anatapui au tepai ma ai anatapui au ġoui gana vinalaulau i terenaiei ma Asherah ana tuatua ma kokoitau i vituramairini.

BADA mai Israel ai ġoa apoapoe aubaina i viopuni

²⁴ Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiai da Samaria, ana au taon nununai kampa i terei da i mae. Tau i mai Israel numa i ruba-tawane i raunumei. ²⁵ Vouvounai wei ravai eġa BADA ita viborumei, lamna aubaina lion ġelau i paritawaneiai da rava i viviraġeni. ²⁶ Ma rava Assyria ai gulau ana riwa i paritawane i pa, “Rava au Samaria u terenaiei, dobuna Godna ana tarawatu eġa ita aramane. Lamna aubaina ma dobuna ana God, lion i paritawane i ravai e viviraġeni.”

²⁷ Ma mai Assyria ai gulau rava i egari, i pa, “Pirisi tagogi au Samaria o panipania, ona paritawana-melei ma, dobuna ana God, ana kava ravai voui ina viararamani.” ²⁸ Anina ma pirisi tagogi au naona i naenaie au Assyria i neiana-melei da au Bethel i mae. Kampa rava i viararamani da BADA viborumei.

²⁹ Wate jentail ravai nununai ai god morumorui kokoitau i kaukauei ma metauna au taona i mae, kampa ola au tepai au naona mai Israel au Samaria ai voepaepa gabui i voavoailana, kampa i terenaie.

18

Hezekiah i mae mai Judah ai gulau

¹ Elah natuna Hosea i vigulau au Israel madega tonuga i kwa. Wei maranaina au Judah Hezekiah, Ahaz natuna i vigulau. ² Tauna ana madega 25 ma i vibada au Jerusalem da madega 29 i kwa. Alona Abi, Zekariah natuna. ³ Tauna kava aiiai avai i kaukauei BADA awarina me noina David nanare. ⁴ *Ma god morumorui ai ani voepaepa gabui anapui i votawatawanei. Ma kokoitau i viairikarikai ma Asherah tuatuna i taraituina-naiei. Ma wariaga Moses mota bronzei, kokoitau i kauie, i viviborumei. Hezekiah motana kokoitauna maiteni i viaigimagimai. (Mai Israel motana i gōrei Nehushtan.)

⁵ Hezekiah BADA, Israel ana God i vitumağanana-kauie. Ega gulau gelauna au Judah nanare me tauna, ma ega aiiai gelauna nanare au naona i mae bo muriai i mae. ⁶ I vipatutu BADA awarina au anapuna ma i vovoguratei da God ana tarawatu Moses i vereverei anapuna i vovotaḡotaḡoi. ⁷ BADA tauna awarina i mae ma ana nola anapuna i davudavu. Tauna Assyria ai gulau i parivirevirei ma ega aubaina ita vilaraga. ⁸ Ma mai Philistia anapui i vovaiubai, melaḡai da taon gāimeie garigarina anapuna i pupuni da au Gaza i ḡeta.

Maranai Hezekiah i rage, Manasseh amana i raviepaiai da i vigulau.

21

Manasseh i vigulau au Judah

¹ Manasseh ana madega 12 ma i vigulau au Jerusalem, ma i vibada madega 55. Tauna alona Hephsibah. ² Wariaga BADA eteni ravai i virubai ai kava vinuamedamedai aubaina maranai mai Israel i ruirui au Canaan. Manasseh wei ravai ai kava i votaḡotaḡoi da i kaukauei ma ana ḡoa apoapoe i rata BADA au matana, ³ Manasseh ola muomuoi au tepai god morumorui awari voepaepa gabui amana i viairikarikai, i voa-melei. Ma nanare pulo aniapuna i voanaie Baal awarina, ma Asherah tuatuna i tonanaie me Israel ana gulau Ahab. Manasseh wate nanare ubona i viviborumei. ⁴ *Tauna god morumorui ai pulo aniapuna i voanaie BADA ana tempol au orana, wei gabuna aubaina BADA i riwa i pa, “Wavau au tempol ina mae.” ⁵ Tempol au metaetana, gabu garigarina au orana Pulo aniapui ruaḡa i voai ubona god aubai. ⁶ Manasseh natuna orotona ai au araratana i apui ana pulo, * ma parauma ma baravu ma gweri da ginauri ravai i rautaniḡaneie. Kava maḡamaḡau apoapoe kaukaui i kauie ma BADA amlona i ḡaiḡai kava.

¹⁰ Ma lamna aubaina BADA ana peroveta awariei i babani i pa, ¹¹ “Gulau Manasseh kava maḡamaḡau vinuamedamedai i kaukauei, ma tauna i apoapoe kava ega me mai Amori, tau i wei dobuna i maeni muriai da mai Israel. Ai kokoitau mirimirai awariei mai Judah i ravai da i ḡo’apoapoe. ¹² Lamna aubaina BADA Israel ana God wenanare e ririwa, ‘Kovoḡa ḡaeḡaeotana ana neiai Judah ma Jerusalem awarii da maranai rava anapui riwana taniḡaie ina nonori ma orai ina auepai. ¹³ Ruvana tagoginei Samaria a kovoḡi ma ruvana tagoginei Jerusalem ma Israel ai gulau Ahab ana epaepaia maiteni a kovoḡi. Jerusalem ravai ana amaḡa-tawanei, me aboma ita amamaḡi, ma i vitaragabubui. ¹⁴⁻¹⁵ Au rava i ḡo’apoapoe awarii, maranai noinoi Egypt i opu-tawanei da marina. Wei e viviamloḡaiḡainiu. Ma rava mae-terenai ana inana-tawanei, ma ana veredamaneie ḡavia awarii ma tau i vovaiubai ma ai purapura ina kwalei.”

¹⁶ Manasseh mai Judah i ravai da god morumorui i viborumei ma BADA i vijiboḡi; wate ega lamna ava ma rava aiiai i virageḡa labalababai da tara i kororo da Jerusalem etanaina i vioai au giana da au giana:

* 18:4: Num 21:9 * 21:4: 2Sa 7:13 * 21:6: I apui mai Canaan ai god Molek awarina.

¹⁸ Manasseh i raḡe ma ana numa au ririvana dobu wavana Uzza ana au wapu i doboi, Ma natuna Amon ana gabu i vaia da i vigulau.

Amon i vigulau au Judah

¹⁹ Amon ana madeḡa 22 ma i vigulau. Ma i vibada madeḡa ruaḡa au Jerusalem. Tauna alona Meshulemeth, oroto Jotbahei wavana Harus natuna ²⁰ Tauna ana ḡo'apoapoe, i rata kaua BADA awarina me amana nanare. ²¹ Amana i ḡovaivaitē ma god morumorui i viborumei. ²² Tauna noinoi ai God, BADA i rawaḡaiḡaie ma ana tarawatu eḡa ita votaḡotaḡoi. ²³ Ana gabemani babadai Gulau Amon i viogei da ana au gulau numana i viraḡeni. ²⁴ Wate mai Judah, rava gulau Amon viraḡenana i viogatarei anatapui i viviraḡena-naiei ma natuna Josiah i terei da i vigulau.

22

Josiah i vigulau au Judah

¹ Josiah ana madeḡa 8 maranai i vigulau au Judah ma i vibada au Jerusalem madeḡa 31. Tauna alona Jedidah, oroto Boskathēi Adaiah natuna. ² Tauna BADA au matana aiwai ana tapuna i kauana-kauē ma noina David au ivina i tua ma BADA ana tarawatu ana tapuna i votaḡotaḡo-kauē.

Josiah nelara ḡelau i terei da BADA ana tempol i voavoavirai lamna maranaina Moses ana tarawatu au buka i girugirumi i nelaḡai da i nei ai Josiah awarina.

¹¹ Maranai gulau i nonori aiwai Tarawatu au bukana i girumi, ma ana gara i viaisikasikai. ¹² Ma gulau Josiah ana taunola pirisi Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa, ¹³ "Noinoita wei bukana riwana eḡa ita votaḡotaḡoi, ma aiwai i ririwei eḡa ita votaḡotaḡoi, lamna aubaina BADA amlona i ḡaiḡai awarita. Lamna aubaina ona nae au tempol ma BADA awarina ona raupari tau ma wei dobuna ravai aubai ma Judah ravai ḡelau aubai. Ma ona paridadana wei au bukana aiwai i girumi."

Josiah ana taunolababadai i nae BADA ana peroveta tagogi awarina. Wei perovetana lamna wavine ma riwa i paritawane i nae me gulau awarina.

¹⁶⁻¹⁷ BADA wenanare i riwa, "Tau wei dobuna ma dobuna taumaenina ana kovaḡa kauē." I girugirumia nanare, ma lamna gulau awarimi i 'avi, BADA wenanare i riwa, "Tau i geduaieu ma god ḡelau i viviborumei ma lamna i viamloḡaiḡainiu. Jerusalem awarina orau amapo da e ararai ma amapo eḡa ina dauva." ¹⁸ Wate ona naeme Judah gulauna, i paritawanemi awarina da ona riwei, "BADA Israel ana God e ririwa da ¹⁹ Maranai u nonori menanare Jerusalem ma taumaenina ana kovoḡane. Tam u rupena ma u vilamolamona tau BADA awariu, am gara u viaisikasikai ma u tou, Tau ana kauē da ina apoapoe kaua, rava ma dobu ana kovoḡi da eḡa aiwai wei doana ina maeni. ²⁰ Ma kovoḡana a neneiai au Jerusalem eḡa ina nei da am iraḡe au murina. Ana voterem da ana nuubam ma iraḡe."

Ma wei pariverena i naiei ma gulau i riwei. Josiah god morumorui viborumai i viḡaei.

23

Josiah i parivainuaḡana da ina votelatela

¹ Gulau Josiah babada anatapui au Judah ma Jerusalem i ḡoreia. ² Ma pirisi ma peroveta ma rava molamolakana da manemanena, anatapui i ḡae BADA ana au tempol. Kampa gulau parivainuaḡana bagibagina bukana tempol au orana i nenelaḡaia i iava-tapui awarii. ³ Gulau ana au gabu i mairi tempol tuatuaana au naona ma BADA maiteni parivainuaḡana bagibagina i ravivouni da tauna BADA ana tarawatu ma ana riwa bagibagina orana ma aruana taputapunei ina vojijini, i ririwei nanare au bukana. Ma rava anatapui nanare i parivainuaḡana.

⁴ *Ma gulau, pirisi ḡetelarana Hilkiah, ana pirisi babadai ma tempol taupainii i egari da BADA ana tempol au orana aiwaiē Baal ma god wavinena Asherah ma ubona godna morumorui i viviborumei anatapui ita opuneiai. Gulau wei purapurai anatapui i naiei da gaugauba Kidron au ririvana i apu-naiei, ma lapukarei i vivane au Bethel.

Anina ma Josiah mai Judah ma mai Israel ai dobu i naeni ma meparava kokoitau i raraudunelei ola muomuoi au tepai anatapui i pupuni ma pirisi kokoitau taurauduneleina anatapui i viraḡeni.

Ma gulagulau aiavoi Josiah i votaḡotaḡoi tauti BADA eḡa ita vivirei ma ai ḡoa i apoapoei BADA awarina.

2 Chronicles Vinolanola Viruaina

Pariverena

Wei bukai Chronicles 1 ma 2 virarautuana tagogina Samuel 1 & 2 ma gulagulau ai au buka 1 & 2 e mamae. Chronicles 1, gulau David e virarautuei ma ana oga tempol au Jerusalem aubaina. David nola ogana pirisi i verei. Tauna i goei da rava anatapui BADA ina viborumana-kauai. Chronicles Viruaina mai Israel ai gulagulau ai nola i babaniei, menanare Solomon ana taunola BADA ana tempol i voai au Jerusalem. Solomon iraġe ma au murina menanare ana dobu i kai da ruaġa. Chronicles 2, gulagulau ruaġa ai kausa e bababaniei. Gulau ġelau aiiai tau i BADA i viborumai wate gulau maġamaġai i apoapoe kaua. Tai i eġa BADA ana tarawatu ita votaġotaġoi. Tai i god morumoru i votaġotaġoi. Wei gulau nuabola ai rava i verei. Ma BADA ai ġavia i vianinei da i nei ma dobu i ruaġai i viġaviei da i pupuni. Ma muriai BADA Judah mamae terenai i neiana-meleiai.

36

Judah e novoapoapoe

¹⁴ Ma pirisi ai babada ma rava anataputapui, BADA ana parivainuaġana bagibagina eġa ita vojijini ma jentail au ririvai maemaiei ai kausa apoapoei kaukawai ma ai bua i ġovaivaitai. Ma lamnei BADA ana Tempol vivivireina au Jerusalem i vimiramirai.

¹⁵ Mai Judah ġoġoġai ai God BADA, ana rava ma ana tempol nuanuana i bolai ma lamna aubaina ana peroveta nununai i paripari-tawanei da rava ai ġoa apoapoe ita rupeni. ¹⁶ Wate tau i God ana peroveta i vijiboġi ma eġa ita vivirei ma au damona BADA ana amloġaiġai i rata guratana da menanare ita viubanei.

Mai Babilon Jerusalem i vipupui

¹⁷ Anina ma BADA mai Babilon ai gulau i paritawanei da Jerusalem i vipupui. Ai sorodia nelara voui tempol au orana i viragena-naiei. Tai i mai Judea eġa ita rau-nuapoapoei ma waivine ma laraga ma rava magumaguri ma doridoriai. BADA mai Judea anatapui i verenei Babilon ai gulau Nebuchadnezzar au urana. ¹⁸ Tauna Tempol ana purapura ġaeġaei da muomuoi ma mane anatapui i pupuna-naiei. Gulau ana gabemani babadai ai numa i viairikarikai ma mane ma purapura i pupuna-naiei au Babilon. ¹⁹ Ma God ana Tempol i apui ma Jerusalem ġarina i viairikarikai; ma gulau ana numa ma numa ġelau anatapui ma purapura mae-terenana anatapui i viairikarikai ma i apu-naiei, eġa aiwai ita mae.

²⁰ Ma aiavoi lawalawai i mamae, anatapui i paninaiei au Babilon da i vitaunola. Ma muriai mai Persia nai dobu na Babilon i pupuni ma i vibadei. ²¹ Mai Israel ai doa ipipipiei tau i madeġa au vi-7-na ai doana eġa lauvitau ita verei, lamna aubaina i kovoġi, da i pupuna-naiei au Babylon da madeġa 70 i kwa. BADA ana peroveta Jeremiah i ririweia nanare i tupua.

²² Au Persia gulau Sairas ana vibada madeġana tagoġi, ma BADA ana peroveta Jeremiah aiwai i ririweia marina i tupua, Persia ai gulau orana i ravi-dagudagai da i giruma ma i vibabarai ana au vigulau au anatapuna.

²³ Mai Persia ai gulau Sairas, wei i riwei,

“BADA, Aidamo ana God, dobu anatapuna vibadana au urau i terei. Ma i vineu da ana Tempol au Jerusalem, Judah au paratana ana voa-melei. Ma taumi aiavoi BADA ana rava, o ġoeġoei da ona nae me kampa, lamna anina da ona nae. Ma BADA ami God ina gagaloemi.”

Ezra

Pariverena

Wei bukana Ezra e ririweta da menanare mai Judea au Babilon i mae ma ġelau i naeme ai au dobu au Jerusalem da BADA ana Tempol ina voa-melei.

3

Pulo aniapuna i voa-melei

¹ Mai Israel ai au dobu i mae nawaravi ^{v i7ⁿa} ma marina tau i anatapui i netagogiai au Jerusalem. ² Nai maranai Josadak natuna Jeshua ana rava pirisi ġelau maiteni, ma Shealtiel natuna Zerubabel ana dam ravai maiteni; pulo aniapuna i voai Israel ana God awarina. Me God ana peroveta Moses, ana Tarawatu i ririweia nanare. ³ Avena da tau nai dobu taumaeni i rovorovoei; wate pulo aniapuna ana au gabu wadubona i voai. Ma i vikarei da ubaubanai ma aubigai patapatana pulo i apuapui BADA awarina.

Tempol i voa-melei

⁷ Gulau Sairas i riwa da wenanare ita kau ei. Tau i mane ġaima taubori ma kamda ravai ita verei. Ma lam, wain ma oil mai Sidon ma mai Tyre ita verei da ai cedar au Lebanon bogei ita towana-neiai au Joppa.

⁸ Ma Madega viruaina nawaravina au viruaina Zerubabel ma Jeshua ma varevarei (pirisi ma mai Levi ma rava ġelau maiteni i vivipanipani i nememei au Jerusalem) ma BADA ana Tempol voana i vikarei. Ma Levi ana damei nelara ai madeġa 20 da nore i ġeġae i terei da nola i vibadei.

Rava i nola da God ana Tempol i voa-melei madeġa 21 au orana.

6

Tempol i viaiaini

¹⁶ Anina ma Mai Israel piripirisi ma dam Levi ravai ma rava anatapui panipaniei i nenememei ana nuaiaii God ana Tempol i vovivirei God voepaepana aubaina.

Nehemiah

Pariverena

Nehemiah Wei au bukana e ririweta, menanare mai Judea ġelau i Babilon i mamae, i naeme ai au dobu Jerusalem da garina ina voai-melei.

8

Ezra tarawatu bukana-rava awari i 'avi

¹ Rava anatapui Jerusalem ana au anirui e ġoreġorei Samaim,* i vitagögiei. Ma tau tarawatu badana Ezra i riwei da Moses ana tarawatu bukana ita neiai, wei tarawatuna BADA mai Israel i verevereia.

² Ma aupom naona au nawaravi au vi-7-na, pulo tauapuna pirisi Ezra tarawatu bukana i neiai patarana i vitagögieina awari, nelarai ma waivinei ma roaroa awari metau da iava i aramanei. ³ Ma Ezra au deba i mairi ma ponana ġaeġaenei bukana i 'avi rava awarii, maratomtomi i vikarei da aubenai ma anatapui i rautaniġana kaua.

⁵ Ezra vatara au tepana i mairi rava au matai ma maranai buka i votawanei, rava anatapui i vomaimairi. ⁶ Anina ma Ezra BADA God ġaeġaena i voepapai; ma rava urai i voepai ma i paribelei i pa, "Amen, Amen!" Ma i raudune au doa ma BADA i voepapai.

⁸ Ma Levi ana dam ravai, bukana rava awari i 'avi ma i viararamani† da tau riwana anona i aramanei.

⁹ Anina ma Gavena Nehemiah, ma pirisi, taugiruma Ezra ma dam Levi ravai, rava awari i viararamana. Marina rava awarii i riwa i pa, "Wei marana tana vovavivirei BADA ata God awarina. Lamna aubaina eġa ona vinuabola ma ona tou."

¹⁰ Ma Nehemiah i riwa, "Ona nae ami au numa ma ona am kaua ma ona uma-kaua ma rava eġa ita lauvoa, ona taraiġuei. Wei marana lamna mara vivivireina BADA awarina. Lamna aubaina BADA ina vinuaiainimi, eġa ona vinuabola, aubaina BADA ana nuaiai awarimi lamna ami rewapana!"

* **8:1:** Wei metaetana lamna Jerusalem garina ana anirui tagögi e ġoreġorei Samaim wate ata ponei Waira. Wei aniruina lamna waira dogona au ġereġerena au maramatanei. † **8:8:** Bible pona Hebrewi i girumi ma wei ravai pona arama i aramanei lamna aubaina viararamana maiteni i kaukauei.

Job

Pariverena

Rava jijimanina tagogi vinuabola apoapoei maġamaġau i nenelaġai lamna au bukana e vivirautuei. Job ana nota ma ana rava ai nota wei nuabolai awari lamna e viviatataieta. Ana rava e notanotai da Job kaus apoapoei i kauai aubaina God, tauna e kovokovogi. Job i aramanei da wei eġa riwa kaus. Tauna, God i vivitumaġanei, wate i ġoġoġei da ita aramanei aiwai aubaina wei nuabolana e tuputupua. God, Job ana vinuapoapoe anona eġa ita vieġei, wate God ana rewapana ma ana nuaulaula i rata guratana au baina rava eġa tagotagogina da ina aramanei aiwai e viviatataieta. Maranai i aramanei da God ana rewapana ma ana nuaulaula i rata guratana, tauna God vitaraviravirana i voterei ma i voepaepai. Wei virarautuana au damona God Job i vilawani ma natunatuna i vimaġai ma i vimaure-melei. God Job ana rava tonuġa i ena-guratei aubaina tau i eġa ita aramana-kauai aiwai i latolaton i Job i vinuapoapoe.

Job ana virarautua

¹ Orotu wavana Job au Uz i mae. Tauna rava jijimana kaukauana ma ġo'apoapoei i geduaiei. Tauna God i vivirei ma ġoa aiwai ava i kaukauei. ² Tauna natunatuna nelarai 7 ma waivinei tonuġa, ³ ma ana sipu 7,000; kamel 3,000; uata bullna 1,000 ma donkey waivinei 500 ma ana taunola maġamaġau. Ma i vipurapura ma i maura kaus eġa aiwai ġelauna nanare nai au dobuna, au maramatanei.

⁴ Ai mara i tereterei nanare Job natunatuna nelarai nununai ai au numa i toretorela, ma varevarei ma novunovui i rauġoreiai ma anatapui i amam ma i umauma gogona. ⁵ Aupom biaġa nanare torela au murina, Job ubaubanai boiboġi ina vovomairi ma natunatuna nununai ina rauġoreiai ma epai i ġamoġamo taputapuna ina apuapui BADA awarina da natunatuna ina viaiaini. Tauna i notanota da, "Mepa da roaroa i kauana-boai ma au orai God i parivaiapoapoeni."

Satan Job ana tumaġana i raudadani

⁶ Marina mara i ġetai da anela au mara i ġeta BADA awarina ma tauviwavu - Satan tau i votaġoi da i ġeta. ⁷ BADA Satan i paridadanei, "Tam meiei e nenei?"

Satan i paribelei i pa, "Tau were ma nare a nena e ma a nenei, dobu a tetetei."

⁸ Ma BADA i paridadana, "Au taunola Job u inana i bo eġa? Tauna rava aiwai kaukauana, eġa aiwai ġelauna au dobu nanare. Tauna rava jijimanina ma patupatatuna. E vivivireiu ma e paipaina-melei da eġa kaus apoapoe ita kaukauei."

⁹ Satan i paribelei, "Tam Job e paipaina-kauai lamna aubaina e voepaepaim! ¹⁰ Marana patapatai tauna ana numa ravai ma ana purapura e gagagaloei, ma anatapuna uranei e vovodadani e viaiaini, ma bulumakau u verei da wapuna i oai. ¹¹ Wate uram ma viloloi ma anatapuna ġarinei ma vaitawanei, ma au matam ina parivai apoapoenim."

¹² BADA i riwa i pa, "Anina, ana purapura anatapuna au uram a tereterei, wate eġa tupuana aiwaina ma vodadani." Ma Satan BADA i netawanei.

¹³ Mara tagogi, Job natunatuna nelarai ma waivinei i toretorela, tuai ana au numa, ¹⁴ ma taupariverena i ġeta Job awarina ma i riwei i pa, "Am taunola burumakauai doa i uauatai ma au ġereġerei donkey modu i amam, ¹⁵ ma mai Sabea i ruba-ġairai ma ġamoġamo anatapui i kwalei, am taunola anatapui i viraġena-naiei, ma tau ainelau a ruba da ata pariverem."

¹⁶ I bababani ma taupariverena ġelauna i ġetai ma i riwa, "Namanamara marei i ġairai da sipu ma taupainii i viraġena-pai, ma tau ainelau a ruba da ata paripariverem!"

¹⁷ Ravana i bababani ma taupariverena ġelauna i ruba ġetai ma i riwa, "Mai Caldia boru tonuġa ana melaġina i ġairai ma am kamel i viaġaġana-naiei ma taupainii i viraġena-pai, tau ainelau a ruba da ata paripariverem!"

¹⁸ Amapo i bababani ma wate taupariverena ġelauna i ruba ġetai ma i riwa, "Natunatum nelarai ma waivinei, natuevou ana au numa i toretorela, ¹⁹ ma maratagogi kojikojira mutuluei i opui ma numa i vipeuni au tepai ma anatapui i viaijijini, tau ainelau a ruba da ata pariverem!"

²⁰ Anina ma Job i vomairi ma ana kwama i sikai. Kolana i ġari ma i peu ġaira au doa ma BADA i voepaepai. ²¹ Ma i riwa, "Ana kovakovau a nei; ana kovakovau ana nae. BADA i verena ma i vai-melei;

BADA wavana ana voepaepai ma ana viborumei.”

²² Wei anatapuna au orana, Job eġa ġo'apoapoe aiwaina ita kauēi bo God ita viwavui.

2

Satan Job i raudadana-melei

¹ Mara ġelauna, anela au mara i ġeta me, BADA awarina ma tauviwavuna - Satan tau i votaġoi. ² Ma BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nenei, dobu a tetetei.”

³ Ma BADA i paridadana, “Au taunola Job u inanai bo eġa? Tauna rava aiāi kaukauana eġa aiāi ġelauna au dobu nanare. Tauna rava jijimanina ma patupatutuna. Ma e vivivireiu ma ġo'apoapoe e gedugedaiei. Ana lawana anina jijimanina e maemaeni avena da orau u taini da a kovoġa labalababai.”

⁴ Tauviwavu BADA i paribelei, “Tauna ana lawana ava e vinuabolei, me rava ana purapura anatapuna ina verenei da eġa ina kero. ⁵ Wate uram ma viloloi ma tupuana ma ġelamina ma ravi, ma au matam ina parivai-apoapoenim!”

⁶ BADA i riwei, “Anina, tauna au uram a tereterei wate eġa ma viraġeni.”

⁷ Ma Satan BADA i netawanei ma i nae da Job kero apoapoei i verei, au loulouna da i ġaira au ae lalapapana. ⁸ Ma Job nau gebona i vaia da kerona i kakakaroi ma au lapukare i kiakiala.

⁹ Awana Job i riwei i pa, “Amapo da am lawana jijimanina ma vovojjini bo? God ma parivai-apoapoeni ma ma iraġei!”

¹⁰ Wate Job i paribelei i pa, “Tam opaopam! Eġa nanare ma babani. Tauta God kaua maġamaġai ma aiāi e verevereta, ma apoapoei e paripari-tawaneiai, maiteni tana vaia.”

Wei kauai maġamaġai apoapoe Job awarina i tupua, wate tauna ana babani awarinei eġa ġo'apoapoe ita kauēi.

Job ana rava i nei da i raugenari

¹¹ Maranai ana rava tonuġa riwana i vaia da Job wenanare ma menanare i vinu'apoapoeni, tau i vitagodie ma i nae Job ita raugenari ma ita vinuabai. Tau i wavai Eliphas tauna Temanei, Bildad tauna Shuahei ma Zophar tauna Naamah ei. ¹² Tau i tapunei Job i 'nanai ma i vinuanaini da lamna Job. Maranai i 'nana-kauēi. Tau i vitouana, ma ai kwama i vaiasikasikai ma pokau au tepai i tawatawanei. ¹³ Ma aupom ma waguvarai 7 tau i doa i vikiakialei, Job i mae-vereverei. Ma i 'nanai da ana nuabola i rata guratana ma gamoi i pota ma i kiala genuatuu.

3

Job ana tupua marana i parivaiapoapoeni.

¹ Wiki tagogi au murina Job gamona i lāġi ma ana tupua marana i parivaiapoapoeni. ² I pa,

³ Au tupua marana ma boai,
ma waguvaraina i vinolanola da tevera orotona i tupua.

⁴ Nai marana ina waguwarei!
Ma God au aidamo wei marana ina nota-tawanei,
ma au tepana eġa ina rarana.

⁵ Waguvara ma gimtona potopotona wei marana ina vibadei;
ma lada marana ina purui
ma gimtona lalalaina ina purui.

⁶ Gimtona nai waguvaraina ina viamoai
wei marana eġa ma iava-melei;
madeġana bo nawaravina.

⁷ Nai waguvaraina eġa aiāi ina tupua,
ma eġa nuaiai gararana ina nonori.

⁸ Vijiboġa amamai,
mepa da ai vijiboġa boga bariawana ina vidagui;
tau i wei marana ina vijiboġi.

⁹ Maratmtom ubonana ina ġuvai
ma mara karena ina paina-avei
ma madeġa vuduna eġa ina inanai.

¹⁰ Aubaina tau i manawa metaetana eġa ita gudui
ma vita maġamaġai i vereu.

- 11 Airake, boiboği ita gomuii!
 Bo ata i 'raġe maranai a tuputupua.
 12 Aiwai aubaina au arona i vimataveniu
 ma ġuġunei i viġuġuii?
 13 Maranaina a tupua, matau ita pota;
 ma ata matave ma ata vilauvitau.

4

Eliphas i babani

- 1 Ma Eliphas rava Temanei Job i paribelei i pa,
 2 Job eġa amlom ina ġaiġai ma ana babani,
 tau ata genuana ava, ana babani!
 3 Rava maġamaġai u viararamani
 ma ġokokokarai u vovaiwewapani.
 4 Riwam, rava peupeui u duġui,
 ma ae tutui viviarai u duġui.
 5 Wate marina nuabola i nei awarim, ma am nota i peui
 i vodadanim ma u rovo-kaua.
 6 Am vitumaġana God awarina,
 ma am lawana jijimanina.
 Lamna, am rewapana, tapa?
 7 Ma tumairi ma ma vinua notanota!
 Rava jijimani e irairage bo?
 Mara aiwai rava jijimani i kero ma i'raġe?
 8 A inanai rava ġoa apoapoe i paewi
 ma nuabola i tuarui.
Job ana rava amapo da i ririwa-ġiriġiri da tauna kaua apoapoei i kauai aubaina wei nuabolana e nenelaġai. Wate Job e ririwa da tauna eġa aiwai apoapoena ita kauai.

38

BADA Job i paribelei

- 1 Ma BADA labu au orana ma Job i paribelei, i pa,
 2 "Tam ai ai e bababani labalababa,
 ma au nuaulaula e paripari-virevirei?
 3 Ma mairi jijimana me oroto,
 ana vitaravirevirem
 ma ma paribeleu!
 4 Tam mepa maranai dobu tuatuana i tonei?
 Ma riweu, mepa da u aramanei?
 5 Ai ai dobu ana manawa ma ana dabora i terei?
 U aramanei tapa? Ma ai ai i ruvai?
 6 Aiwai dobu tuatuana e vovojjini?
 Ma ai ai dobu tuatuana i tonei,
 7 maranai maratontom ubonai i wela tagogi,
 ma BADA ana anela ana morelanai i voepaepa ma i vigaragaraei?
 8 Ai ai boga ana au parata i terei
 maranai boga manawana ana goba i wanaiwaġi?"

40

- 1 Ma BADA Job i riwei i pa,
 2 "Tam, God Vivirewapana Kaukauana e viviwavui;
 Ai ai God e viviwavui, ina paribelei."
 3 Anina ma Job BADA i paribelei,
 4 "Tau rava labalababa, menanare ana paribelananem?
 Gamou ina pota.
 5 Boiboği a babani ġuratana.

Eġa aiwai ġelauna ana latoni.”

42

Job i babani me

¹ Ma Job i babani me, i pa

² “Tau a aramanei da tam aiwai anatapuna e kaukauei;

Eġa aiwai am oga ina viġaei.

³ *U paridadaneu, ‘Tam aiwai e bababani labalababa, ma au nuaulaula e pari-virevirei?’

Riwa kaua am boruma vivinualaulaunana eġa ata aramanei, da a voġana guratana.”

⁴ *U riweu, ‘Ma rautaniġana, ma ana babani,

Ana paridadanem ma tam ma paribeleu.’

⁵ Taniġau ava riwam i nonori

Wate marina matau i ‘nanaim.

⁶ A vinimala, ma au lapukare ma au debidebi ana kiala.

A ruperupena ma a mae-tavireu awarim ma au ġo‘apoapoe ma nota-tawanei.”

Damona

⁷ BADA i babani vorovei Job awarina ma marina Eliphaz rava Temane awarina ina pa, “Amlou i ġaiġai awarim am rava ruaġa maiteni, taumi eġa riwa kaua ota babaniei me Job nanare. ⁸ Lamna aubaina, bull 7 ma sipu ororotoi 7 ona vaia ma ona nae au taunola Job awarina ma siai taputupuna ona apui awariu. Tauna aubaimi ina raupari ma ana pari ana nonori da eġa ana vinimalaimi ami kaua apoapoei aubaina. Taumi eġa riwa kaua ota babaniei me au taunola Job nanare.” ⁹ Anina ma Eliphaz, Bildad ma Zophar BADA aiwai i ririweia nanare i kauai, ma BADA Job ana pari i nonori.

¹⁰ *Ma maranai Job i raupari-vorovei, BADA ana maura i veremelei ma raviai-tepatepani. ¹¹ Varevareina ma novunovuna ma ana rava waduwaduboi i nei ana au numa ma maiteni i am ma i uma gogona. Ma Job i vinuaubai aubaina BADA vita ġaeġaena Job i verei. Ma tau i anatapui kampa i ġeġeta mane ma loji goldei Job i verei.

¹² BADA, Job i viaiaina-kauai eġa me au naonei. Awarina sipu 14,000; kamel 6,000; uata bullna 2,000 ma donki waivine 1,000. ¹³ Ma nanare, natunatuna nelarai seven ma waivine tonuġa. ¹⁴ Natuna wavinena magurina wavana Jemimah*, ma keikeina wavana Keziah† ma vitonuina Keren-Hapuk. ‡ ¹⁵ Job natunatuna guguiniii inana i ai dewadewa eġa me guguini ġelau i nai au dobuna. Ma Job natunatuna nelarai ma waivine ai buderi i terei da anatapui ruvana tagogina ina vaia.

¹⁶ Job i mae madeġa 140 ġelauna; da ġoġoġana ma nonoina da i nae kimta au *v_i-4⁻nainanai*. ¹⁷ Anina ma i magura kaua ma i raġe.

* 42:3: Job 38:2 * 42:4: Job 38:3 * 42:10: Job 1:1-3 * 42:14: Heb. wei wavana anona Gabubu † 42:14: Heb. wei wavana anona Cassia. bo kaidara talana. ‡ 42:14: Heb. wei wavana anona mata penitana.

Psalm Wela ma Pari

Pariverena

Mara manamanaina i netawanana rava maḡamaḡai taputapunei ava wela ma pari i girumi wei au bukana. Mai Israel wei welai ma pari i tami ma i teretagogie da lamnei God i viviborumei.

Wei au bukana wela ma pari tapuna ma tapuna. Ḡelau God e viviborumei ma e vovoeapapai ma ana iviaiai aubaina e viviegualaei. Ḡelau e vivibaḡa agu ma gagalo aubaina, bo notatawanana aubaina. Wela au ḡelau, rava e raraupari ai gulau aubaina ma god e vivibaḡai da ai ḡavia ita kovoḡi. Ma wela au ḡelau tauamgiruma ana apoapoe ma ana nuabola aubaii God awarina i beubeura.

Ma maraḡela Iesu riwa wei au parii i vaia da i viararamana. Kerisiana wei welai ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiiai ririwa-kauana

¹ Rava viaiainana, lamna eḡa ḡo'apoapoe ravai ita votaḡotaḡoi,
ma ponai eḡa ita rarautaniḡanei;
ma vivijiboḡai eḡa awarii ita kiakiala.

² Wate BADA ana tarawatu i vinuiaiiei,
aupom ma marai e notanota-vaitetei.

³ * Tauna me ai, waira au adana gogogona,
ana au mara e rarauano;
ma rugurugui eḡa ita poipoi.

Wei ravanana, aiwai anapapuna e kaukauana-kauei.

⁴ Wate ḡo'apoapoe ravai eḡa nanare!

Tau me rugurugu, ive i kapupuana-naiei;

⁵ Lamna aubaina ḡo'apoapoe taukauei BADA ana au etera ita mairi ava,
ma nanare ḡoa apoapoei ta kauei rava jijimani ai au dam ita mae ava.

⁶ BADA ḡoa aiiai ravai e rarauetaraveni ma e paipaini;
wate ḡo'apoapoe ai etanai au damona, pupui.

23

Bada taupainiu*

David ana wela

¹ BADA taupainiu
ma eḡa aiwai ana voladaḡei.

² Gidagida majimajiḡai au tepana i vimataveniu,
ma i raveniu waira au raraunairina au adana.

³ Au rewapana e raviravivouni
ma wavana aiaina aubaina etanai jijimaninei i raveniu.

⁴ Avena da gwagwa waguwaguvareina ana naeni,
wate eḡa aiwai apoapoena ana rovoei.
Aubaina tam au ririvau da am kwapuei ma jiḡonei e gagagalo e vivinuubaiu.

⁵ Aubaiu torela e vokaukauei au ḡavia au naoi.
Oilei kolau u volaḡolaḡoi da tam u vinuavaineu,
ma au kelaka i oa-karagelai.

⁶ Ee! Riwa kaua da am iviaiai ma am raunuapoapoe maemae nonoana awariu ina mae, da
au mara au damona.

Ma BADA ana au numa ana mae-nonoa.

* 1:3: Jer 17:8 * 23: Taupainiu me sipu taupainina.

27

*Voepaepa parina*David ana wela

¹ BADA au lalalaina ma au tauvilawana,
aiwai ana rovoei!

BADA au taugagagalo
aiwai ana rovoei!

² Maranai go'apoapoei ravaii i ġetai
da ita vunuii,
au ġavia

aei ina pakana-melei da ina peu.

³ Avena da sorodia borui ina mae-gariġuruvui,
tau eġa ana rovo dadana.

Maranai au ġavia i vomairi,
tau anina da God ana vivitumaġanei.

⁴ Kaua tagogi ava aubaina a vivibaġa.

Au ġoana ġaeġaena da,
BADA ana au numa, boruborumana ana mae,
ma ana voepaepai. Au lawana au anatapuna.

⁵ Nuabola au marana
ina tereġaġariu.

Ana ġabu au vivivireina, ina teregovaġiu.

Ma ola au tepana ina tereu
da ġavia eġa ina vodadanu.

⁶ Ma au ġavia i garigari kwaipipiniu, ana tuvaideoedoi.
Da au tempol ana morelanau pulo ana apui BADA awarina.

Ana vinuaii ma welei ma arei ma ana voepaepai.
⁷ BADA ma rautaniġaneu maranai awarim a kwatukwatu,
ma raunu'apoapoleu ma ma paribeleu.

⁸ Au orau u riwa, u pa, "Ma nei da ma rauduneleu."
Tau a paribelem a pa, "BADA a nenei."

⁹ Eġa ma raugovaġeu,
eġa awariu ma ġaiawa.
Am taunola eġa ma inana geduaiei,
au anatapuna tam, au tauagu.

Eġa ma netawaneu,
au God, tam au tauvilawana.

¹⁰ Avena da amau ma alou ita teretawaneu,
wate BADA ina paina-kaueu.

¹¹ BADA, ma viararamaniu da am ġoana ana kauei.
Ma etanai au ġadaġadarana ma taravainiu aubaina au ġavia i maġa

¹² Tai moruei ma parivairovorovoei e vunuvunuii.
Lamna aubaina, eġa ma teretawaneu awarii

¹³ A ramanei da BADA ana viaiaina ana inanai,
weka lawalawai ai au dobu.

¹⁴ BADA ma vitumaġanei,
da ma virewapana ma tepam ina tora.
Anina BADA ma vitumaġanei!

34

BADA ma viborumei

¹ BADA ana vimaegaeġaeni marana patapatai,
ma ana viborumana-nonoei.

² Orau taputapunei BADA ana voepaepai;
Vilamolamonai riwau ina nonori ma ina vinuaii.

³ Ona nei ata BADA tana vimaegaeġaeni
wavana tana voepae-gogonei.

⁴ A raupari BADA awarina ma i paribeleu,
awariu rovo anatapui i vaitawanei.

⁵ Aiavoi awarina e inainana,

- taui naoi ina ravilalai
ma eġa melanai ina vitepa-ubaubai.
- 6 Au nota i kwa da a ġorei, ma i nonori
ma nuabola au orau i vaitawanei.
- 7 Aiai da BADA e vivivirana-kauei,
ana anela tauri e inana-vaitetei, ma e vivilawani.
- 8 Taumi ona raudadani ma ona aramanei da BADA i aii.
Tauri BADA au ġouna maemae nuaii ġaeġaena awari.
- 9 Taumi vivitumaġanami eġa aiwai ona voladaġei.
Lamna aubaina, BADA ona vivirei.
- 10 Lion ġauboi mara ġela am e irairiġe,
wate aiavoi da BADA awarina e vitumaġana eġa ina voladaġa.
- 11 Natunatu, ona nei, ona rautaniġana,
ma ana viararamanimi da BADA ona vivirei.
- 12 Taumi o ġoei da ami lawana ina aii
ma ina manawa bo?
- 13 Nanare, lamna menami ona paina-melei da eġa babani apoapoe bo moru ona babaniei.
- 14 Ġoa apoapoe ona geduaiei ma kaua aiiai ona kaukauei,
ma ona voguratei da nuauba lawanana ona maeni.
- 15 BADA, matana ġoa aiiai ravai awari e tereterei,
ma taniġana e tonetonei mepa da agu e toutouei.
- 16 Wate tauna ġo'apoapoei ravai e mamae-puputei
taui ina iriġe ma rava nuanuai ina vuru.
- 17 Rava jjiimanii agu aubaina e viviġoreBADA awarina
tauna e rarautaniġana ma ai vita e vaivaitawanei.
- 18 Tauna rava peupeui, rovorovoi, ma vinuabolai e vivilawani,
tauna rava orana i peu kaua e vovoepai.
- 19 Rava jjiimanii ai nuabola i maġa
wate BADA tauri e vovoagui ai au nuabola.
- 20 E inainana-vaitetei da eġa gelamina tagogi ina wanagai.
- 21 Ġoa apoapoe ravai ai apoapoe ina vunumelei,
ma aiavoi da ġoa aiiai ravai e gedugeduaiei, ina kovoġi.
- 22 BADA ana taunola e gagaloei,
aiiai da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana Bathsheba i tavimatane i matave.

1 Oo God, ma raunu'apoapoeleu. Tam nuavaina maemae-nonoana amai.

Tam raruunuapoapoei amai
au ġo'apoapoe ma notatawanei.

2 Au rauaġaiġai ma oġai
ma au ġo'apoapoe ma oġa-tawanei.

3 Au rauaġaiġai a aramanei
marana patapatai a notanotai.

4 Kaua apoapoei a kauei.
Tam ainelam awarim Ġoa apoapoei a kauei,
ma am viwavu lamna riwa kaua.
Amapo anina da ma kovoġiu.

5 Tau rauaġaiġai, melamelauei da marina
Au manawa da marina tau ġo'apoapoe taukaueina.

6 Wate tam u ġoei da riwa kaua au ora-dewadewau ina mae.
E viviararamaniu da nuaulaula orau ina oai.

7 Au ġo'apoapoei ma oġa-tawanei,
ma oġai da ana arapoira da gonu rovena arapoirana ana ġetawanei.

8 Ma riweu da au ġo'apoapoe u nota-tawanei
da ana vinuaii ma ana morelana

- avena *da gelamiu u viaigaigai, marina ana vinuaiiai.
 9 Au go'apoapoe ma inana-tawanei
 ma au apoapoe mirai ma boai.
 10 Oo God nuanua ma ravivouni
 da ana vipatutu kua awarim.
 11 Ega au naom ma tawana-opuneu
 ma awariu ega Aruam Vivivireina ma vaitawanei.
 12 Vilawana nuaiaina ma ravivouni me au naona nanare
 aruau ma viaiaini da ana voteletelem.
 13 Lamnei, go'apoapoei taukauei am kua ana viaramani,
 da ina mae-tavirei awarim.
 14 Oo God, vi'raḡena vitana awariu ma vaitawanei,
 da am kua jijimani ana welei.
 15 Oo Bada ipiriu ma votawanei da gamou ina vimaeḡaeḡaenim.
 16 Au pulo, ḡamoḡamo ata apui awarim,
 wate tam pulo apuapunana ega uta vinuaiiaiei.
 17 Bada, pulo e ḡoeḡoei lamna vilamolamona.
 BADA, ega au vilamolamona ma au rupena ma geduaiei!
 18 Am nuavaina Jerusalem ma viaiaini,
 ma ana gari ma voa-melei.
 19 Anina ma ai pulo nota aiaini ina vikarena-melei da ina kaukauei ma ma vinuaiiaiei.
 Tau pulo tapuna ma tapuna ina apui awarim.
 Bull maḡamaḡau am au aniamapu ina apuapui.

67

Vieḡualau wela

- 1 Oo God ma raunu'apoapoelelai ma ma viaiainiai,
 ma naom weka ma tereiai da ma voaguiai!
 2 Da au dobu am kua ina aramanei,
 da rava anatapui au dobu ina aramanei da tam ai tauvilawana.
 3 Rava ina voepaepaim Oo God,
 rava anatapui ina vimaeḡaeḡaenim.
 4 Rava anatapui au dobu ina vinuaiiai ma ana morelanai ina wela,
 aubaina tam rava anatapui au dobu, kua jijimaninei e vivibadei
 ma e paipaini.
 5 Rava ina voepaepaim Oo God.
 Rava anatapui ina voepaepaim.
 6 Anina ma doa maura ḡaeḡaena ina vereta
 ma God ina viaiaina-kaueta
 7 Riwa kua, God ina viaiainita
 ma rava anatapui au dobu tauna ina vivirei.

90

God ana taunola Moses ana pari

- 1 Bada ai animae
 kimta wariaga da marina.
 2 Tam God maemae nonoana
 muriai da ola
 ma dobu uta kauei.
 3 Tam rava e ririwei da e vipokau, ma e ririwei,
 "Rava ona wanaviraimi"
 4 Tam awarim madeḡa 1,000 lamna me aupom tagogi, i tupo kua
 me raviravi, ega ita manawa dadana.
 5 Rava ai lawana e vaivaitawanana laḡilaḡinei me rauboni damona.
 Tau me modu, ubaubanai e raraupairei,
 6 da e rarata ma e talatalai,
 wate aubigai e ḡiviḡivi.

* 51:8: Au vinuabola lamna me gelamiu wanagaina

- 7 Nanare am meji tauai e lagulaguriai ma
maranai e ġaiġaiawa tauai a rovorovo kaua.
- 8 Ai ġo'apoapoe anatapui au naom u lavaei,
ai ġo'apoapoe govagovaġana, wate anatapuna e inainanai.
- 9 Am meji ai lawana i vitupoi,
ma ai madeġa laġilaġina e kwakwa, a lavutu-tawanana.
- 10 Madeġa 70 i vereta da tana mae,
mepa da tana virewapana lamna 80;
Wate wei lamna nuabola ava ina vereta,
eġa tana mae-pora ma tana nae.
- 11 Eġa ai ai am ġaiawa malana ita vai-kauei.
Mepa da am ġaiawa ata aramana-kauei, lamna tauai ata vivirana-kauem.
- 12 Ma nanare, ma viararamaniai da ai lawana i tupo kaua,
ma lamna aubaina awarim nuaulaula ana vaia.
- 13 Oo BADA! Ma nememei awariai.
Ma mae-tavirem, ma vinuabilelai, tauai am taunola.
- 14 Ubaubana marana patapatai am nuavaina maemaena ma verelai,
da ana morelanai ana logoi ai ma ai au mara anatapuna ana vinuai ai.
- 15 Madeġa biaġa u kovoġiai, nuaiai ma verelai
da madeġana biaġa a vinuapoapoe ina kovoġi.
- 16 Tauai am taunola, am nola vivirewapanana ma viatataieli.
Ma natunatuiai am boruma ma viatataiei.
- 17 Ma Bada ata God ana vianina ina viatataieta
ma ina kauei da aiwai anatapuna ta kaukauei anona ina tupua.
Nanare ai nola ma viuai.

91

God ata rawena

- 1 Aiai ravana e nenaie Aidamo Telarana awarina agu aubaina,
lamna Vivirewapanana Kaukauana au ririvana ina mae.
- 2 BADA au God awarina ana riwa ana pa, "Tam au anigagalo ma au tauviġavia.
Tam au God, a vivitumaġanem."
- 3 Aubaina tauna, ġavia ana waro govagovaġai
ma numa rarauabubu awarinei ina gagaloemi.
- 4 Tauna papenenei ina tereġovaġimi ma papena au gabaurina ina gagaloemi;
ana vipatutu, am rawena ma am anigagalo.
5 Waguvara kauai vi'ni-rovorovoi eġa ona rovoei,
bo ġavia madeġai e vivivġavia,
- 6 bo numa rarauabubu waguvara e vivivġavia,
bo doria madeġai e viviraġena.
- 7 Avena da rava tausan au ririvam i peu,
bo ten tausan au oiem i peu;
wate tam ita vodadana-avem.
- 8 Matamiei ona inana ma ona inanai
ġo'apoapoe ravai ai kovoġa.
- 9 Aubaina BADA o vaia ami rawena; Ġetelarana ami taugagalo.
10 Eġa aiwai apoapoena awarimi ina tupua bo au numa ina ġeta.
- 11 God ana anela ina terei da ina painimi
ma ina gagaloemi ami au babara.
- 12 Taii uraiei ina voepaim
da aem eġa ġaima au tepana ma rauei.
- 13 Taumi lion ma mota ona vovaiubai,
lion ġaiġaiawai ma mota vivivaiawai ona tugwadagwadai.
- 14 God i riwa i pa, "Alai nuanuau e vaivainonoei, ana vilawani;
ma ana gagaloemi, aubaina i aramana-kauei.
- 15 Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- 16 Ai lawana ana vimanaini,
ma au vilawana mamae-nonoana ana viatataiei."

95

BADA tana welei

- 1 Ona nei! Tana wela BADA awarina.
 Ana nuaiaita tana wela God ata tauvilawana vivirewapana awarina.
- 2 Tana nei au naona ma tana viegualaei
 ma welei tana voepaepai.
- 3 Aubaina BADA lamna God virewapana kaukauna,
 ma god anatapui e inainana-ġairei.
- 4 Dobu anatapuna au urana,
 guba ġaeġaei doa au orana da ola ġaeġaei au tepai.
- 5 Boga tauna ġarinei, tauna i kauei
 ma nanare tauna uranei dobu alalana i tere-kauei.
- 6 Ona nei ma tana raudune ma tana vimaġaeġaeni,
 ae tututa tana tapeġaroei taukaueta BADA awarina.
- 7 Aubaina tauna ata God.
 Tauta natunatuna. Ana sipu ma e ġamoġamoita ana au wapu.

Mepa da ponana o nonori amadodo,

- 8 [⊛]E riwei i pa "Eġa orami ona gudui me amamami au Meribah;
 me au mutulua au Massah.
- 9 Kampa amamami i 'nanai, kauababai a kauei
 wate eġa ita vitumaġaneu, ma i raudadaniu.
- 10 Madēġa 40 wei kimtana awari amlou i ġaiġai ma a riwa,
 'Wei ravai orai i bagibagi ġaġa!
 Eġa ita rarautaniġaneu.'
- 11 Ana meġiu a parivainuaġani,
 'Gabu a vokaukauei ami lauvitau aubaina wate kampa eġa melanai ona rui."

100

Voepaepa welana

- 1 Rava anatapumi au dobu ona logoimi BADA awarina!
- 2 Ana nuaiaimi BADA ona voepaepai,
 ona nei au naona ma ona welei.
- 3 Ona aramanei da BADA anina God.
 Tauna i kaueta.
 Ma tauta tauna ġarinei. Tauta tauna natunatuna. God ana sipu ma e galaloeta me sipu
 taupainina.
- 4 Ana welami ana au gari ona rui ma voepaepami
 ana au aniviboru ona rui,
 ma ona vimaġaeġaeni.
- 5 Aubaina BADA i aii;
 natunatuna e vivinuavaina-nonoei,
 ana vipatutu e mamae-nonoa, kimta au anatapui.

103

BADA ana nuavaina

David i girumi

- 1 Orau taputapunei BADA ana voepaepai.
 Wavana vivivireina ana voepaepai.
- 2 Orau taputapunei BADA ana voepaepai,
 kava aiiai i kauei aubaiu eġa nuanuau ina vuru.
- 3 Au ġo'apoapoe anatapui e notanota-tawanei,
 ma doria awarinei e vivilawaniu.
- 4 Ata iraġe ma i sinaepaiu
 ma nuavainei ma raunuapoapoelei e vivigulaueu.
- 5 Au lawana au anatapuna
 purapura aiiai avai i verevereu, au vilaraga marana i raviravivouni me *manubada.
- 6 BADA ana kava anatapuna jijimanina.

⊛ 95:8: Exo 17:1-7; Num 20:2-13 * 103:5: Manubada tawarana waduboi e peupeu ma vouii e gogogo. Me manubada tawarana voui e gogogo nanare tam au lawana e raviravivouni.

- 7 Ana oga Moses i viataaiei,
ma mai Israel BADA ana kaua vivirewapanai i 'nanai.
- 8 BADA raraunuapoopena ma ivina aiaina,
Ega laḡilāḡina amlona ita voḡaiḡai. Ana nuavaina maemae-nonoana.
- 9 Ega mara nonoa ina enita,
ma ana amloḡaiḡai eḡa ita mamae-nonoa.
- 10 Anina da ita kovaḡa-kaueta,
wate i raunu'apoapoeleta da kovoga eḡa ḡaeḡaena ita verevereta.
- 11 Dobu weka ma mara nore au tepadewadewana.
Nanare, BADA ana nuavaina i rata guratana tau i da BADA e vivivirei awarii.
- 12 Mepa madeḡa e gogolana da mepa e ḡaiḡairalana, lamna uama,
ma nanare ata ḡo'apoapoe vinimalana e vaivaitawana-naiei aueia.
- 13 Me ama natunatuna e rarau-nuapoapoelei,
nanare BADA natunatuna e rarau-nuapoapoelei.
- 14 Aubaina i aramanei da tauta pokauei i kaueta.
- 15 Ata mara au dobu lamna me modu.
Ta gogogo ma ta rarata me berana moduei;
- 16 Anina ma ive i uvena-kapupuei,
eḡa ita mamae, ana gabu i kwakwava.
- 17 Tau i da BADA e voepaepai ana nuavaina maemae-nonoana
awarii ma nanare noinonii ma ai epaepaia awarii
- 18 tau i aiavoi da ana parivainuaḡana bagibagina e vovojijini
ma ana patupatutui tarawatu e vovojijini.
- 19 BADA ana vigulau anikialana au mara i terei,
ma kampa ana vigulau e vivibadei.
- 20 BADA ana anela, vivirewapanami,
BADA riwana o rarautaniḡanei ma o kaukauei,
BADA ona voepaepai.
- 21 Anina BADA ana anela marei,
BADA ona voepaepai taumi ana taunola ma ana ḡoana anatapuna o kaukauei.
- 22 Taumi anatapumi BADA uranei i kauei, ana au vigulau maemaei, BADA ona voepaepai.
Tau nanare orau taputapune i BADA ana voepaepai.

110

Gulauna vinevinena

David ana wela

1 *BADA au bada wenanare i riwei,

“Au oieu ma kiala

da am ḡavia

au ae karem ana terei da ma tuvaideoedoei.”

2 BADA, am gabemani vivirewapanana Zion * ana parata ina viratai,

da am ḡavia ma vibadei.

3 Am laraga ana nuaii ina verena-melei da ina visorodia,

ma ona ḡae BADA ana ola au tepana viḡavia aubaina,

ma ami rewapana ina ravivouni ubaubanai patapatana me ubaubanai turuvanina.

4 BADA i parivainuaḡanim ma ega nuanuana ina virai;

“Tam piri si maemae nonoana me Melkisedek.”

5 BADA au oiem e maimairi da e paipainim;

tauna gulagulau ina piaḡi maranai amlona ina ḡaiḡai.

6 Dobu nununai ai ḡoa apoapoe ina kovogi,

ma taubeu dobuna ina vioai

ma dobu gulagulau i anatapui kolai ina viaigwadagwadai.

7 Wate au etanai au vuvura ina uma

ma rewapana ina verei ma ina vovaiuba.

119

BADA ana tarawatu boruborimana

9 Rava vouna menanare lawana aiaina ina maeni?

Tauna riwamei ina paina-melei.

* 110:1: Mrk 12:36; Act 2:34-35 * 110:2: Jerusalem wavana ḡelauna.

- 10 Lamna aubaina a baibaiem orau taputapunei;
eġa ma votereu da riwam ana geduaiei.
- 11 Riwam a iaiavi ma au nuanuau a tereterei,
da eġa ġo'apoapoei awarim ana kauei.
- 12 BADA, a voepaepaim!
Am tarawatu ma viararamaniu.
- 13 Ipiriuei ana bababani ma
am tarawatu anatapui u verevereiu ana jimei.
- 14 Am tarawatu votelatelana a vinuaiainana-kauei,
eġa me vipurapura bo vimane.
- 15 Riwam ana iavi
ma ana vinuanotenotei.
- 16 Am tarawatu a vinuaiaina-kauei,
eġa riwam ana voteretawanei.

139

Bada anatapuna i aramanei.

David ana wela

- 1 BADA orau u inanai ma au kaua anatapui u aramanei.
- 2 U aramanei mara aiwai a kiala ma a vomairi.
Avena au uama wate au nota e araramanei.
- 3 E inainanai maranai a babara bo au numa a vivilauvitau.
Anatapuna a kaukauei e araramanei.
- 4 Muriai da ata babani tam e araramanei aiwai ana latoni.
- 5 Tam e garigari-kwaipipiniu,
ma uram virewapananei e paipainiu.
- 6 Lamna riwa kauana, awariu i aii kaua
ma i ġe-dewadewa da kolau i kwauna-kauei.
- 7 Mepa ana nae da Aruam ana raugovaġei?
Mepa ana ruba da ana raugovaġem?
- 8 Ata ġae au mara da tam kampa;
mepa da i 'rairaġei ai au dobu ata rauviraiu, tam kampa.
- 9 Mepa da ana lave nae au maramatanei,
bo mepa madeġa e neneulai,
- 10 avena kampa ma uram ina raveniu,
ma am rewapana ina painiu.
- 11 Mepa da ana riwa, "Gimtona ina tereġovaġiu
ma lalalaina ina gimtona."
- 12 Wate avena da gimtonana amapo eġa ana raugovaġem.
Tam awarim gimtona ina rarana me marai, aubaina tam awarim gimtona ma lalalaina
lamna tagogina.
- 13 Tam tupuau anatapuna u voai da alou au manawana u teretagogieu.
- 14 A vivieġalauem aubaina tam am nuavaini ma am borumei u voa-kauei! Am raugaroġaro
i aii,
A voepaepaim aubaina a aramana-kauei.
- 15 Tam u vivineneġaneu maranai a tuputupua u govagovaġana, alou au manawana,
tam ainelam anatapuna u aramanei.
- 16 Tam u inanai muriai da a tupua.
Aupom biġa u vereu da ana mae
lamna au buka u girumi,
muriat da aupom naona i ġotai.
- 17 God! I pipiri guratana da am nota ana aramanei.
Am nota kolau i kwauni, eġa aiwai ġelaunei am kaua ana aramanei.
- 18 I maġa guratana eġa me bubu, iavana ana kauana-avei,
avena da ata iava-pai, tau amapo da tam ana vivinuanainem.
- 19 Oo God! A ġoei da ġo'apoapoei ravai uta viraġeni.
Tauviraġena uta viaġaġei da eġa ina nei awariu.
- 20 Aubaina e vivijiboġim,
ma wavam eġa ita vivivirei.
- 21 BADA, rava e gedugeduaiem, tau ravai a gedugeduaiem.
Tau i eġa ita voteletelem lamna aubaina tau i au ġavia.

22 **Tau**i a geduaiana-kauei,
anina tau*i* au ġavia.

23 **Ma** tuvirevireu, ma orau ma inana-pai.

Ma raudadaniu da nuanuau ma aramanei.

24 **Mepa** da ġoa apoapoe au orau, ma viatataieu,

ma ma raveniu etanai e nena*e* au lawana maemae-nonoana awarina.

Proverbs Nuaulaula Riwai

Pariverena

Wei au bukana awanaina maḡamaḡau, ma God ana rava e viviararamani da ina mae-kaua. Gulau Solomon maḡamaḡau i girumi ma rava ḡelau ruāḡa ota i girumi. Orotu e ḡoreḡorei Agur ḡelau i girumi ma gulau Lemuel ḡelau i girumi.

Viararamana ḡaeḡaena tagogi wei au girumana lamna nuaulaula anapui pulo Godei. Rava nuanuaulaulana au naona God ina vivirei.

Mara au anapuna ata au animae wei nuaulaulauna e vovoaguia, au melagai, au gabemani ma au nola.

Ma maiteni wei girumana e viviararamani da lawana aiaina tata maeni, ma kaua aiiai tata kauaei. Ma avena tata gogulagulai ma tata nola guratana ma ivita ita ai molamolakai awari.

Vinuaterena etana

⁷ BADA vivirana, lamna aramana karena,
Wate opaopai, nuaulaula ma aramana e gedugeduaiei.

⁸ Natu, amam ma alom ai vinuaterena anapui ma voteletelei.

⁹ Ai vinuaterena lamna me kunuteia au kolam,
bo gadogado au uam
da inanam ina ai.

5

Wavine matana maḡamaḡauna ma vorei

⁸ Wavine matana maḡamaḡauna ma ruba-tawanei!
Eḡa ma nae dadana ana au metaeta!

⁹ Mepa da nanare lamna rava eḡa ina vivivirem.
Tam am vilaraga ma am lawana aiaina ma vitupoi.

²¹ BADA rava ai kaua anapui e inainanai,
Metauna etanaina e vaivaia, tauna kampa da e inana-vaitetem.

²² Taniḡapota ravana ana ḡo'apoapoelei ina waro-melei.
Ana ḡo'apoapoe tauna ina tupajijini.

²³ Tauna opaopana ma eḡa ita paina-melei,
Ana kaua opaopai aubai i raḡe.

6

Amam ma alom ai vinuaterenana

²⁰ Natu, amam ma alom ai vinuaterena anapui ma voteletelei.

²¹ Ma vojijina-kauai au nuanuam; marana patapatai au uam ma gadoi.

²² Maranai e bababara, ai vinuaterena am etanai ina rauḡadaḡadari.
Maranai e matamatave, ai vinuaterena ina matave-painim.

²³ Maranai u vomairi, ai vinuaterena awarim ina babani.
²³ Aubaina wei tarawatui lamna rampa.

Wei viararamana lamna ravilala, etanaina e lalalai.

Nuaterena bagibagina lamna lawana aiaina etanaina.

²⁴ Tau i ina aguim da wavine matai maḡamaḡau ma vorei,
ma wavine tavitavinena ana gwalameru.

²⁵ Eḡa wavinena inana aiaina ma erawei.
Eḡa! Ma voterei da matanei oram ina taini da ina waroim.

8

BADA nuaulaula i terei

Nuaulaula e ririwa,

²² "Au karena, BADA tau i tereu.

Muriai da aiwai gēlai i kauei.

²³ Tau kampa au kare oina,
muriāi da dobu.

²⁴ Tau a tupua muriāi da BADA gabinou i kauei,
muriāi da waira vuvura i kwakwa-gētai.

²⁵ Tau a tupua muriāi da ola,
muriāi da ola muomuoi ai au gabu i terei, tau kampa.

²⁶ Muriāi da dobu bo wapu
bo doa pokauna.

²⁷ Tau kampa maranai mara ana au gabu i terei,
maranai parata i taini da mara au tepana ma boga au gabaura.

²⁸ Maranai apau i terei au mara
ma vuvura doa au orana i votawanei.

²⁹ Tau kampa, ma boga ana parata i terei
ma i egari da nai paratana ega ina raḡoni.

Tau kampa, maranai dobu oḡona i tonana-naiei.

³⁰ Nai marana tau BADA au ririvana a mamae me tauvioga,

marana patapatai a vinuaiaini ma tau a vinuaiāi.

³¹ A vinuaiāi kaua maranai dobu i kaukaueia a inanai,
a vinuaiāi kaua maranai rava a inanai.”

9

Nuaulaula ma opa

¹ Nuaulaula ana numa i voai
tuatua gaegaē 7 i tai ana numa aubaina.

² Torela gaegaena i apui,
sia i api ma wain aiāi i wāḡi ma kepaḡepa i vokaukauei,

³ ma ana taunola gēlai i paritawanei,
au deba da i viḡoreḡore,

⁴ i riwa i pa, “Taumi ega notanota kauami ona nei!”
Ma opaopai i riwei,

⁵ “Ona nei au lam ona ani
ma wine a viravirai ona umai.

⁶ Ami lawana opaopai ona voterei
ma ona lawana,
ma aramana lawanana ona maeni.”

13

¹ Tevera nuaulaulana Amana ana vinuaterena e nonori,
wate tevera maegaegaena vinuaterena e gedugeduaiei.

⁴ Mata-galagalawana purapura e raurauoḡarei ega ina vaia,
wate egoḡolana ana ḡoana aiwai anatapui ina vaia.

²⁴ Aiāi natuna ora-potapotana ega ita kwapukwapui, lamna natuna nuanuana ega ita vaivaia.
Wate aiāi da natuna nuanuana e vaivaia lamna ina viararamani.

17

²¹ Ama tevera opaopana i vinatunei lamna nuabola ava e vivitupui,
laragana amana awarina ega nuaiai.

20

⁴ Rava mata galagalawana e paepaewa labalababa, ega iri ita votaḡotaḡoi;
tuaruta ana mara e baibaia ma ega aiwai.

22

⁶ Natunatumi lawana aiaina ona viararamani, da maranai i vorata,

nai lawanana eġa ina voterei.

23

- 13 Natum e viviorapota eġa ma inana-tawanei,
boreborelei u kwapui Amapo eġa ma viraġeni.
14 U raukwapui
lamna iraġe awarinei u galaloei.

24

- 30 Rava mata-galagalawana ana wapu adanei a nae,
ravana opaopana ana grape wapuna au ririvana.
31 A inana da modu i gogo-nae,
ma donadona wapuna i vioai.
Ma ana gari, i wanarikarikai.
32 Lamna a inana ma a vinua-notanotei.
A tuvirevirei ma wei i viararamaniu.
33 Matam ma potai, ma rauviraim.
Wapu nolana avena, uram au nuanuam ma terei ma ma matave.
34 Ma gomara ina ravim me taudanene;
anatapuna ina pupuni.

26

- 13 Rava mata-galagalawana e ririwa, “Ġamoġamo ġaiġaiawana au doa! Ġamoġamo ġaiġaiawana
au etana!”
15 Mata-galagalawana lam au urana e vaivaiaia
wate eġa ina voepai au gamona.

29

- 3 Aiai ravana nuaulaula i ġoana-guratei, nuaiai ġaeġaena amana e vereverei.
Wate aiai da etana waivinei maiteni e nena lamna ana mane ma ana purapura
anatapuna e vikalokaloei.
15 Kwapu ma nuaterena riwai, natum nuaulaula e vereverei.
Wate tevera eġa viararamanana, alona e vivitepaubaubai.
17 Natunatumi ona vinuaterenei, da mara nonoa awarim nuauba;
ma oram ina vinuaiaini.

31

Wavine aiaii kaukauana

- 10 Mepa nanare wavine aiaina ma egoegolana uta nelaġai?
Wavinena i vinualaulauna kaua eġa me ġaima lebalebarina maiana ġaeġaena.
11 Orotu awana i vitumaġanei,
ma eġa aiwai ina voladaġei.
12 Wavine, kaua aiaii ma eġa kau apoapoe ita neneiai awana awarina
ana lawana au anatapuna.
13 Wavine sipu aparana ma waiape i vaia
ma i vinuaiai da ina rauġaroġaro.
19 Wavine sipu aparana ma waiape ina metani
ma gara ina ġauġauri.
20 Ana numa ma orana i votawanei
molamolakai ma vovoladaġai awarii.
30 Erawa lamna kaua morumoruna

ma inanana aiaina ina amoa;
wate wavine BADA e vivivirei, rava tauna ina voepaepai.
³¹ Wavinena ina voepaepai aubaina i kauana-kauei.
Rava anapui, wei wavinena ona voepaepai.

Ecclesiastes Tauviararamana

Pariverena

Aiai da wei bukana i giruma lamna ega wavana tata aramanei. Wate rava gelaui e ririwa da gulau Solomon i girumi. Ma aiai i girumi lamna anina da rava araramanina. E ririwa da wavana lamna *tauviararamana*. Aubaina purapura vopiripirii e bababaniei. Rava magamaagai God ega ita aramanei aubaina da i goei da ina baiei da aiwai e tuputupua. Wate anona ega ita nenelaagai. Tauviararamana wei ravai ai nota e ririweta. Mara gelauna rava aiwai i kaukauei lamna ega anoi Ma e ririweta da wei kauai lamna me ive tata viaagei. Rava i nelaagai da lawana wei au dobuna lamna anona ega aiwai.

Tauviararamana ana giu

- ¹ Wei lamna tauviararamana, David natuna, mai Israel ai gulau ana viararamana;
² Tauviararamana i riwa, "Anona ega!
 Anatapuna kwakwavina!"
³ Ma nolanola da ma magura ma anona aiwai?
⁴ Kimta e nenei ma e nene, ma e
 wate dobu maemaena e mamae.
⁵ Madega e gogogo ma e arearere,
 ma e wanawanavirai da ina vikarena-melei.
⁶ Kariwabu e gotagota,
 rauanaaga e opuopu,
 e kwavikwaviviro
 ma e wanawanavirai da ina vikarena-melei.
⁷ Waira anatapui au boga e opuopu,
 wate boga ega ita oaoai.
 Waira matanei,
 e gaigairai ma e nene me au matana.
⁸ Kau anatapuna i vi'nigarigari,
 menanare tana riwa nei?
 Matata ega melanai ina inana iaua;
 Taniyata ega melanai ina nonora iaua.
⁹ Aiwai wariaga i tupua ina tupua me,
 aiwai wariaga i kauai ina kauana-melei.
 Ega aiwai, kau vouna wei au dobuna!
¹⁰ E ririwa, "Ona inanai! Wei kau vouna."
 Wate ega! Wei kau maemaena;
 wariagana, muriai da ta tupua.
¹¹ Kau wariaga i tuputupua, ega aiai ita notanotai.
 Ma kau marina da muriai e tuputupua, ega aiai ina notai.

Nuaulaula anona ega

- ¹² Tau lamna tauviararamana ma Israel ai gulau au Jerusalem. ¹³ Orau a terei da aiwai anatapuna au dobu e tuputupua, nuaulaulei ana girumi. Ma a aramanei da God vita gaegaena rava i verei. ¹⁴ Aiwai e tuputupua au dobu a vinua-notenotei ma a inanai da;
 anatapui anona ega, kwakwavina. Ive ava ta viviaagei.
¹⁵ Aiwai barabarai amapo ega ma vojijimana-melei,
 aiwai awarim ega, lamna menanare ma iavanei.
¹⁶ Au orau a riwa, "Tau a nuaulaula guratana,
 ega me aiai gelauna au Jerusalem i vivigulau nanare.
 A ramanei nuaulaula aiwai ma aramana aiwai. ¹⁷ A goei da ata aramana-kauai nu-
 aulaula aiwai ma bua ma opa aiwai.
 Wate a aramanei da wei lamna me ive a viviaagei.
¹⁸ Aubaina au nualaula e rarata, mae-boaboa e rarata
 au aramana e rarata, au nuabola e rarata."

2

Vinuaiaiana-melana lamna anona ega.

¹ A vinotanota a pa, “Abeka nuaiai ana baiei, ana raudadani, da i aii bo eġa.” Wate a nelaġai da wei lamna kwakwawina. ² Lamna aubaina a riwa da kaka labalababa ma erawa lamna bua. Ma erawana aiwai aiaina e vereverem? ³ Nuaulaula a ġoana-guratei, ma a ġoei da wine ata umai da orau ita telatela ma kaua opaopai ata kauē, da ata aramanei metauna i aii rava au dobu awari, maranai mara tupona awa au dobu e mamae.

⁴ Kaua ġaeġaei a vikarei, au numa ġaeġaei a voa-naiei ma grape wapui a paewi. ⁵ Wapu da peipei a kauē ma ai uuai tapuna ma tapuna a paewi. ⁶ Dogo a ġarai da garewa ma wapaketa i vojijini, lamnei wei wapui a vivituvanei. ⁷ Awariu taunola au numa tuputupuai, ma taunola maġamaġau nellarai ma waivinei a gimarai. Au bulumakau ma sipu i maġa guratana eġa me aiāi ġelauna au naona au Jerusalem nanare. ⁸ Awariu gold ma silver gaegaena ma nanare dobuġela gulau ai via. Tauwela nellarai ma waivinei a vimaiei ma guguini inanai aiāi a vivaneiai au numa, au ani vieraerawa. Aiwai a ġoeġoei ana tapuna awariu. ⁹ Tau a maura ma a vipurapura kaua eġa me aiāi ġelauna au Jerusalem nanare. Ma wei anatapuna au orana au nuaulaula i mae-kaua.

¹⁰ Aiwai a inanai ma a rauoġare i a vaia, anatapuna a notai da ita vinuaiainiu.

Au nola anatapui a kauana-kauē, ma nuaiaina lamna au nola maiana.

¹¹ Anina ma aiwai anatapuna a voavoai ma a polepolei, a vinua-notenotei ma a aramanei da wei anatapui lamna anona eġa, lamna me ive ata viviaġaġei wei au dobuna amapo eġa aiwai tana vaia.

Nualaula i aii eġa me bua

¹² Nuaulaula, bua ma opa anoi a vinua-notenotei.

Gulau ana raviepaia, aiwai ġelauna ina kauēi?

¹³ Ma aramanei da nuaulaula i aii kaua eġa me opa, ma lalalaina i aii kaua eġa me gimtona.

¹⁴ Rava nuaulaulana matana au kolana e mamae wate opaopana waguwaguwareina e bababara.

Ma aramanei da ravai ruaġai ai damona tagogi.

¹⁵ A vinua-notanota a pa, “Tau ma opaopana ai damona tagogina.

Au nuaulaula aiwai ġelauna ina vereu?”

Au nota a pa, “Wei maiteni anona eġa.”

¹⁶ Rava nuanuaululai lamna me rava opaopai amapo nai ravaii nuanuata ina vuru.

Kapore! Rava nuaulaulauna ma rava opaopana e irairaġe.

¹⁷ Tau lawana a geduaiei, au dobu aiwai anatapuna ta kaukauei iniviera awa e verevereta. Anatapuna kwakwawina, me ive taviviaġaġei.

Bagibagi ġaeġaena eġa anona

¹⁸ Anatapuna au dobu a polepolei a geduaiei, aubaina nai ana voterei, da rava au muriu e nenei aubai. ¹⁹ Ma aiāi i aramanei da tauna rava nuaulaulauna bo rava opaopana? Wate tauna aiwai a polepolei ma au aramanei a vitupui ina vaia. Wei anona eġa. ²⁰ Au bagibagi anatapuna wei au dobuna a notai ma orau i pe. ²¹ Aubaina rava ana nuaulaulei ma ana aramanei i nola kaua, da i maura ma anatapunana ina voterei da rava ġelauna, eġa taunoleina ina vaia. ²² Marana patapatai nola ma nuabola inina e viviarei au dobu ma aiwai ina vitupui? ²³ Tauna ana nola da iniviera ma nuabola; waguwarai maiteni eġa ita matamatave. Wei maiteni eġa anona.

²⁴ I aii da rava ita am ma ita uma ma ana nola ita vinuaiāiei, ma a inanai da vinuaiāi lamna God uranei. ²⁵ Aubaina God eġa. Lamna eġa am ma eġa nuaiai. ²⁶ Aiāi God e vivinuaiāini, God tauna nuaulaula, aramana ma nuaiai, e vereverei. Wate ġoa apoapoe ravana ana nola i verei da mane ma maura ġaeġaena ina vitupui, Wate God nai maurana ina vaivaitawanei ma aiāi e vivinuaiāini ina verei. Goa apoapoe taukauei ai nola lamna kwakwawina, me ive i taviviaġaġei!

3

Aiwai anatapui ai au mara e tuputupua

¹ Mara ma iri i terei da aiwai anatapui au dobu ai au mara e tuputupua.

² Vinatuna ana mara ma irāġe ana mara paewa ana mara ma tuaruta ana mara.

- ³ Virāgena ana mara ma vilawana ana mara,
amrika ana mara ma voa ana mara.
⁴ Tou ana mara ma kaka ana mara,
mogu ana mara ma ara ana mara.
⁵ Gaima viorerena ana mara ma tama melanana ana mara,
taragwaba ana mara ma ega taragwaba ana mara.
⁶ Baia ana mara, ma baia voterena ana mara,
ma purapura vojjinana ana mara ma purapura vineboana ana mara.
⁷ Sika ana mara ma popo ana mara,
genuana ana mara ma babani ana mara.
⁸ Nuavaina ana mara ma goaagai ana mara
vigaigaiawa ana mara ma nuuba ana mara.

4

- ⁹ Rava ruaaga i aii ega me rava tagogi,
aubaina tau i ina viagu vivira ma maura ina nelaagai.
¹⁰ Mepa da tagogi ina peu, turana e mamae da ina voepai.
Wate tam ainelam ma u peu lamna i apoapoe kaua,
aubaina kampa ega aiai da ina voaguim.
¹¹ Ma nanare mepa da rava ruaaga i matave tagogi, tau i ega inii ina ubauba.
Rava tagogi menanare ainela ina vibolabola-melei?
¹² Am gavia, ainelam ina vigaiviem ma ina vovaiubaim, wate maranai taumi ruaagami
e vivigaviem amapo ona vobelei.
Ma rava tonuga i virewapana kaua me gurava barawa tonugei metametanana.
Wei guravana viaituinana ma kauana-avei.

5

- ¹⁰ Aiavoi mane nuanuai e vaivaia ega melanai nuanuai ina rauei;
aiavoi e goegoie da ina vipurapura;
tau i ega melanai ai rauogara anapuna ina vaia.
A inanai da wei anona ega.
¹¹ Maranai am maura e rarata,
lamna maranai patara e gēgetai da e amam vereverem.
Wate wei maurana aiwai aiaina e vereverem?
Ega aiwai, anina e viatataim da tam maumauram, wate rava gelauna am maura
ina tawanei aubaim.
¹² Taunola e amam kaua bo ega,
wate e matamatave kaua.
Mane ravana ega nanare, tauna ana maura e notanota-maratomei.
¹³ Au dobu kaua apoapoe kaukauana a inanai;
Mane ma purapura ravana ana maura au anara e teretere muriai aubaina. Wate wei
lamnei, ana nuabola gaegeaena i tuarui.
¹⁴ Ana mane ma ana maura i kauana
labalababai ma anapuna i vine-boai.
Natuna ega ana buderi ita terei.
¹⁵ *Menanarena dobuna ta ruinei
nanarena tana nae me, kovakovata ma ana ura kwakwavita.
Amapo ega ata purapura, ta vopolepolei tana vinimavoei.

7

- ¹⁵ Au lawana kwakwavina au orana kaua ruaaga a inanai;
Rava aiaina BADA ana nola e kaukauei i'rage lagilagina
ma go'apoapoe taukaueina God ana tarawatu e viviaigai wate ana lawana i manawa.
¹⁶ Lamna aubaina ega ma vigoa aiaina guratana bo ma vinuaulaula guratana,
mepa da ma viragena-melem.
¹⁷ Wate nanare, ega ma vitaniapota guratana

* 5:15: Job 1:21

ma eġa ma opa;

eġa ita ai da ma irage muriai da am mara.

¹⁸I aii mepa da wei riwai bagibagina ma nonori

Aiai God e vivivirei lamna ina paina-melei

da wei kauai ruaġai eġa ina kauiei.

¹⁹Rava nualaulaunana tagogi rewapana ġaeġaena ina verei

eġa me gulagulau 10 au taon.

²⁰Riwa kaua! Weka au dobu eġa aiai tagogi kaua aiaii ava taukaueina.

Ma eġa ġo'apoapoe ita kaukauei.

8

¹⁶A ġoei da nuanuau ita ulaula lamna aubaina rava ai mae au dobu a inana, ma lamnei a aramanei da marai ma waguvarai eġa matave kaua. ¹⁷God aiwai i kaukauei eġa ata aramana dadanei. Ma voguratei da ma nelaġai, wate amapo eġa ma aramanei. Nuaulaulai e ririwa da i aramanei, wate eġateni dadana.

11

Ami au vilaraga ona vinuaiai

⁹Laralaraga, ami vilaraga ona vinuaiaiei.

Nuanuami ina morelana ami au vilaraga.

Orami ma matami ana rauoġara ona kauiei.

Wate ona aramanei da aiwai o kaukauei

God ina etaremi, anatapuna aubaina.

¹⁰Lamna aubaina nuabola au murimi ona terei ma tupuami ona paina-melei,

aubaina amapo eġa ona vilaraga nonoa.

12

¹Ami au vilaraga, taukauemi eġa nuanuami ina vuru,

muriai da nuabola ona nelaġai;

maranai magura i tuġereġerei,

ma ona riwa, "Lawana marina eġa ita ail!"

²Lamna maranai madeġa, nawaravi ma ubona ina ġuvai,

ma apau ina nememei da mara ina ġuva-nonoei.

³Anina ma nimami, taugagaloemi ina sisi

aemi marina vivirewapanana ina vokokokara.

Ivomi ina viruaġa da ami lam eġa ona uta gwadagwadai,

matami ina vinawanawa da eġa ona inana kaua.

⁴Taniġami ina pota da gugura au etanai eġa ona nonori,

kiu ina logologoi ina ravidagudaguimi wate ai wela anatapui ina amoa.

⁵Taukauemi ona vinuanotenotei:

Maranai aidamo ona gagatei ma babara ona rovoei,

maranai kora ina tonaimi me rei talana,

ma tam ma gwaġa-nae me kapau e gwaġagwaġa-nae irage aubaina.

Erawa ma morelana anatapui ina kwa. Tauta kokoġa ta tuġereġerei ma tou ina vikarei au doa.

⁶Taukauemi ona vinuanotei,

muriai da lavutu ġuravana ina wanautuini,

bo nau goldei ina wanawamai

ma reduġoru ina wanakabakabari.

⁷Ma tupuami ina naeme au doa

ma aruami ina naeme God, tauverena awarina.

⁸Tauviararamana i riwa, "Anona eġa! Anona eġa!

Anatapuna anona eġa."

Damona, God ma vivirei ma riwana ma voteletei

⁹Tauviararamana nuanuana i ulaula kaua, ma aiwai i aramanei rava i viararamani. Riwa nuaulaulai maġamaġai i 'avi ma i girumei ma i rereġa-kauiei. ¹⁰Tauna riwa vinuaubana i baiei ma aiwai i girumi lamna jijimanina ma ririwa-kauana.

¹¹ Tauviararamana riwai lamna me kwapu ma riwa nuaulaulai i gam me tutu, nuanuam ita tonatonai. Wei anatapuna BADA i vereta. ¹² Anina natu, ma aramanei da kuaa gelaui ma inana-kauei. Buka girumai ega ina kwa ma giruma giri giri i vinigarigari.

¹³ Wei anatapui au murina.

Riwa tagogiava ma aramanei:

God ma vivirei ma ponana ma voteletelei.

Wei lamna aubaina rava i vitupui.

¹⁴ God ata kuaa anatapui govagovagai,
aiaii bo apoapoe, ina kovogi.

Peroveta Isaiah ana buka

Pariverena

Wei bukana lamna peroveta gaeḡaena au Jerusalem i mae tana riwa 750 BC. nanarena, wavana Isaiah. Bukana iavana tonuḡa:

Kapita 1-39 e ririweta da mai Assyria ai gulau ma ai sorodia vivirewapanai dam ḡelau Israel ma Judah au ririvai i vipupuni. Gulagulau Israel ma Judah i vibadei.

Kapita 40-55 lamna mai Babylon ai gulau mai Judah i vipupui ma i pupuna-naiei da au Babylon. Perovetana i vinuabai ma i riwei da God ina naiana-melei ma lawana vouna ina verei.

Kapita 56-66 lamna mai Judah i nememei au Jerusalem. Ma perovetana God ana ogatara Jerusalem ravai aubaii e bababani.

2

BADA ana ola

¹ God ana pariverena, Judah ma Jerusalem aubaii wenanare, Isaiah - Amoz natuna i verei.

² Mara au murina,

ola mepa tempol marina e maimairi, ina mae-nonoa.

Ina ḡetelara kaua eḡa, me ola ḡelau.

Dam nununai patarai ina taini kampa da ina voepaepa.

³ Dam patarai ina nei ma ina riwa,

“Ona nei, tana gae BADA ana au ola,

Jacob ana God ana au numa.

Weka ana kaua ina viararamanita

da au ivina tana babara.

Aubaina BADA Riwana au Zion da ina opu,

BADA ana tarawatu Jerusalemei ina opu.

⁴ Tauna dam gaeḡae ai viḡaiḡaiawa ina rautarei,
ma ina kovoga.

Ai sod ina guda-virai da ipa uata,

ma ai pawasi ina guda-virai da naipi ai raḡaraḡai kosii aubaii.

Dam damai eḡa ina viḡaiḡaiawa vivira me,

bo ina vokaukaua, ḡavia aubaina.

⁵ Ona nei Israel natunatu, BADA ana au ravilala au ivina tana babara.”

5

BADA ana grape wapuna welana.

¹ *Ona rautaniḡana ma au nuavainana ana wela ana ravi.

Au nuavainana ana grape wapuna i paewi,

doa au maumaurana, ola au barana.

² I auni ma ḡaima i viopuni ma i gari

ma grape ḡoroḡorovai aiiai, avavai, i paewi.

Violaḡa numana i voai

ma nanare wine anigudana i bori au kira.

Anina ma i vipaipai da grape uena aiiai ita verei,

Wate grape anatapui i viḡora.

³ Marina taumi Mai Jerusalem ma Mai Judah,

Tau ma au grape wapuna ona babiniei!

⁴ Aiwai ḡelauna eḡa ata kauei au wapu?

Anatapuna a kauana-paiei!

A notai da grape uena aiiai ita vereu wate viviḡorai i vereu.

⁵ Marina ana riwem,

* 5:1: Mrk 12:1

wenanare ana kauēi au wapu awarina.
 Garina ana viairikarikai da gāmoḡamo ina rui
 Ma wapuna ina ḡara-viravirai.
 6 Ana voterei da modu ura gogoi ina vinelana
 ma eḡa aiāi grape ina taraḡadaḡadari
 bo modu ina tuparaguragui.
 Modu ma donadona, wapuna ina puru-pai.
 Apau ana egari da eḡa kampa garewa ina atuna.
 7 BADA Vivirewapana Kaukauana
 ana grape wapuna lamna, Israel
 ma grape ḡorogorovana ae tuḡuna e rerereḡi
 lamna ana dam mai Judah,
 I notanotai da lawana aiaina ita maeni
 wate i 'nanai da tara i vitoini;
 kaua jijimanina ita nelaḡai
 wate viḡaiḡaiawa gararai i nonori.

6

BADA Isaiah i ḡorei da ina viperoveta.

1 Madeḡana gulau Uziah i 'raḡe, tau Bada a inanai. Tauna ana au anikiala, au aidamo telarana i kiakiala ma ana gara adana tempol i vioai. 2 Au rivivana lamna Seraph ruaga. Tagotagogi ava papei six; papena ruaḡei naoi i purui, ruaḡei aei i purui ma ruaḡei, i lavelave. 3 Ma tauiva i viḡoreḡore vivira;
 “Vivivirem, vivivirem, vivivirem tam BADA, Vivirewapanana;
 Dobu anatapuna am boruma i oai.”

4 Ponai gugurana tempol tuatuaana i gui ma bau tempol i vioai.

5 Ma a riwa, “Aio! A kauana-boai! Babani apoapoei gamou i vimiramirai, ma rava gamoi miramirai au poui a mamae, wate matauei gulau, Bada vivirewapana kaukauana a inanai.”

6 Ma seraph tagogi incense aniapuna au tepana ai moniana i kavini ma i lavenei awariu.

7 Ma ai monianeḡ gamou i vodadani ma i riwa, “Ma inanai, wei ipirim i vodadani; am apoapoe viminalana i vaitawaneḡ ma am ḡo'apoapoe i notatawaneḡ.”

8 Anina ma BADA ponana a nonori i riwa i pa, “Aiāi ana paritawaneḡ? Aiāi aubaita ina nae?”
 Ma a riwa a pa, “Tau weka. Ma paritawaneu!”

7

Imanuel ana mataira.

10 Muriāi, BADA, gulau Ahaz i riwana-melei i pa, 11 “BADA am God ma vibaḡai da mataira piripirina, doa au ipu dewadewana, irairaḡei ai au animae bo mara au tepa dewadewana, ina viatataiem.”

12 Wate Ahaz i paribelei, “Tau eḡa Bada ana vibaḡai mataira aubaina. Eḡa ata ḡoei da Bada ana raudadani.”

13 Ma Isaiah i riwa i pa, “Gulau David ana epaepaia, ona rautaniḡana kaua! Taumi ami orapotei rava orai o vivibadoi ma marina o ḡoei da kauana tagogina ona kauēi Bada awarina bo? 14 Lamna aubaina Bada ainelana mataira ina viatataiem: Matatapu ina duama ma tevera orotona ina ḡuni ma ina viwavaḡ Imanuel.” Wei anona God tauta maiteni.

9

Awarita tevera i tupua

1 Tau i vivinu'apoapoe, ai vinuapoapoe ina kwa. Rorova dobu Zebulun ma dobu Naphtali i kwalai* ma i viminalamalai, wate muriāi dobuna ina viboruma-kauēi. Galili, jentail ai dobu, au boga Mediteranean ina vikareḡi da maramataneḡ ina nae da waira Jordan au baba ḡelauna.

2 Tau i waguwaguvareina taubararai
 lalaina ḡaeḡaena i 'nanai;

* 9:1: I pupuna-naiei au Assyria i vipanipani

Tau'i gimtona taumaenina†
awarii lalalaina i lalai.

3 Tam ai dam u vimaḡai
ma ai nuaiai u viratai;
am viturana i vinuaiaiei;
me tuaruta au marana e vivinuaiai,
me sorodia e vivinuaiai,
maranai, ḡavia purapurai i tuarui, e ḡutaḡutai.

6 Aubaina, awarita tevera i tupua!
Tevera orotona i vereta!

Tauna ina vibada.

Tauna ina ḡorei:

Tauvinuaterena Aiaii telarana, God Vivirewapanana;

Amata Maemae Nonoana; Nuauba Badana.

7 Ana vigulau ma ana nuauba ina tua,
eḡa damona ita mamae.

Noina Gulau David ana au vigulau gabuna ina kiala,
ma nuavainei ma jijimaninei ina vibada kaua;
Ina mae-nonoa, marina da mara au damona.

BADA VIVIVIREWAPANA KAUKAUANA

ana nuavainei wei anatapuna ina kauai!

11

David ana epaia

1 Me ai tuḡutuḡu ita nabinabi

Mara e nenei maranai Jesse ana damei gulau ina nei.

2 Ma BADA Aruana tauna au tepana ina rauei da:

Nuaulaula ma aramana ḡaeḡaena ina verei,
ana oḡa tara aiaina ma tepa tora ina verei, da ana rava ina paina-kauai.
BADA ina aramane ma ina vivirei.

3 Bada votelatelana, lamna ana nuaiai ḡaeḡaena,
ma eḡa kaua tepana inanana bo viarautu awarinei, ina kovoḡimi;

4 Tauna molamolakai ina rauetarana-kauai,
ma vivinuapoapoe au dobu aubaii ina mairi.

Ma gamona bolabolana dobu ina kovoḡi,
ma ponanei ḡo'apoapoe ravai ina viragei.

5 Tauna kaua jijimanina ina vijiḡoratei
ma patutu ina vitairoroei.

6 Nanare auou moduei sipu natuna maiteni ina mae,
ma leopard gote ḡaubona au ririvana ina matave,

nanare cow ma lion natunatui ina laba-tagogi;
ma tevera ina viḡamoḡamo.

7 Bulumakau ma bear ina am tagogi,
natunatui ina matave tagogi,
ma lion ḡidagida ina ani me bulumakau.

8 Tevera daradarana mota ana au nibo ina vikalokalo
Ee! Ma tevera edaedana mota aiara ana au nibo, urana ina tereḡairei.

9 Au Zion, au ola vivivireina eḡa aiwai ina vikeroi bo ina viapoapoeni.
Aubaina BADA aramanana
dobu ina vioai, me waira boga e vivioai.

10 Nai maranaina gulau vouna, Jesse ana damei,
ina vomairi da ina vimataira dobu au ana tapuna.

Dam ḡaeḡaei anatapui ina deri ḡeta awarina, ana au animae boruborumana.

35

Etanai Vivivireina

† 9:2: Iraḡe paratana

- 1 Mutulua ma dobu poipoina ina vinuai, dobu dariġaġa ina vinuai ma ina talai!
- 2 Berana ina numoi,
ma ina vinuai ma ina logologoil
Inanana i vinualaulauna me Lebanon olai
ma ana maura me Carmel olana ma Sharon wapuna.
Kampa BADA ana boruma rava ina viatataiemi,
BADA ana vigulau ina inana.
- 3 Ura vogarigarii ona vovaiabagi,
ae tutu gwaġagwaġana ona vovaiabagi;
- 4 Rava rovorovoi ona riwei,
“Eġa ona rovo! Ona virewapana!
Ona inana! God ana mejina e nenei;
da ami ġavia ina vipupui.”
- 5 Ma mata potapotai ina inana
ma taniġa potapotai ina nonora
- 6 Gwaġagwaġai ina viauauepa me deer, ma gungum ana morelanai ina vigaragararei.
Waira au dobu dariġaġa ina wanaiwaġi,
ma vuvura ina raupaipairei.
- 7 Doa paipairana ina vitopa
vuvura ina raupaipairei
au dobu dariġaġa,
modu ma gonu ina gogo labalababa auou moduei ana au animae.
- 8 Ma kampa etanai ġaeġaena e ġoreġorei *Etanai vivivireina*, ina mae.
Etanaina lamna tauti God ana babara e nenaeni, tauti ava aubai,
Rava orai miramirai eġa ina babarani.
Bubuai weka eġa ina babara dadana.*
- 9 Eġa lion bo raviuru kampa ina babara.
Eġa ġamoġamo ġaiġaiawai kampa ina mae
BADA rava i vivilawania,
tauti ava kampa ina babara.
- 10 BADA aiavoi i gimara-melei wenanare ina nememei
ina welawelai ina rui au Zion
Nuai ai maemaena ina vikunuteiei,
nuai ai ma morelana ġaeġaena ina peu au tepai,
nuabola ma iniviara ina amoa.

40

God ana rava ina vinuaubai.

- 1 Ami God e ririwa, “Au rava, ona vinuaubail
Nuauba riwai ona riwei.”
- 2 Riwa egolanei mai Jerusalem ona riwei
ona riwei da ai vinuapoapoe marana i kwa,
ai ġo’apoapoe i nota-tawanei.
BADA ai ġo’apoapoe i vimaiei mara ruaġa.
- 3 *Rava e viġoreġore;
“BADA ana aninae au mutulua ona vokaukauei!
Etanai jijimanina ata God aubaina au mutulua ona kauei.
- 4 Gwagwa ona dobo-naiei,
ma ola anatapui ona ġara tawatawanei
doana anatapuna ona vimataveni,
ona ġara-laboġi.
- 5 BADA ana boruma ina vieġai,
ma rava anatapui ina inana.
Lamna BADA gamonei i riwai!”
- 9 Zion, tam pariverena aiaina e garagararei.

* 35:8: Bo avena da ai nota i aburu, tauti eġa ina kwako. ✧ 40:3: Mrk 1:3

Ma gāe ola gāe gāena au tepana
 ma ponam gāe gāenei,
 pariverena aiaina ma raugugulei
 ma ega ma rovo!
 Taon gāe gāei Judah au paratana ma parivere,
 “Ami God e nenei!”

¹⁰ Ona inana BADA God ana rewapanana
 e nenei da ina vibadeta.

Ona inanai! Maiana, lamna rava i vivilawania, maiteni e nenei.

¹¹ *Ana rava ina gamoi me sipu tau gāmoina,
 ana sipu natunatui au nuanuana ina raparapai.
 ma tatauvao ina ravena-kauei.

42

BADA ana taunola.

¹ *BADA i riwa,

“Wei au taunola, a vinei,
 a vovai virewapani ma a vinuaiaiei.

Aruau au orana a terei
 ma tauna lawana aiaina, ma kua jijimanii ina neiai dobu au anatapuna.

² Tauna ega ina garara
 bo ponana ina rata au deba.

³ Rava me gonu barabarana ega ina gai,
 bo rava me wiki tupona ega ina boi.

Wate lawana aiaina ma kua jijimanii ina neiai dobu anatapui awarii da ai lawana.

⁴ Ega orana ina peu bo ina vokokokara,
 lawana jijimanina ina terei au dobu;
 bonabona ravai aueia nanare, e vivipaipai.”

⁶ * “Tau BADA jijimaniu, a vinem ma ana vovai virewapanim da lawana aiaina ma neiai;
 ma ana raunimavoaim ma ana gagaloem.

Tamei, parivainua gāna bagibagina rava anatapui au dobu maiteni ana kauei,
 ma vilalalaina jentail awari.

⁷ Ma mata-potapotai matai ma vikalai;
 ma ravai au panipani numana;
 nai tau gimtona maemaei ma tereopunei.”

49

BADA ana taunola

³ BADA i riweu i pa,

“Israel tam au taunola ma tamei au boruma ana viegai.”

⁵ Au manawa ma BADA i vineu da ana taunola;
 da ana rava mai Israel kwakokwakoi ana neiana-meleiai awarina.

BADA i vimaegāe gāeniu;
 Tauna au rewapanana.

⁶ * I riweu “Au Taunola,
 Jacob ana dam ma voepana-melei ma
 mai Israel kwakokwakoi ma neiana-meleiai; lamna nola aburuna.

Wate nola gāe gāena a vereverem;
 lalalaina ma naiei jentail awarii
 ma lawana mamae-nonoana ma naiei da dobu au gia dewadewana ina gēta.”

¹⁴ Wate mai Jerusalem i riwa,
 “BADA i netawaneta! Tauta nuanuana i vuru”

¹⁵ Ma Bada i paribelei,
 “Moina! Tatauvao natuna melamelana au gūgūna, nuanuana ina vuru bo;
 bo natuna i gūni gūnia nuanuana ina vuru

Mepa da alo nuanuana ina vuru,
 wate tau, ega nuanuau ina vurul”
 16 Jerusalem ega melanai nuanuau ina vuru
 Ona inanai! Wavami, au ura lalalapau a rurui.

50

BADA ana taunola patupatutuna.
 4 BADA God i viararamaniu aiwai ana latoni,
 da gokokokarai ma peupeui ana vovairewapani.
 Ubaubana! patapatai e ravidagudaguii,
 ma taniġau a tonetonei da
 ana rautaniġanana ma ana viararamana kaua.
 5 BADA God aramana i vereu
 ma ega ata parigaiei bo ata mae-puputei.
 6 *Uporau a verei da i kwapu-kauei,
 ma a voterei da muturou i amui.
 Ega naou ata govaġi maranai i vinimalamalaiu
 ma naou i ovai.
 7 Wate BADA God au muriu e maimairi,
 lamna aubaina ega ita vitepaubaubaiu.
 A vokaukaua da ana nebelei,
 aramanei da ega ina vinimalamalaiu.
 8 God au rivirau, ma ina vitaubabani aubaiu.
 Tauna ina riwemi da tau ega aiwai ata kauana-boai.
 Aiai ina viwavuii?
 Tana nae tana etara
 Au ġavia mepa, taumi ona nei?
 9 Anina BADA tauoina e gagagaloeiu,
 Aiai ina riwei da tau a kauana-boai?
 Taii anatapui ina gumaġa me gara wadubona.
 Komaġana ina ambaubauni.

52

BADA ana vilawana e nenei
 7 I ai ġaġa, taupariverena a inana! olei e taġotaġonai.
 Riwa Aina e jimejimej:
 nuaba ma nuaiiai riwai
 ma BADA ana vilawana.
 Ma Zion i riwei, “Ami God e vivibada.”
 8 Ona rautaniġana! Ami tauvineneġana e vigaragararei;
 ana morelanai e logologoi;
 Taii mataiei BADA i 'nanai
 e nenememei au Zion.
 9 Jerusalem wanarikarikana,
 ana morelanami ona wela-gogona BADA awarina.
 Tauna ana rava i vinuubai,
 ma ana melagai Jerusalem, i vai-melei.
 10 Dobu anatapui au matai
 ana rewapana vivivireina e vivieġai.
 Rava anatapui au dobu
 BADA ana vilawana, ina inana!

Taunola ana vinuapoapoe ma ana boruma.
 13 BADA i riwa, “Au taunola ana nola ina kauana-kauei!
 Rava tauna ina voepai au tepa dewadewana.
 14 Au naona rava maġamaġai tauna i 'nanai
 ma i virovorovoanei.

I vunu-kauei ma i vitaratarai;
 da inanana eġa me rava.
 15 Wate marina dobu patarai ina raviġori
 ma gulagulau gamoi i pota tauna voepaepa aubaina.
 Eġa ita pariveri,
 marina mataiei ina inanai,
 ma aiwai eġa ita nonori, ina aramanei.”

53

1 “Aiai wei pariverenana ita vitumaġanei?
 BADA aiai awarii ana rewapana i viatataiei?”
 2 God au matana, i rata me ai-nabina,
 me aiwarama au kemara e gogogolana.
 Eġa ita tupua karawata bo vigulauna,
 eġa aiwaina vinualaulaunana da tata rauoġarei.
 3 Ta inana geduaiei ma ta inana-tawanei,
 iniviara ma vinuapoapoe malana i vaia,
 ta raugovaġei,
 ta mae-puputei ma ta riwa da tauna rava labalababa.
 4 Tauna, ata nuabola kovoġana i vaia
 ma ata iniviara i avarai.
 Wate ta notai da
 ana ġo'apoapoe aubaina, God i kovoġi.
 5 Ata kua apoapoe aubaina i vitonei,
 ata ġo'apoapoe aubaina i vikeroi.
 Kovoġanei, nuauba i vereta;
 kwapu keronei i vilawanita.
 6 Anataputa me sipu kwakokwakona,
 ana nuaita ma ata ġoanei ta mamae;
 wate ata ġo'apoapoe kovoġana, BADA tauna i viavarai.
 7 *Au taunola i rauiviapoapoelana-kauei,
 wate i volaġota;
 eġa aiwai ita latoni.
 I taravaina-naiei viragenana aubaina me sipu ġaubona.
 Me sipu ana genugenuanana e nena aparabori aubaina eġa aiwai ita latoni.
 8 I pani ma i naiei
 ma eġa aiai tauna ita vinuabolei,
 eġa ana epaepaia ma ina iraġe.
 Ana lawana au pouna i kwa labalababa.
 Ana rava oina ai ġo'apoapoe aubaina i'raġe.
 9 Tauna eġa morumoruna bo ġaiġaiawana.
 Wate tau i ġoei da danedanei maiteni ita doboi,
 ma purapura ravana ana au kokoaġa i vimataveni.
 10 Maranai ana lawana i puloei ata ġo'apoapoe aubaina.
 Lamna, BADA ana ġoana da tauna ita vunu-boai ma iniviara ġaeġaena ita vaia.
 Ma ana epaepaia ina maġa guratana
 ma ana lawana ina manawa.
 Ma taunei, BADA ana ġoana ina kauana-paiei.
 11 Ana nola anona ina inanai ma ina vinuaiaiei
 da ana nuabola eġa kwakwavina.
 Bada i riwa, “Au taunola patupatutuna a vinuaiaiei,
 rava maġamaġagai ai kovoġa i avarai
 ma lamnei tau ana ġorei Rava-Jijimani.
 12 *Ma lamna aubaina ana vimaġaeġaeni, tauna rava ġaeġaena.
 Ma ana au gabu ana terei
 rava ġaeġaei ma virewapanai maiteni
 ma ana maia ina ġutai.
 Aubaina ana nuaina ana lawana i verenei.

Tauna ora-potapotai maiteni i'raḡe,
ma ḡo'apoapoe ravai maḡamaḡaui aubai i mairi."

54

BADA ana nuavaina Zion aubaina.

⁴ Eḡa ona rovo aubaina eḡa ina vitepa-ubaubaimi.

Tepami ina tora, eḡa ina vinimalamalaimi.

Ami laraga kauai nunuami ina vuru.

Ami vikaiaibaba nuabolana ina amoa.

⁵ Aubaina, taukauem lamna awam,
wavana BADA Vivirewapana Kaukauana.

Israel ana God Vivivireina am taugimaramelana,

Tauna dobu anatapuna ai God.

⁶ Israel, tam me wavine tavine vouvou

ma awam i geduaiem ma u vinuabola kaua.

Wate BADA ina ḡore-melem awarina ma ina pa,

⁷ "A voterem mara aburuna,

wate raunuapoapoe ḡaeḡaenei ana vaimelem.

⁸ Au meji i rata kaua da a mae-puputem mara aburuna.

Wate au nuavaina mamae-nonoanei,
ana raunuapoapoelem."

BADA taugimaramelana i riwa me,

⁹ "Awariu, wei me Noah ana au mara,

maranai parivainuaḡana bagibagina a kauei

da eḡa melanai wairei dobu ana purui-melei.

Marina, nanare parivainuaḡana bagibaginei a ririwem

da eḡa melana amlou ina ḡaiḡai da ana kovoḡimi.

¹⁰ Ola ina vidagu

ma ina amoa.

Wate, au nuavaina mamae-nonoana,

ma au nuauba mamae-nonoana tam awarimi ina mae-nonoa."

BADA taurauu'apoapoelemi i riwa.

55

Nuarelanami ona nei

BADA i riwa i pa,

¹ "Ona nei, nuanuarelanami! Waira wei!

Awarimi mane eḡa ona nei ona gimara ma ona am!

Ona nei, wine ma mereki ona gimarai

maiana eḡa, ona vaioi.

² Aiwai aubaina lam apoapoei awari mane e tawatawanei.

Aiwai aubaina e nolanola labalababa.

Ona rautaniḡana kaua ma ona am-iaua,

ma lam aiiai dagidagii ona vinuiaiiei.

³ "Tanigami ona toneiai ma ona nei awariu

ona rautaniḡana da ona lawana.

Au parivainuaḡana mamae-nonoana ana kauei tam maiteni.

Ma viaiaina David a parivainuaḡani ana verem."

⁶ "BADA ona baiei da ona nelaḡai,

marina au ḡereḡeremi, ona vibaḡai.

⁷ Goa apoapoe ravai, ami lawana apoapoei ona geduaiem

ma nuanuami ona virai.

Ee! Ma ona wanavirai BADA awarina da ina raunu'apoapoelemi

ma ami ḡo'apoapoe ina notatawanei."

⁸ BADA i riwa, "Au nota eḡa me ami nota nanare,

ma au kaua tapuna, eġa ami kaua nanare.”

⁹ Mara i ġetelara eġa me dobu
ma nanare au kaua i ġetera eġa me ami kaua.
Ma nanare au nota i ġetelara eġa me ami nota nanare.

¹⁰ Garewa ma turuvani marei e peupeu
eġa kwakwavina ina naeme au mara,
wate dobu ina viutuvanei

da lam ina gogo,
da pei ina vereta, paewa aubaina
ma lam, aniam.

¹¹ Ma wenanare riwau gamouei e opuopu;
eġa kwakwavina ina nememei awariu
da aiwai a pariparitawanei ina kaeui;
au ġoana anatapuna ina vikwai.

56

Lawana rava anatapui aubaii

¹ BADA wei e ririwei:

“Aburuna ava, ana nei da ana vilawanimi
ma au viaiaina ana vieġai.

Lamna aubaina, kaua aiiai
ma jjiimanii ona kaukaui.”

⁶ “Mai jentail, aiiai da tau i vituraneu
ma i vitaunoleu, ma wavau

i vinuavaini ma i vimaēġaeġaeniu.

Au Sabate i vivirei,

ma au parivainuagana bagibagina e vovojijina-kauei.

⁷ *Tauri ana neiai au ola vivivireina - Zion
ma nuaiai ana verei au parinumana.

Ma ai pulo e apuapui awariu ana vianinei.
Anina ma rava, au tempol ina ġorei pari numana,
dam anatapui au dobu aubaii.”

58

Uji ririwa kauana.

BADA uji ririwa kauana e bababaniei:

⁷ “Am-irairaġei lam ona taraiġuei,
ma ami numa ona votawanei,
nelabalabai ma vinuapoapoe awarii.

Kovakovai gara ona vioteni,
ma taraoim eġa ona inana-tawanei.”

⁸ “Maranaina, au viaiaina ina ravilalaimi me maratmtom madeġana,
ma ami doria laġilaġina ana vilawani.

Au naomi ana nae da ami aninae ana vovajijimani,
ma murimiei, au boruma ina gagaloemi.

⁹ Nai maranaina ona viġore ma TAU BADA, ana paribelemi.
Agu ona gararei ma ana riwa, “Tau weka.”

“Eġa rava, vita ona verei, eġa ona viwawuwavu
ma eġa babani morumorui ona kaukaui.

¹⁰ Maranai am-irairaġei o viambagibagi,
ġokokokarai o vovoagui.

Lamnei, ami lalalaina gimtona ina lalai,
ina ravilalai me aubenai madeġana.”

61

*Riwana Aiaina molamolakai aubai**BADA ana taunola e ririwa:*¹“BADA God, aruana i vereu.

I vineu ma i paritawaneu da:

Riwana Aiaina ata naiei molamolakai awari

ma vinuanuabolai ana vinuabai.

Ma panipani ana parivereu da deriei ina viopuni.

²I paritawaneu da rava ata parivereu,

da mara i turiai maranai BADA ana rava ina vilawani

ma ana ġavia ina kovogġi.

Ma i paritawaneu da vinuabolai ana vinuabai.

³Da tau i mogumogu au ola Zion,

nuai ai ina vikunuteiei ma eġa ina vidolodolo.

Nuai ai logologona ma eġa tou.

Tau i ina vinuai ai ma eġa ina vinuabola.

Ai kaua jijimanina aubaina ina ġorei BADA ana labarava ai jijimanina
da tauna ina vimaegaeġaeni.”⁶“Ma taumi ina ġoremi BADA ana pirisi.

Ina ġoremi, God ana taunola.

Taumi dobu ġelau i ai maura ona ani

ma ona vigulagulaui.”

*BADA i riwa*⁸“Aubaina Tau, kaua ai ai i a ġoeġoei,

danene ma ġo’apoapoe a gedugeduaiei.

Au rava ai vinuapoapoe aubaina ana vimaiana-kauai;

au parivainuaġana bagibagina mamae-nonoana maiteni ana kauai.

⁹Dam anapui, am epaepaia ina aramanei

ma e inainana ġaei.”

Ma ina pa,

“BADA i viaiaina-kauai.”

*Zion i riwa*¹⁰BADA awarina a vivinuai ai kaua

ma Aruau God awarina i vinuai ai kaua.

Aubaina vilawana garanei i vigarai u

Ma jijimana viane i ma garanei i viotenu.

Me tavitavinevou orotona e vingarai nanare bo

me wavine tavitavinevou ana viana e tavitavine.

¹¹Me doa, pei e vivigogoi ma debagau lam e verevereta,

nanare BADA God, rava e teretere-vaijijimani

au dobu da tauna ina voepaepae.

64

*Pari agu aubaina*⁴Oo Bada wariġa da marina, eġa ai ai god ġelau ponana ita nonori, ita inanai, bo ita aramana
dadanei.

Anina Tam ainelam.

Tau i da e vivipaipaiem e vovoagui.

⁵Tam kaua ai ai ravai e vovoagui,

am tarawatu e vovojijini.

Wate maranai ta ġo’apoapoe ġiriġiri

tam amlom e voġaiġai.

Aiwai aubaina ma vilawaniai?

⁶Anatapuiai a ġo’apoapoe,

Au matam, ai kaua jijimani anapui miramirai me gara wadubona.

Anataputa ta poipoi me ai-rugurugu,

Ata ġo’apoapoe e kapupuana-naieta.

⁷Ma eġa ai ai wavam ita voepaepai

bo ita voguratei da naom ita inanai.
Lamna aubaina tam u netawanelai
da ai ġo'apoapoei e vunuvunuiiai.

- ⁸ Wate BADA, tam amaiai.
Tauai dogodogo ma tam nau tauvoaina.
Tam anapuiiai uramei u rauġaroġaroelai.
- ⁹ Lamna aubaina, eġa ma meji guratana awariai.
Ma eġa ai ġo'apoapoe ma nota-nonoei.
Ma i 'nanaiai, anapuiiai tam natunatum.

Peroveta Jeremiah ana buka

Pariverena

Jeremiah lamna peroveta wavana naenaena au Jerusalem, ma BADA riwana i raugugulei ana rava awari. Tauna riwa bagibaginei ana rava i ririwei menanare God tau i kovoḡanei, aubaina Tauna i mae-puputei ma god ḡelau i votaḡotaḡoi.

Bada Jeremiah i ḡorei

⁴ BADA i riweu i pa:

⁵ “A vinem, muriai da alom au manawana a teretagogiem.

Muriai da uta tupua, A tereriem,
rava anatapui ai peroveta.”

⁶ A paribelei, “Oo BADA God, tau tevera ota, ma babani eḡa ata aramanei.”

⁷ BADA i riweu, “Eḡa ma riwa, ‘Tau tevera ota.’ Ma nae mepa a pariparitawanem, ma aiwai a ririwem tau i ma parivere. ⁸ Eḡa ma rovoei aubaina Tau a paritawanem. Tau tam maiteni ana mae da ana gagaloem. Tau BADA a babani.”

⁹ Anina ma BADA urana i viloloi da ipiriu i tapedadani ma i riweu,
“Marina riwau au gamom a terei.

¹⁰ Ma aramana-kauei da marina rewapana a vereverem,
da dobu anatapui ai gulagulau ai kovoḡa ma vinolenolei wenanare,
Gelau ma orumi, ma viairikarikai,
ma vovaiubai ma vipupui.
Gelau ma voepai ma ma paewi.”

¹⁷ “Ma vokaukua Jeremiah! Ma vomairi ma aiwai anatapuna a riwem ravai ma parivere. Eḡa ravai ma rovoei, bo au matai, ana virovoim.

¹⁸ Amadodo a vovaiwewapanim me melagai vivirewapanana, tuatuaana ma garina iramei voavoana. Tam ma mairi ma eḡa maiJudah ma ai gulagulau, ai gabemani ravai, ai piri si ma dobuna ravai ina tereḡairem.

¹⁹ Tau i ina viḡaviem wate ina kauana-avei.

Aubaina tau tam maiteni, ma ana gagaloem. Tau BADA a babani!”

6

Bada i riwa,

¹³ “Rava anatapui, ḡaeḡaei da muomuoi,
e ḡoeḡoei da moruei mane ina kauei;
peroveta da piri si anatapui nanare
rava e morumorui.

¹⁴ Tau i, au rava keroi ḡaeḡaei
e bunabunamai apamina me kero aburuna.

E ririwa da aiwai anatapuna anina,
Wate eḡa anina!”

17

BADA ona-vitumaḡanei

⁵ BADA e ririwa,

“Aiavoi da ai vitumaḡana rava ota awarii e tereterei,
ma ai rewapana e vitumatumaḡaneiei;
ma e gedugeduaieu,
ana parivaiapoopeni.

⁶ Tau i me, ai podapodai au dobu dariḡaḡa
eḡa aiwai aiaina ita inainanai.

Tau i dobu au paipairana ina mae, ai ma modu eḡa,

me au dobu au vivibogana ita mamae kampa eġa rava ita mamae.”

7 “Wate aiavoi awariu e vivipatutu ma e vivitumaġana da

BADA ai tepamairi, tauġ ana viaiaini.

8 *Tauġ me ai, vuvura au adana i paewi,
ma warami i ġaira waira au orana.

Eġa marapoi ina rovoei,
ma rugurugui majimajigai ina maimairi.

Ma marapoi ana au mara,
eġa ua ita vovoterei.”

9 “Rava nuapoui lamna morumoru kauana, i apoapoe kaua,
aiġi i aramana-kauei, da ina vilawani.

10 Tau BADA rava nuapouii
a tuvirevirei ma kaua govagovaġai au orai a inana-pai.

Rava anatapui ai kaua ana inanai.
ma ai kaua awarinei ana puloi.”

20

Jeremiah ana beura

BADA i riwa,

5 Tau, Jerusalem ma ai mane ma ai maura ma aiwai anatapui polapolai i toitoiei ana veredamaneġi ai ġavia awarii. Ina nei ma Judah, ai gulagulau ai purapura maiġi ġaegaeġi maiteni ina pupuna-naieġi au Babilon.

Jeremiah i riwa,

7 Oo BADA! u gwala-kaueu da a viperoveta
ma a voterem da u kauei.

Tam u virewapana guratana da
u tereġaireiu.

Marina tau rava ai anivinama.
Rava anatapui e vivinameu, marai ma waguvarai.

8 Maranai a paripariverena,
Riwa ana nuaiġi e rubaruba-opu.

“Viġaiġaiawa! Pupu e nenei!”
BADA ana pariverena aubaina, vinama ava a nenelaġai.

9 Mepa da ana geduai ma wavana eġa ana latoni bo wavaneġi ana jima
Lamna maranaina riwam lamna me ai araratana,

orau e ararai.
Amapo eġa ana vojijina-gurateġi. Amapo eġa!

10 A nonori patara e viviarautueu.
Au ġavia i maġa kaua,

ma e vineneġaneu da ana neboa,
ma ina viwavuii ina pa,
“mepa da i jima boa, ina waro-melei ma tauta ata biwa tana vaia.”

11 Wate BADA tau maiteni
me tauviġavia virewapana kaukauana.
Lamna aubaina au ġavia eġa ina tereġaireu.

Tauġi ina vun-aveu ma ina vinimala kaua.
Ina vinimalana-nonoeġi ma eġa nuanuai ina vuru.

12 “Oo BADA Virewapanam! Tam rava jijimanii e raraudadani,
ma ai nota ma orai e araramaneġi.

Au vita au uram a terei
ma ana inanaim, au ġavia ma kovoġi.

13 Ona wela BADA awarina.

Ona voepaepai.

Maranai Rava virewapanai, gwaġgwaġai e rarau-iviapoapoeġi,
lamna BADA ana rewapanai tauġi ina gagaloeġi.”

23

BADA Gulau vouna ina vinei mamae-terenai aubaii

¹ BADA e ririwa, “Au rava ai babada nuabola gaeḡaena ina nelaḡai! Tau i sipu taupaini apoapoei. I vipaipai-boa da sipu i vidabararai.”

² Lamna aubaina BADA, Israel ana God, wenanare Israel babadai awari e ririwa, “Taumi ami kauelai au sipu o vidabararai ma o vilamolamonei. Eḡa ota vipaipai kaua. Lamna kauai apoapoei aubaina ana kovoḡimi. ³ Anina ma Tau au sipu ḡelau i virubai au dobuḡela, ana neiana-meleiai ai au gari. Wei mamae-terenai ina vinatuna ma ina maḡa guratana. ⁴ Taupainii rava kaua ana tere-naiei da ina viḡamoḡamo kaua ma eḡa ina rovo me bo orai ina sisi. Eḡa tagogi ina kwako. Tau BADA a riwa.”

⁵ *BADA e ririwa

“Mara vouna e nenei maranai gulau ana terei David ana damei.

Wei gulauna ina vibada kaua ma kaua aiainei ma jijimaninei dobu anatapuna ina vibadei.

Nota aiainei Judah ravai ina rauetaraveni ma

Israel ravai au nuauba ina mae.

⁶ Wei maranaina mai Judah, ina vilawani

ma Israel ana nuaubai ina mae.

Ma wavana ina ḡorei, BADA Tauterevaujijimanita.”

31

BADA Israel ina vaimelai.

⁷ BADA i riwa:

“Ana nuaiaimi ona wela Jacob ana dam aubaina ponami ona voepai dam viḡulauna aubaii.

Ona voepaepa, ona jima ma ona riwa,

‘God, an rava mai Israel mamae-terenai ma vilawani!’

⁸ Au kariwabuei au rava ana neiana-meleiai,

dobu au giana da au giana anatapui.

Maiteni mata-potapotai ma sigesigei,

duadumai ma tautauvaoui.

Dam patara gaeḡaena ina nememei.

⁹ Ana rupenai ma ana toutoui agu aubaina, ana neiana-meleiai

Waira adanei ana taravainiai,

etanai abuabunei da eḡa ina peu.

Tau Israel amana,

Ephraim au natuevou.”

Parivainuaḡana bagibagina vouna.

³¹ *BADA e ririwa i pa, “Mara e nenei maranai parivainuaḡana bagibagina vouna ana kauai mai Israel ma Judah maiteni. ³² Wei lamna eḡa me noinoi maiteni a kauai nanare; maranai a raunimavoai ma Egypte i taravaina-opunei. Aubaina au parivainuaḡana i viaigai avena da nuanuai a vaia me oroto awana nuanuana e vaivaia. ³³ Wei parivainuaḡanana mai Israel maiteni ana kauai nai marana au murina.” BADA e ririwa, “Au tarawatu ai au nota ana terei ma au nuanuai ana girumi. Wei ina terekauei da Tau ai God ma tau i au rava. ³⁴ Ma eḡa ai rava ina viararamana-melei bo riwa vivira, ‘BADA ona aramane!’ Aubaina au aburuna da au magurina anatapui ina aramaneu. Tau ai ḡo’apoapoe ana nota-tawanei ma eḡa ana nota-melei.” BADA e ririwa.

33

Nuauba parivai-nuaḡanana

¹⁴ *BADA i riwa, “Mara e nenei maranai au parivainuaḡana bagibagina mai Israel ma mai Judah maiteni a kaukaueia anona ina tupua.

- ¹⁵ Nai maranaina,
 rava kava David ana damei ina nei;
 Ma Tauna kava aiaii ma jijimaniina ina kauei au dobu.
- ¹⁶ Nai au marana
 Judah ina vilawani ma
Jerusalem ana nuubana ina mae.
 Wei melagaina ina ġorei, *BADA Tauterevaijijimanita.*”

38

Jeremiah waira dogona au orana.

⁴ Babadai, gulau Zedekiah i riwei, “Wei ravanana Jeremiah tana viragēni. Ana babaniei, sorodia ruaġgauta lawalawai ma rava ġelau i viviorabadoi. Tauna eġa rava ita vovoagui wate e viviorabadoi.”

⁵ Gulau i paribelei, “Tauna au urami, ami ġoana nanare ona kauei. Tau eġa ana viġaemi.”

⁶ Ma Jeremiah i vaia ma i tere-ġairei gulau natuna Malkijah, ana au dogo, wei lamna gulau ana sorodia ai au potuma au ririvana. Ma ġuravei Jeremiah i tere-ġairei au * dogo. Au orana dogodogo ava, ma Jeremiah i monu ġaira da i mairi dogodogo orana.

* **38:6:** Wei lamna wapaketa dogona, viutuvana aubaina.

Lamentation Mogu Jerusalem aubaina

Pariverena

Wei bukana e ririweta da au 586 B. C mai Israel i vinuapoapoe kaua maranai ai ġavia i nei da Jerusalem i pupuni ma rava ma purapura aiaii i vaia da i naiei. Tauta eġa tata aramana-kauai aiaii wei bukana i girumi wate rava ġelau i notanotai da augunai Jeremiah wei bukana i girumi.

Jerusalem ana nuabola

¹ Kapore! Zion wariġa am patara i rata ġaġa, marina u kwakwava.

Dam patarai ai voepaepa, marina i vikaibaba.

Wariġa dobuġela gulagulau i voepaepa. Tauna i 'nana ġaei.
Marina i vitaunola.

² E toutou maratou,

jirigwegwena au navanavana e toitoi.

Ana nuavainana maġamaġau i ruba-tomana, eġa aiaii da ina vinuabai.

Ana rava* anatapui i mae-puputei ma i viġaviei.

³ Judah i pani ma i pupuna-naiei.

Au dobu ġela i vivipanipani,

e rarau-iviapoapoelei,
i vitaomana au dobuġela.

Ġavia i mae-kwaviviroi,
menanare ina onaganei?

⁴ Zion etanaina e mogumogu

eġa aiaii kampa ita nenaie torela aubaina.

Ana anirui i kwakwava,
Pirisi e gunugunura,
ana guguini e vivitouana;
Nuapouna i wanagwadgwadai.

⁵ Ana ġavia i vibada,

au urai e mamae.

BADA nuabola ġaġaena i neiai Zion awarina
aubaina ai ġo'apoapoe i rata.

Natunatui i paninaieie aueia, ai ġavia au mataii.

⁶ Kapore wariġa Zion na!

Wavana naenaena, vidualaulaunana marina mepa?

Marina, Zion ana babada lamna me

deer, nuanuai i arelei ma i raumolaġau ma lam i baiana-avei.

Inina i garigari

ma eġa tagotagogina da ai ġavia ina rubatawanei.

⁷ Zion i kwakwava, ravana eġa.

Ana maura, wadubona e vinuanotenotei.

Maranai ana rava i peu ai ġavia au urai, eġa aiaii ita nei da ita rauagui.

Ana ġavia Zion ana peu i 'nanai ma i vinamei.

3

¹⁹ BADA, A tenam nae, eġa matave kaua, iniviara maiteni,

a vinuapoapoe kaua, notana i viġora kaua.

²⁰ A notanota-maelei

ma au orau a toutou.

* **1:2:** Ana eririam lamna wapu god Baal ma Aserah ma mai Judah maġamaġau wei god i voepaepai. Ana rava lamna tauviġavia mai Egypt ma nanare maiteni i viturana ma maranai ġavia i ġetai taui i viruberubei.

21 Wate BADA a vinua-notenotei ma orau e vovovairewapani. Lamnei a vitumaḡana:

22 da BADA ana nuavaina mamae-nonoana.

Ma ana raunuapopoe eḡa ina kwa.

23 Ubaubanoi, e raviravivouni;

am vipatutu i rata kaua.

24 A ririwana-meleu, BADA au buderi lamna a vivitumaḡanem.

25 Tau daBADA e vivitumaḡanei ma e baibaiei, ina viaiaini.

26 I ai da tana volaḡota ma BADA tana paini da ina vilawanita.

27 I aii da vilamolamona ma nola ma aramanei. Am au vilaraga,

28 maranai BADA e viviaramanita,

ma mae genuatau.

29 Tana mae-ḡaira au debidebi,

mepa da agu ina nei.

30 Navanavami ona verei da ina ravi, ma ina vijiboḡimi.

Wate eḡa ona vobelei aubaina.

31 Bada eḡa ina geduaiana-nonoeta.

32 Avena da maraḡela nuabola e neineiiai, wate ana raunua apopoe i rata kaua.

Aubaina ana nuavaina i rata kaua, eḡa damona.

33 Wate wei kauai eḡa ita vinuaiaiei.

Peroveta Ezekiel ana buka

Pariverena

Ezekiel mai Jew au Babilon i vipanipani awari i babani. Tauna mara nonoa vivirarautua vinualaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu au gia dewadewana anatapui ina neiana-meleiana da ai au dobu oina ina terei.

2

God Ezekiel i vinei ana peroveta

¹ Bada ana boruma a inanai ma au doa a peu. Ma a nonori pona i riweu, i pa, “Rava ota natuna, ma vomairi ma awarim ana babani.” ² I bababani ma God aruana au orau i rui ma i voepaiu ma a nonori awariu i bababani. ³ I riwa, “Rava ota natuna, a pariparitawanem dam paripariviravirai mai Israel awarii. Amamai maiteni ega ita voteleteleu ma awariu i pariviravira da marina. ⁴ Rava paripariviravirai ma orai badobadoi ma ega ita vivivireu. A pariparitawanem da ma riwei, ‘Wei Bada riwana.’ ⁵ Tau paripariviravirai ma ina rautaniġanem bo ega lamna avena, wate ina aramanei da peroveta i ġetai awarii.”

17

God Israel ina ravivouni

²² Bada God wenanare i riwa, “Tau ai cedar manamanaina nuanuana ana vogai da ana paewi. Raġana au tepadewadewana nabina ana gai da ola manamanaina au tepana ana paewi. ²³ Israel ola au tepai ana paewi, ina raġai ma ina raunumo, ai gulauna. Kiu tapuna ma tapuna au raġai ina raunoġi ma au ġoui ina viġou. ²⁴ Ai anatapui nai au dobuna ina aramanei da tau BADA, ai manamanai ana taragai ma ai tupotupoi ana voepai. Ma ai majimajiġana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kauei.”

33

God Ezekiel i vinei da tauvineneġana.

BADA i riwa:

⁷ “Rava ota natuna, Tau a vinem tauvineneġana dam Israel aubai; riwa a vereverem ma nonori ma babani bagibaginei ma riwei. ⁸ Maranai ġo’apoapoe ravana a ririwei, ‘Tam, ġo’apoapoe ravana, amapo ma i’raġe.’ Ma ravana ega uta pariverei da ana ġo’apoapoe ita voterei, ma ina iraġe. Marina ana iraġe au uram a tereterei. ⁹ Wate mepa da ġo’apoapoe ravana u riwei da ana lawana ita virai ma ega ana lawana ita virai, ana ġoa apoe ina iraġelei, ma tam am lawana ina mae.”

34

BADA tauvipaipai aiaina

¹¹ Bada God wenanare e ririwa, “Tau ainelau au sipu ana baiei ma ana ġamoi. ¹² Sipu taupainina, ana sipu kwakokwakoi e baibaiei da e nenemeleiai. Nanare tau, au sipu e kwakokwako-nae. Ana nelaġai ma ana neiana-meleiai, maranaina dobu i waguvarei ma i gimtonei.*

¹⁵ –Tau ainelau au sipu ana ġamoi ma ana terei da ina matave kua, Tau BADA God a babani. ¹⁶ Tau kwakokwakoi ma nelabalababai ana baiei, ma ana neiana-meleiai. Ma keroi ana bunamai ma ġokokokarai ana vovavirewapani. Wate dododoi ma virewapanai ana pupuni. Jijimaninei au sipu ana ġamoi.

¹⁷ –Taumi au sipu Tau BADA God a ririwana-kauemi da taumi tagotagogi ava ana ruetaremi. Aiaii ma apoapoei ana vilamonei, sipu ma gote ana vilamonei.”

* **34:12:** Wei lamna awanaina maranai mai Babilon Israel ina pupuna-naiei au 587 B.C.

36

BADA ana rava ina ravivouni

¹⁶ BADA i riweu, i pa, ¹⁷ “Rava ota natuna, maranai Israel ai au dobu i mamae, tau i kava apoapoeni ai dobu i vimirai. Tau au matau lamna i vimira-melei me wavine ana nawaravi e vaivaia. ¹⁸ Marina, au meji ana iwağa-tawanei awarii aubaina tau i tara i vitoini au dobu, ma nanare kokoitauēi dobu i viapoapoeni. ¹⁹ A vidabararai ma a vilamolamonei au dobugela, ai ęo’apoapoei ma ai kava awariei a kovoęi. ²⁰ Wate metauna au dobuna i rui tau i wawau vivivireina i vijiboęi, aubaina nai dobuna ravai e ririwa, ‘Wei lamna BADA ana rava wate ana dobu i opu-tawanei.’ ²¹ A ęoei da au rava au wava vivivireina ita vimaęęaęaeni, wate noi rava mai Israel dobu anapui i naeni ma i vitepaubaubai.

²² –Lamna aubaina, marina dam Israel ma parivere, Bada God wei i riwei, ‘Tau a neineiana-meleiaimi, eęa tam am kava aiaina aubaina. Tau a kaukauei wawau vivivireina aubaina, taumi wawau o viapoapoeni-naiei jentail ai au dobu. ²³ Ana viatataiemēi da wawau, ęetelarana ma vivivireina. Wawau taumi dobu au anapuna o vitepaubaubai. Taumie i dobu ana viatataiemēi da tau vivivireu ²⁴ aubaina dobudobuai ana taravainimi ma ana neiana-meleiaimi ami au dobu.’

²⁵ –Wairei ana vitoaimi da ona aii, ami mira ma kokoitau viborumai mirana ina oęa-tawanei. ²⁶ Ma nuanuami vouna, ma aruami vouna ana veremi. Nuanuami badobadoi ana votawanei ma aiaina ana terei. ²⁷ Ma Aruau au oram ana terei da au tarawatu ma au viararamana ona votaęęotaęoi.”

37

BADA gelama ina ravivouni

¹ BADA i raunimavoaiu ma aruanei i naieu da gwagwa ęaęaena au pouna i tereu, rava gelamii gwagwanana i oai. ² Gwagwanana a naeni ma a inana da gelama i maęa guratana ma i poi. ³ I paridadaneu, “Rava ota natuna, amapo wei gelamii ina virava me bo eęa?” A paribelei, “Oo! Bada God, tam ainelam u aramanei.”

⁴ Ma i riweu, “Riwauei gelama ma riwei, ‘Gelama poi, BADA riwana ona nonori.’ ⁵ Bada God wenanare gelama i riwei, “Lavutu au orami ana terei ma ona lawana me! ⁶ Vioa ma warowaro ana veremi, ma opi da gelama ina purui. Ma lavutu ana veremi da ma lawana. Kampa ma aramanei da Tau BADA.” ⁷ I ririweu nanare a babani, a vikarei da a bababani ma dobuna ura ketarana i nae da dobuna i oai, gelama anapui i vitagoei. ⁸ A inainana ma warowaro ma vioa gelama au tepana i ampasi ma au tepai opi i tupua da i purui, wate awari eęa lavutu.

⁹ Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meiei e uvevena, au orami lavutu ina opui ma taubeu patarai e matamatave ona uveni da ina lawana me.” ¹⁰ Ma i ririweu nanare a babani, ma lavutu ravai tupuai i ruini. Anapui i lawana ma i mairi sorodia boruna ęaęaena.

¹¹ I riwa me, “Rava ota natuna, mai Israel lamna me wei gelamii. Tau i ririwa i pa, ‘Tauta gelama poi ava ma ata tumaęana i kwa, ata dam i kwa.’ ¹² Lamna aubaina ma riwana-melei, Bada God wenanare e ririwa, ‘Ona inana! Ami kokoaga ana votawanei ma ana voepaemi ma ana neiana-meleiaimi au Israel.’ ¹³ Au rava! Maranai wei i tupua, ona aramanei da Tau BADA. ¹⁴ Ma Aruau au orami ana terei ma ona lawana ma ana neiana-meleiaimi ami au dobu oina. Maranaina, ona aramanei da Tau BADA. Ee! A ririweia; ana kauēi.”

Peroveta Daniel ana buka

Pariverena

Daniel tauna laraga maranaina i naiei au Babilon da i vipanipani. Ma maranai i vomagura tauna i terei da gabemani ai bada gaegeaena. Tauna ana au lawana i vipatutu ma God i votetelei.

Ana vipatutu awarinei God nuaulaula i verei, ma tauna tagotagogina da rava ai rauboni anona ina viegai ma kaua aiwai amapo ina tupua e viviegai.

7

Daniel ana rauboni

¹³ *Waguvarai inana a inanai, ma kaua aiwai a inanai me Rava Natuna apau oraninei i nenei, ma i taravaina-naiei MAEMAE NONOANA awarina. ¹⁴ MAEMAE NONOANA vibadana ma rewapana ma vimaegaegeaena, tauna i verei da ina vibada, da dam anatapui ma dobu anatapui ai ponei ina voepaepai ma ina voteletelei. Ma ana rewapana ina mae-nonoa, ma ana vigulau vibadana ega ina kwa.

12

Mara au damona

¹ *Ma nai maranaina anela vivirewapanana Michael, Israel ana taugagalo, ina ega. Amapo nuabola gaegeae otana ina nei, ega melana nanare tata inainanai, au karena da marina. Wate wei au marana rava aiavoi da wavai au buka i girugirumia ina lawana. ² Magamaagai irairagei ina vomairi me, ma ina nae, gelau i lawana maemae nonana ma gelau vinimala maemae-nonoana. ³ Rava nuaulaulau i lalai me mara madeana. Ma tui magamaagai e raveraveni da lawana jijimani e maemaeni, ina lalai me ubona.

Peroveta Hosea ana buka

Pariverena

Hosea God ana peroveta, tauna mai Israel awari God riwana i jimei. God i riwa da tau i kovoḡi ma ai dam ina pupuni aubaina tau i tauna i geduaiei ma god morumorui i voepaepai ma ai kava apoapoe i vogaḡotaḡoi.

Hosea awana tauna i voterei ma nelara ḡelau i maiteni i nena. Wate tauna awana nuanuana i vaini ma i baiei ma i taravaina-meleiai ana au numa. Wei bukana e viviatataieta da nanare tagogina avena da mai Israel ai God i geduaiei tauna anina da tau i nuanuai i vaia ma i parivainuaḡana da tau i neiana-meleiai awarina.

11

God, Israel nuanuana i vaia

¹ Bada Hosea i riwei, i pa, “Maranai Israel ana au vitevera, a vinuavainei ma Egyptei a ḡore-opunei.

² Wate a viḡoreḡore
ma tauna amapo da i nenetawaneu.

Tauna ana pulo i apuapui Baal awarina,
ma daji ḡabuḡabui, i apuapui kokoitau ḡelau awarii.”

Peroveta Amos ana buka

Pariverena

Amos taon au aburuna i mae Bethlehem au ririvana, au Judah maranai God tauna i kwatuei ana peroveta. Tauna God riwana mai Israel i riwei da God, ai kua apoapoei aubaii ina kovogi. Wei ravai God ega ita vimaegaegeaeni ma ega ita ririwa kua, i morumoru ma molamolakai awarii kua apoapoei i kaukauei.

Ma maiteni Amos God ana parivainuašana tau i verei da amapo tauna Israel ana gabemani ina ravivouni, Jerusalem ina voa-melei ma gulau David ana tupua rerega ravai dobuna ina vibadana-melei ma ana nuubai ina mae.

8

Tou gaegeaena e nenei

⁴ Ona rautanišana! Taumi voladašai o kwalekwalei
ma molamolakai o tugwadagwada.

⁵ O ririwa, nawaravi vouna torelana ina kwa lašilašina
ma Sabate ina kwa.

Ma witi tana gimarei,

witi ruva aburuna tana terei ma maiana tana gaišai
ma sikere morumorunei tana gimagimarei.

⁶ Witi lošilošii o tami da witi o tavipotoi ma o gimarei
ma lamnei, molamolakai o gimarai ami taunola.
Tau maiai me busi, maiana aburuna.

⁷ BADA parivainuašana-bagibagina, ana wava i kauai,
nai wavana mai Israel e vimaegaegeae,
I pa, “Ami go’apoapoei ega melanai nuuanuau ina vuru.”

Peroveta Jonah ana buka

Pariverena

God ana peroveta Jonah i kwatuei da au Niniveh ita raugugula. Wate tauna eġa ita ġoei da ana dobu ravai ai ġavia wariagana awarii ita raugugula.

God i rauġaiġaiei ma iana tauna i lawani. Au murina, i nae au Niniveh ma i nelaġai da mai Israel ai ġavia, God riwana i votetelei.

Jonah BADA i rauġaiġaiei

¹ Mara tagogi BADA, Amitai natuna Jonah i riwei, ² “Ma vomairi ma nae au taon ġaeġaena Niniveh. Ma riwei, da ai ġo’apoapoei a inana i rata kua ma lamna aubaina ana kovogi.”

³ Wate Jonah, BADA i voterei ma etana i ġelauna i vaia ma ina ruba ġaira au Joppa. Ma kampa waga i nanae au Tarshish i nelaġai. I vimaia ma i geru da ita nae. I notai da BADA ita ruba govagei.

⁴ Wate BADA kojikojira ġaeġaena i paritawane i waga ita viairikarikai. ⁵ Waga ravai ai lawana aubaina i rovo-kaukua ma ai god awarii i tou agu aubaina, ma purapura au boga i viorereni da waga ita telatela. Wate Jonah waga au orana i raunuavuru.

⁶ Kapena i ġaira awarina ma i eni i pa, “Mara i apoapoe ġaġa ma e matamatave! Ma vomairi, ma tou am god awarina da ina voaguita. Mepa da ina raunu’apoapoeleta da eġa tana irage.”

⁷ Waga ravai i babani vivira i pa, “Ġaima tana vikalokalo i tana aramane ai ai ana wavu.” Kalona i kauei ma wavuna Jonah awarina i peu ⁸ Ma tau Jonah i paridadane, “Aiwai aubaina kojikojira awarita i peu? Tam ai ai? Tam am nola aiwai, tam meiei?”

⁹ Jonah tau i paribelei i pa, “Tau Hebrowei ma tau BADA, Mara ana God a voepaepai, Tauna boga ma doa i kauei.”

¹⁰ Waga ravai i rovo kaukua ma i vigaragarare, “Aiwai aubaina lamna u kauei!” Jonah boibogi i vieġa da tauna BADA i rovoei da i rubaruba. ¹¹ Mara i apoapoe kaua ma tau Jonah i vitaravirevirei, “Aiwai tana kauei da kojikojira ina kwa?”

¹² Jonah i riwa, “Ona tawaneu au boga ma ive ina raumairiei. Aramane da tau au kaelel wei ivena i vomairi.”

¹³ Wate waga ravai i lare-guratana da waga ita ġairei au gera, wate eġa tagotagogina, kojikojira i voguratei. ¹⁴ Anina ma tau anatapi i tou Jonah ana God awarina i pa, “Oo BADA! eġa ma voterelai da wei ravana ana ġo’apoe aubaina, ana i’rage, ma eġa tarana wavuna ana avarai!”

¹⁵ Ma Jonah i vojijini ma i tawana-opune i waga ma maratagogi kojikojira i wanatuini ma daumora i matave. ¹⁶ Ma ravai i rovoana-kauei da pulo i apui BADA awarina ma i parivainuaġani da tauna ina vivirei.

¹⁷ Wate BADA iana ġaeġaena i paritawane i lawani. Ma Jonah iana au manawana i mae aupom ma waguvara tonuġa.

2

Jonah ana pari

¹ Jonah iana au manawana ma i raupari BADA, ana God awarina. ² I pa,

“Au nuabola au orana a tou BADA awarina,
ma i paribeleu.

Iriraġei, ai au dobu
ma agu a gararei

ma au tou u nonori.

³ Au gabinou u tawana ġaireu,
boga au gabaura dewadewana.

Boga i kwaviviroiu.

Rabamam ġaeġaei i viaimonumonui.

⁴ Oo BADA! A notai da tau u tereopuneu,
ma a notai da eġa melana i am tempol vivireina ana inana-meiei.”

⁵ “Boga i puruii

- lavutui i tupo
 ma aragoma kolau i pani.
- ⁶ A monu ġaira ola au kare dewadewana,
 a vipanipani nai au dobuna,
 dobuna metaetana guduguduna maemaena.
 Wate tam BADA au God, u vilawaniu.
 Lawalawaiu gabinouei u sinaepaiu,
- ⁷ Malana a vaia au lawana i opuopu,
 ma BADA a raupari awarim,
 am au tempol, ma u nonoriu.
- ⁸ Tau i kokoitau labalababa e viviborumei,
 am nuavaina mamae-nonoana i geduaiei.
- ⁹ Wate tau ana welem, ana voepaepaim
 ma au pulo ana apui awarim.
 Au parivainuaga awarim ana kau ei
 lawana maemaenoana BADEI e nenei.”
- ¹⁰ Ma BADA iana i egari da Jonah i medana-tawanei au gera.

3

Jonah i nae au Niniveh

- ¹ Ma BADA i babani me Jonah awarina, ² I pa, “Ma nae taon ġaeġaena vinualaulaunana Niniveh ma au riwa a vereverem ma pariveri.”
- ³ Jonah, BADA riwana i voteletelei ma i nae au Niniveh. Niniveh lamna taon ġaeġae otana ma aupom tonuġa i vaia da i verautuini. ⁴ Jonah i vikarei nai au taona ma aupom tagogi i babara ma i jima i pa, “Aupom 40 ina kwa ma Niniveh ina pupu.” ⁵ Mai Niniveh BADA riwana i vitumaġanei ma i vioga da anatapai magurina da aburuoina i vianina tagogi da ina uji ma uji garana i oteni da ina vimataira.
- ⁶ Maranai Niniveh ana gulau wei riwana i nonori, tauna ana anikiala i opu-tawanei ma ana gulau garana i ġiġi. Uji garana i oteni ma au lapukare i kiala. ⁷ Ma mai Niniveh awarii wei vinolanolana bagibagina i paritawanei tauna au wavanei. Wenanare i riwa:
- Eġa rava bo bulumakau bo sipu, aiwai ina ani bo ina umai. ⁸ Ma ġamogamo ma rava uji garana ina oteni ma ina raupari guratana BADA awarina. Ma kaua apoapoe ma ġoaġai ina geduaiei. ⁹ Ai ai i aramanei? Mepa da God nuanuana ina amviravira ma nuavainei ana meji ina vojijini da eġa ina pupunita.
- ¹⁰ Maranai God inanai aiwai i kaukauei ma menanare ai kaua apoapoe i geduaiei, Tauna nuanuana i virai ma eġa ita pupuni.

4

Jonah ana ġaiawa ma BADA ana nuavaina

- ¹ Wate Jonah wei ogana eġa ita ġoei ma amlona i ġaiġai kaua. ² *Ma i raupari BADA awarina, i pa, “BADA a notai da amapo nanare ita tupua muriai da au melagai ata opu-tawanei. A ramanei da tam God raunuapoapoe ma iviaiaim, eġa laġilaġina amlom ita voġaiġai ma am nuavaina maemaenoana. Tam eġa am ġoana da go’apoapoe ravai ma pupuni wate ma tere-kau ei. Lamna aubaina a ruba nae au Tarshish. ³ *Ma marina BADA, au lawana ma vaitawanei, i ai da ata iraġe ma avena ata mae!”
- ⁴ Wate BADA i paribelei, i pa, “Tam aiwai e ġaiġaiawei?”
- ⁵ Jonah i opu melagai au metaetana, au maramatanei. Kampa ġou i voepai ma au gabaurina i kiala ma i vipaipai da BADA aiwai ita kau ei nai taona awarina. ⁶ Ma BADA ġoroġorova i vigogoi da i tuaġeta Jonah au tepana da ana ġou. Ma Jonah wei i vinuaiaina-kau ei.
- ⁷ Wate ubaubana boibogi aupom ġela, BADA motamota i paritawanei da ġoroġorovana i ani da i raġe. ⁸ Maranai madeġa i gogo, God ive maramatanei i paritawaneiai. Ma madeġa Jonah kolana i rarani da i ġokokokara. I ġoei da ita iraġe ma i riwa, “Iraġe i aii, eġa me lawana.”
- ⁹ Wate God Jonah i paridadanei, “Am nola aiwai da amlom i ġaiġai kaua wei ġoroġorovana awarina?”
- Jonah i paribelei, “Amlom i ġaiġai kaua da a ġoei ana i raġe.”

¹⁰ BADA i riwa, “Wei ġoroġorovana u vivinuabolei lamna eġa tam uta kauei bo uta paini. Tauna waguvarai i gogo ma waguvarai i’raġe. ¹¹ Wate nai taon ġaeġaena Niniveh ma ana patara 120,000, tauri ġimtona taumaenina ma ai ġamoġamo maġamaġai. Wei taona a vivinuabolei tapa?”

Peroveta Micah ana buka

Pariverena

Wei bukana, Micah mai Israel e ririwei da God tau awari amlona i ġaiġai. Tauna amlona i ġaiġai aubaina ega ita votelatelei. Lamna aubaina ai ġavia ina voterei da ina viġaviei.

Wate nanare BADA ana parivainuaġana i jimei. BADA i parivainuana da au damona ana rava ina vilawani.

5

Gulau meiei ina nei

¹ Sorodia ona vomairi! Ona vokaukua!

Ġavia Jerusalem i matave kwaipipini.

Israel ana gulau ina kwapui, jiġonei navanavana ina kwapui.

² Tam, Bethlehem Ephrathah,

melaġai aburu oina dam Judah au orai.

Wate awarimiei, Israel ai gulau ina opu.

Tauna wariġana,

au karena da marina.

³ BADA mai Israel i voterei ai ġavia au urai,

da wavine marina au manawa, tevera orotona ina ġuni.

Ma ai rava ġelau i tuvai-opunei,

ina nememei ai au ġana au Israel.

⁴ Tauna BADA ana rewapanei, ina mairi ma ana sipu ina raveni,

ana vidualaune i ma BADA wavana ġaeġaenei.

Rava anatapui au dobu, Tauna ina vivirana-kauei

ma lamna aubaina tau kampa ina mae-kauei.

Peroveta Zechariah ana buka

Pariverena

Mai Jew ai ġavia i nei ma tauri i pupuna-naiei au Babilon. Ma madeġa 70 au murina Babilon ai gulau mai Jew i voterei da i naeme au Israel tempol voamelana aubaina. Zechariah maiteni i nae. BADA Zechariah i riwei da mai Israel wenanare ina pariveri, "Ona mae-taviremi awariu ma ana maetavireu awarimi."

Zechariah turana peroveta Haggai maiteni i nola tagogi nai au marana.

9

Zion ana gulau e nenei

⁹ BADA i riwa, "Ona morelana Zion

Ona logoimi Jerusalem,

ona inana! Ami gulau e nenei awarim.

Orana Jijimanina ma ana ġavia i vovaiubai.

Ana volaġotana donkey e gerugerui,

donkey ġaubona i gerui.

¹⁰ Dam Ephraim awarii Chariot ina vaitawanei,

ma Jerusalem awari ġavia horse ina vaitawanei.

Ma viġavia ana pidu ina gai.

Tauna rom ina neiai.

Ma ana vibada boga i taġoni da au boga ġela,

au waira Euphrates da dobu au ġia dewadewana."

12

Tauna i tonatonai ana mogu.

¹⁰ Tau-Bada, David ana epaepaia ma mai Jerusalem awarii, raunuapoapoe ma rupena aruana ana iwagi. Tauri ina taepai ma i tonatonaiu ina inana, ma ina touei ma ina moguei me rava natuna tagotago i'raġe; me natuevouna ina irairaġe. ¹¹ Nai marana, tou ma tarakwatu au Jerusalem ina rata kaua me au Hadad-Rimmon au wapuna, au Meggido maranai gulau Josiah i viragieni.

13

¹ BADA Virewapana Kaukauana i riwa i pa, "Mara ina ġetai maranai vuvura ina votawanei au Jerusalem. David ana epaepaia ma mai Jerusalem anatapai ina nei ma ai ġo'apoapoe ma ai mira ina oġa-tawanei."

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġaui i notai da tauna, Peter maiteni au Rome i mae. Ma Peter, Iesu ana kawa ma ana viararamana maġamaġaui Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauei.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kawa maġamaġaui ita kauei. Wei kauai tana inainai maranai; e viviararamana; ma arua-apoapoei e viviaġaġana-opune; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kawa i girumi ma eġa ana viararamana ita giruma-guratei. Mark i vieġeta menanare Iesu au korosi i raġe da rava anatapui ita vilawanai ma God menanare, Iesu iraġalei i vovaimairini.

*John Taubabataito, Iesu ana aninae i vovokaukauei
(Matthew 3:1-12; Luke 3:1-18; John 1:19-28)*

¹ Wei lamna Iesu Keriso Messiah God natuna Riwana Aiaina karena.

² Wariaġa peroveta Isaiah i girugirumia nanare:

*“Ona rautaniġana! Au peroveta au naom ana paritawanei
da am aninae ina vovokaukauei.”*

(Malakai 3:1)

³ **“Peroveta au mutulua e viviġoreġore:*

*‘Taumi BADA ana aninae ona vovokaukauei,
ana eta ona vovai-jjimani!’*

(Isaiah 40:3)

⁴ Ma taupariverena John i nei au mutulua da rava i bababataitoi ma God riwana i jimejime i pa, “Ami ġo'apoapoe ona voterei, ma ona mae-taviremi God awarina ma ami ġo'apoapoe ina nota-tawanei ma ana babataitoimi.” ⁵ Ma rava anatapui Judea au paratana ma au Jerusalem i nae da John ita rautaniġanei. Maranai ai ġo'apoapoe i rupeni, John, tau i babataitoi au waira Jordan.

⁶ Ma John, *kamel* aparana metametanana i oteoteni ma ana tairoro ġamoġamo opina. Ana lam kapau ma manigewa. ⁷ Ma tauna, rava i ririwei i pa, “Rava au muriu e nenei i ġetelara, eġa me tau. Eġa tagotagogiu da ana ae uma ġuravana ana rupeni. ⁸ Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitoi
(Matthew 3:13-17; Luke 3:21-22)*

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi. ¹⁰ Ma maranai Iesu wairei i ġeġetai, i 'nana da mara i wanatawanei ma Arua Vivivireina me gabubu i ġairai. ¹¹ *Ma God ponana marei i opu ma i riwa i pa, “Tam, tau natu au nuavaina ma u vinnuainiu.”

*Satan, Iesu i raelari
(Matthew 4:1-11; Luke 4:1-13)*

¹² Ma lamna au murina God Aruana Vivivireina Iesu i paritawanana-opune au mutulua. ¹³ Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au do buna i mamae ma God ana anela marei tauna i paini.

*Iesu, lebalebaġai ruaġa ma ruaġa i raukwatuei
(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jime. ¹⁵ Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo'apoapoena ona rupeni ma ona mae-taviremi ma Riwana Aiaina ona vitumaġanei!”

¹⁶ Mara tagogi Iesu Galili topana au gerana i bababara nae. Ma lebalebaġai ruaġa i 'nanai, Simon * ma ana tevera Andrew au topa i rarauagida. ¹⁷ Iesu i riwei i pa, “Ona nei

ma ona votaḡotaḡoiu. Ma me marina iana o tutuarui; nanare, ana viararamanini da rava ona tuarui da ina vitumaḡaneu!”

¹⁸ Ma maratogogi ai agida i voterei ma Iesu i votaḡotaḡoi. ¹⁹ Ma tau i gera i verau-nae. Iesu, Zebedi natunatuna i 'nanai, James ma John ai au waga ai agida wanawanarorona i vokaukauei. ²⁰ Ma maratogogi tau i ḡorei, “Taumi ona nei ma ona votaḡotaḡoiu!” Ma tau amai Zebedi† ana taunola maiteni i voterei ma Iesu i votaḡotaḡoi.

Iesu, arua-apoapoena rava awarina i viaḡaḡana-opunei
(*Luke 4:31-37*)

²¹ Iesu ana Tauvotaḡotaḡo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei. ²² Tauna ana rewapanana i viararamana eḡa me mai Jew ai tarawatu babadai § nanare. Ma taurautaniḡana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i ruiaruina i garara ²⁴ i pa, “Iesu Nasaretei, aiwai e ḡoeḡoei awariai. Tam weka u nei da ma viapoapoenai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawanei!”

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei. ²⁷ Ma rava anatapui i bana-kauei ma tau i vitarapiri, “Wei aiwai? Wei viararamana vouna ma ana rewapanana maiteni! Wei ravana awarina rewapanana e mamae da arua-apoapoena i riwei ma tauna i vovoteletelei!” ²⁸ Iesu nolana, maratogogi i tua Galili au anatapuna.

Iesu, rava maḡamaḡai i vilawani
(*Matthew 8:14-17; Luke 4:38-41*)

²⁹ Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae. ³⁰ Simon poiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i pariverei. ³¹ Tauna i nae wavine awarina, nimana i vojijini ma i voagui da i vomairi. Lamna maranaina, ini ḡuḡurana i voterei ma wavinena, tau i paini.

³² Ma au bigai madeḡa i neulai au murina, rava, ai rava doridoriai ma aiavo i arua-apoapoei au orai maemae, i nei ai Iesu awarina.* ³³ Ma rava anatapui nai au melagaina i vitagogiei numa au metaetana. ³⁴ Ma Iesu, maḡamaḡai ai doria nununai i vilawani ma arua-apoapoe maḡamaḡai rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina tau i viḡaei da i genuana.†

Iesu au Galili i raugugula nae
(*Luke 4:42-44*)

³⁵ Ubaubana i boibogi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari. ³⁶ Muriai, Simon ana rava maiteni i nae da i baiei. ³⁷ Ma maranai Iesu i nelaḡai, ma i riwei i pa, “Rava anatapui e baibaieim.”

³⁸ Iesu i paribelei i pa, “Tana nae taon ḡelau i ḡereḡere, ma kampa maiteni God Riwana Aiaina ana raugugulei. Tau wei lamna aubaina a nei.” ³⁹ Ma Galili au anatapuna i naeni ma pari au numai i raaugugula ma arua-apoapoei i viopuni.

Iesu, oroto opi doriani i vilawani
(*Matthew 8:1-4; Luke 5:12-16*)

⁴⁰ Anina ma rava awarina opi doriani, i nei Iesu awarina ma au naona i peu ma i raudene ma agu i vibagei i pa, “Mepa da ma ḡoei, anina da ma viaiainiu.‡”

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a ḡoeḡoei, ma aii!” ⁴² Ma maratogogi opi-doriani, oroto i voterei ma tauna i aii me. ⁴³ Anina ma Iesu i riwana-guratei i pa, ⁴⁴ “Tam ma nae! Aiwai i tuputupua awarim, eḡa rava ma vieḡei!

† **1:20:** Eng. Zebedi. ‡ **1:21:** Eng. Capernaum. § **1:22:** Wariaga BADA, ana Tarawatu Moses i verei mai Israel aubai. * **1:32:** Madeḡa ina neulai au murina anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kauei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viḡavia, me tau i vivinua-notenotei nanare. Jhn 6:15 ma inana. ‡ **1:40:** Mai Jew ai Tarawatu e ririwa da rava lepeleperai, tau miramirai me dobu gela ravai - Jentail. Mai Jew amapo nai ravai eḡa ina vodadani. Rava miramirai eḡa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelai ma rava maiteni ina mae ma ina taparoro.

Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauai da ina vimataira tau awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa ega rava ita mamaelana kampa i nae. Wate rava mepa maemaei i nei Iesu awarina.

2

Iesu, oroto gwaḡagwaḡana i vilawani
(*Matthew 9:1-8; Luke 5:17-26*)

¹ Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai. ² Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei. ³ Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina. ⁴ Rava i maḡa guratana ma ega tagotagogina da ita neiai Iesu awarina, lamna aubaina da tetelei i amgaena da au poewa ma gavogavo i bauni ma kampa gwaḡagwaḡana ana rasirasina i tere-gairei Iesu au naona. ⁵ Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, “Natu, am ḡo'apoapoei, a nota-tawanei.”

⁶ Anina mai Jew ai tarawatu babadai ḡelau kampa i kiakiala, au orai i vinua-notanota i pa, ⁷ “God ainelana ḡo'apoapoei e notanota tawanei. Aiwai aubaina wei ravana nanare e bababani? Tauna, God e vivijibogi ma e ririwa da tauna, God nanare.”

⁸ Maratagogi, Iesu Aruanei ai nota i vaia ma i riwei i pa, “Aiwai aubaina wei kauai o vivinua-notenotei? ⁹ Metauna i telatela: gwaḡagwaḡana ata riwei, ‘Am ḡo'apoapoe a nota-tawanei.’ Bo ata riwei, ‘Ma vomairi, am animatave ma vaia ma ma babara?’ ¹⁰ A ḡoei da taumi ona aramanei da Rava Natuna au dobu ana rewapana e mamae da rava ai ḡo'apoapoe ina nota-tawanei ma ina vilawani.” Ma gwaḡagwaḡana i riwei i pa ¹¹ “A riwem, ma vomairi, am animatave ma vaia ma nae au numa!”

¹² Orotona i vomairi ma maratagogi aravi i vaia ma i babara nae. Ma patara i rarausiga, i bana-kauai ma God i voepaepai ma i ririwa, “Tauai ega melanai kua wenanare ata inana!”

Iesu, Levi i kwatuei
(*Matthew 9:9-13; Luke 5:27-32*)

¹³ Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei. ¹⁴ Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, “Ma votaḡotaḡoiu!” Levi i vomairi ma i votaḡotaḡoi.

¹⁵ *Tax* tautami ma ḡo'apoapoei ravai maḡamaḡau, Iesu ma ana tauvotaḡotaḡo i votaḡotaḡoi. Ma anatapui, Levi ana au numa i kiala gogona ma i amam.† ¹⁶ Tarawatu Babadai ḡelau lamna Pharisi, ma tau i 'nanai da Iesu *tax* tautami ma ḡo'apoapoe ravai maiteni i amam. Anina ma Iesu ana tauvotaḡotaḡo i riwei i pa, “Aiwai aubaina Iesu *tax* tautami ma ḡo'apoapoei ravai maiteni e amam?”

¹⁷ Ma maranai Iesu wei riwana i nononori ma tau i riwei i pa, “Rava lawalawai, doketa ega ita ḡoeḡoei ma rava doridoriai, doketa e ḡoeḡoei. Tau a nei ḡo'apoapoei ravai aubai ma ega rava jijimani aubai.”

Uji vitaraviravirana
(*Matthew 9:14-17; Luke 5:33-39*)

¹⁸ Mara tagogi, John Taubabataito ma Pharisi ai tauvotaḡotaḡo i ujiuji. Ma rava ḡelau i nei Iesu awarina ma i vitara-virevirei, “Aiwai aubaina John Taubabataito ma Pharisi ai tauvotaḡotaḡo e ujiuji, wate tam am tauvotaḡotaḡo ega ita ujiuji?”

¹⁹ Iesu i paribelei i pa, “Taumi o notanotai da tau aiavoi i raukwatuei tavine ana au torela, ina mae lota bo? Eḡateni kua! Maranai tavitavine vou orotona, tau maiteni e mamae, tau ega ina uji. ²⁰ Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji.”

* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauai. Ma tau kua waduboi amamai ḡariei maiteni i vovoteletelei ma i riwa da aiavoi Tarawatu ega ita vovoteletelei lamna tau rava apoapoei, ḡo'apoapoe tau kauai.

²¹ Ma riwa e mamae, “*Tau kaua vouna a neiai eġa me taumi ami kaua wadubona nanare.* Eġa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata.” ²² Ma nanare, eġa aiai *wine* vouna ina vaini da *wine* aniterenana wadubona ġamoġamo opinei au orana ina iwaġi. Mepa da ina kauai, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni[‡]. Wate *wine* vouna, anina da *wine* aniterenana vouna au orana ina iwaġi.”

Iesu ana riwa Sabat aubaina
(*Matthew 12:1-8; Luke 6:1-5*)

²³ Mara tagogi au Sabat, Iesu ana tauvotaġotaġo maiteni, *witi* wapuna au orana i nena. Ma ana tauvotaġotaġo *witi rovei* i vaini ma i amam. ²⁴ Pharisi ġelau i 'nanai wei kauana i kaukauei ma tau Iesu i riwei, “Ma inana, ata Tarawatu e mamae da Sabat, lamna lauvitau ana mara. Aiwai aubaina tau i vovobagibagi?”

²⁵ Iesu i paribelei i pa, “Me peroveta i girugirimia nanare. David ana tauvotaġotaġo maiteni am-irage ma aiwai i kauai? Taumi o iavi ma aiwai aubaina anona, eġa ota vinua-notenotei? ²⁶ [‡]Pirisi Ġeġetalarana Abiathar ana au mara, David, God ana au numa i rui ma palawa vovivirana i vaia ma ġelau ana tauvotaġotaġo maiteni i verei da i ani. Moses ana Tarawatu e mamae da pirisi ava palawana e aniani.”

²⁷ Ma Iesu ana riwa au damona i riwa i pa, “God, Sabat i kauai da rava voaguna aubaina ma eġa rava ita kauai Sabat voaguna aubaina. ²⁸ Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotu urana irairage na i vilawani
(*Matthew 12:9-14; Luke 6:6-11*)

¹ Mara ġelauna au Sabat, Iesu i naeme au pari numana ma oroto urana irairage na i 'nanai kampa i kiakiala. ² Ma Pharisi ġelau i ġoei da aiwai Iesu ita viwavui. Lamna aubaina i 'nana-taġotaġoi da oroto ita vilawani bo eġa au Sabat. ³ Ma Iesu, orotona i riwei, “Ma nei, au naoi ma mairi!” ⁴ Ma Iesu, ravai i vitara-virevirei i pa, “Sabat au marana, metauna i aii: Aiaina tana kauai bo apoapoena? Tana vilawana bo tana virage na? Tarawatu aiwai i riwei?” Ma anatapui i genuana. ⁵ Iesu ana amloġaigaina i 'nana viravira ma i 'nanai da taui orai i bado ma nuanuana i bola-kauai. Ma orotona i riwei i pa, “Uram ma viloloi!” Ma i viloloi ma i lawana. ⁶ Ma Pharisi maratagogi i opu ma i nae Herod ana rava awari* ma ai oga i tarai da Iesu mena ita virage nane.

Iesu, Patara awari i babani

⁷⁻⁸ Iesu ana tauvotaġotaġo maiteni, tau i netawanei ma i nae au gera da ita vilauvitau; ma mai Galili patara ġaeġaena i votaġotaġo. Rava maġamaġau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelau waira Jordan taon au babagelauna, Taia taon ma Sidon taon,[†] taui anatapui i nei Iesu awarina. ⁹⁻¹⁰ [‡]Iesu, rava maġamaġau i vilawani. Ma lamna aubaina doridoriai maġamaġau i viviamdudu ma i ġoei da tauna ita vodadani. Lamna aubaina ana tauvotaġotaġo i riwei da waga i vokaukauei. ¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, “Tam God Natuna!” ¹² Ma Iesu tau i viġaei da avena ita vieġa da tauna aiai.

Iesu ana Apasol 12 i vinei
(*Matthew 10:1-4; Luke 6:12-16*)

¹³ Anina ma Iesu i ġae au ola ma ana ġoanei nanare, rava i kwatuei da awarina i ġei. ¹⁴ Tauna, nelara 12 i vinei da maiteni ita mae ma muriai ita paritawanei da ita raugugula. Ma i ġorei Apasol. ¹⁵ Ma i vovai-virewapani da arua-apoapoei rava au orai ina viopuni.

¹⁶ Tau i vinevinei 12 ai wava wenanare,

Simon i ġoreġoreia Peter[‡]

¹⁷ ma Zebedi[§] natuna James ma ana tevera John i ġorei Boaneges, anona waiparara natunatuna,

¹⁸ Andrew,

Philip,

[‡] 2:22: Wine e tuputupua ma purupurona wine ana aniterenana ina viaisikasikai [‡] 2:26: 1Sa 21:1-6 * 3:6: Herod ana rava anona lamna mai Jew ai boru, tau aiavoi Rome gabemanina i vovogui. Tau ai bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava taui tauvibenabenam ai rava au oiena awarii.

[†] 3:7-8: Eng. Tyre & Sidon. Wei ravana eġa mai Jew. [‡] 3:9-10: Mrk 4:1 [‡] 3:16: Anona Gaima. [§] 3:17: Eng. Zebedi.

Batolomeo,*
Matthew,
Thomas,
James, tauna Apius† natuna,
Thadeus,‡
Simon, tauna Ununurana,§

19 ma Judas Iskariotei,* tauna, Iesu tauvibenabenameina.

Rava i riwa da arua-apoapoei Iesu e vivibadei.
(Matthew 12:22-32; Luke 11:14-23; 12:10)

20 Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am. 21 Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

22 Tarawatu babadai ḡelau Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

23 Lamna aubaina Iesu, wei Babadai i ḡorei ma awanainei i pa, “Satan amapo Satan eḡa ina viopuni. 24 Mepa da dobu ravai ina viḡavia vivira, lamna doḡuna ita mae ava. 25 Ma nanare dam ina viḡavia vivira, nai damna ita mae ava. 26 Ma Satan ita vomairi ma ita viḡavianana-melei, amapo ita mae ava. 27 Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene. 28 Riwa kaua a ririwemi da God ami ḡo’apoapoei ma ami vijiboḡa anapui ina nota-tawanei. 29 Wate aiai da Arua Vivivireina e vivijiboḡi, God, nai ravana ana ḡo’apoapoei eḡa melanai ina nota-tawanei ma ana ḡo’apoapoei ina mae-nonoa.” 30 Iesu wenanare i babani, aubaina rava ḡelau i ririwa, “Iesu au orana arua-apoapoei e mamae.”‡

Iesu ana dam oina
(Matthew 12:46-50; Luke 8:19-21)

31 Iesu alona ma varevareina i nei ma au doa i maimairi ma riwa i paritawanei Iesu awarina da ita nei. 32 Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ḡoḡoem.”

33 Iesu i paribelei i pa, “Aiai alou ma aiavoi varevareiu?” 34 Anina ma tau i kiakiala i ‘nanai ma i riwa i pa, “Ona inana! Wei tau alou ma varevareiu. 35 Aiai God ana ḡoana e kaukauei, tauna alou ma novu ma vareiu.”

4

Doa tapuna ma tapuna ai awanaina
(Matthew 13:1-9; Luke 8:4-8)

1 Iesu, giu i raukarena-melei Galili topana au adana. Ma patara i riei da ita rautaniḡanei. Ma patara i rata, da tauna au waga i geru ma i kiala ma waga i dudui da i virauoupu au topei ma patara au gera i mae.

2 Ma kaua maḡamaḡau awanainei i giu ma i viararamana i pa, 3 “Ona rautaniḡana! Taupaewa, ana wapu i vokaukauei ma pei i ravi awawari. 4 Pei ḡelau au eta i peu. Ma kiū i ḡeta ma i ani. 5 Ma pei ḡelau doa au ḡaiḡaimana i peu, doa au avavana. Ma lamna aubaina maratagogi i gogo. 6 Wate maranai madeḡa i rarani, maratagogi i poi, anona warami eḡa ita ḡaira guratana doa au orana. 7 Pei ḡelau, modu donadonai au poui i peu. Ma modu donadonai i gogo ma pei i gogogo i lavani, ma eḡa ita ua. 8 Ma pei ḡelau doa au aiaina i peu ma i gogo kaua ma i ua, ḡelau 30, ḡelau 60 ma ḡelau 100.”

9 Ma Iesu i riwa i pa, “Mepa da taniḡami e mamae, riwa ona nonori!”

Aiwei aubaina Iesu awanainei i babani
(Matthew 13:10-17; Luke 8:9-10)

10 Maranai Iesu ainelana i mamae ma ana tauvotaḡotaḡo 12 ma taurautaniḡana ḡelau i ḡeta ma Iesu i vibaḡai da awanaina anona ita riwei.

11 Ma Iesu i paribelei i pa, “God ana vigulau ana kaua mamae govagana; taumi i vieḡemi ma rava au tano mevamaei, tau aiwai anapui awanainei e paripari-verei. 12 Lamna ana kauai da wariaga peroveta aiwai i girugirumia ina tupua:

* 3:18: Eng. Batolomeo. † 3:18: Eng. Alphaeus. ‡ 3:18: Wavana ḡelama Judas-Luk 6:16 § 3:18: Anona lamna tau mai Jew ma tau Rome e vivigaviei. * 3:19: Iskariot, lamna Judas ana melagai wavana da auna lamna Iskariotei. † 3:22: Eng. Beelzebub. Anona lamna, nabugara ai bada. ‡ 3:30: Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eḡa melanai ai ḡo’apoapoei ina nota-tawanei.

‘Tau i ina inana ma eġa ita inainanai.

Tau i e rarautaniġana ma eġa ita aramanai;
ma lamna aubaina tau i eġa ita nenei God awarina
da ai ġo’apoapoe ita notatawanei.”

(Isaiah 6:9-10)

Doa tapuna ma tapuna anoi.

(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramanai bo? Ma awanaina ġelau menanare ona aramananei? ¹⁴ Taupaewa, God riwana, rava anatapui e paripari-verei. ¹⁵ Rava ġelau orai i bagibagi me etanaġi. Riwa au tepana e raurauei, wate maratagogi Satan e nenei da riwa rava au orai e vaivai-tawanei. ¹⁶ Ma rava ġelau orai me doa viġaiġaimana. Tau i, riwa i nonori ma maratagogi ana nuaii riwa e vaivaia. ¹⁷ Wate warami eġa da eġa ita mamae guratana. Ma maranai nuabola bo rau-iviapoapoe e nenei tau i awari, aubaina tau i ai tumaġana God awarina e teretere. Tau i maratagogi e peupeu. ¹⁸ Rava ġelau orai me pei, modu donadonai au orai e gogogolana. Tau i anina riwa e nononori. ¹⁹ Wate lawana ai nuabola ma mane ai nuavainana ma kava ġelau ai au nuaii e ruirui ma God riwana e lavalavani da eġa ita uaua. ²⁰ Ma ġelau, tau i me pei doa au aiaina i pei. Tau i, lamna anina riwa e nononori ma e vaivai-kauei ma e uaua: ġelau 30 ma ġelau 60 ma ġelau 100.”

²¹ Iesu i riwei i pa, “Rava, eġa rampa ita neinei da iriga au gabaurina ita teretere bo watara au gabaurina ta pa? Rampa ana au anikiala e teretere ta pa? ²² Kava mamae govaġai, anataputapui a vieġai ma kava govagovaġai nanarena ana vieġai. ²³ Mepa da tanigami e mamae, riwa ona nonori!”

²⁴ Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi. ²⁵ Lamna aubaina, mepa da riwau ona aramanai, tau ġelauna ma ġelauna ana veremi. Ma tau i eġa ita aramanai, lamna aiwai aburuna i nononoria, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, witi peina au doa ita ravi-awawari. ²⁷ Ma waguvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanainei. ²⁸ Doa ana nuaina, pei me witi e vivigogoi ma e uaua. Au naona e rarapairei ma muriai e roverove ma muriai anona e magumapura au tapina. ²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi? ³¹ Wenanare, wei aina peina, lamna me gaga peina, pei aburuoina au dobu ma au doa i paewi. ³² Ma peina i gogo ma i rata da ai muomuoi i ġetawanei ma raġaraġai ġaġaġe i terei ma au ġoui, kiu ai noġi ita voai.”

³³ Ma Iesu, awanaina maġamaġai, rava au matai i raugugulei da tau i ai rau-taniġana ana au ruva nanare. ³⁴ Awanainei, rava awari i giugiu, wate ana tauvotaġotaġo ava awari kava anatapui i vivieġai.

Iesu, kojikojira i ravi-daumora

(Matthew 8:23-27; Luke 8:22-25)

³⁵ Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.” ³⁶ Anina ma tau i patara i voterei. Ma anatapui Iesu, maiteni au waga i geru ma i damana, waga ġelau maiteni. ³⁷⁻³⁸ Iesu, waga au murina unutana i terei ma i raunuavuru. Ma kojikojira ġaġaġena i tupua ma rabama, waga au tepana i raurauei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana irage?”

³⁹ Ma tauna i vomairi ma ive i viġaei ma i riwei i pa, “Ma genuanal!” Ma rabama i riwei i pa, “Ma mae-genuataul!” Ma ive i wanatuini ma daumora ġaġaġena i matave. ⁴⁰ Iesu ana tauvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġana!”

⁴¹ Ma tau i rovo kava ma i riwa vivira i pa, “Wei aiwi ravana da ive ma rabama tauna e vovoteletelei?”

5

Iesu, arua-apoapoena oroto awarina i viaġaġana-opunei.

(Matthew 8:28-34; Luke 8:26-39)

¹ Iesu ana tauvotaġotaġo maiteni Galili topana au baba ġelauna i ġeta, mai Gerasa ai au dobu. ² Wei au dobu, arua-apoapoena oroto au orana maemaena. ³⁻⁵ Eġa aiwi tagotagogina da ita vovaiubai. Mara maġamaġauna, aena ma urana seinei i pani. Wate wei

i viaituituini, ma eġa tagotagogina da seinei ita pani. Marai ma waguvarai i nene-labalababa ma i garagarara ma ġamei tupuana i boribori-melei ma au kokoaga ma au ola i raunuma. ⁶ Maranai Iesu wagei i opuopu, arua-apoapoei orotona i ruiuruinia, aueia Iesu i 'nanai ma kokoagei i ruba ma Iesu au naona i mae-peu ma i raudune. ⁷⁻⁸ Iesu, ravana i riwei i pa, "Arua-apoapoena, wei orotona ma opu-tawaneii!" Ma orotona, ponana au aidamo ma i garara, "Iesu, God Aidamo Telarana Natuna! Aiwai awariu e ġoegoei? God wavanei a vivibaġaim da eġa ma kovoġiu!" ⁹ Iesu, orotona i vitara-virevirei i pa, "Tam wavam aiai?"

I paribelei i pa, "Tauai a maġa, aubaina tau wavau lamna Ġavia Patarana."

¹⁰ Ma arua-apoapoei, Iesu i vibaġa-guratei da avena nai dobunei ita viopuna-tawanei.

¹¹ Ma poro boruna ġaeġaena au ġereġere ola au adana i labalaba. ¹² Ma arua-apoapoei, Iesu i vibaġai, "Ma paritawanelai poro au orai ana rui." ¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ġaira da au topa i monu.

¹⁴ Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inana aiwai i tupua. ¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jjiimanina. Ma tau i rovo kaua. ¹⁶ Ma aiwai i tupua orotona ma poro awari, tau i 'nainanaia, rava i riwana-naiei.

¹⁷ Ma dobuna ravai, Iesu i vibaġai da dobuna ita oputawaneii.

¹⁸ Iesu au waga i gerugeru ma orotona, Iesu i vibaġai i pa, "Tau maiteni tana nae."

¹⁹ Iesu i viġaei ma i riwei i pa, "Ma naeme am au dam. Ma BADA kaua aiwai ġaeġaena i kaukaueia ma ana iviaiai tam awarim, tau ma pariverei."

²⁰ Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma taui anatapu i nononoria i baiei.

*Iesu, Jairus natuna wavinena ma wavine doridorigana i vilawani.
(Matthew 9:18-26; Luke 8:40-56)*

²¹ Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai. ²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu ²³ ma i vibaġa-guratei i pa, "Natu guguinina e irairaġe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariġuruvi ma i votaġotaġoi.

²⁵ Wavine tagogi kampa patarana au orana awarina tara-dorigana i mae da madeġa 12 i kwa. ²⁶ Ana mane anataputapuna, dokedoketa maġamaġau awarii i tawanei ma eġa tagotagogina ita vilawani ma amapo da ana doria i rarata. ²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani. ²⁹ Maratagogi, tara-dorigana i wanatuini ma malana i vaia da i lawana. ³⁰ Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, "Aiai au gara i vodadani?"

³¹ Ana tauvotaġotaġo, tauna i riwei, "Ma inana, patara i mae gariġuruvi! Ma menanare da u riwa 'Aiai i vodadani?"

³² Wate Iesu i 'nana viravira da ita inana aiai i vodadani. ³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapu i viġei. ³⁴ Anina ma Iesu, wavine i riwei i pa, "Natu, am tumaġana i vilawanim. Am doria i kwa, ana nuaubam ma nae!"

³⁵ Maranai i bababani ma rava ġelaui Jairus ana numei i nei ma i riwei i pa, "Natum ana mara i kwa. Eġa Taugiu ma visina-viravirai."

³⁶ Iesu ai babani i nonora-tawanei ma Jairus i riwei i pa, "Eġa ma rovo, ma vitumaġanal!" ³⁷ Iesu, rava ġelaui i viġaei ma Peter ma James ma ana tevera John maiteni i nae. ³⁸ Ma Jairus ana au numa i ġeta ma Iesu, patara i 'nanai; i toutou ma i taratarakwatu ³⁹ ma i rui ma tau i riwei i pa, "Aiwai aubaina o taratara-kwatu ma o toutou? Tevera eġa ita iriġe, tauna e matamatave ota."

⁴⁰ Ma tau, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana. ⁴¹ Iesu, tevera nimana i vaia ma i riwei i pa, "*Talitha koum!*" wei anona, "Kukuma, ma vomairi!"

⁴² Maratagogi i vomairi ma babara i vikarei (Tauna ana madeġa 12). Ma tau i ba kaua.

⁴³ Iesu, tau i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaḡotaḡo maiteni nai dobuna i netawanei ma i naeme ana au melagai. ² Ma Sabat marana i ḡeta ma tauna giu i vikarei au pari numana. Ma rava maḡamaḡau i rie i da i rautaniḡanei. Tau i anapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?” ³ Anina ma tau i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

⁴ Iesu, tau i riwei i pa, “Peroveta dobu au ḡelau i vivivirei, wate ana au melagai, ana rava ma ana dam oina, eḡa ita vivivirei.”

⁵⁻⁶ Tauna i baiei da rava eḡa tauna ita vitumaḡanei. Ma eḡa tagotagogina da kua vivirewapanai kampa ita kau. Tauna urana, rava ruḡa ota doridoriai au tepai i terei ma i vilawani. Ma muriai, melagai nununai au ḡereḡerei i viararamana nae.

Iesu ana Apasol i paritawanei da ita viararamana

⁷ Ma Iesu, tau i ḡoreiai ma ruaruḡe i ava i paritawanana-opunei ma rewapanai i verei da arua-apoapoei ina viaḡaḡana-opunei. ⁸ Ma riwa bagibaginei i riwei i pa, “Ami au vaḡai, eḡa aiwai ona vaia anina jiḡona ava; eḡa lam, eḡa autu bo mane au urami. ⁹ Ae uma ona oteni ma eḡa kwama ḡelauna ona vaia.” ¹⁰ Ma i riwei i pa, “Metauna melagaina o ruiruriana ma i vianinemi. Numa tagoginina au orana ona mae da melagaina ona oputawanei. ¹¹ *Mepa da au melagai o ḡeta ma rava eḡa ita vianinemi bo eḡa ita rautaniḡanemi. Nai melagaina ona oputawanei ma aemi pokauna ona rauabuabui da ina aramanei da tau i wavu!”*

¹² Ma tau i opu ma rava awari i raugugula ma i riwei i pa, “Taumi ami ḡo’apoapoei ona voterei ma ona mae-taviremi God awarina!” ¹³ Tau i, arua-apoapoei i viaḡaḡana-opunei. Ma rava doridoriai maḡamaḡau, olive oirana au kolai i buloi ma i vilawani.

John Taubabataito ana iraḡe

¹⁴⁻¹⁶ *Iesu nolana i nae da rava anapui i aramanei ma tauna i babaniei. Ma rava ḡelau i ririwa i pa, “Tauna, kua vivirewapanai e kaukauei, aubaina tauna John Taubabataito iraḡelei i vomairi me.” Ḣelau i ririwa i pa, “Tauna Elijah i nememei.” Ma ḡelau i ririwa i pa, “Tauna peroveta wariḡai nanare.” Ma gulau Herod,[†] nolana i nonori ma i riwa i pa, “Tau, John Taubabataito uana a borituini; marina i vomairi me.” ¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaḡi. Wavinena wavana Herodias. Au murina John, Herod i riwana ḡiriḡiriei i pa, “Tarawatu e mamae da eḡa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniḡanei. Wate nuanuana i raḡaraḡa.

Ma Herodias, John awarina amlona i ḡaiḡai ma viraḡenana i ḡoei. Herod i aramanei da John, lamna rava jijimanina ma vivivireina ma i ḡalaloei. Herod, John i rovoei ma lamna aubaina wavinena eḡa tagotagogina da aiwai ita kau.

²¹ Ma wavine, gavogavo i nanai, maranai Herod ana tupua marana i ḡeta ma torela i vokaukauei. Ma gabemani babadai ḡaeḡaei ma sorodia ai babada ḡaeḡaei ma Galili babadai i raukwatuei. ²² Ma Herodias natuna wavinena i nei ma i ara. Herod ma tau i maiteni i amam i vinuaini. Ma gulau, gugui i riwei i pa, “Aiwai u ḡoeḡoei ma vibaḡai ma ana verem!” ²³ Ma i parivainuḡani i pa, “God au matana a ririwem da aiwai u vivibaḡeiu ana verem da au vigulau navanavana au paratana.”

²⁴ Ma tevera wavinena i opu ma alona i paridadanei i pa, “Aiwai ana vibaḡeiu?”

Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaḡai i pa, “A ḡoeḡoei da marina John Taubabataito kolana ma vereu au aboma!” ²⁶ Ma gulau nuanuana i bola-kau. Wate parivainuḡana boiboḡi i kau i tau i amam au matai. Ma lamna aubaina gugui, aiwai i vivibaḡeiu anina i vianinei. ²⁷ Ma tauviragena i paritawanei ma i riwei da John kolana ita nei. Ma i nae panipani au numana ma John uana i borituini. ²⁸ Ma kolana au aboma i terei ma

* 6:11: Act 13:51 * 6:11: Wariḡa mai Jew, tauvaḡai e nenememei au Israel. Tau i aei pokau e rarauabuabui maranai Israel ana au parata e ḡeḡeta, lamna tau i orai e viaiaini. Ma Iesu ana tauvotaḡotaḡo wei i kau i melagai ravai ina notai, “Tauvotaḡotaḡo e ririwa da tauta orata apoapoena me tauta eḡa mai Jew.” * 6:14-16: Mrk 8:28 † 6:14-16: Herod Antipas, Galili ana Wavalatona.

guguini i verei ma guguini, alona i verei. ²⁹ Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

*Iesu, nelara 5,000 i viambagibagi
(Matthew 14:13-21; Luke 9:10-17; John 6:1-14)*

³⁰ Apasol i ḡeta memei ma aiwai anaputapuna i kaukauei ma i raraugugulei, Iesu i vieḡei. ³¹ Lamna maranai, rava maḡamaḡau i nenei ma i nenae da Iesu ana tauvotaḡotaḡo maiteni eḡa gavogavo ita maemae da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” ³² Ma anatapui wagei i nae au mutulua.

³³ Wate rava maḡamaḡau i 'nanai i nenae ma i aramanei tau aiavo. Ma melagai nununai anatapui geraei i ruba gogona da au dobuna i aiḡeta. ³⁴ Maranai Iesu wagei i tuopu au gera ma patara ḡaeḡaena i 'nanai ma nuanuana i bola-kauei. Tau me sipu ma eḡa ai tauvipaipai. Ma Riwana Aiaina viararamanai i raukarei. ³⁵ Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere. ³⁶ Rava ma paritawanei da ina nae au melagai ma au wapu au ḡereḡere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 denarii[‡] tana vaia da wei patarana tana viambagibagi?” ³⁸ Ma Iesu i paridadanei i pa, “Palawa biaḡa awarimi? Ona nae ma ona baieil!”

Maranai i nelaḡai ma i riwa i pa, “Awariai, palawa five ma iana ruaḡa.”

³⁹ Anina ma Iesu, patara i riwei i pa, “Boru nununai, gidagida au majimajiḡai ona kiala nae.” ⁴⁰ Ma tau ai au boru 50 da 100 nanare i kiala nae. ⁴¹ Ma Iesu, palawa five ma iana ruaḡa i vaia ma i ḡoutata au mara ma God i vieḡalauaei. Ma palawa i vogimagimai ma iana i gutai da ana tauvotaḡotaḡo i verei ma tau, rava i verei. ⁴² Ma patara i am ma i am-iaua. ⁴³ Ma ana tauvotaḡotaḡo, lam am tereterenai i tuarui da poa muomuoi 12 i vioai. ⁴⁴ Nelara 5,000 i viambagibagi.

*Iesu, waira au tepana i babara
(Matthew 14:22-33; John 6:15-21)*

⁴⁵ Anina ma Iesu, ana tauvotaḡotaḡo i egari da ita aidamana au Bethsaida.[§] Tau i waga i geru da i nenae ma tauna, patara i paritawanei. ⁴⁶ Patara i paritawanei ma tauna ava i ḡae au ola da ita raupari. ⁴⁷ Ma waguvara ana tauvotaḡotaḡo au waga au topa ma Iesu au alala. ⁴⁸ Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratomtōm nanare, Iesu i nae awari. Tauna waira au tepana i bababara ma i ḡoei da tau i ita tutelarei. ⁴⁹⁻⁵⁰ Ma maranai tau, Iesu i 'nanai topa au tepana i bababara ma i notai da tauna konaḡa ma i rovo kaukauei ma i vigaragararei. Ma maratagōgi Iesu i riwa i pa, “Tepami ina toral Tau, eḡa ona rovo!”

⁵¹ Ma au waga i geru ma ive i wanatuini ma tau i bana-kauei. ⁵² Avena da kava palawa awarina i kauei i 'nanai, wate ana rewapana eḡa ita aramana-kauei. Tau i orai i bado ma i vinuanaina.

*Iesu, rava doridoriai maḡamaḡau au Genesaret i vilawani
(Matthew 14:34-36)*

⁵³ Tau, topa i damani ma au Genesaret i ḡota ma ai waga i raḡini. ⁵⁴ Tau, waga i oputawanei ma rava, Iesu i 'nanai ma maratagōgi i aramanei da tauna. ⁵⁵ Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasiariei i vivaneiai. ⁵⁶ Iesu mepa i nenelana, melagai ḡaeḡaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaḡa, da doridoriai, Iesu ana gara adana ava ita vodadani. Ma aiavo Iesu ana gara i vodadani i lawana.

7

*Amamami ai giu
(Matthew 15:1-9)*

¹⁻⁴ Pharisi ma Jew anatapui, magumagura ai giu maḡamaḡau i notanota-jijini. Tau, ai aniuma ma ai aniam anatapui e oḡaoḡai lamnei tau i viaiaina-melei God au matana. Ma maranai au maket da e nenei, urai ina oḡai ma ina am. Tau eḡa ina am da au naona urai ina oḡa kauei me ai magumagura ai giu nanare.

Maratagōgi Pharisi ḡelau ma Tarawatu Babadai, Jerusalem ei i nei Iesu awarina da ita rautaniḡanei. Ma tau i 'nanai da Iesu ana tauvotaḡotaḡo ḡelau, urai eḡa ita oḡai ma i amam.

[‡] 6:37: 200 denarii. Denarius tagōgi lamna taubagibagi ai maia au pom tagōgo nolana aubaina. [§] 6:45: Eng. Bethsaida.

⁵ Ma tau, Iesu i vitara-virevirei i pa, “Aiwai aubaina am Tauvotaḡotaḡo magumagura ai giu, eḡa ita votaḡotaḡoi ma ana ura mirimirai e amam?”

⁶ Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

‘Wei ravai ipiriei e voveopaepai,
wate nuanuai aueia.

⁷ Tau rava ai giu e viviararamani.

Lamna aubaina ai voveapepa anona eḡa.’

(*Isaiah 29:13*)

⁸ Taumi, God ana Tarawatu o teretere-tawanei ma ami giu o votaḡotaḡoi.”

⁹ Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi. ¹⁰ *God ana Tarawatu, Moses i girugirumia nanare: *Aman ma alom ma vivirei ma Aiai amana ma alona e enaena-boai, tauna ona viraḡeni.* ¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei iuta, God aubaina.’

¹² Wei viararamanana, tau e vivigaei da amana ma alona ina voagui. ¹³ Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡaui gelai maiteni o kaukaui.”

Metauna kauai, rava orai e vivimirai.

(*Matthew 15:10-20*)

¹⁴ Iesu, patara i kwatuaana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei. ¹⁵⁻¹⁶ Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

¹⁷ Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai. ¹⁸⁻¹⁹ Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

²⁰ Anina ma i riwa i pa, “Aiwai, rava oranei e opuopu; lamna, rava e vivimirai God au matana. ²¹ Anina rava nuanuane i vinuanotanota apoapoei e opuopu me: viawawana labalababa, danene, viraḡena, awadanene, ²² ambo, rau-iviapoapoe, moru, erawa, unura, terevaideḡa, mae-ḡaeḡae ma opa. ²³ Wei kauai apoapoei anatapui oranei e opuopu ma rava e vimimirai.”

Jentail wavine, † Iesu i vitumaḡane i

(*Matthew 15:21-28*)

²⁴ Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa. ²⁵⁻²⁶ Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni. ²⁷ Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

²⁸ Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e raurau e aniani.”

²⁹ Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

³⁰ Ma wavine i naeme au numa. Natuna wavinena i ‘nanai i matamatave, arua-apoapoena boiboḡi tevera i opu-tawanei.

Iesu, oroto taniḡa-potapotana ma mena birebirena i vilawani

³¹ Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana. ³² Orotu taniḡana potapotana ma menana birebirena i nei ai Iesu awarina ma i vibaḡai da urana au inina ita terei da ita vilawani. ³³ Iesu, oroto i taravaina-opunei da tui ava ma ura-gigina, oroto au taniḡana i terei ma ura-gigina ḡelauna i ovi ma menana i vodadani. ³⁴ Nuanuana i bolai ma i ḡoutata au mara; i lavutu tawanana ma oroto i riwei i pa, “*Ephthai!*” Wei anona, “Ma wanatawanei!” ³⁵ Maratagogi taniḡana i wanatawanei ma menana i vidagadagu ma i babani kaua. ³⁶ Ma Iesu, tau i viḡaei da aiwai i tuputupua, avena

* **7:10:** Exo 20:12; Exo 21:17 * **7:15-16:** Giruma gelai Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.” † **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Tau e notanotai da tau i ai guratana eḡa me rava gelai. Lamna aubaina tau dobu gelai ravai e ḡoreḡore auou.

rava ita vieḡei. Iesu, rava i viḡaei; wate tau i eḡa ita rautaniḡana ma riwa i vituai. ³⁷ Ma maranai ravai wei i nonori, tau i bana-kauēi ma i riwa i pa, “Aiwai anapui i kauana-kauēi. Tauna, rava taniḡa potapota i vivilawani da e rarautaniḡana ma menabirebire e bababani.”

8

*Iesu, rava 4,000 i viambagibagi
(Matthew 15:32-39)*

¹ Nai maranai, patara ḡaeḡaena i riana-melei. Patara eḡa ai lam. Ma Iesu, ana tauvotaḡotaḡo i kwatuei da i nei ma i riwei i pa, ² “Au pom tonuḡa patara maiteni a mae ma ai lam eḡa ma a rau-nuapoapelei. ³ Tau i ḡelau, uamei i nei. Mepa da ana am-iraḡe ana paritawane i ai au numa, ma au etanai ina raumolaḡau.”

⁴ Ma ana tauvotaḡotaḡo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tau i paridadanei i pa, “Awarimi palawa biaḡa?”
Tau i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualaei ma i vogimagimai ma ana tauvotaḡotaḡo i verei da patara i verei. ⁷ Ma tau i awari, iana muomuoi ruaḡa ota. Iesu i vaia; God i viegualaei ma ana tauvotaḡotaḡo i verei da patara i verei. ⁸ Tau i anapui i am da i am-iaua. Ma lam am tereterenai i tuarui da poa ḡaeḡaei seven i vioai. ⁹ Rava 4,000 i viambagibagi. Ma muriai i paritawane i ai au numa.

*Pharisi, God ana mataira i vibaḡei
(Matthew 15:39-16:4)*

¹⁰ Maratagogi, Iesu ana tauvotaḡotaḡo maiteni au waga i geru ma i nae Damanuta ana au parata. ¹¹ Pharisi ḡelau i nei ma viparipariḡai i vikarei Iesu maiteni. Tau i ḡoei da Iesu ita raudadani da mataira Godei ita viatataiei. ¹² Iesu, Aruane i lavutu tawanana ma i riwa i pa, “Wei kimta voui, aiwai aubaina mataira e ḡoeḡoei? A ririwana-kauemi, amapo mataira eḡa ona inanai.”

Iesu, ana tauvotaḡotaḡo I parivainotai

¹³ Anina ma Iesu, patara i netawane ma ana tauvotaḡotaḡo maiteni au waga i geru me ma i damana Topa Galili au baba ḡelauna. ¹⁴ Ma ana tauvotaḡotaḡo, nuanuai i vuru da ai palawa ita vaia ma palawa tagogi ava au waga i mamae. ¹⁵ Iesu, tau i parivainotai i pa, “Pharisi ma Herod ai giu ma ai viaramana morumoruna ona inana-kauēi! Lamna me yist.*,”

¹⁶ Ma tau i babani vivira i pa, “Tauta eḡa ata palawa aubaina da e ririweta.”

¹⁷ Ma Iesu i aramane ma tau i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo? ¹⁸ *Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa? ¹⁹ Maranai palawa five a vogimagimai rava 5,000 aubai, lam am tereterenai o tami da poa biaḡa o vioai?”

Tau i paribelei, “Twelve.”

²⁰ “Ma maranai palawa seven a vogimagimai rava 4,000 aubai, lam am tereterenai o tami da poa ḡaeḡaei biaḡa o vioai?”

Tau i paribelei, “Seven.” ²¹ Ma tau i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

²² Tau i nei au Bethsaida ma rava ḡelau, oroto matana apoapoena i neiai Iesu awarina ma i vibaḡa-guratei da ita vodadani. ²³ Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovoi ma urana au matana i terei ma i paridadanei, “Aiwai e inainanai bo eḡa?”

²⁴ Ma i taepai ma i riwa, “Rava a inainanai ma tau i me ai ita bababara.”

²⁵ Iesu, urana i tere-melei oroto au matana. Ma matana i wanatawanei da aiwai anapui i nana-kauēi. ²⁶ Iesu, tauna i paritawane ana au numa ma i riwei, “Eḡa ma nae au melagai! Wate jjiimanina ma nae au numa.”

*Peter i riwa da Iesu, tauna Keriso
(Matthew 16:13-16; Luke 9:18-20)*

²⁷ Iesu, ana tauvotaḡotaḡo maiteni i nae melagaa Caesarea Philipai au ḡereḡerei. Maranai i nena ma Iesu, tau i paridadanei, “Rava e ririwa; tau ai ai?”

* **8:15:** Yist mai Jew awarini awanaine lamna aiwai da apoapoe, mira bova e vivitua bo e vivimagai. Weka Iesu mai Pharisee ma mai Herod ai lawana ma ai giu morumorui e babanie, da eḡa ina tua. ✧ **8:18:** Mrk 4:12

²⁸ Ma tau i paribelei, “Ġelau e ririwa da tam, John Taubabataito. Ma ġelau Elijah. Ma ġelau e ririwa da peroveta wariġana tagogi.”

²⁹ Ma Iesu, tau i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

³⁰ Iesu, tau i viġaei da eġa aiai ina riwei da tauna aiai.

Iesu ana iraqe ma ana vomairi me i babaniei

(Matthew 16:21-23; Luke 9:21)

³¹ Ma Iesu i raukarei da ana tauvotaġotaġo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geđuaei ma ina viraġeni. Ma au pom tonuġa au murina ina vomairi me.” ³² Iesu jijimaninei wei kauai i babaniei ma lamna aubaina Peter, tauna i taravaini au ririva ma enana i vikarei. ³³ Wate Iesu i mae-tavirei ma ana tauvotaġotaġo i 'nanai. Ma Peter i eni, i pa, “Satan ma nae au muriu! Tam am nota eġa Godei ita nenei, eġa da ravei.”

Iesu votaġotaġona anona

(Matthew 16:24-28; Luke 9:23-27)

³⁴ Ma Iesu, patara ma ana tauvotaġotaġo i raukwatuei ma i riwei, “Mepa da aiai ita votaġotaġoiu. Tauna ina boviana-melei ma ana korosi ina avari ma ina votaġotaġoiu.†
³⁵ Aiai ana lawana e tatajjini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelai. ³⁶ Ana aii bo anona aiwai, mepa da wei dubna lawanana ma vigulauna ma vaipai ma am lawana maemae-nonoana ma vine-boai. ³⁷ Wate aiwai ei am lawana ma gimara-melei. ³⁸ Mepa da aiai: tau ma au viararamana ina vinimalei; ma i mae-puputeu; ma ana ġoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eġa ona iraqe da God ana vigulau ona inana ana rewapanana ina nei.”

Iesu inanana i virai

(Matthew 17:1-13; Luke 9:28-36)

² Au pom six muriai, Iesu, Peter, James ma John i taravaini. Ma tau i ava i ġae ola ġaeġaena au tepana. Ma kampa tau i matai, Iesu inanana i virai. ³ Ana gara i arapoira ma gamrina i vimata-kamokamota; eġa me aiwai ġelauna au dobu nanare. ⁴ Ma kampa au matai, Elijah ma Moses i eġa. Ma Iesu maiteni i babani. ⁵ Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!” ⁶ Ma tau i rovo kaua ma Peter eġa ita aramane i da aiwai i latolaton i.

⁷ *Anina ma apau i eġa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniġane!” ⁸ Maratagogi tau i 'nana viravira ma eġa aiai ġelauna ita inana ma Iesu, tauna ava.

⁹ Ma maranai olei i ġaiġairai ma Iesu, tau i viġaei da aiwai i 'nananaia eġa ina vieġai da au naona Rava Natuna iraqeiei ina vomairi me.

¹⁰ Ma tau i, wei riwana i voteletei ma i babani vivira i pa, “Iraġelei vomairi me anona aiwai?” ¹¹ Ma tau i, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

¹² Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariġa i girumi da Rava Natuna ina vinuapoapoe kaua ma ina inana-geđuaei. ¹³ Wate a ririwana-kauemi da Elijah anina i nei ma rava, ai ġoanei tauna i rau-iviapoapoele i me i girugirumia nanare.”†

Iesu, arua-apoapoena tevera orotona awarina i viopuni

(Matthew 17:14-21; Luke 9:37-43a)

¹⁴ Iesu ana tauvotaġotaġo tonuġa maiteni olei i ġaira memei ai rava awari ma patara ġaeġaena, tau i gariġuruvi. Ma Jew ai tarawatu babadai, tau i maiteni i vivitarapiri. ¹⁵ Maranai

† **8:28:** Mrk 6:14-15 † **8:34:** Wei lamna awanaina. Anona lamna Iesu ana tauvotaġotaġo anina vinimala ma apoapoei ina nelaġai aubaina tau i, tauna i votaġotaġoi. Tauna eġa ita ririwa da ana tauvotaġotaġo au korosi ina iraqe me tauna. * **9:7:** Mrk 1:11 * **9:11:** Mai Jew i vitumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma tau i eġa ita notai da Elijah rau-iviapoapoei ina nelaġai ana au nememei. † **9:13:** Iesu lamna John Taubabataito i babaniei da tauna Elijah (Mat 11:13-14, 17:10-13)

patara, Iesu i 'nanai. Tau i orai i auepai ma awarina i ruba ma i viegualaei. ¹⁶ Iesu, tau i vitara-virevirei, "Aiwai o vitarapiriei?"

¹⁷ Orototagoga patara au poui i paribelana, "Tauviararamana, arua-apoapoena natu orotona au orana e mamae ma i kauēi da ega ita bababani, lamna aubaina a neiai awarim. ¹⁸ Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta girigiriei; ma inina e badobado. Am tauvotaḡotaḡo a vibaḡai da arua-apoapoena ita viopuni, wate ega tagotagoga da ita kauēi."

¹⁹ Ma Iesu i paribelei, "Oo mara aiwai ona vitumaḡana! Ta mae ḡaga ma ami vita ana 'vara ḡaḡalei? Tevera awariu ona neiai!"

²⁰ Ma tevera i neiai Iesu awarina. Ma maranai arua-apoapoena, Iesu i 'nanai, maratagoga tevera i viaikwajiana-guratei da au doa i tonei ma i vitatauvira ma i vivipuropuro. ²¹ Iesu, tevera amana i vitara-virevirei, "Wei teverana ana doria mara aiwai i vikarei?"

I paribelei i pa, "Maranai aburunai. ²² Arua-apoapoena mara au anapuna, tauna ai au araratana ma au waira e tawatawanei ma i ḡoei da ita viraḡeni. Mepa da tam tagotagoga; ma raunu'apoapoelelai ma ma voaguiai!"

²³ Iesu, tauna i riwei, "Menanare da u riwa, 'Mepa da tam tagotagoga?' Aiai ravana e vivitumaḡana, God anapuna ina kauēi tauna aubaina."

²⁴ Maratagoga tevera amana i garara, "A vitumaḡana, wate au tumaḡana ega ita rata ma ma voaguui da ina rata!"

²⁵ Iesu i 'nana da patara i rierieiai awarii ma lamna aubaina arua-apoapoena i egari i pa, "Tam arua taniḡa-potapotana ma gumgum. Tau a egaegarim da tevera ma opu-tawanei. Ma ega melanai au orana ma rui me!"

²⁶ Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡai kampa i riwa, "Tauna i raḡe!" ²⁷ Ma Iesu, tauna urana i vojijini ma i sinaepai da i mairi.

²⁸ Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, "Aiwai aubaina tauai ega tagotagoga da arua-apoapoena ata viopuni?"

²⁹ Iesu, i riwa, "Arua-apoapoei me wenanare, pari ainelana ina viopuni."

Iesu ana iraḡe i babaniana-melei

(Matthew 17:22-23; Luke 9:43b-45)

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu ega ita ḡoei da rava ita aramanei da tau i mepa. ³¹ Aubaina tauna, ana tauvotaḡotaḡo i viararamani i pa, "Tau i Rava Natuna ina amverenei rava ḡelau i urai. Ma tau i ina viraḡeni. Wate au pom tonuḡa au murina ina vomairi me."

³² Wate tau i ega ita aramanei tauna aiwai i bababaniei. Ma pari-dadanana i rovoei.

Tauvotaḡotaḡo i vitarapiri vivira da aiai i ḡetelara

(Matthew 18:1-5; Luke 9:46-48)

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, "Au etanai aiwai o vitarapiriei?"

³⁴ Wate tau i genuana, aubaina au etanai tau i vitarapiri vivira da aiai i ḡetelara. ³⁵ Iesu i kiala ma Apasol 12 i raukwatuei awarina ma i riwei i pa, "Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai."

³⁶ Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa, ³⁷ "Aiai ravana; tau wavauei, tevera wenanare i rauḡorei. Lamna tau maiteni e rarauḡorei. Ma aiai da tau e rarauḡorei. Lamna tauparitawaneu maiteni e rarauḡorei."

Aiai ega ata ḡavia, lamna turata

(Luke 9:49-50)

³⁸ Anina ma John, Iesu i riwei, "Tauviararamana! Tauai, oroto tagoga i ananai; tam wavamei arua-apoapoena i viopuni ma tauna ega turata. Lamna aubaina a viḡaei da ega ina kauana-melei."

³⁹ Iesu i riwa, "Ega ona viḡaei! Ega aiai au wavau kaua babai ina kauēi ma muriai ina parivai-apoapoeniu. ⁴⁰ Aiai ravana ega ata ḡavia; lamna turata. ⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au tauvotaḡotaḡo. Tau i ai maia ega ina vine-boai."

Rauelara babanina

(Matthew 18:6-9; Luke 17:1-2)

⁴² Aiai ravana i kauēi da wei teverana ana tumaḡana Tau awariu i viapoapoeni da ḡo'apoapoe i kauēi. Lamna i ai da ḡaima ḡaeḡaena ravana au uatabana ina duri ma au

boga ina tawanei aubaina God, tauna ina kovoḡa-guratei. ⁴³⁻⁴⁴ Mepa da nimam i kauem da ḡo'apoapoe u kauēi. Ma bori-tawanei! I aii da nimam tagogiava ma lawana mamae-nonoana ma vaia. Ma eḡa ma kauēi da nimam ruaḡa aiaii ma ma nae ai au menamenana; mepa ai eḡa melanai ita bobo.[‡] ⁴⁵⁻⁴⁶ Mepa da aem i kauem da ḡo'apoapoena u kauēi. Ma bori-tawanei! I aii da sigesigem au lawana mamae-nonoana ma rui. Eḡa me aem ruaḡa aiaii ma ai au menamenana ina tawanem.[§] ⁴⁷ Ma mepa da matam ina kauem da ḡo'apoapoena u kauēi. Ma vaiawanei! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem;⁴⁸ dobuna motamotana eḡa ita irairaḡe ma ai eḡa ita bobo.

⁴⁹ Au Tauvotaḡotaḡo anataputapui, ai araratanei ina bogai.

⁵⁰ "Nia i ai lam viaiainana aubaina. Ma mepa da i tomatoma, mena ma vidagiane. Nia au orami ina mae ma ona viturana vivira!"

10

Iesu, tavine vilamonana i babanie

¹ Ma Iesu, dobuna i netawanei ma i nae Judea ana paratana. Ma Waira Jordan i damani da au baba ḡelauna. Patara ḡaēḡaena i riana-melei. Ma Iesu i viaramana, me mara patapatana i kaukauei nanare.

² Ma Pharisi ḡelau i ḡoei da tauna ita waroi. Ma lamna aubaina i vitara-virevirei, "Tarawatu e mamae bo eḡa da rava, awana maiteni ita vilamonei?"

³ Ma Iesu i paribelei, "Moses ana Tarawatu aiwai e ririwei?"

⁴ Ma tau i riwa, "Moses ana Tarawatu e ririwa da oroto vilamona pepana ina girumi ma awana ina verei. Ma tau i ina vilamonei."

⁵ Iesu i paribelei, "Taumi orami i bada. Au baina Moses wei Tarawatuna i terei. ⁶ Wate ona notai da au karena, maranai God rava i kauēi ma tauna oroto ma wavine i kauēi. ⁷ Ma lamna aubaina oroto amana ma alona ina netawanei ⁸ ma awana maiteni ina vitagogi da tau eḡa ruaḡa me au naona ma tupua tagogi. ⁹ God aiwai i vitagogiei, eḡa aiai ina vilamonei."

¹⁰ Maranai tau i naeme au numa, ma tauvotaḡotaḡo, Iesu i vitara-virevirei wei kauai aubai.

¹¹ Iesu i paribelei, "Mepa da oroto, awana i voterei. Ma wavine ḡelauna i ravaḡi. Lamna tauna, awana awarina i rauviapoapoe. ¹² Ma nanarena mepa da wavine, awana i voterei ma oroto ḡelauna i ravaḡi. Lamna awana, awarina i rauviapoapoe."

Iesu, roaroa i viaiaini

¹³ Rava ḡelau, roaroa i neiai Iesu awarina da urana au tepai ita terei. Ma ana tauvotaḡotaḡo, ravai i viḡaei. ¹⁴ Maranai Iesu wei kauai i 'nanai. Ma ana tauvotaḡotaḡo i eni ma i riwa, "Roaroa ona voterei da awariu ina nei. Ma eḡa ona viḡaei. Au baina God ana vigulau, lamna rava wenanare aubai me wei roaroai. ¹⁵ A ririwana-kauemi. Aiai, God ana vigulau eḡa ina vaia me tevera aburuna nanare. Tauna, eḡa God ana au vigulau ina rui." ¹⁶ Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu ivomairi da inenae. Orotu i ruba ḡeta ma au naona iraudune ma i riwa i pa, "Taugiu vinualaulaunam. Aiwai ana kauēi da lawana maemae-nonoana ana vibuderiei?"

¹⁸ Ma Iesu i paribelei i pa, "Aiwai aubaina, tau u vikaua vinualaulauneu? God, tauna ava vinualaulaunana. ¹⁹ Tam, God ana Tarawatu u aramanei, Eḡa ma virageni! Eḡa ma awadanene! Eḡa ma danene! Eḡa ma viwavu-moru! Eḡa ma amkwalakwala! Amam ma Alom ma vivirei!"

²⁰ Ma tauna i riwei, "Taugiu! Maranai tau aburueu da amadodo, wei tarawatui anatapui a voteletelei."

²¹ Iesu, tauna i 'nanai ma i vinuavainei ma i riwei, "Kaua tagogi e mamae eḡa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiei. Ma ma nei ma ma votaḡotaḡoiu!"

²² Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

²³ Iesu i 'nana viravira ma ana tauvotaḡotaḡo awari i riwa, "I pipiripi kaua da purapura ravana, God ana au vigulau ina rui."

²⁴ Tauvotaḡotaḡo riwana i baiei maranai Iesu wenanare i babani. Ma Iesu i riwa me, "Natunatu! I pipiripi kaua da purapura ravana, * God ana au vigulau ina rui. ²⁵ I telatela kaua

‡ 9:43-44: Wariaḡa nimaiei i giruma damanei tau riwana tagogina me vs 48. § 9:45-46: Wariaḡa nimaiei i giruma damanei tau riwana tagogina me vs 48. * 10:6: Gen 1:27 * 10:7: Gen 2:24 * 10:19: Exo 20:13; Exo 20:14; Exo 20:15; Exo 20:16; Exo 20:12 * 10:24: Wei riwana buka ḡelau awarii e mamae ma ḡelau eḡa purapura ravana.

da gāmoḡamo gāeḡaena wavana kamel, iḡoma au gavogavona ina rui. Ma i pipiri guratana da purapura ravana, ana lawana God ina verei. Ma God, tauna ina vibadei.”

²⁶ Tau i vinuanaina ma ai nota i kwa. Ma tau i ava i babani vivira i pa, “Mepa da nanare; amapo aiai lawana mamae-nonoana ina vaia?”†

²⁷ Iesu awarii i nana ma i riwei, “Rava awarii wei kauai i pipiri. Wate eḡa God awarina. God awarina aiwai anapuna i telatela kaua.”

²⁸ Ma Peter i riwei, “Ma tauai melanare? Tauai ai purapura a voterei ma tam a vogaḡoim.”‡

²⁹ Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina vogaḡotaḡoiu; tau ma Riwana Aiaina aubaina. ³⁰ Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anapuni ina maḡa. Rava ina rau-iviapoapelem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia. ³¹ Wate maḡamaḡau marina e vivinao; tau i ina vimuri. Ma maḡamaḡau da e vivimuri; ina vinoa.”

*Iesu ana irage babanina i vitonui
(Matthew 20:17-19; Luke 18:31-33)*

³² Iesu, ana tauvotaḡotaḡo maiteni i ḡeḡae au Jerusalem. Iesu, tau i naoi i nena. Tauvotaḡotaḡo i baiei. Ma rava ḡelau i muri i nenei i rovo kaua. § Ma tau i 12 i raḡorei au ririva ma i raukarei da kaua amapo da awarina ina tupua; tau i vieḡei ³³ I pa, “Ona inana, tauta ta ḡeḡae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana irage ina vianinei. Ma Mai Jentail ina verei. ³⁴ Ma tauna ina vijiboḡi ma ina ovai ma ina kwapu ma ina virageḡeni. Au pom vitonuina ina vomairi me.”

*James ma John ai vibaḡa
(Matthew 20:20-28)*

³⁵ - Zebedi natunatuna James ma John i nei Iesu awarina ma i vibaḡai i pa, “Tauviararamana! Tauai ai ḡoana a vivibaḡei uta kauai.”

³⁶ Iesu i riwa i pa, “Aiwai o ḡoeḡoei ana kauai aubaimi?”

³⁷ Tau i paribelana, “Ma verelai da ana kiala, tagoḡi au oiem ma ḡelauna au kelakelaum am au vigulau.”

³⁸ Iesu i paribelei, “Taumi eḡa ota aramanei aiwai o vivibaḡei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoui?”*

³⁹ I paribelei, “Tauai tagotagogina!”

Iesu i riwei, “Iniviara kelakana anina ona umai ma ona irage me tau ana irage. ⁴⁰ Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukauai.”

⁴¹ Maranai Tauvotaḡotaḡo 10 ḡelau, wei riwana i nonori. Tau i James ma John awarii i ḡaiawa. ⁴² Ma Iesu, tau i anapuni i ḡorei da awarina ma i riwei, “O aramanei da jentail ai babada, dobu ḡela ravai jentail awarii e mamae-ḡaeḡae ma e rarau-iviapoapelei. Wate tau i ai babada gaegaei, ai rewapana i ḡetelera da ai rava e vibadebadei da ai ḡoana e kaukauai. ⁴³ Wate au tauvotaḡotaḡo eḡa nanare. Eḡa da aiai i ḡoei da ina ḡetelera taumi au poumi; tauna anina da ina vitaunola. ⁴⁴ Aiai i ḡoei da ita vinoa. Tauna ina vitaunola rava anapuni aubai. ⁴⁵ Ma nanare Rava Natuna eḡa ita nei da tauna, tana nolei. Wate ita vitaunola rava aubai. Ma ana lawana ita verenei da rava maḡamaḡau ai lawana ita ḡimara-melei.”†

*Iesu, rava mata-potapotana Batimeus i vilawani
(Luke 18:35-43)*

⁴⁶ Ma tau i ḡeta au Jeriko. Iesu, ana tauvotaḡotaḡo, patara ḡaeḡaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai

† **10:26:** Mai Jew i notai da rava vipurapurai lamna BADA ana verena ana nuavaina matairana, tau i notai da BADA, rava vipurapurai eḡa ina gagaloie, tauna ravai ḡelau maiteni eḡa ina gagaloie. ‡ **10:28:** Peter i ḡoei da ita aramanei da tauvotaḡotaḡo ai au irage maiana aiwai, ina vaia. § **10:32:** Iesu i ḡeḡae au Jerusalem ma rava maḡamaḡau i vigaviei ma lamna aubaina ana tauvotaḡotaḡo i baiei da tauna tepana i tora da weka i nena. Rava ḡelau i vogaḡotaḡo, tau i rovo kaua da aiwai awarina ina tupua maranai i ḡeta au Jerusalem. * **10:38:** ...babataito me tau ina babataitoui tau i iniviara ma irage e bababaniei, maranai Iesu au Gethsemani i raraupari muriai da ana irage tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaḡai. ✧ **10:43:** Mrk 9:35 † **10:45:** Iesu i vinuapoape me irage aubaita me Isaiah i girugirumia nanare au Isa 52:13-53:12.

i kiakiala ma i viamgigimana. ⁴⁷ Maranai i nonori da tauna, Iesu Nasaretei; garara i raukarei i pa, "Iesu, tam David natuna! Ma raunu'apoapoeleu!"[‡]

⁴⁸ Rava maḡamaḡai, tauna i rai ma i riwei da ita genuana. Wate tauna, garara i voguratei, "David Natuna! Ma raunu'apoapoeleu!"

⁴⁹ Iesu i tumairi ma i pa, "Ona ḡoreiai!"

Anina tau, mata-potapotana i ḡoreiai i pa, "Tepam ina tora ma ma vomairi! E ḡoreḡorem!"

⁵⁰ Tauna, ana puru i tawanei ma i vomairi laḡilaḡina ma i nei Iesu awarina.

⁵¹ Iesu i paridadana i pa, "Aiwai u ḡoei ana kauai aubaim?"

Mata-potapotana i paribelei, "Tauviararamana! A ḡoei da ana inana me."

⁵² Iesu i riwa, "Ma nae! Am tumaḡana i vilawanim." Maratagogi tauna i 'nana me ma Iesu au eta i votaḡotaḡoi.

11

Iesu i rui au Jerusalem

(*Matthew 21:1-11; Luke 19:28-40; John 12:12-19*)

¹ Ma maranai Jerusalem i tuḡereḡerei ma i rui au Betphagi ma Bethani* au ola *Olives*. Ma ana tauvotaḡotaḡo ruaḡa i paritawanei, ² ma i riwei i pa, "Ona nae au melagai au naomi. Maranai o ruirui, kampa *donki* natuna ḡaubo, raḡiraḡitana ona nelaḡai. Tauna eḡa ai ai ita gerudadanei. Ona rupeni ma ona nei ai.[†] ³ Mepa da ai ai ina paridadana, 'Aiwai aubaina wei o kaukauei?' Ona riwei, 'BADA e ḡoeḡoei ma maratagogi ina paritawana-melei."

⁴ Ma i nae ma *donki* ḡaubona au doa au metaeta raḡiraḡitana i rupeni. ⁵ Rava ḡelau kampa i maimairi i paridadana i pa, "Aiwai o kaukauei *donki* ḡaubona o ruperupeni?"

⁶ Ma i paribelei me Iesu i ririweia nanare ma tau i voterei da i nae. ⁷ Tau i *donki* i nei ai Iesu awarina ma ai puru au uporana i tawana-epai ma au tepana Iesu i kiala. ⁸ Ma rava maḡamaḡai, ai puru au eta i ebani ma ḡelau, ai rugurugu i tarataria i ebani. ⁹ Tau i vivinao ma tau au muri i nenei i garara:

"Hosanna!"[‡]

"Viviaiainana tauna BADA au wavana e nenei!"

¹⁰ "Viviaiainana amata David ana vigulau e nenei!"

"*Hosanna* au aidamo telarana!"

¹¹ Iesu i ḡeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, tau 12 maiteni.

Iesu, damala aina i parivai-irairaḡeni

(*Matthew 21:18-19*)

¹² Ma marana i tom, tau Bethani i opu-tawanei ma Iesu am-iraḡe. ¹³ Au weia ma damala aina i 'nanai ana ruguruguna. Ma i nae da ita inana da i ua bo eḡa. Maranai kampa i ḡeta, eḡa aiwai ita nelaḡai. Anina ai ruguruguna ava, aubaina eḡa damala ana mara. ¹⁴ Iesu, damala aina i riwei i pa, "Eḡa ai ai amadodo ma amapo anom ina am-melei!" Ma ana tauvotaḡotaḡo i nonori aiwai i latoni.

Iesu, taugimara tempolei i viaḡaḡana-opunei

(*Matthew 21:12-17; Luke 19:45-48; John 2:13-22*)

¹⁵ Maranai tau i ḡeta au Jerusalem, Iesu i rui Tempol garina au orana ma taugimara i viaḡaḡana-opunei, mane tauviraina[§] ai kepakepa ma gabubu taugimareina ai anikiala i vitauvirai. ¹⁶ Ma i viḡaei da eḡa ai ai ana gimara Tempol au orana ita avarai-naiei. ¹⁷ [‡]Ma rava i viararamani i pa, "I girugirumia nanare, 'Au numa ina ḡorei pari numana dam anatapui au dobu aubaii.'

Wate taumi o vovirai da kwalakwalai ai guba."*

[‡] **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevini i babaniei. Mai Jew i aramanei da Keriso ai wavalatona me David wariaga nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24) * **11:1:** Eng. Bethphage & Bethani. [†] **11:2:** Mai Jew awari, donki lamna nola aubaina ma eḡa gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei. [‡] **11:9:** Lamna pona Aram anona ma vilawanai ma muriai lamna vieḡualau ma vimae-ḡaeḡaena aubaina. [§] **11:15:** Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ḡelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). [⊛] **11:17:** Isa 56:7 * **11:17:** Iesu dobuḡela manena tauviraina ma gimara ravai i viwavui da tau pari numana i vovirai da amkwalakwalai ai guba, tau rava ai arua nolana e vivipoapoeni Jer 7:11-15.

¹⁸ Pirisi Babadai ma tarawatu Babadai i nonori ma i ogei da ita viraḡeni. Tauī, Iesu i rovoei aubaina patara ana viararamana i baiei.

¹⁹ Ma au bigai Iesu ana rava, Jerusalem i opu-tawanei.

*Damala aina i poi
(Matthew 21:20-22)*

²⁰ Ma ubaubanai tauī i nene ma damala aina i 'nanai anatapuna i poi. ²¹ Peter i notai ma i riwa "Tauviararamana ma inana! Damala aina u parivai-irairāgenia i poi."

²² Iesu i paribelei, "God ona vitumaḡanei! ²³ A ririwana-kauemi. Rava wei olana ita riwei, 'Ma vomairi ma au boga ma tawanem!' Ma nuanuana eḡa ina raḡaraḡa ma ina vitumaḡana da aiwai e ririweia, ina tupua. ²⁴ Lamna aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimiei. ²⁵ Ma maranai e raraupari, au naona rava anatapui ai ḡo'apoapoe awarim ma nota-tawanei. Ma nanare amam au mara am ḡo'apoapoe ina nota-tawanei."[†]

*Jew babadai, Iesu ana vibadana i vitarapiriei
(Matthew 21:23-27; Luke 20:1-8)*

²⁷ Tauī i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. ²⁸ Ma i paridadanei i pa, "Aiwai vibadanei wei kauai e kaukauei? Aiāi vibadana i verem da wei kauai uta kauēi?"

²⁹ Iesu i paribelei i pa, "Au vitaraviravira tagoḡi ana terei ma ona paribeleu. Ma ana riwemi; aiwai vibadanei wei kauai a kaukauei. ³⁰ Aiāi, John taubabataito vibadana i verei da rava ita babataitoi, God bo rava? Ona riweul"

³¹ Tauī i vitarapiri vivira, "Mepa da tana riwa, 'Godei.' Tauna ina riwa, 'Ma aiwai aubaina eḡa ota vitumaḡanei?' ³² Wate eḡa tana riwa da, 'Ravei.'" Tauī rava i rovoei, aubaina rava anatapui, ai nota da John anina peroveta. ³³ Ma i paribelei, "Tauai eḡa ata aramanei." Iesu i riwa, "Tau nanare eḡa ana riwemi aiwai vibadanei wei kauai a kaukauei."

12

*Tauipi ai awanaina
(Matthew 21:33-46; Luke 20:9-19)*

¹ [†]Iesu i vikarei ma awanainei awari i babani i pa, "Mara tagoḡi oroto, ana wapu i kauēi ma grape i paewi* ma i gari ma grape anigudana ma violāḡa numana i voai. Ma tauipi ḡelau i verei da ita nolei tauī anatapui aubai. Ma i vaḡai au dobu ḡela. ² Tuaruta ana mara i ḡetai ma taniwaga, ana taunola i paritawanei tauipi awarii da ana ḡuta ita vaia. ³ Wate tauipi, tauna i vojijini ma i kwapui ma kwakwavina i paritawanei. ⁴ Ma taniwaga, taunola ḡelauna i paritawanei. Ma tauī, kolana i viaibaumi ma i vitepaubaubai. ⁵ Ma taunola ḡelauna i paritawanei ma tauna i viraḡeni ma i maḡa ḡelau i paritawanei, ḡelau i kwapui ma ḡelau i viraḡeni. ⁶ Ma tagoḡi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, 'Tauī, natu ina vivirei.' ⁷ Wate tauī, tauna i 'nanai ma i riwa vivira i pa, 'Wei taniwaga natuna. Ona nei, tana viraḡeni ma ana buderi ina viḡaritaiei!' ⁸ Ma i vunui ma i viraḡeni ma tupuana wapuei i tawanana-opunēi.

⁹ –Wapu taniwagana marina aiwai ina kauēi tauī awarii? Tauna ina nei ma tauipi ina viraḡeni ma grape wapuna ina veredamanei tauipi ḡelau awari. ¹⁰ Wei girumana o iavi bo eḡa?

*'Wei ḡaimana, tauvoa i geduaiei,
wate muriai i nelaḡai da tauna ḡaima kaua.*

¹¹ *Wei lamna, BADA ana kaua
ma inanana i vinualaulauna."* (Psalm 118:22-23)

¹² *Jew babadai i aramanei da awanaina lamna tauī i bababaniei ma i ḡoei da ita pani. Wate tauī patara i rovoei, lamna aubaina Iesu i voterei ma i nae.*

*Caesar awarina tax tana terei bo eḡa?
(Matthew 22:15-22; Luke 20:20-26)*

¹³ Ma Pharisi ḡelau ma Herod ana rava ḡelau i nae Iesu awarina da riwei ita waroi. ¹⁴ Tauī i nei ma i riwa, "Tauviararamana, tauai aramanei da tam rava jijjanim. Ma rava wawai naenaēi ma rava labalababa eḡa uta vibainaenaēi ma anatapui e vaivaia da tagoḡi. Wate tam

[†] **11:25:** Riwa wadubo nonoana uraiei i girugiruma vs 26 weka eḡa ita mamae, Mepa da rava ai apoapoei eḡa ma nota-tawanei, amam au mara nanare am apoapoei eḡa ina nota-tawanei. ^{*} **12:1:** Isa 5:1-2 ^{*} **12:1:** Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

God ana babani riwa kauē e viararamani. Ma riwelai tax tana tereī Rome gulauna wavana Caesar[†] awarina, i aii bo ega?”

¹⁵ Wate Iesu, ai moru i 'nana-bauni ma i riwei, “Aiwai aubaina o raudaniu? Mani tagogi ona neiāi da ana inanaī!”

¹⁶ Denarius tagogi i neiāi Iesu awarina ma tauī i vitara-virevirei, “Wei aiāi aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma tauī i baiēi.

Sadusi ġelauī, Iesu i vitara-virevirei irairagelei vomairina aubaina

(Matthew 22:23-33; Luke 20:27-40)

¹⁸ *Mai Sadusi ai vitumaġana da rava ega ita vovomairi-me maranai e irairage.[‡] Anina ma ġelauī i nei Iesu awarina ma i paridadanei, ¹⁹ “Tauviararamana! God ana tarawatu, Moses wenanare i ġirumi: Mepa da oroto i'rage ma kaiababana i netawanei ma ega natunatuī. Orotō vareina kaiababana ina ravaġi ma roaroa ina ġuni vareina aubaina. ²⁰ Mara tagogi varevareī seven i mae. Ma natuevou i tavine ma ega natunatuna ma oroto i 'rage. ²¹ Vareina viruaina kaiababa i ravaġi ma tauna maiteni ega natuna ma i 'rage. Ma nanare vareina vitonuina. ²² Ma nanare anapui seven, wavinena i ravaġi ma ega natunatuī. Au muriai wavine i'rage. ²³ Anapui seven, wavinena i ravaġi. Vomairi me au marana, lamna aiāi awana?”

²⁴ Iesu, tauī i riwei, “Aiwai Moses i ġirumi ma God ana rewapana ega ota aramanei. ²⁵ Maranai tauī iragelei ina vomairi, tauī ega ina tavine bo ina vitavine. Wate ina mae me anela au mara. ²⁶ *Ma rava iragelei ai vomairi babanina, Moses ana tarawatu ega ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God*. ²⁷ Tauna ega rava irairagei ai God, wate rava lawalawai ai God. Taumi o moru kaua!S”

Tarawatu ġeġetelarana

(Matthew 22:34-40; Luke 10:25-28)

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kua, lamna aubaina tauna i vitara-viravira, “God ana tarawatu metauna i ġetelara?”

²⁹ *Iesu i paribelei, “ġeġetelarana tagogi lamna wei: *Ona rautaniġana Israel!* BADA ata God, tauna ava BADA. ³⁰ BADA ami God nuanuami ina vaia orami anapuneī ma aruami anapuneī ma ami nota anapuneī ma ami rewapana anapuneī! ³¹ *Ma viruaina lamna wei: *Rava ġelauī nuanuam ina vaia me tam nuanuam e vaivai-melei!* Wei tarawatuī ruaġa i ġetelara, ega me ġelauī nanare.”

³² Tarawatu badana i riwa, “Tauviararamana u babani kua! Riwa kua u babaniei, BADA Tauna ava God ma ega mepa ġelaua. ³³ Ma nuanuami ina vaia orami anapuneī ma ami nota anapuneī ma ami rewapana anapuneī. Ma, *Rava turam nuanuam ina vaia me tam nuanuam e vaivai-melei.* Wei tarawatuī ruaġa lamna i ġetelara, ega me pulo apuapunana bo pulo ġelauī.”

³⁴ Iesu i 'nanai da tauna i paribelana kua ma i riwei, “Tam, God ana vigulau au ġereġerena e ġeġeta.” Ma ega aiāi tepana ita tora da Iesu ita vitara-viravirana-melei.

Keriso tauna aiāi?

(Matthew 22:41-46; Luke 20:41-44)

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna? ³⁶ *Arua Vivivireina, David nota i verei ma tauna i riwa:

'MAMAE-NONOANA au ġulau i riwei,

Au oieu ma kiala

da am ġavia

au ae karem da ma tuvaidoedoei.'

(Psalm 110:1)

³⁷ –David, tauoina wei gulauna i ġorei bada. Ma menanare da badana lamna, David natuna?” Patara ġaeġaena riwana i nonori ma i vinuāiāi.

† **12:14:** Sisa. * **12:18:** Act 23:8 ‡ **12:18:** Sadusi tauī ġulagulau ma rava ġaeġaei mai Jew ai ġiu babadai tauī maiteni ega ita vitumaġana da anela bo arua ġelauī e mamae ma buka 5 i vinoa, Moses i ġirugirumia, tauī lamna ava e vivitumaġaneī (Karena, Exodus, Leviticus, Numbers, Deuteronomy). Ma ega buka ġelauī. Wate Moses ma BADA riwaieī tauī i viatataieī da lawana e mamae irage au murina. * **12:26:** Exo 3:6 § **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tauī lawalawai maranai BADA, Moses awarina i babani. * **12:29:** Deu 6:4-5 * **12:31:** Lev 19:18 * **12:36:** Psa 110:1

*Iesu, Tarawatu Babadai ai kaua i babaniei
(Matthew 23:1-36; Luke 20:45-47)*

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i vivivirei. ³⁹ Tau i anikiala vinevinei pari au numana ma au torela, gabu aiiai e vaivaia. ⁴⁰ Tau i, kaikaiaababa e morumoru ma ai numa e kwalekwalei, e morumoru ma e raraupari-vai-manamanawa. Tau i ai kovoğa ina apoapoe guratana.”

*Kaiababa ana pulo
(Luke 21:1-4)*

⁴¹ Ma Iesu, pulo aniterenana au baba ġelauna i kiala ma rava i 'nananai mane i tereterei. Rava maġamaġau vivimanei, mane maġamaġau i terei. ⁴² Wate kaiababa molamolakana i nei ma mane muomuoi ruaġa i terei, ruvana i aburu kaua. ⁴³ Ana tauvotaġotaġo i ġorei ma i riwei, “Anina a ririwemi, wei kaiababa molamolakana i tere-guratei, eġa me tau ġelau. ⁴⁴ Tau ġelau ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

*Iesu i riwa da rava God ana Tempol ina rikai
(Matthew 24:1-2; Luke 21:5-6)*

¹ Iesu, Tempol i nene-tawanei ma ana tauvotaġotaġo tagogi i riwa, “Tauviararamana! Numa i viġulau ġaġa ma numa ġaimai i rata ġaġa.”

² Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ġaima anatapui ina rikai.”

*Rava ina vinuapoapoe kaua. Iesu ana tauvotaġotaġo ina vipatutu
(Matthew 24:3-14; Luke 21:7-19)*

³ Iesu i kiakiala au ola *Olives*, Tempol au navanavaġela ma *Peter*, *James*, *John* ma *Andrew* i nei ma i vitaraviravirana govaġei ⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, tau i riwei, “Ona inana kaua da eġa aiiai ina terevaideġaimi! ⁶ Rava maġamaġau, wavauei ina nei ma ina riwa, ‘Tau Keriso tauvilawana!’ Ma rava maġamaġau ina terevaideġai. ⁷ Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona. ⁸ Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviarana e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaġotaġoiu. Ma tau awarii, Riwa Aiaina ona raugugulei. ¹⁰ Riwana Aiaina ona raugugulei rava anatapui awari ma muriai damona ina nei. ¹¹ Ma maranai i panimi ma i etaremi. Eġa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate Arua Vivivireina. ¹² Rava, vareina ina verenei da ina virageni. Ma ama, natunatuna ina verenei da ina viraġeni. Ma roaroa, amamai ma aloloi ina viġaviei da ina irage. ¹³ Rava anatapui ina geduaiemi tau aubaiu. Wate aiiai da e maimairi-jijina da au damona, tauna ina lawana.”

*Iniviarana ġaeġaena ana mara
(Matthew 24:15-28; Luke 21:20-24)*

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauia-vana wei ina aramanei anona aiwai). Tau aiavoi au Judea ina ruba laġilaġina au ola. ¹⁵ Aiiai numa au tepana eġa ina ġaira bo ina rui au numa da aiwai ina vaia. ¹⁶ Aiiai au wapu eġa ina naeme au numa da ana gara ina vaia. ¹⁷ Ma iniviarana ġaeġaena, waivine duadamai ma tau da e viviġuġu awari nai au marana! ¹⁸ God awarina ona raupari da wei kauai eġa au bodu ina tupua. ¹⁹ *Ma nai au marana amapo iniviarana ġaeġaena. Ma maranai God dobu i kauai, iniviarana ġaeġaena eġa nanare ita tupua ma amapo eġa nanare ina tupua me. ²⁰ Wate BADA nai marana ina vitupoi. Mepa da eġa ina vitupoi, rava anatapui ina irage. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumoru ma peroveta morumoru ina nei ma mataira ma kaua babai ina kauai ma ina kauana dadanei da God ana vinevine maiteni ita terevaideġai. Lamna aubaina mepa da aiiai ina riwemi, ‘Ma inanai, *Tauvilawana noi!*’ bo ‘Tauna noi!’ Nai babanina eġa ona vitumaġane! ²³ Ona inana kaua; anatapuna a riwananonoemi!”

* **13:14:** Eng. *Abomination of Desolation* Dan 9:27 11:31 & 12:11 ✪ **13:19:** Da 12:1

*Rava Natuna ana nei
(Matthew 24:29-31; Luke 21:25-28)*

²⁴ Iesu wenanare i riwa, “Ma iniviara gāēgaena au murina.

Madēga ega ina rarana

ma nawaravi ega ina lalai.

(Isaiah 13:10)

²⁵ *Ma ubona marei ina peu*

ma rewapanana gēlaui au aidamo ina gui.

(Isaiah 34:4)

²⁶ ✠—Nai maranaina, *Rava Natuna ana rewapanana ma ana borumana apauēi ina nei.*

²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu gēlau da damona.”

Damala ana awanaina

(Matthew 24:32-35; Luke 21:29-33)

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiāi. ²⁹ Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i gētai. ³⁰ Anina a ririwemi da wei kauai au naona ina tupua ma muriai da rava marina lawalawaii ina irage. ³¹ Mara ma dobu ina amoa. Wate riwau ega ina amoa.”

Bada ainelana ana nei i aramanei

(Matthew 24:36-44)

³² “Ma ega aiāi ita aramanei nai marana bo madēga aiwai ina nei. Anela au mara ega ita aramanei ma Natuna ega ita aramanei. Amana, tauna ava i aramanei. ³³ Ona vineneḡana ma matami ina kalā† Ega ota aramanei mara aiwai, wei kauai ina tupua. ³⁴ Wei me rava ana numa i netawanei ma i vaḡai. Ma ana taunola nununai i terei da ita vīpaipai ma tagotagōgi ava ai nola i verei da ita kauēi. Ma tauvineneḡana i riwei da ita vineneḡana. ³⁵ Ona vineneḡana! Ega ota aramanei mara aiwai, numa taniwagana e nenei; mēpa da au bigai bo au nubautuva bo maratōtomai bo ubaubanai. ³⁶ Ma ega matamatavemi ina nelaḡaimi. ³⁷ Aiwai riwana a ririwemi, riwana tagogina rava anatapui a riwei, ona vineneḡana!”

14

Jew ai babada, Iesu i ogei da ita viragēni

(Matthew 26:1-5; Luke 22:1-2; John 11:45-53)

¹ ✠Au pom ruaḡa muriai da Raḡona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govagovaḡanei Iesu ita vunui. ² Ma i riwa, “Au torela wei kauai ega tana kauēi, mēpa da viḡaiḡaiawa gēgaena ina tupua.”

Wavine, daji ḡabuḡabuna Iesu au kolana i waḡi

(Matthew 26:6-13; John 12:1-8)

³ Maranai Iesu au Bethani, Simon i ḡoreḡorei lepeleperana ana au numa i kiala ma i amam. Wavine, waḡi wavana alabaster i voai ma i gēta ma waḡi uana i vogai ma daji ḡabuḡabuna, maiana gēgaena e ḡoreḡorei *nard*, Iesu au kolana i waḡi. ⁴ Rava ḡelau kampa i mamea i ḡaiawa ma i riwa, “Aiwai aubaina daji u vikalokaloei? ⁵ Wei dajina ita gimarei 300 *denarii* † ruwana ma manena molamolakai ita verei.” Ma tauī, wavine i vienenei.

⁶ Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kauēi. ⁷ Molamolakai awarimi e mamea-nonoa ma ona ḡoei ma tauī ona voagui. Wate tau awarimi ega ata mamea-nonoa. ⁸ Wavine ana nola i kauēi. Tauna, dajiei tupuau i vokaikauana-nonoēi vikokoaga aubaina.‡ ⁹ A ririwana-kauemi, mēpa Riwana Aiaina i raugugulei dobu au anatapui, wei wavinena aiwai i kaukauei ina babantei, ma ega nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari iḡeta da Iesu ita vibenabenei. ¹¹ Tauī i vinuaiāi kaua maranai wei i nonori ma Judas i parivainuagani da mane ita verei. Ma Judas i nana da mēpa gavogavo ita inana da Iesu ita amverenei.

Iesu ma Apasol, Raḡona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sīpu orotoi ḡauboi e vunuvunui Raḡona torelana aubaina. Tauvotagōtaḡo, Iesu i paridadanei, “Mēpa u ḡoeḡoei Raḡona torelana ana vokaikauēi aubaim?”

✠ **13:26:** Da 7:13 † **13:33:** Wedau Evanelia i girumi, ma i raupari, wate buka wadubo nonoana wei ega ita mamea, Luk 21:16 kampa ona inana da e mamea. ✠ **14:1:** Exo 12:1-27 * **14:1:** Raḡona (passover) Exo 12:1 Palawa ega yist maiteni (Unleavened-Bread) Exo 12:17 & 23:15 † **14:5:** Wei lamna me taubagibagi ana maia madēga tagogi aubaina.

‡ **14:8:** Mai Jew ai kaua da taubeu dajiei e bulubuloi muriai au kokoaga e tereterei.

¹³ Iesu, tau i ruaġa i riwei ma i paritawanei, “Ona nae au Jerusalem ma oroto, waira wagina e avarai ona inamai ma ona votaġotaġoi. ¹⁴ Au numana e ruiuriana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?” ¹⁵ “Ma tauna, numa vatavatara ina viatataiemi i vokaukauana-nooei ma kampa aubaita ona vokaukaua.”

¹⁶ Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

¹⁷ Au i biga ma Iesu i nei Apasol maiteni. ¹⁸ Tau i kepaġepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaġotaġo i vinuabola ma tagotagogi ava i pa, “Eġa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni. ²¹ Wariaġa i girugirumia nanare, Rava Natuna ina irage. Wate aiai da Rava Natuna i vibenabenamei; tauna, kovoġa ġaeġaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

²³ Anina ma wine kelakana i vaia ma i viegualau ma i verei da anataġui i umei, ²⁴ “Wei tau tarau i toi rava maġamaġau aubai ma au parivainuaġana bagibagina ina vovai-virewapani. ²⁵ Anina a ririwemi, wine eġa ana uma-melei da maranai God ana rava aubai ana vigulau.”

²⁶ Ma tau voepaepa welana i ravi ma i ġae au Ola Olives.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, tau i riwei “I girumi nanare,

God i riwa, ‘Tauviġamoga ana viraġeni ma sipu ina vilamonei.’

(Zekariah 13:7)

Ma nanare anataġumi ona ruba-tawaneu. ²⁸ Wate au vomairi au murina ana aivinao au Galili.”

²⁹ Peter i riwa, “Mepa da anataġui ina rubatawanem, wate eġa tau!”

³⁰ Iesu, Peter i riwei, “A ririwana-kauem da amadodo waguvarai muriai da kokoreko ina tou mara ruaġa; tam mara tonuġa ma bovieu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana irage. Eġa melanai ana boviemi!” Ma tau i ġelau i riwana tagogina i latoni.

Iesu au Gethsemani i raruġari

(Matthew 26:36-46; Luke 22:39-46)

³² Ma au Gethsemani i ġeta ma Iesu, ana tauvotaġotaġo i riwei, “Weka ona kiala ma ana raupari.” ³³ Ma Peter, James ma John i taravaini ma nuanuana i raġe ma nuanuana i bolakau. ³⁴ Ma tau i riwei, “Au nuabola i rata kava au orau da e vunuvunui. Weka ona mae ma ona vineneġana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei. ³⁶ I riwa i pa, “Abba Amau! Aiwai anataġuna tagotagogina tam awarim. Wei kovoġa kelakana ma waitawanei. Wate eġa tau au ġoana, wate tam am ġoana.”

³⁷ Ma Iesu i nememei ma tau tonuġa rarau-nuavurui i nelaġai. Ma Peter i riwei, “Simon! tam aiwai matavena? Mara aburuna uta vineneġana bo eġa?” ³⁸ Ma Iesu, tau i riwei, “Ona vineneġana ma ona raupari da eġa au raelara ona peu! Arua e ġoeġoei, wate tupua i ġokokokara.”

³⁹ Ma i naeme ma parina tagogina i raupariei. ⁴⁰ Maranai i nememei ma i nelaġai, i matamatave; tau, matai i vitali. Ma tau eġa ita aramanei aiwai ita riwei.

⁴¹ Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ġetai, ona inamai. Rava Natuna ina vibenabenamei ġo’apoapoe ravai au urai. ⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tauvotaġotaġo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai. ⁴⁴ Muriai da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona nai i ma ona inana-kauiei!”

⁴⁵ Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei. ⁴⁶ Ma tau, Iesu i vojijini ma i pani. ⁴⁷ Ma tagogi kampa i maimairi, ana sword

i taina-lavui ma Pirisi ġeġetlarana ana taunola taniġana i borituini. ⁴⁸ Ma Iesu, tau i riwei, “Taumi ana apiami o nei da ota panu bo, apamina tau amkwalakwalau? ⁴⁹ Marana patapatai taumi maiteni ta mamae au Tempol ma a viararamana ma eġa ota panu. Ma i girugirumia nanare, ina tupua.”

⁵⁰ Ma Tauvotaġotaġo anapapui, Iesu i voterei ma i ruba-tawanei.

⁵¹ Ma laraga tagoi, i vikareko ma Iesu i votaġotaġoi. Tau i ġoei da ita vojijini, ⁵² wate ana kareko i vojijini ma tauna ana kovakovana i ruba.

Tau, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

⁵³ Ma tau, Iesu i naiei Pirisi Ġeġetlarana. Pirisi Babadai, dogadogara ma Tarawatu Babadai mepa i vitagoejiana. ⁵⁴ Ma Peter i votaġotaġo da Pirisi Ġeġetlarana ana numa. Ma ana au debadeba, purusimani maiteni i kiala ma i viviairara. ⁵⁵ Pirisi Babadai ma mai Jew ai boru ġeġetlarana, * Iesu ana apoapoe i baiei da ita viraġeni; ma i baiana-avei. ⁵⁶ Matamata maġamaġau, Iesu i viwavu-morumoruei, wate ai viwavu taputapunei ava.

⁵⁷ Ma ġelau i vomairi ma wei wavuna morumoruna i kauie Iesu awarina, ⁵⁸ “Tauai a nonori tauna i riwa, ‘Wei tempolna i voavoia. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.’ ⁵⁹ Wate nanare ai viwavu taputapunei ava.

⁶⁰ Pirisi ġeġetlarana i mairi tau i naoi ma Iesu i vitara-virevirei, “Wei ravai e vivivauim ma eġa aiwai ma paribelei bo?”

⁶¹ Ma Iesu i genuana ma eġa ita paribelei.† Ma Pirisi ġeġetlarana i vitaraviravirana-melei, “Tam Keriso tauvilawana bo? Viviaianana Natuna bo?”

⁶² *Iesu i paribelana, “Tau tauna! Ma *Rava Natuna ona inanai, Vivirewapanana au oiena ina kiala ma mara ladanei ina nei.*

⁶³ Pirisi ġeġetlarana, amlona i ġaiġai ma ana gara i sikai ma i riwa, “Aiwai aubaina mata-mata ġelau tana ġoei? ⁶⁴ Taumi, vijiboġa o nonori ma ami notai aiwai?”

Tau anapapui i riwa, “Tauna ana ġo’apoapoe aubaina anina da ina iraqe!”

⁶⁵ Ma ġelau iraukarei ma Iesu i ovai ma naona i purui; i raunavanavai ma i riwei, “Ma pariverelai, ai ai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

⁶⁶ Ma Peter au gabaura i mamae ma Pirisi ġeġetlarana ana taunola guguini i ġetai. ⁶⁷ Marana tauna, Peter i nanai i viviairara; ma i nana-tunutunui ma i riwa, “Tam maiteni Iesu Nasaretei, ana tauvotaġotaġo!”

⁶⁸ Wate tauna i bovi ma i riwa, “Eġa ata aramane aiwai e bababaniei, a vinuanainei!” Ma i tuopu au metaeta ma [kokorereko i tou‡].

⁶⁹ Taunola guguini, Peter i nanai ma i raukarena-melei ma rava au ġereġere i maimairi i riwei, “Wei ravana, tau tagoi!” ⁷⁰ Wate Peter i bovi me.

Mara aburuna muriai, tau au ġereġere i maimairi, Peter i riwana-melei, “Tam anina, tau tagoi; aubaina tam, Galiliei!” ⁷¹ Ma Peter i riwa, “God au matana, tau a ririwa kaua, ravana o ririweia a vivinuanainei!”

⁷² Maratagoi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruaġa, tam mara tonuġa ma bovieu.* Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubanai boiboġi, pirisi babadai ma dogadogara ma tarawatu babadai anapapui i viboru* ma i vianina da Iesu i pani ma i veredamane i Pilate au urana. ² Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.” ³ Pirisi Babadai e vivivauim kaua maġamaġau aubai. ⁴ Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e vivivauim kaua maġamaġau aubai!” ⁵ Wate Iesu i genuana ma eġa ita paribelei. Ma Pilate i ba kaua.†

Iesu ana iraqe i vianinei

(Matthew 27:15-38; Luke 23:13-25; John 18:39-19:16)

* **14:55:** Mai Jew e ġoreġorei Sanhedrin. † **14:61:** Isaiiah i parivereta da Keriso ana au iraqe eġa ina gagaloana-melei. (Isa 53:7). ✨ **14:62:** Da 7:13 ‡ **14:68:** Wei riwana buka au wadubo nonoana eġa ita mamae. * **15:1:** Mrk 14:55 Sanhedrin † **15:5:** Mai Rome ai tarawatu e mamae da marana i viwauim ma tauetara eġa uta paribelei lamna tam anina wavu ma varai.

⁶ Tau i a kua maemaena da Raḡona Torelana au marana, Pilate, panipani tagogi, rava ai ḡoanei e ruperupeni ma e vovoterei da e nena. ⁷ Orotō tagogi wavana Barabas; tauna Rome gabemani i viḡaviei ma i pani da panipani au numana i mamae. Ana rava maiteni tauviraḡena. ⁸ Ma patara i ḡeta da Pilate ita vibaḡai da panipani tagogi ita rupeni Raḡona Torelana au marana. ⁹⁻¹⁰ Pilate i paribelei, “Taumi o ḡoḡoḡei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. ¹¹ Wate Pirisi Babadai, patara i egari da Pilate, Barabas ita rupeni ma eḡa Iesu. ¹² Pilate, patara i paridadana-melei i pa, “Tauna o ḡoreḡoreia mai Jew ai gulau mena ana kauanei?” ¹³ Tau i garara, “Ma tuparatui!” ¹⁴ Pilate i riwa, “Aiwai apoapoena i kauiei?” Ma tau i garara guratana, “Ma tuparatui!” ¹⁵ Pilate i ḡoei da patara ita vinuubai ma Barabas i rupeni ma sorodia i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(*Matthew 27:27-31; John 19:2-3*)

¹⁶ Sorodia, Iesu i taravaina-ruiiei Pilate ana au numa ma ai rava ḡelau i ḡoreiai. ¹⁷ Ma gara lebalebarina* [*me gulau ana gara*] Iesu i vioteni ma kunuteia ai donadonanei i viri da au kolana i terei. ¹⁸ Ma vinamana i raukarei ma i garara, “Eḡalau mai Jew ai gulau!” ¹⁹ Ma kolana gonuei i raviravi ma i ovaovai. Ma ae-tutuiei i mae-ḡaira au doa ma i raudunelei ma i vivinamei. ²⁰ Ma i vijiboḡa vorovei ma gara lebalebarina i voḡiḡi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(*Matthew 27:32-44; Luke 23:26-43; John 19:17-37*)

²¹ Tau i nena ma Simon i nelaḡai, rava Sairinie§ (tauna Rufus ma Alexander amai). Simon wapuei i nenei. Ma sorodia, tauna i egari da Iesu ana korosi i avari. ²² Tau, Iesu i naiei da gabu i ḡoreḡorei Golgotha, lamna anona unu gabuna. ²³ Sorodia, wine bunama myrrh maiteni i virai ma Iesu i veredadani, wate tauna i geduaiei. ²⁴ Ma Iesu i tuparatui ma ana gara, tau i ava au orai i ḡutai.*

²⁵ Ubaubanai 9 kilok nanare, Iesu i tuparatui. ²⁶ Aniviwavuna i girumi ma i tutui, “Mai Jew ai gulau.” ²⁷⁻²⁸ †Danedanenei ruaḡa, Iesu au ririvana i tuparatui; tagogi au oiena ma ḡelauna au kelakelauna.†

²⁹ †Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuḡa ma voa-melei. ³⁰ Ma vilawana-melem ma korosiei ma ḡairai!”

³¹ Ma nanare Pirisi Babadai ma Tarawatu Babadai maiteni, Iesu i vivinamei, “Rava ḡelau i vilawani, wate ainelana ita vilawana-melana-avei. ³² Keriso Tauvilawana, Israel ana gulau; marina korosiei ma ḡairai ma tana inana da tana vitumaḡanei!” Danedanenei i tupatuparatui maitenai, Iesu i vinamei.

Iesu ana iraḡe

(*Matthew 27:45-56; Luke 23:44-49; John 19:28-30*)

³³ Ma au benai dobu anapapuna i waguvarei da 3 kilok au bigai. ³⁴ Lamna maranaina Iesu ponana i rata ma i kwatu, “Eloi, Eloi, lama sabachthani?” Lamna anona, “Au God, au God aiwai aubaina u netawaneu?” ³⁵ Ma rava ḡelau au ḡereḡere i maimairi i nonori ma i riwa, “Ona rautaniḡanei, Elijah e kwatukwatuei!” ³⁶ Ma rava tagogi i ruba da gara ai au damona i pani ma au wine tomatomana i vialoi ma i voepai Iesu au ipirina ma i riwa, ‡ “Ona vipaipai ma tana inana mepa da Elijah ina nei da ina tereḡairei.” ³⁷ Ma Iesu ponana i rata ma i kwatu ma i lavutu tawanana. ³⁸ Ma Tempol au orana anitereḡaḡara au pouna i wanasikai au tepana da i ḡaira au doa. ³⁹ Ma sorodia ai bada, Iesu au naona i maimairi; i ‘nanai da i lavutu tawanana ma i riwa, “Wei anina God Natuna.” ⁴⁰ Waivine ḡelau aueia i mae ma i raraubiga: Mary Magdalene ma Mary (James keikeina ma Joses§ aloi) ma Salome. ⁴¹ Tau, Iesu i votaḡotaḡoi ma i vovoagui maranai au Galili i mamae ma waivine ḡelau maḡamaḡai, tauna maiteni i ḡeḡae au Jerusalem, anapapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

‡ 15:17: Eng. purple. § 15:21: Eng. Cyrenian. * 15:24: Tau i ḡaima i tawanei me dice da aiwai garana ita vaia.
 † 15:27-28: Isa 53:12 † 15:27-28: Giruma ḡelau waduboi vs 28 e mamae Ma aiwai i kaukaueia lamna peroveta i ririweia i tupua, Tau i ‘nanai me tau i ḡo‘apoapoe taukauei. Isa 53:12 † 15:29: Mrk 14:58 † 15:36: Psa 69:21 peroveta i girumi da Keriso ita verei. § 15:40: Au Mat 27:56, Matthew i girumijoseph ma eḡa Jose.

42-43 Ma au biga i tuturiai Joseph Arimathea^e* tauna rava gaegeaena tagogi boru getelarana au orana. Tauna God ana vigulau ana nei i vipaipaei. Ma vokaukaua marana (Lamna Sabat au naona)[†] ma Joseph ana tepatorana, Pilate awarina i rui ma Iesu taubeuna i vibaŕei. 44 Pilate i baiei da Iesu boiboŕi i raŕe. Tauna, *sordia* ai bada i kwatuei ma i vitara-virevirei da Iesu i raŕe bo eŕa? 45 Maranai *sordia* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

46 Joseph, gara maiana gaegeaena i gimara i Iesu tupuana i tere-gairei. Gare i umai ma au guba tupuana i vimataveni ma gaima gaegeaena i kaipeuri da kokoaga metaetana i viaitomeni. 47 Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

1 Ma Sabat au murina, Mary Magdalene ma Mary - James keikeina alona ma Salome, bunama gabuŕabui i gimara i da i naiei da Iesu tupuana ita buloi.* 2 Ma Sunday ubaubanai boiboŕi maranai madeŕa i gogogo, tau i nae au kokoaga. 3 Ma i nena ma i babani, "Aiai aubaita gaima kokoaga au metaetana ina kaipeura-tawanei?" 4 Maranai tau i taepai, i 'nanai da boiboŕi gaima i kaipeura-tawanei - gaima gaegeae kaukauana. 5 Maranai i rui au guba ma oroto laragana ana gara ararapoirina i 'nanai au oiena.[†] Ma tau i orai i auepai. 6 Orotu laragana i riwa, "Eŕa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eŕa weka! Tau i weka taubeuna i vimataveni. 7 *Marina ona nae ma ana tauvotaŕotaŕo ona riwei, ma Peter eŕa nuanuami ina vuru da Iesu e vivinao au Galili. Kampa ona inana i ririwemi nanare." 8 Tau i opu ma kokoagei i viruberubei ana ini sisisi ma ana rovoi. Tau i rovo kaua, lamna aubaina eŕa rava ita riwei.

Mark 16:9-20

Mark Riwana Aiaina damona lamna wariŕa i vine-boai. Ma rava gelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eŕa

9 Iesu iragelei i vomairi me au Sunday ubaubanai boiboŕi ma i ainae da Mary Magdalene awarina i eŕa. Maraotai Iesu, Mary awarina arua-apoapoei seven i viopuni. 10 Iesu, ana tauvotaŕotaŕo i vivinuabola ma i toutou ma Mary i geta da i pariverei. 11 Ma Mary i pariverei da Iesu i lawana me ma tauna matanei Iesu i 'nanai. Wate tau i eŕa ita vitumaŕane.

Iesu, tauvotaŕotaŕo ruaŕa awari i eŕa

12 Wei au murina Iesu inananana tapuna ma ana tauvotaŕotaŕo ruaŕa awari i eŕa; maranai tau i nena au melagai. 13 Tau i naeme ma tauvotaŕotaŕo ŕelau i vieŕei. Wate tau i nanare eŕa ita vitumaŕane.

Iesu, Tau i 11 awari i eŕa

14 Muriai tau i 11 i amam ma Iesu awarii i eŕa. Ma i eni aubaina tau i orai i bado ma eŕa ita vitumaŕana maranai rava, i riwei da Tauna i vomairi me. 15 *Iesu ana Apasol i riwei, "Ona nae dobu au anatapuna. Ma God Riwana Aiaina ona jimei rava anatapai awarii. 16 Aiai da i vitumaŕana ma i babaito; tauna ina lawana. Ma aiai da eŕa ita vitumaŕana ina kovoŕi. 17 Ma tau i aiavoi da i vitumaŕana, rewapana ina verei da kaua babai ina kauai. Ma arua-apoapoei ina viopuni ma pona tapunei ina babani. 18 Tau i, mota uraiei ina vaia ma waiawa ina umai ma eŕa ina rauputei. Ma urai doridoriai au kolai ina terei ma ina lawana."

God, Iesu i ŕaiei au Mara

19 *BADA Iesu, awari i babani vorovei. Ma tauna i ŕaiei au mara ma God au oiena i kiala. 20 Tauvotaŕotaŕo i opu ma dobu au anatapuna i raruugugula. Ma BADA, tau i voagui ma kaua babai i kaukauei da tauvotaŕotaŕo aiwai i bababaniei i vovai-virewapani.

* **15:42-43:** Eng. Arimathea. † **15:42-43:** Mai Jew ai Sabate, madeŕa e neneulai au Friday e vivikarei da madeŕa e neneulai au Saturday e kwakwa. Mai Jew ai Tarawatu e ririwa da rava i 'raŕe lamna marana tagogina ina doboi. Sabate amadodo madeŕa e neneulai ina vikarei lamna aubaina Joseph i volaŕilaŕina da Iesu taubeuna ita doboi. * **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ŕoei da wei kauai ita votaŕotaŕo. † **16:5:** Tupua i vimataveni au oiena i kiakiala, ana gara ararapoirina. * **16:7:** Mrk 14:28 * **16:15:** Act 1:8 * **16:19:** Act 1:9-11

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano gaegeaena lamna i goei da rava ita viegei da menanare Arua Vivivireina Iesu ana tauvotagotaogo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana. (1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumašana. Tauamgiruma ana nota gaegeaena da wei bukana tauivavana ita pariverei da kerisiana avena Rome gabemanina ita viviavie. Kerisiana vitumašana lamna mai Jew ai vitumašana e kaukauna-paiei. Wei bukana i gutai da rağarašana tonuğa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana gae au murina Ekalesia au Jerusalem ai nola i vikarei;

Palentine taun gelaui awari i tua-nae;

Ma i tua-nae au Mediteranean da i nae au Rome paratana. Wei bukana ana kaua gaegeaena lana Arua Vivivireina i nolanola, ma rewapana tauvitumašana au Jerusalem i verei au Pentecost. Ma wei au bukana i viegeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariaga kerisiana ai pariverena i tere-tagogiei raugugula au mağamağau, ma kaua ma ai nola i kaukaui anatapui. Wei au bukana i girumi da wei parivai-nuaganana ana rewapana tauvitumašana ai au lawana ma kerisiana ai au voepaepa i viatataieta.

Buka rereğana 1.

Vokaukaua tauvimatamata aubai (1:1-26)

Iesu ana tarawatu ma ana parivainuagana damona (1:1-11)

Judas Epaiana (1:12-26)

Tauvimatamata au Jerusalem (2:1-8:3)

Tauvimatamata au Judea ma Samaria (8:4-12:25)

Paul ana nola (13:1-28:31)

Paul ana vağai tagogi (13:1-14:28)

Boru au Jerusalem (15:1-35)

Paul ana vağai viruaina (15:36-18:23)

Paul ana vağai vitonuina (18:24-21:16)

Paul i vipanipani au Jerusalem, Caesarea, ma Rome (21:17-28:31)

Iesu ana Apasol i parivainuagani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukaui ma i viviararamana a pariverem ² i nae da ana gae au marana. Muriai da Iesu i gaiei au mara, Tauna Arua Vivivireinei ana apasol vinevinei riwa bagibaginei i pariverei. ³ Iesu ana irage au murina i vieğana-melei ana apasol awarii. Ma kaua mağamağau i kauei da apasol i vitumašana kaua da Tauna anina i lawana me. Tau awarii i eğa au pom 40 au orana ma God ana vigulau i babaniei. ⁴ Maranai ana apasol maiteni i vitagogiei ma i riwana-guratei i pa, “Eğa Jerusalem ona oputawanei, wate pulona amau i paripari-vainuaganimi ona paini, maraotai a ririwemi nanare. ⁵ *John wairei i babataito, wate mara aburuna ava Amau, Arua Vivivireinei taumi ina babataitomi.”

God Iesu i gaiei au Mara

⁶ Muriai maranai Iesu ma Apasol i vitagogiei ma tau Iesu i vitara-virevirei i pa, “Bada! Marina, Israel ana[†] vigulau ma vere-melei bo?”

⁷ Ma Iesu i paribelei, “Amau ainelana ana rewapanei mara ma iri e vivibadei, aubaina da taumi eğa ona aramanei. ⁸ *Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.” ⁹ *I babani vorovei ma au matai God Iesu i gaiei au mara. Ma apau i nei da i purui ma tau eğa ita inana-melei.

* 1:1: Bukana au naona i girugirumi lamna Luke ana Gospel * 1:5: Mrk 1:8 † 1:6: Rome gabemanina Juda i vibadei wei au marana, Mai Jew wei eğa ita goei, ma i goei da ita virai. * 1:8: Mrk 16:15 * 1:9: Mrk 16:19

¹⁰ Ma tau i gōgouta au mara ma nelara ruağa ai gara ararapoiri au ririvai i raumairiei. ¹¹ Ma i riwa, “Mai Galili, aiwai weka o maimairiei ma o gōgoutatei? Wei ravana menanarena o inana i gāenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i gaira me au Jerusalem lamna eğa uama ma au geregere. ¹³ *Ma au Jerusalem i gēta ma i gae numana i mamae lana au tepana au vatavatara. Tau ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot[‡] ma Judas - James natuna. ¹⁴ Ma wei ravai mara patapatana i vivitagogiei ma i raraupari gogona, waivine gēlaui ma Iesu ana roaroa ma aloi Mary maiteni kampa.

¹⁵ Wei au marana, tauvitumağana 120 i vitagogiei ma Peter i vomairi ma wenanare awari i babani, ¹⁶⁻¹⁷ “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariğa gulau David i riwei da ina tupua; ma aiwai i ririwei anina nanare i tupua.” ¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu. ¹⁹ Ma rava anatapai au Jerusalem wei irağena riwana i nonori, lamna aubaina tau nai dobona ai ponei i viwavai Hakeldama, wei anona Tara Doana.

²⁰ “Wariğa Gulau David i girugirumia, nanare i tupua,

Ana animae ina kwakwava,

ma eğa aiāi au orana ina me.

(Psalm 69:25)

Ma

rava gēlauna ana nola ina vaia.

(Psalm 109:8)

²¹ *Lamna aubaina marina awarita, rava gēlauna tana vinei da ina raviepaia. Tauna ravanana Iesu maiteni ta bababara-nae madeğa tonuğa au orana, ²² John rava i babataitōi au marana ma i nae da Iesu i gāiei au mara. Ma maiteni tana nola ma rava tana riwei menanarena God Iesu irağelei i vovaimairini.”

²³ Ma tau i rava ruağa i vinei, Joseph-Barsabas (ana wava gēlauna Justus) ma Matthias. ²⁴⁻²⁵ Anina ma tau i raupari, “BADA tam rava anatapai orai u aramanei. Ma vieğelai da wei ravai ruağa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.” ²⁶ Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i gairai

¹ Pentecost torelana i gētai ma tauvitumağana anatapai numa tagogi au orana i vitagogiei.

*

² Maratagogi gugura gāeğæna, nonorana me ive vivirewapanana marei i gairai ma tauvitumağana i mamae numana i vioai. ³ Tau i purapura inanana me ai menamenana i nanai, i gairai ma rava tagotagogi ava au kolai i kiala. ⁴ Ma Arua Vivivireina anatapai i vioai ma pona taputapune i ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui. ⁶ Ma patarai kampa i viruberubei, ma i nonori da gugurana lamna tauvitumağana tau tagotagigiava ai ponei i bababani ma tau ai nota i kwa. ⁷ Tau i anatapai i baei ma taui ava i babani vivira i pa, “Wei mai Galili bo?” ⁸ Ma menanarena da anataputa awarita ata ponei e bababani! ⁹⁻¹⁰ Tauta gēlauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au gereğere, ma gēlauta mai Rome, ¹¹ gēlaui mai Jew ma gēlaui Jentail wate inibori i vaia da i vimai Jew. Ma gēlauta mai Crete ma mai Arabia. Wate God kaua gāeğæna i kaukaeia, ata ponei i bababani ma ta nononori!” ¹² Tau i anatapai i vinuanaina, nuanuai i rağarağa ma i bababani vivira, “Wei aiwai kauana e tuputupua?”

⊛ **1:13:** Mrk 3:16-19 † **1:13:** Rava ununurana. Wei ravai mai Rome ai gabemani e viviğaviei. ⊛ **1:21:** Mrk 1:9;

Mrk 16:19 § **1:26:** Wei kalona wenanare: mai Jew wava gaima muomuoi awari i girugirumi ma e tawatawanei, ma aiāi ana namba i eğa lamna tauna ina vaia. Tau i vitumağana da wei kauana awarinei God tau i ina viatataiei da aiāi ita vinei.

(Pro 16:33) * **2:1:** Mai Jew ai Rağona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

13 Wate gēlauri tau i vinamei i pa, “Wei ravai i uma bua!”

Peter rava awarii i raugugula

14 Anina ma Peter i vomairi Apasol 11 maiteni, ma ponana gaegeaenei patara awarii i babani, Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kaua. 15 Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

16 Wei lamna wariaġa peroveta Joel i ririweia e tuputupua:

17 Mara au damona,

Aruau rava anatapui awari ana iwaġi.

Ma natunatumi nelarai ma waivinei riwau ina jimei,

ma nelara voui mataiei kaua ina inana,

ma babada magumaguri rauboniei kaua ina inana.

18 Wate nanare, Aruau ana iwaġi au taunola nelarai ma waivinei awarii,

ma ina vitaubabani.

19 Ma kaua babai au mara ana kauei,

ma au dobu mataira ana vieġai

ai araratana, tara ma bau potopotona.

20 Ma madeġa ina waguveri

ma nawaravi ina ravitararai,

muriai da BADA ana mara gaegeaena ma boruborimana ina nei.

21 Nai au marana aiavoi da BADA awarina e viviġore agu aubaina BADA tau i ina vilawani. (Joel 2:28-32)

22 Ma Peter i babani me:

Mai Israel ona rautaniġana: God Iesu Nasaretei i vovai-virewapani da kaua babai, ma mataira gaegeai i kauei da ita viatataiemi da tauna anina Godei i nei. 23 *Wate God wariaġa i vioge i ma ana ġoana nanare da Iesu au urami i terei, ma taumi ġo'apoapoe ravai ai aguei, Tauna au korosi o tuparatui da o virage. 24 *Wate God, Iesu iragelei i vovaimairini, ma irage iniviarana i vaitawanei ma irage eġa tagotagogina da tauna ita vojijini. 25 Wariaġa David Iesu i bababaniei maranai i riwa:

Tau a inana BADA God au naou mara au anatapuna.

Tauna au oieu lamna aubaina eġa ana rovo.

26 Lamna aubaina nuaiiai orau i oai ma menau i morelana,

ana irage ma a aramanei da tupuau ma paina-kauei.

27 Ma aruau eġa rava irairaġei ai au dobu ma voterei,

ma tam eġa am taunola vivivireina tupuana ma voterei da ina buda.

28 Tam lawana etanaina u viatataieu,

ma Tam maiteni a mamae ma a vinuaiai kaua.

(Psalm 16:8-11)

29 Au rava, A riwana-kauei da amata gulau David i raġe da i doboi, ma ana kokoaga weka e mamae. 30 *Wate David lamna peroveta, ma i aramanei da God i parivainuaġani da ana damei gulau ina opu, me tauna nanare. 31 Ma David i 'nanai God muriai aiwai ina kauei ma i riwa,

Keriso ina vomairi me,

ma tupuana eġa rava irairaġei ai au dobu ina voterei da ina buda.

(Psalm 16:10)

32 Ma God Iesu-na tagogina iragelei i vovaimairini, ma tauai anatapui ai a vimatamata. 33 Ma God i ġaiei ma au oiena i vikialai. Ma Arua vivivireina i verei me i parivainuaġana nanare, ma nai Aruana tagogina Iesu awariai i waġi, lamna marina o nononori ma o inainana. 34 *David eġa ita ġae au mara, ma wate i riwa, BADA au Bada i riwei, “Au oieu ma kiala 35 ma am ġavia au ae karem ana terei.”

(Psalm 110:1)

36 Lamna aubaina mai Israel anatapumi ona aramana-kauei da wei ravana Iesu o tupatuparatuia, God i terei da BADA ma Tauvilawana.

37 Ma maranai rava wei riwana i nononori, tau i orai i rautonai da Peter ma Apasol gēlauri i riwei, “Varevareiai, tauai aiwai ana kauei da ana lawana?”

38 Ma Peter i paribelei, “Taumi tagotagogi ava Iesu Keriso wavanei ona rupena ma ona babataito ma ami ġo'apoapoei ina nota-tawanei, ma God ana pulo Arua Vivivireina ona vaia. 39 Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

† 2:15: Mai Jew tau i bigai sia e aniani ma wain e umaumi. * 2:23: Mrk 15:24 * 2:24: Mrk 16:6 * 2:30: 2Sa 7:12-13 * 2:34: Psa 110:1

40 Ma Peter riwa ġelau maiteni rava i vinua-terenei, ma i egari, “God ona vianinei da ina vilawanimi, ma eġa kovoga ona vaia.” 41 Ma rava maġamaġau Peter ana babani i vitumaġanei ma i babataito ma nai au marana rava 3,000 ai au boru i rui.

Tauvitumaġana i mae gogona

42 Ma tauvitumaġana Apasol ai viararamana i nononori, ma i viboruboru, i amam ma i raraupari gogona. 43 Apasol kaua babai ma mataira ġaeġae maġamaġau i kaukauei ma anat-
apui i rovo ma God i vivirana-kauei. 44 *Ma tauvitumaġana anatapui gabu tagogi i vivitagogiei ma aiwai ġariei ai rava maiteni i ġutaġutai. 45 Tau i ai doa, ai numa, ai wapu ma ai purapura i gimagamarei ma manena ai rava ġelau maiteni i ġutaġutai. 46 Tau mara patapatai au tempol i vivitagogiei, ma ai au numa ana nuaiaii ma ana morelanai i amam gogona. 47 Ma tau i God i vovoepapai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaġana ai boru i viviratai.

3

Peter, oroto aena gwaġagwaġana i vilawani

1 Mara tagogi au bigai 3 oklok, Peter ma John pari aubaina i ġeġae au Tempol. 2 Ma oroto tagogi aena gwaġagwaġana i tupuei, ma mara au anatapuna ana rava i avavara neiai da Tempol metaetana, e ġoreġorei, metaeta aiaina, kampa i vivikialai ma rava i rurui tempol au orana i vivigigimane mane aubaina. 3 Maranai i ‘nanai da Peter ma John aburuna ava da au metaeta ita rui, ma i vibaġai mane aubaina. 4 Peter ma John orotona i ‘nana-tunutunui ma Peter i riwa, “Ma inanaiaii!” 5 Ma orotona tau i ‘nanai ma i notanotai da aiwai awarii ita vaia. 6 Ma Peter, orotona i riwei, “Awariu silva ma gold eġa wate aiwai awariu lamna ana verem. Iesu Keriso Nasaretei, wavanei ma vomairi, ma babara!”

7 Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana, 8 ma aenei i viauepa ma babara i vikarei. Anina ma tau maiteni i rui au tempol ma tauna tempol oraninei i bababara, i viviauepa ma God i vovoepapai. 9 Ma rava anatapui orotona i ‘nanai i bababara ma God i vovoepapai, 10 ma i aramane da tauna ravana tagogina tempol metaetana e ġoreġorei *inanana aiaina* au naona, i kiakiala ma i vivigimana. Ma rava anatapui i ‘nanai aiwai i tupua wei orotona awarina ma i ba-guratana.

Peter patara awarii i babani

11 Ma orotona Peter ma John i vojijini ma rava anatapui i bana-kauei, ma i viruberubei tau awari au lovelove e ġoreġorei, Solomon ana lovelove. * 12 Ma maranai Peter patarai i ‘nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunui, apamina tauai ai rewapani bo ai vipatutuei, wei ravana a kauei da i babara?

13 *Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraġeni, ma Pilate au matana o geduaiei. Pilate i ġoei da ita rupeni wate taumi eġa ota vianinei. 14 *Iesu lamna rava vivivireina ma jijimanina, wate o geduaiei. Ma Pilate i ġoei da Iesu ita rupeni, wate taumi o ġoei da tauviraġana i rupeni aubaimi. 15 Ma taumi lawana maemae-nonoana tauvereina o viraġeni, wate God i vilawana-melei, tauai wei a vimatematei. 16 Wei ravana aena gwaġagwaġana Iesu au wavana i vitumaġana ma lamna aubaina i lawana. Taumi o aramane ana doria menanare, Wate ana tumaġana Iesu awarina i vilawani.

17 Ma au rava marina a aramane da taumi ami babada maiteni Iesu o viraġeni, aubaina taumi eġa ota aramane da tauna tauvilawana. 18 Wate wei lamna wariaġa God ana peroveta anatapui i ririweia i tupua, God i riwa da ana tauvilawana ina vinuapoapoe. 19 Ami ġoa apoapoe Ona voterei ma ona mae-taviremi God awarina da tauna ami ġo’apoapoe ina nota-tawane. 20 Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneia. 21 Iesu au Mara ina mae da God kau anatapui ina ravivouni, me God ana peroveta vivivirei wariaġa i ririweia nanare. 22 *Moses i riwa, “BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniġanana-kauei. † 23 *Ma aia i da wei perovetana eġa ina rautaniġane lamna God ana rava awariei ina vilamonei.”

* 2:44: Act 4:32-35 * 3:11: Solomon ana lovelove tagogi tempol au orana e mame. Wei lamna gari au ririvana ma ana tuatua maġamaġauna. * 3:13: Exo 3:15 * 3:14: Mrk 15:6-14 * 3:22: Deu 18:15, 18 † 3:22: Mai Jew e ririwa da Moses lamna ai peroveta ġaeġaena. * 3:23: Deu 18:19

²⁴ Peroveta Samuel ma muriai Peroveta maḡamaḡau, kaua i ririweia marina e tuputupua. ²⁵ *Taumi nai perovetai natunatui ma taumi maiteni parivainuaḡana bagibagina au orana. Au baina God Abraham i riwei, “Am epaepaia awariei dam anatapu i dobu ana viaiaini.” ²⁶ Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami ḡo’apoapoe ota opu-tawanei ma ota nei Tauna awarina.

4

Jew babadai Peter ma John i etarei

¹ Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ḡelau † i ḡetai. ² Taui amloi i ḡaiḡai kaua Peter ma John awari aubaina taui i viviararamana da God, Iesu iraḡelei i vovaimairini ma wei i viatataiana da God rava anatapu iraḡelei ina vovaimairini. ³ Taui Peter ma John i pani ma au i pom aubaina panipani au numana i terei da i mae mara. ⁴ Wate rava maḡamaḡau riwa i nonori ma i vitumaḡana, ma ai maḡa nelara 5,000 waivine eḡa ita iavi.

⁵ Ma mara i tom ma Jew babadai, dogadogara ma tarawatu babadai au Jerusalem i vitagogiei. ⁶ Ma pirisi ḡeḡetelarana Annas kampa ma Caiaphas, John, Alexander ma pirisi ḡeḡetelarana ana rava maiteni. ‡ ⁷ Ma taui Peter ma John i nei da au naoi i vimairini ma i riwei, “Aiwai rewapananei, ma aiai wavanei wei o kauēi?”

⁸ Arua Vivivireina Peter orana i vioai ma taui i riwei, “Rava ai babada ma dogadogara; ⁹ tauai kaua aiaina a kauēi gwaḡagwaḡana awarina ma amadodo taumi o vitara-virevirelai, da menanare tauna i lawananei. ¹⁰ Ma wei ona aramana-kauēi, da taumi ma mai Israel anatapu, da Iesu Keriso Nasaretei o tuparatui, Wate God tauna iraḡelei i vovaimairini ma tauna wavanei wei orotona au naomi lawalawaina e maimairi. ¹¹ Taumi tauvoa nai ḡaimana o geduaiei, wate wei ḡaimana lamna numa ogona, numa ana tapuna e vovojijini. §

¹² –Lamna aubaina Iesu ainelana ina vilawanita. Ma God eḡa aiai ḡelauna au dobu rewapana ita verei da ina vilawana.”

¹³ Ma taui Peter ma John ai tepatora inanai ma maranai i aramanei da taui eḡa girugirumai, ma i baei. Ma i aramanei da taui Iesu ana tauvotaḡotaḡo. ¹⁴ Ma wate i ‘nanai oroto i vililawania Peter ma John maiteni i maimairi, lamna maranai taui gamoi i pota. ¹⁵ Anina ma Peter ma John i riwei da boru gabuna i opu-tawanei, ma taui ava i vitarairavira vivira. ¹⁶ Taui i vitaraviravira-viravira i pa, “Aiwai tana kauēi wei nelarai awari? Rava anatapu i Jerusalem i aramanei da taui kaua babai i kaukai, lamna eḡa tana boviei. ¹⁷ Wate tana viḡaei da wei kauai eḡa ina tua rava ḡelau awari, ma riwa bagibaginei tana viḡaei da eḡa aiai awarina Iesu wavanei ina raugugula.”

¹⁸ Anina ma taui i ḡorei da i rui me, ma riwa bagibaginei i viḡaei da eḡa aiai awarina Iesu wavanei ina raugugula bo ina viararamana. ¹⁹ Wate Peter ma John taui i paribelei, “Taumi ami nota aiwai. Tauai God ana voteletei bo taumi? ²⁰ Tauai aiwai a inainanaia ma a nononoria babanina eḡa ana voterei.”

²¹⁻²² Wei Orotona i vivilawani lamna gwaḡagwaḡana ma ana madeḡa 40. Lamna aubaina rava anatapu God i vovoepapai, ma babada eḡa ita aramanei menanare Peter ma John ina kovoganei. Ma i parivairovorovo-melei ma i paritawanei da i nae.

Tauvitumaḡana God i viḡaei agu aubaina.

²³ Peter ma John i nae me ai rava awari ma pirisi ḡaeḡaei ma dogadogara aiwai i ririweia taui i vieḡei. ²⁴ *Maranai tauvitumaḡana wei riwana i nonori, taui anatapu i raupari gogona God awarina:

BADA tam ai gulau, Tam mara, dobu, boga ma anatapuina au orana maemaei taukaueina. ²⁵ Tam Arua Vivivireinei am taunola, amaia David gamonei u babani ma u riwa,

Aiwai aubaina rava awariai e mejimeji,

ma aiwai aubaina ai oga e taratara labalabai?

²⁶ *Ma dobu ai gulagului i vokaukaa ma babada ḡaeḡaei ḡelau maiteni i vitagogiei da*

* **3:25:** Gen 22:18 † **4:1:** Tempol tau-painina lamna anatapuina au tempol e inainana-vaitetei (purusimani). Taui pirisi ḡeḡetelarana ana taunola. ‡ **4:1:** Sadusi taui iraḡelei vomairime eḡa ita vitumaḡanei § **4:6:** Mai Rome Caiaphas i vinei da Pirisi ḡeḡetelarana, poiana Annas epaiana. Wate mai Jew ai au giu da aiai pirisi ḡeḡetelarana vaivaina i vaia, tauna anina ina mae da au iraḡe. Luke e ririwa da Annas tauna pirisi ḡeḡetelarana. § **4:11:** Mai Jew ai numa ḡaimēi i voavoai. Iesu tauna anina God ana Tempol vouna ogona. (Eph 2:19-21, Isa 28:16). * **4:24:** Exo 20:11

BADA ma ana tauvilawana* maiteni i viġaviei.

(Psalm 2:1)

²⁷ Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulbuloloia i viġaviei. ²⁸ Ma tam am rewapani ma am ġoanei am oga menanare u tarataranei marina nanare i tupua. ²⁹ BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei. ³⁰ Uram ma viloloi da ma vilawana ma kaua babai ma mataira ġaeġaei ma kauai, am taunola Vivivireina Iesu wavanei.

³¹ Ma pari au murina, tau i mepa i vivitagogiei gabuna i vigu. Ma Arua Vivivireina anatapui orai i vioai. Ma ana tepatorai God riwana i raugugulei.

Tauvitumaġana ġariei i ġutaġutai

³² ³² Tauvitumaġana anatapui ai nota ma orai tagogi. Ma ai purapura tagogi ma eġa aiwai ita nuanei. ³³ Ma Apasol ana tepatorai ma rewapani BADA Iesu ana irage, ma ana vomairi me i raugugulei. Ma God ana viaiaina ġaeġaena tau anatapui awari i peu. ³⁴⁻³⁵ Ma tau i au orai eġa aiwai ita voladaġei aubaina, ai rava ġelau i ai doa bo ai numa i gimagimarei ma manena i neneiai Apasol awari i tereterei, ma aiwai i vovoladaġei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu. ³⁷ Tauna ana doa i gimarei, ma manena i neiai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei. ² Ma airuaga i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagimarei manena navanavana u nuanei? ⁴ Doa lamna tam ġarime i da uta gimarei bo eġa. Ma maranai u gimarei lamna manena tam ġarime i da uta verenei, aiwai aubaina nota apoapoeni au oram i rui? Tam eġa rava awarina uta moru, wate God awarina u moru.” ⁵⁻⁶ Maranaina Ananias wei riwana i nononori, tauna i peu da i raġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

⁷ Tau i eġa ita mae guratana, ora tonuġa nanare ma awana i nei, aiwai i tupua eġa ita aramanei. ⁸ Ma Peter wavine i paridadanei, “Abe uta riweu, tam awam Ananias maiteni doa o gimagimarei maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodobo i inanai u metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i raġe. Maranai nelara i rui au numa ma i 'nanai da wavine i raġe, anina ma i avara-opuneni da awana au ririvana i doboi. ¹¹ Lamna maranaina ekalesia anatapui, ma rava aiavoi da wei riwana i nonori i rovo kaua.

Apasol rava maġamaġau i vilawani

¹² Ma Apasol mataira ma aniba kauai maġamaġau i kaukaei rava awari. Ma tauvitumaġana Solomon ana au lovelove i vivitagogiei. ¹³ Wate rava ġelau ai au boru ruina i rovoei, wate rava tau i vivirana-kauai. ¹⁴ Wate nelara ma waivine maġamaġau Iesu awarina i vitumaġana ma tauvitumaġana ai au boru i rui. ¹⁵ Ma lamna aubaina rava ai rava doridoriai i avavara-opuneni au eta ma ai au animatave i vimataveni, da Peter inii ita vodadani bo eġa da ġouna tau i ita ġouni da ita lawana. ¹⁶ Ma melagai ġelau Jerusalem au ririvana ravai maġamaġau ai rava doridoriai, ġelau arua-apoapoei i rui ruinia i neiai ma anatapui i vilawani.

¹⁷ Anina ma pirisi ġeġetelarana ma ana rava mai Sadusi anatapui orai unura i oai. ¹⁸ Ma Apasol i pani, ma panipani au numana i terei. ¹⁹ Wate waguvarai BADA ana anela i nei da panipani numana metaetana i votawanei, ma tau i taravaina-opuneni ma i riwei, ²⁰ “Ona rui tempol au orana, ona mairi ma lawana vouna riwana anatapuna rava ona pariverej.”

²¹ Anela i ririwei nanare, tau i tempol i rui ma rava viararamanai i vikarei. Nai maranai pirisi ġeġetelarana ana rava maiteni i ġetai ma boru ġaeġaena e ġoreġorei Sanhedrin i terei. Ma rava i paritawanei au panipani numana da Apasol ita neiai awari. ²² Tau i panipani au numana i ġeta ma i baina-avei, ma i naeme da i vieġa. ²³ I pa, “Panipani numana anina i gudu-kauai, ma tauvipapai au metaeta i maimairi; wate maranai tauai metaeta a votawanei lamna eġa aiwai kampa.” ²⁴ Maranai tempol taupainina ai bada ma pirisi babadai wei riwana i nonori, tau i vinuanaina da aiwai i tupua.

* 4:26: Wei lamna Keriso. ✧ 4:27: Mrk 15:1 ✧ 4:32: Act 2:44-45

²⁵ Ma rava tagogi i nei ma i riwa, “Ona rautaniġana! Nelara panipani au numana o teretereia, tau i tempol e maimairi ma rava e viviaramani.” ²⁶ Anina ma tempol taupainina ai bada, ma babada ġelau maiteni i nae ma Apasol i neiai. Tau i rovo ma eġa ita egari mepa da rava ġaimi ita ravi.

²⁷ Ma Apasol i neiai boru ġeġetelarana au naoi, ma pirisi ġeġetelarana tau i vitara-virevirei. ²⁸ I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai.”

²⁹ Ma Peter Apasol ġelau aubai i vitauvibabani i pa, “Tauai God ana voteletei ma eġa rava. ³⁰ Taumi Iesu au korosi o tuparatui ma o virageŋi, wate amamata ai God Tauna i vovaimairini. ³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai ġo’apoapoe ina rupeni, ma ai ġo’apoapoe ina nota-tawanei. ³² Ma tauai Arua Vivivireina maiteni wei kauai anatapui mataielai a inana. Ma nanare God Arua Vivivireina i paritawanei rava votelatai awari.”

³³ Tau i wei babanina i nonori ma amloi i ġaiġai kua, ma i ġoei da Apasol ita virageŋi. ³⁴ Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava. ³⁵ Anina ma ana rava i riwei, “Mai Israel, ona inana kua ma muriai da aiwai wei ravai awari ona kauai. ³⁶ Mara tagogi oroto wavana Theudas viġavia i vikarei ma i kauna-melei da tauna rava ġaeġaena, ma rava ai maġa 400 nanare tauna i votaġotaġoi. Ma maranaina tauna i virageŋi ana tauvotaġotaġo i vilamonei ma aiwai anatapuna kampa i kwa. ³⁷ Wate tauna au murina oroto Galiliei wavana Judas i ġeta, census au marana ma rava maġamaġau tauna i votaġotaġoi, ma tauna maiteni i virageŋi, ma ana tauvotaġotaġo i vilamonei. ³⁸ Lamna aubaina a ririwemi da wei ravai ona voteretawanei! Mepa da tau i nola ravei, amapo ina peu. ³⁹ Wate mepa da Godei, taumi eġa tagotagogina da wei ravai ona viġaei, taumi mepa da God o viviġaviei.”

⁴⁰ Tau i Gamaliel ana babani i voteletei. Ma Apasol i riwei da i rui, ma i wipiei i kwapui ma i viġaei da Iesu wawanei ina jima, ma i paritawanei da i nae.

⁴¹ Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiiai Sanhedrin i opu-tawanei, ⁴² Tau i mara patapatana tempol au orana ma au numa God riwana aiaina i raraugulei ma i viviararamana da Iesu tauna Keriso.

6

Stephen i vinei tauvoaġu

¹ Tauvitumaġana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Tau i beubeura da ai kaikaiababa ai ġuta eġa ita tereterei.

² Anina ma Apasol 12 tauvitumaġana ai boru i raukwatuei. Ma i riwei, “Tauai Apasol ma ai nola lamna God riwana ata jimejime ma avena mane nolana maiteni ata kaukauei. ³ Lamna aubaina au rava, awarimi rava 7 ona vinei, tau orai Arua Vivivireina i oai ma nuaulaulai da wei nolana ina kauai, ⁴ Ma tauai ai nola da pari ma God riwana ava ana jimej.”

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaġana God awarina i rata kua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana. ⁶ Ma wei ravai i neiai ma Apasol nimai tau ai tepai i terei ma i raupariei.

⁷ Anina ma God riwana i vituai ma au Jerusalem rava maġamaġau Iesu i vitumaġanei, ma nanare pirisi maġamaġau i vitumaġana.

Stephen i pani

⁸ Anina ma God Stephen i viaiaini ma i vovai-virewapani da mataira ma kua babai i kaukauei rava awari. ⁹ Wate mai Jew ġelau provins nununai i nei mai au Sairini, mai Alexandria, ma Silisia ma Eisia ai parinumana e ġoreġorei panipani *waduboi, Stephen ana ġavia i vomairi. ¹⁰ Wate Arua Vivivireina, Stephen nuaulaula ma riwa i verei ma i bababani da tau i viganopotai. ¹¹ Lamna aubaina tau i rava ġelau i gwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i vivijibogi.” ¹² Ma lamnei patara i viamlo-ġaiġaini, dogadogara ma tarawatu babadai maiteni. Anina ma tau i Stephen i vojijini ma i naiei mai Jew ai Boru Ġeġetelarana† awarina. ¹³ Ma tau i rava ġelau i neiai da moruei Stephen i vibenabenamei, ma i riwa, “Wei ravana mara patapatana Tempol vivivireina ma

* 6:9: Wei ravai lamna slave waduboi, marina i voterei da ana ġoanei e mamae. † 6:12: Sanhedrin.

Moses ana tarawatu i vivijiboḡi. ¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anatapui maiteni ina virai.”

¹⁵ Ma rava anatapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

¹ Anina ma Pirisi ḡeḡetelarana Stephen i paridadanei, “Wei viwavuna, riwa kaua bo?”

² *Stephen i paribelei:

Varevareiu ma amamau, au babani ona rautaniḡanei. God boruborumana noita Abraham awarina i eḡa au Mesopotamia, muriai da ita nae au Haran. ³ Ma God tauna i riwei, *Am dobu ma am dam ma netawanei da ma nae dobu ana viatataiem lana.* ⁴ *Anina ma Abraham Mesopotamia i netawanei ma i nae da au Haran i mae. Amana i'raḡe ma au murina God Abraham i paritawanei da marina dobuna o mamae lana kampa ita mae, ⁵ *Nai maranaina God eḡa Abraham doa ita verei, eḡa aburu dadadana! Wate i parivainuaḡani, da ina verei tauna ma ana epaepaia aubaii. Nai au marana Abraham eḡa natunatuna, ⁶ *ma God wenanare Abraham i riwei, *Am epaepaia au dobu ḡela ina mae ma ina vitaunola, nai dobuna ravai tau i rau-iviapoapoelei da maeḡa 400 ina kwa.* ⁷ * *Wate ravai, awarii e vivitauola ana kovoḡi, ma muriai mai Israel ina opui ma wei au dobuna ina voepaepaiu.* ⁸ *Anina ma God inibori parivai-nuaganana bagibagina Abraham maiteni i kauai, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

⁹ *Jacob natunatuna vare Joseph i unurei ma i gimarei da ita vitaunola au Egypt, wate God tauna awarina i mae. ¹⁰ *Ma ana au nuabola i gagaloei. Ma God nuaulaula i verei ma i kauai da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei. ¹¹ *Ma gomara ḡaeḡaena i ḡeta au Egypt ma au Canaan, ma vinuapoapoe ḡaeḡaena i tupua. Ma noinoita eḡa ai lam. ¹² Ma maranai Jacob i nonori da au Egypt lam, ma noinoita i paritawanei au Egypt, wei ai babara naona. ¹³ Ma muriai i nae me ma wei maranai Joseph i vieḡana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei. ¹⁴ *Anina ma Joseph riwa i paritawanei amana Jacob awarina ma i riwei da ana numa ravai anatapui, ai maḡa 75, ita nei au Egypt. ¹⁵ *Anina ma Jacob i nae au Egypt. Tauna kampa i'raḡe ma nanare natunatuna anatapui. ¹⁶ Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

¹⁷ *Maranai mara i tuḡereḡerei da God Abraham i paripari-vainuaḡania ita kauai, ata patara i maḡa guratana au Egypt. ¹⁸ Ma Pharaoh vouna au Egypt i vibada ma tauna noita Joseph eḡa ita aramanei. ¹⁹ *Tauna amamata i morui ma i rau-iviapoapoelei, i egari da natunatui melamelai numei i viopuni da ita iraḡe. ²⁰ *Wei au marana Moses i tupua, tevera inanana aiaina. Amana ma alona natui i ḡamoi da nawaravi tonuḡa i kwa. ²¹ *Ma maranai tevera numei i tere-opunei, gulau natuna guguinina tevera i vaia ma i ḡamoi da natuna. ²² Ma mai Egypt ai nuaulaula Moses i viararamani ma i virowapana, babani ma nola awarina.

²³ *Moses ana maeḡa 40 ma i nota da ita nae ana dam ravai ita raugenari. ²⁴ Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i virageni. ²⁵ Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei eḡa ita aramanei. ²⁶ Ma maratamna Moses i nae me ma ana rava ruaḡa i viḡaiḡaiawa i 'nanai, ma i riwei, “Taumi ava ma aiwai aubaina o viḡaiḡaiawa?” ²⁷ Wate ḡaiawa tauvikareina Moses i vokaririei ma i riwei, “Tam ai i terem da ma vibadelai bo tauai ai tauraueta? ²⁸ Tam ma virageniu me pom Egyptei u virageni nanare bo?” ²⁹ Maranai Moses wei i nonori tauna Egypt i ruba-tawanei ma i nae au Midian,

* **7:2:** Gen 12:1 * **7:4:** Gen 12:4 * **7:5:** Gen 12:7; 13:15; 17:8 * **7:6:** Gen 15:13-14 * **7:7:** Exo 3:12

* **7:8:** Gen 17:10-14; Gen 21:2-4; Gen 25:26; Gen 29:31-35:18 * **7:9:** Gen 37:28; Gen 39:2-21 * **7:10:** Gen 41:39-41

* **7:11:** Gen 42:1-2 * **7:14:** Gen 45:9-10, 17-18 * **7:15:** Gen 46:1-7; Gen 49:33 * **7:17:** Exo 1:7-8 * **7:19:**

Exo 1:10-11; Exo 1:22 * **7:20:** Exo 2:2 * **7:21:** Exo 2:3-10 * **7:23:** Exo 2:11-15

wei eġa ana dobu wate kampa i mae. Muriai dobuna wavinena i ravaġi ma natunatuna nelarai ruaġa i tupua.

³⁰ *Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i eġa, inanana me ai menamenana ai aburuna rugurugui au orana i ġeġae. ³¹ Wei i 'nanai ma i baei ma i nae au ġereġere da ai arata ita tuvivirei ma i nonori BADA i riwa i pa, ³² "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi. ³³ Ma BADA i riwa, "Am ae uma ma votawane! Wei gabuna au tepana e maimairi, lamna doa vivivireina ma Viaiainana. ³⁴ A inanai menanare mai Egypt, natunatu e rarau-iviapoapoelei. Ai ora-tou a nonori ma a ġairai da tau i ata vai-tawanei. Ma marina ma nei, Tau ana paritawanem au Egypt."

³⁵ *Stephen i riwa:

Wei Moses na tagogina, mai Israel i parivivirei i pa, "Aiai i terem da tauai ma vibadelai ma ma rautarelai?" Moses i paritawaneia i da ita vibademi ma ita tereopunemi, anela i eġaeġa ai menamenana au poui, ana aguei. ³⁶ *Ma Moses tau i Egypte i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vaġai madeġa 40 au mutulua. ³⁷ *Wei Moses-na tagogina, mai Israel i riwei, "God muriai peroveta ami damei ina paritawaneia i me tau." ³⁸ *Moses Israel patarana maiteni Egypt i oputawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamane tauta awarita. ³⁹ Wate noinoita Moses i parivivirei ma au orai i ġoei da ita nae me au Egypt. ⁴⁰ *Ma tau i Aaron i riwei, "Nai ravana Moses, Egypte i taravai-opunelai, tauai eġa ata aramane aiwai awarina i tupua. Ma tauai ai god kokoitau ma kauie da ina rautaraveneia." ⁴¹ *Anina ma bulumakau ġaubona kokoitauna i kauie, ma pulo i apui awarina ma i ainei ma i umei, da aiwai uraiei i kaukauei i vimae-ġaeġaeni. ⁴² Wate God tau i mae-puputei ma i voterei da ubona ma nawaravi ma madeġa au mara i vimae-ġaeġaeni. Wei lamna peroveta nununai i ririweia i tupua:

Rava mai Israel! Maranai madeġa 40 au mutulua.

Taumi eġa Tau awariu ġamogamo ota vunui ma ota apui tapa?

⁴³ *Taumi ami god Molek ana numa gara ma ami ubona god kokoitauna Rephan o avarai.*

Kokoitau o kauie da ota vimae-ġaeġaeni.

Lamna aubaina rava borui ami au dobu ina vainimi ma ina naiemi aueia, Babilon ina netawane i dobu au ġelauna. (Amos 5:25-27)

⁴⁴ *Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare. ⁴⁵ Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

⁴⁶ *God, David nuanuana i vai-kauie ma David i vibaġa da tauna God ana numa ita voai.

⁴⁷ *Wate David eġa numa ita voai ma natuna Solomon numa i voai. ⁴⁸ Wate God ġeġetelerana eġa rava uranei numa ita voavoai au orana ita mamae, me peroveta variaġa i riwa i pa:

⁴⁹⁻⁵⁰ *Aubaina Tau aiwai anatapuna au mara ma au dobu a kauie. Tapa?*

BADA i riwa, "Mara* au anikiala

ma dobu aeu kareu aniterenana.

Wate numa aiwaina ona voai tau aubaiu? Eġatenil

Tau au animae-kaua mepa? Eġa mepa!

(Isaiah 66:1-2)

⁵¹ Ma Stephen i riwa:

Taumi orami badobadoi. Ma eġa ota ġoeġoei da God ona voteletei ma taniġami o vopotai da ana riwa eġa ota nononori. Taumi Arua Vivivireina o vivivivie me noinoimi i kaukauei nanare. ⁵² Noinoimi metau perovetai eġa ita rau-iviapoapoelei. Wariġa perovetai, God ana tauvilawana, ana nei i vinolenolei; Wate noinoimi wei perovetai maiteni i viragġeni. Ma marina Tauna i nei ma o vibenabenamei ma o viragġeni. ⁵³ God ana anela i paritawaneia i da ana tarawatu noinoita i verei, wate taumi tarawatuna eġa ota voteletei.

Stephen ġaimiei i viragġeni

* 7:30: Exo 3:1-10 * 7:35: Exo 2:14 * 7:36: Exo 14:21; Num 14:33 * 7:37: Deu 18:15, 18 * 7:38: Exo 19:1-20:17 * 7:40: Exo 32:1 * 7:41: Exo 32:2-6 * 7:44: Exo 25:9, 40 * 7:46: 2Sa 7:1-16 * 7:47: 1Ki 6:1-38 * 7:49-50: Wei anona lamna Bada wenanare natuna i riwei, "Tam au oieiu ma kiala ma am ġavia au ae kareu ana tuvaideodoi"

⁵⁴ Maranai babada wei riwana i nonori ma i meji guratana ma ivoi i uta-ḡiriḡiriei Stephen awarina. ⁵⁵ Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi. ⁵⁶ Ma i riwa, "Ona inana! Mara metaetana i wanatawanei ma Rava Natuna a inainanai God au oiena e maimairi!" ⁵⁷ Marina tauī anatapui taniḡai i vopotai, i vigaragarei ma Stephen aubaina i ruba, ⁵⁸ ma i taina-opunei au doa, taon i opu-tawanei da au ririva ma ḡaimēi ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni. ⁵⁹ Tauī i virauraeui ma tauna i raupari i pa, "BADA Iesu, aruau ma vaia! ⁶⁰ Ma ae-tutunei i peū ma i garara, "BADA ai ḡo'apoapoe ma nota-tawanei." Wenanare i riwa ma i raḡe.

8

¹⁻² Ma Saul kampa da Stephen ana iraḡe i 'nanai ma i vianinei. Rava patupatutui ḡelauī ana toutoui ma ana tarakwatui i nei ma Stephen taubeuna i naiei ma au kokoḡa i terei.

Saul Ekalesia i rau-iviapoapoei

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae. ³ *Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

⁴ Wate tauvitumaḡana Jerusalem i rubaruba-tawanei taon ma dobu anatapuna i naeni ma Riwana Aiaina i raugugulei. ⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei. ⁶ Maranai patarana, Philip i raraugugula i nonori, ma i 'nanai kua babai ma mataira ḡaeḡae i kaukauei tauī anatapui orai taputapunei i rautaniḡana. ⁷ Tauna arua-apoapoei rava maḡamaḡauī au orai i egari da ana garagararai i viopuopuana, ma nanare rava maḡamaḡauī gwaḡagwaḡai ma sigesigei i vilawani. ⁸ Ma nuaiaī ḡaeḡaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariḡa ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena. ¹⁰ Rava labalababa, ma wavai naenaei anatapui ana babani i rarautaniḡana-kauei ma i ririwa, "Tauna, God ana rewapana e ḡoreḡorei, Rewapana ḡaeḡaena." ¹¹ Tauī i vineneḡanana-kauei aubaina mara nonoa tauī Simon ana baravu i baebaei. ¹² Wate tauī Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito. ¹³ Simon maiteni i vitumaḡana ma i babataito. Ma Philip mepa i nenaē tauna kampa aubaina kua babai ma mataira vivirewapanai i kaukauei. Tauna wei pulona i bana-kauei.

¹⁴ Maranai Apasol au Jerusalem i nonori da mai Samaria, God Riwana i vitumaḡanei, tauī Peter ma John i paritawanei awari. ¹⁵⁻¹⁶ Ma au Samaria i ḡeta ma tauī i raupari da Arua Vivivireina ita rui au orai. Aubaina tauī Iesu wavanei ava i babataito. Ma arua vivivireina eḡa ita rui. ¹⁷ Peter ma John urai tauī au tepai i terei ma i raupari da Arua Vivivireina au orai i rui. ¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi, ¹⁹ ma i vibaḡa i pa, "Tau maiteni nai rewapanana ma veru da rava au kolai urau ana terei ma tauī Arua Vivivireina ina vaia." ²⁰ Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimaraī! ²¹ Tam wei nolana au orana am gabu eḡa ita mamae, aubaina oram eḡa ita ai God au matana. ²² Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei. ²³ Aubaina a inanaim da unura oram i oai tauai awariai ma wei notai apoapoei e panipanīm." ²⁴ Simon marina Peter ma John i riwei, "Aubaiu BADA awarina ona raupari da aiwai o ririwei eḡa ina tupua awariu!"

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ḡeta au Jerusalem.

Philip ma Ethiopie

* 8:3: Act 22:4-5; 26:9-11

²⁶ Mara tagogi BADA ana anela, Philip i riwei, “Ma vokaukua ma nae au rauanaḡei, etanai au Jerusalem da e ḡaiḡaira au Gaza.” (Wei etanaina lamna au mutulua). ²⁷ Anina ma Philip i vokaukua ma i nae. Ma wei au etanaina oroto Ethiopia i ’nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina, ²⁸ ma i nena-me ana au dobu. Ma ana au chariot i kiala ma wariaga peroveta Isaiah buka i girugirumia i ’aiavi. ²⁹ Ma Arua Vivivireina Philip i riwei, “Ma nae ma chariot au ririvana ma babara-nae.” ³⁰ Anina ma Philip i ruba chariot au ririvana ma i nonori badana peroveta Isaiah ana buka i ’aiavi. Ma Philip i paridadana, “Aiwai e iaivia e araramanei bo eḡa?” ³¹ Orotona i paribelei, “Menanare ana ’ramananei mepa da rava eḡa ita parivai-araramaniu!” Ma Philip i vibaḡai da i ḡeta da au ririvana i kiala. ³² Buka au orana, wei riwana i ’aiavi,

*Tauna i taravaina-naiei me sipu viraḡenana aubaina
me sipu natuna e genugenuana maranai aparana e boribori,
tauna eḡa aiwai ita latoni.*

³³ *Tauna i vijiboḡi ma i vinimalamalai ma eḡa ita kauana-kauai awarina.
Aiai ana epaepaia ina babanei.*

Aubaina ana mara au dobu i vaitawanei.”

(Isaiah 53:7-8)

³⁴ Ma orotona, Philip i paridadanei, “Isaiah e babaniana-melei bo rava ḡelauna e babaniei?”

³⁵ Ma Philip, wei riwana awarina i vikarei ma riwa ḡelau maiteni ma Iesu Riwana Aiaina i viararamani. ³⁶ Ma i nena da waira i ’nanai mai Ethiopia i riwa, “Ma inana waira noi, aiwai aubaina da eḡa ana babataito?” ³⁷* ³⁸ Badana, chariot taurubeina i riwei, “Chariot ma vojijini” Ma tauna ma Philip i ḡaira waira au orana ma Philip, badana i babataito. ³⁹ Maranai wairei i ḡeta, BADA Aruana maratagogi Philip i vai-tawanei ma turana eḡa ita inana-melei, ma ana morelanana i nae ana au dobu. ⁴⁰ Wate Philip au Asotus i rauēḡa ma dobuna i naeni ma Riwana Aiaina i raugugulei da au Caesarea taon i ḡeta.

9

Saul i vitumaḡana

¹ Wate Saul amapo da i mejimeji ma i ḡoēḡoei da BADA ana tauvitumaḡana ita viraḡeni. Ma i nae Pirisi ḡetelarana awarina, ² ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaḡana, nelara ma waivine ita pani ma ita neiai au Jerusalem. ³ Ma Saul, Damaskas i tuḡereḡerei, nanare ma lalalaina marei i ḡairai da tauna i ravilalai. ⁴ Tauna i peu au doa ma pona i nonori awarina i babani i pa, “Saul, Saul! Aiwai aubaina e rarau-iviapoapoeleu?”

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoelei! ⁶ Marina ma vomairi ma ma rui au Damaskas, ma kampa aiwai ina riwem ma kauai.”

⁷ Nelara Saul maiteni i nena i mairi kwakwa, ana gamopotai, tau pona i nonori wate eḡa aiai ita inana. ⁸ Ma Saul au doa i matamatave i vomairi ma matana i kala, wate eḡa aiwai ita inana. Ma ana rava i raunimavoai ma i taravaina-naiei au Damaskas. ⁹ Ma au pom tonuḡa eḡa ita inana, eḡa ita am bo ita uma.

¹⁰ Au Damaskas tauvitumaḡana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu. ¹² Ma ana au inana i ’nanai oroto wavana Ananias i nei awarina ma urana au inana i terei da ita inana-me.”

¹³ Wate Ananias i paribelei, “Bada, rava maḡamaḡau i riweu da wei ravana ana kaua i apoapoe kaua tauvitumaḡana awarii au Jerusalem! ¹⁴ Ma weka i nei pirisi ḡaeḡaei ai rewapani da aiai wavam e vibiborumei ina pani.”

¹⁵ Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii. ¹⁶ Tau ana viatataiei da aubaiu ina jima ma rau-iviapoapoe ḡaeḡaena ina nei awarina.”

¹⁷ Anina ma Ananias i ḡeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i eḡa maranai weka u nenei, i paritawaneu

* 8:37: Buka wadubo nonoana vs 37 eḡa ita mamae.

awarim da ma inana me ma Arua Vivivireina oram ina vioai.”¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna. ²¹ Tau i aiavo i da Saul i nonori i ba kaua ma tau i ava i babani vivira i pa, “Wei ravana tagogina, rau-iviapoapoe gaegeaena Iesu ana tauvitumaḡana i awarii i kaukauei au Jerusalem bo? Tauna i nei weka nolana tagogina aubaina da tauvitumaḡana ita pani ma ita naiei Pirisi babadai awarii bo.”²² Wate Saul ana raugugula i virewapana kaua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani eḡa ita parivirevirei.

²³ Ma au pom biḡa au murina Jew babadai i viogatara da Saul ita viraḡeni. ²⁴ Mai Jew marai ma waguvarai taon garina au metaetana i vipaipai da Saul ita viraḡeni. Wate Saul ai ogatara riwana i nonori. ²⁵ Ma waguvarai tauvitumaḡana i ḡelau i ai bada Saul i taravaini ma iriga gaegeaena au orana i poi ma gavogavo aburuna taon au garina, kampa ḡuravei i tere-ḡairei au doa ma i ruba.

²⁶ Saul i ḡeta au Jerusalem ma maranai i ḡoei da tauvitumaḡana i ai au boru ita rui. Wate tau i rovoei ma eḡa ita vitumaḡanei da tauna Iesu ana tauvotaḡotaḡo. ²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei. ²⁸ Anina ma tau Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei. ²⁹ Ma nanare Saul mai Jew pona Greek taubabanieina maiteni i babani ma i viparipariḡai, ma tau i viogatara da tauna ita viraḡeni. ³⁰ Maranai tauvitumaḡana ḡelau i wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaḡana i vovai-virewapani, Ma ai boru i rarata, ma tau BADA i vivirana-kauei.

Aeneas ma Dorkas

³² Nai maranaina Peter dobu maḡamaḡau i naeni, ma God ana tauvitumaḡana awarii i ḡeta au Lidda. ³³ Kampa oroto wavana Aeneas i nelaḡai, tauna gwaḡagwaḡana madeḡa 8 ana au aravi i matave. ³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma nouil!” Ma maratagogi i lawana. ³⁵ Anina ma rava maḡamaḡau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaḡana tagogi wavana Tabitha (Greek ponanei lamna Dorkas) tauna marana patapatana kaua maḡamaḡau aiiai i kaukauei molamokai aubaii. ³⁷ Wei marana tauna i doria ma i raḡe ma tupuana i oḡai ma numa vatavatara au aidamo, i vimataveni. ³⁸ Lidda, lamna Joppa au ḡereḡerena ma maranai tauvitumaḡana i nonori da Peter au Lidda, tau i ai rava ruaga i paritawanei da Peter i egari i pa, “Laḡilaḡina ma nei!”

³⁹ Ma Peter tau i maiteni i nae da i ḡeta ma i taravaina-ruiei au numa vatavatara. Kaika-iaaba maḡamaḡau ana toutoui Peter i mairi kwaviviroi. Maranai Dorkas lawalawaina ma kwama da gara i popoioia Peter i viatataiei.

⁴⁰ Wate Peter anatapui i vibaḡai da i opu au doa, ma ae-tutunei i mae-ḡaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i 'nanai, i vomairi da i kiala. ⁴¹ Peter urana i viloloi ma i voagui da i vomairi. Ma tauvitumaḡana anatapui ma kaikaiaaba maiteni i kwatueiai, ma wavine lawalawaina tau i verei. ⁴² Ma wei riwana dobu Joppa i naeni ma rava maḡamaḡau Iesu i vitumaḡanei. ⁴³ Peter au Joppa i mae au pom biḡa nanare Simon ḡamoḡamo opina taurauḡaroḡaroeina ana au numa.

10

Peter ma Cornelius

¹ Au Caesarea oroto^{*} wavana Cornelius, tauna mai Italy sorodia boruna ai bada. ² Tauna rava jijimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai i raraupari God awarina. ³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, “Cornelius!”

⁴ Cornelius ana rovona anela i 'nana-tunutunui ma i riwa, “Au bada, menanare!”

* 10:1: Wei ravana jentail.

Ma anela i paribelei, “Am pari ma am verena molamolakai awarii, i ġeta God awarina me pulo apuapunana ġabuna. ⁵ Ma marina nelara ġelau ma paritawanei au Joppa ma ravana wavana Simon wavana ġelauna Peter ina taravainiai. ⁶ Tauna rava wavana Simon, ġamoġamo opina taurauġarogaroena awarina e mamae gera au ririvana.”

⁷ Maranai anela i nae, Cornelius ana taunola ruġa i ġoreiai, ma ġelauna lamna sorodia, tauna ana tauvipapai, tauna God tauvitumaġaneiana. ⁸ Tauna aiwai anataputa tau i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari. ¹⁰ Ma am i 'raġe ma i ġoei da aiwai ita ani, maranai tau lam i vovokaukauei, ma Peter matanei rauboni i 'nanai. ¹¹ I 'nanai mara i wanatawanei ma purapura inanana me puru ġaġaena au adana 4 i vojijini ma marei i tere-ġaireiai au dobu. ¹² Au orana lamna sia tapuna ma tapuna, tetetei me mota ma kiu au aidamo lavelavei. ¹³ Ma pona i riwa, “Peter ma vomairi, ma viragena ma ma am!”

¹⁴ Wate Peter i paribelei, “Eġa! Lamna eġa melanai ana kauai. Eġa melanai lam vivigana ata am-dadani.”

¹⁵ Wate pona i babani me, “Aiwai God i viviaiania, eġa ma riwa da i apoapoe.”

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaġai ma i ġeta ana au metaeta. ¹⁸ Tau i paridadana, “Weka rava wavana Simon-Peter e mamae bo eġa?”

¹⁹ Peter amapo da wei i vivinua-notenotei maranai Arua vivivireina i riwa, “Simon, nelara tonuġa e baibaiei! ²⁰ Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim.”

²¹ Peter i ġaira ma awarii i riwa, “Taumi tau o baibaieu bo, Ami ġoana aiwai?”

²² Ma nelarai i paribelei, “Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġai tauna e vivivirei. Anela vivivireina i riwei da uta nei ana au numa da aiwai u araramanei uta riwei.” ²³ Ma Peter nelarai i ġorei da i rui au numa ma kampa i matave.

Peter Cornelius ana au numa

Ma maratomna anataputi i nae, Tauvitumaġana ġelau au Joppa maiteni i vomairi. ²⁴ Ma au pom ġelauna tau i Caesarea i ġeta. Cornelius tau i paipaini, ma ana numa ravai ma ana rava i ġorei da i nei. ²⁵ Ma maranai Peter i ruiui au numa, Cornelius Peter i 'nanai ma i mae-ġaira au ae karena ma ana vivirana i raudune. ²⁶ Wate Peter tauna i voepai ma i riwa, “Ma vomairi, Tau rava ota me tam.”

²⁷ Peter ma Cornelius i bababani ma i ruiui au numa. Ma i 'nanai da patara tauna i paipaini. ²⁸ Peter tau i riwei, “Taumi o aramana-kauai da tauta mai Jew ata tarawatu e vivigata da Jentaill maiteni tana mae-gogona bo tana raugenari. Wate God i viatataieu da eġa rava ana ġorei rava apoapoen a bo miramirana. ²⁹ Lamna aubaina maranai u vibaġaiu da ata nei, Tau au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana ġara ararapoirina ma namanamarina au naoi i raumairiei. ³¹ Ma i riwa, ‘Cornelius! God am pari i nonori ma am verena molamolakai awarii i vinuaiaiei! ³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamoġamo opina taurauġarogaroena ana au numa e mamae.’ ³³ Lamna aubaina da am riwa lagilaġina ava a paritawanei, ma i ai da tam u nei. Tauai anataputai marina weka God au matana a vivipapai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauai da God rava anataputi e vaivaia da tagogina. ³⁵ Wate dobu dobau ravai God e vivivirei ma kaua aiaii e kaukauei, Tauna wei ravai e goeġoei, ³⁶ Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaġanei ma tauna ai lawana ina vibadei. ³⁷ Taumi o aramanei Iesu aiwai i kauai Judea au anataputa, au Galli i vikarei maranai John babataito ai kaua i raugugulei. ³⁸ God Arua Vivivireina ma rewapana Iesu Nasaretei i verei da dobu maġamaġai i naeni ma kaua aiaii i kaukauei, ma rava au orai arua apoapoe i ruiui, i vilawani.

³⁹ —Aiwai anapuna au Judah provins ma au Jerusalem i kaukauei tauai anapupui ai a vimatemei ma a bababanie. Tauna au korosi i tutui da i'raḡe. ⁴⁰ Wate God tauna iraḡelei i veopa-melei aupom au vitonuina ma i kauēi da ḡelauai awariai i eḡa. ⁴¹ Eḡa rava maḡamaḡau tauna ita inanaī, anina tauvimatamata i vinevinei awari ava i ḡeta. Lamna tauai maiteni a uma ma am ana vomairi au murina. ⁴² Ma i egariai da dobu au anapuna ana raugugula ma ana jima da God Iesu i vinei da rava anapui lawalawaii ma irairaḡei ina rautareai. ⁴³ Peroveta anapui i jimeī da maranai rava Iesu i vitumaḡanei, Tauna wavineī God tauī ai ḡo'apoapoe ina vaitawanei."

⁴⁴ Maranai Peter i bababani ma Arua Vivivireina i ḡairai ma rava i raurautaniḡana i vioai. ⁴⁵ Ma mai Jew Joppei i nenei Peter maiteni, i ba kua maranai God Arua Vivivireina i paritawana ḡairei Jentail awarii. ⁴⁶ Au baina mai Jew i nonori tauī pona tapunei i bababani ma God i vivimae-ḡaeḡaeni. Anina ma Peter i riwa, ⁴⁷ "Tauī Arua Vivivireina i vaia me tauta. Wei lamna aubaina eḡa aiāi ina viḡaeta da wei ravai tana babataitoi." ⁴⁸ Ma tauī Cornelius ana numa ravai maiteni ma ana rava ḡelauī Iesu Keriso wavaneī i babataitoi, ma tauī Peter i vibagāi da maiteni ita mae mara aburuna.

11

Peter ana babani

¹ Apasol ma tauvitumaḡana au Judea provins i nonori da Jentail maiteni God riwana i nonori ma i vitumaḡana. ² Ma maranai Peter i ḡeta me au Jerusalem tauvitumaḡana mai Jew ḡelauī tauna i eni i pa, ³ "Tam Jentail ai au numa u rui, ma maiteni u am!"

⁴ Anina ma kua menanare i tuputupuaneī anapuna Peter tauī i parivereī: ⁵ I riwa i pa:

Maranai a raruapari au Joppa ma matauei kua a inanaī, ma purapura inana ma puru ḡaeḡaena adana 4 i vojijini ma marei i tere-ḡaireiaī awarii. ⁶ Au orana a inana lamna ḡomogamo maramaragāmai ma moduei, tetetei me mota ma kiu au aidamo lavelavei. ⁷ Ma pona a nonori i pa, "Peter ma vomairi, ma viragena ma ma am!"

⁸ Tau a paribelei, "Eḡa! Lamna eḡa melanai ana kauēi. Eḡa melanai lam viviḡana ata am-dadani!"

⁹ Wate pona marei mara viruaina i babani, "Aiwai purapurana God i riwa da i ai, tam eḡa ma riwa da i apoapoe." ¹⁰ Mara tonuḡa wenanare i tupua, ma puruna i ḡaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiaī, au metaeta i raumairiei. ¹² Ma Arua Vivivireina i riweu da eḡa aiwai ana notai ma orau taputapuneī ana nae. Mai Joppa tauvitumaḡana 6 maiteni a nae ma ravana ana au numa a rui.

¹³ Cornelius i riwelai da anela awarina i eḡa, ma i riwei, "Rava ma paritawaneī au Joppa da rava wavana Simon Peter ina neiāi." ¹⁴ Tauna wei riwana ina neiāi ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ḡairai da tauī i vioai me au naona awarita i tupua nanare. ¹⁶ *Anina ma Iesu aiwai i ririwei a notai, "John wairei i babataito, wate taumi Arua Vivivireineī ina babataitoimi." ¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaḡanei, ma tau aiāi da God ata viḡaei?

¹⁸ Tauī i viḡamopotai maranai wei i nonori, ma God i viborumei i pa, "Riwa kua da God Jentail maiteni i vianineī da ina rupena ma ina lawana."

Ekalesia au Antiok

¹⁹ *Ekalesia ḡelauī rau-iviapoapoe i rovoei maranai Stephen i viragēni ma i vilamonei au uama. ḡelauī i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii. ²⁰ Wate ekalesia ḡelauī mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei. ²¹ BADA ana rewapana tauī au orai i mae ma Jentail maḡamaḡau i vitumaḡana ma i mae-tavirei BADA awarina.

²² Wei riwana i ḡeta ekalesia awarii au Jerusalem, ma tauī Barnabas i paritawaneī au Antiok. ²³⁻²⁴ Maranai i ḡeta ma i 'nanai da God ravai i viaiaina-kauēi, tauna i vinuāiaī ma i eḡari da BADA awarina ina vipatutu orai taputapuneī. Barnabas tauna rava aiaina, Arua Vivivireina orana i oai ma ana tumaḡana i rata, ma God ana aguieī, i rauguga ma rava maḡamaḡau i taini BADA awarina.

²⁵ Ma Barnabas i nae au Tarsus da Saul ita baiiei. ²⁶ Ma i nelağai ma i nei ai au Antiok, ma kampa tauvitumağana maiteni i mae madeğa tagogi i kwa, ma patara gaeğæna awarii i viararamana. (Weka au Antiok lamna i vikarei da tauvitumağana i viğorei Kerisiana)

²⁷ Wei au marana peroveta ġelau Jerusalem ei i ġairai. ²⁸ *Peroveta tagogi wavana Agabas i vomairi ma God ana rewapanei i vieğa da gomara e nenei au naoui dobu au anata-puna (Caesar Claudius ana vibada au marana gomarana i nei). ²⁹ Tauvotağotağo au Antiok i yanina da tauu ava ita kauana-guratei da mane vounaina ita kau ei da ai rava ekalesia au Judea ita voagui. ³⁰ Tauu nanare i kau ei ma manena Barnabas ma Saul au urai i terei ma tauu ekalesia ai babada au Jerusalem i verei.

12

James i virağeni ma Peter i pani

¹ Lamna maranai, gulau Herod Agrippa* i raukarei da ekalesia ġelau i rau-iviapoapoelei. ² James, John tuana uana sodei i bori-tuini. ³ Ma maranai Herod i 'nanai da mai Jew wei kauana i vinuiaiiei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua. ⁴*Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i goei da Peter ita vojijini da rağona torelana au murina ma au deba ita rautarei. ⁵ Ma lamna aubaina Peter au pani numana i vojijini mara aburuna. Wate ekalesia i rarau pari guratana God awarina Peter aubaina.

Peter pani numanei i tere-opunei

⁶ Ma nai waguvaraina, ma maratamna da Peter ita rautarei, Peter sorodia ruağa au poui i matamatave. Urana seinei i rağini sorodia ruağa au urai, ma sorodia ġelau au metaeta i vipaipai.

⁷ Maratagogi BADA ana anela i eğa ma pani numana i ravilalai. Ma Peter i vogugui da matana i kala ma i riwei, "Lağilagına ma vomairi!" Ma sein au urana i dabarara. ⁸ Ma Peter i riwei, "Ma vighara ma ae uma ma oteni." Ma nanare i kau ei. Ma i egari, "Am kwama potopotona ma oteni ma ma votağotağoiu."

⁹ Peter anela i votağotağoi da pani numana i opu-tawanei, wate eğa ita aramanei anela aiwai i kaukauei, tauna i notai i rarau boni. ¹⁰ Tauu, sorodia boruna ruağa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Tauu etanai tagogi i ġairai ma maratagogi anela tauna i voterei.

¹¹ Peter ana nota i nememei ma i riwa, "Wei anina riwa kua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eğa ita tupua." ¹² Maranai ana nota i nememei tauna i nae Mary ana au numa. (Mary lamna John alona. John wavana ġelauna Mark). Kampa rava mağamağau i vitagogiei ma i rarau pari.

¹³ Peter au metaeta i rauwepewepa ma taunola wavana Rouda i nei da metaeta ita votawanei. ¹⁴ Ma Peter ponana i nonori ma i aramanei da tauna, ma i vinuiaiai guratana da eğa metaeta ita votawanei ma i ruba-ru i da i vinolanola i pa, "Peter au metaeta e maimairi!"

¹⁵ Wate tauu eğa ita vitumağanei ma i riwei, "Tam ma bubua!" Wate tauna i riwa bagibagi. Ma tauu i riwa, "Nai Peter ana anela."

¹⁶ Wate Peter i rarau-pewapewa ma maranai tauu metaeta i votawanei ma i 'nanai da tauna, tauu orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, "James† ma ekalesia ġelau wei ona pariverei." Ma Peter i nae au dobuğela.

¹⁸ Maranai mara i tom kampa au pani numana nuabola ma vinuanaina gaeğæna i peu sorodia awarii da aiwai i tupua Peter awarina ¹⁹ Herod, ana sorodia i egari da Peter i baiiei wate eğa ita nelağai. Lamna aubaina sorodia 16 i etarei ma i virageni. Muriai Herod Judea i netawanei ma i nae au Caesarea da ita mae mara aburuna.

Herod iraqe

²⁰ Marina Herod amlona i ġaiğai kua Taia ma Sidon ravai awarii, lamna aubaina tauu ana borui i nei da Herod maiteni wei i babaniei. Tauu Herod ana taunola gaeğæna Blastus, i taravaini da ita voagui. Tauu rom i vibağei Herod maiteni. Aubaina ai lam Herod ana dobu ei i nenei. ²¹ Ma marana i ġetai da Herod maiteni ita viboru ma tauna ana vigulau garana i vigharei ma ana au anikiala i kiala ma awarii i babani. ²² Ma patara ana babani i nonori ma i logoi i pa, "Wei lamna god e bababani ma eğa rava!"

* 11:28: Act 21:10

* 12:1: Tauna gulau Herod 1 goğana.

✧ 12:4: Exo 12:1-27

† 12:17: Iesu ana tevera

²³ Maratagogi BADA ana anela Herod i vipeuni au doa ma motamota orana i ani da i'rage, aubaina tauna rava ai voepaepa i vinuiaie i ma ega rava ita riwei da BADA ita voepaepa.

²⁴ Ma ekalesia BADA riwana i rarauugulei ma rava ma gāma gāui i nenei BADA awarina ma ekalesia i rarata. ²⁵ Maranai Barnabas ma Saul ai nola au Jerusalem i vikwai, tau John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e gōre gōrei Gawara), Lusias Sairinie, Manaen (Tauna gulau Herod Antipas maiteni i rata tagogi), ma Saul. ² Mara tagogi maranai tau i ujiui ma BADA i vovoepaepa ma Arua Vivivireina i riwa i pa, "Tau, Barnabas ma Saul a vinei, ona tereriei au nola aubaina." ³ Anina ma uji ma pari au murina tau urai Barnabas ma Saul au tepai i terei ma God ruagai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i gaira au Selusia ma kampa i amkuka damana au bonabona Saipras. ⁵ Ma au Salamis i gōta ma i nae mai Jew ai au boru numana ma God riwana i raugugulei. John-Mark tau maiteni i nae da ai tauagui.

⁶⁻⁷ Tau bonabonana i kwaviviroi da au Paphos taon i gēta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i gōei da God ana babani ita nonori ma lamna aubaina Barnabas ma Saul i raugōreiai. ⁸ Wate barabaravuna Bariesu (Greek ponanei lamna Elimas) Saul ma Barnabas i vi gāviei da gavena ana tumagāna ita viapoapoeni. ⁹ Saul wavana gēlauna Paul, Arua Vivivireina orana i oai ma barabaravuna matana i 'nana-tunutunui. ¹⁰ Ma i pa "Tam Satan natuna ma kaua aiāi ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaua ma voviravirai da moru. ¹¹ Ma marina BADA urana ina kovo gōim da matam ina apoapoe mara aburuna ma ega madega lalalaina ma inanai." Maratagogi matana i vinawanawa ma i gimtona ma nare da were i volada gā-nae da rava au urana ita vojijina.

¹² Maranai gavena i 'nanai aiwai i tupua ma i vitumagāna, aubaina tauna BADA ana viararamana i bana-kauei.

Paul God Riwana Aiaina i jimejime au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem. ¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala. ¹⁵ Ma rava gēlauri, Moses ana tarawatu bukana ma peroveta gēlauri ai buka i 'avi, ma babada riwa i paritawanei Paul ma Barnabas awari i pa, "Varevareiu! Mepa da awarimi nota aiwai da ota voaguai lamna marina ona gēi da ona babaniei."

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi ega mai Jew ai God tauviborumeina, ona rautani gāne! ¹⁷ *Mai Israel ai God noinoita i vinei, ma i vimaurai ai au mae au Egypt, ma ana rewapana gāe gāenei dobune i taravaina-opune. ¹⁸ *Madega 40 au mutulua ami kaua apoapoei ami beura ma ami gunura anatapui am-iauei. ¹⁹ *Dam gāe gāei 7 i vipupui au Canaan ma dobuna mai Israel i verei da i vi gāriana-nonoei. ²⁰ *Wei anatapuna madega 450 au orana i tupua. Wei au murina God taurauetara[†] i terei da tau i vibadei da peroveta Samuel ana mara. ²¹ †Anina ma rava God i viba gāi da gulau ita verei. Ma God Saul, Kish natuna Benjamin ana damei i terei; ai gulau da madega 40 i kwa. ²² †Ma God Saul i tere-opune ma David i terei ai gulau. Ma wenanare i riwa i pa, "Tau a aramanei da David, Jesse natuna orau ana rauo gāra, ma au gōana anatapuna ina kauei."

²³ Muriai me God i parivainu gāni nanare, Mai Israel ai Tauvilawana, Iesu David ana damei i nei. ²⁴ *Muriai da Iesu ita nei, John mai Israel anatapui awari i jima da ai gō'apoapoe ina voterei ma ina mae-tavirei God awarina ma ina babataito. ²⁵ *Ma John ana nola au damona i riwa, "Taumi o notanotai da tau Tauvilawana bo? Ega! Tau ega tauna.

* 13:17: Exo 1:7 † 13:18: Num 14:34 * 13:19: Deu 7:1 * 13:20: (a) Jdg 2:16; (b) 1Sa 3:20 † 13:20: Wei ravai lamna ai gāvia babadai ma ai tauravena ma taurauetara *Judge*. † 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 * 13:24: Mrk 1:4 * 13:25: Mrk 1:7

Wate ona rautaniġana, rava au muriu e nenei tauna i ġetelara, tau eġa tagotagogina da ana ae uma ġuravana ana rupeni.”

²⁶ Varevareu - Abraham natunatuna ma taumi Jentail God tauviviborumeina, God tauta awarita, kwakokwakoi vilawanai riwana i paritawaneia! ²⁷ Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoġi, Peroveta wei lamna i jimejime i au Sabate marana patapatana. ²⁸ *Tau i eġa ana apoapoena aiwai ita nelaġai da Iesu ita viragei, wate Pilate i vibaġai da ita viragei.

²⁹ *Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ġairei ma au guba i vimataveni. ³⁰ Wate God Iesu iragelei i vovaimairini. ³¹ *Ma au pom maġamaġau Iesu tau i maiteni au Galili da i ġeġae au Jerusalem awari i eġa. Wei ravai marina e vivimatamata rava awarii.

³² Marina tauai Riwana Aiaina a paripariveremi. Wei parivainuaġanana wariġa noinoita awari i kauēi. ³³ Ma God nanare i kauēi tauta eda muri aubaita, da Iesu iragelei i vovaimairini, au Psalm viruaina wenanare I girumi, *Tam natu.*

Amadodo Tau a viamanem.

(Psalm 2:7)

³⁴ God Iesu iragelei i vovaimairini da eġa tupuana ina buda. Me i girugirumi nanare i pa, *Au viaiaina vivivireina David a parivainuaġani tam ana verem.* *(Isaiah 55:3)*

³⁵ Psalm ġelauna wenanare i girumi, *A ramanei da Tam am Messiah-Tauvilawana tupuana eġa au kokoaġa ma voterei da ina buda.* *(Psalm 16:10)*

³⁶ Maranai David i mamae ma God ana nola i kauēi ma i raġe, ma amamana maiteni i doboi ma tupuana i buda. ³⁷ Wate God Iesu iragelei i vovaimairini ma tupuana eġa ita buda.

³⁸⁻³⁹ Lamna aubaina au rava, ona aramanei da Iesu awarini God ami ġo'apoapoe ina nota-tawanei. Rava anatapai da Iesu e vivitumaġanei, ai ġo'apoapoe e notanota-tawanei ma ai viturana e viviaiaini. Wei Moses ana tarawatu eġa ita kaukauei. ⁴⁰ Ona paina-melemi da peroveta aiwai i ririwei eġa awarimi ina tupua. Aubaina i riwa;

⁴¹ *Ona rautaniġana vivijiboġami,*

kaua ġaeġaena ana kauēi da Ona baei ma ona iragei!

Aubaina ami au lawana kaua ġaeġaena ana kauēi da taumi ona vitumaġana-avei.

⁴² Paul ma Barnabas i opuopu ma rava i nei ma i vibaġa-guratei da ita nememei au Sabate ġelauna da Tauvilawana ana kaua ita babanana-kauēi. ⁴³ Boru i kwa da rava i vilamonei, mai Jew borui ma ġelau i marina ina bori i vaia da i vimai-jew, tau i Paul ma Barnabas i votaġoi, ma i riwana-guratei da Iesu ana aguei ina mae jijina.

⁴⁴ Au Sabate ġelauna taon ravai anatapai i ġeta da Iesu riwana aiaina ita nonori. ⁴⁵ Maranai mai Jew wei patarana i nanai ma orai unura i oai ma Paul i vikaua-morumoruei ma i vitepaubai.

⁴⁶ Ma Paul ma Barnabas ana tepatorai i babani, “God riwana a jime i awarimi au naona, wate taumi wei riwana o ġeđuaei. Wei e viviatataiana da taumi lawana mamae-nonoana eġa ota ġeđue. Lamna aubaina ana voteremi ma God riwana ana jime i Jentail awarii. ⁴⁷ BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapai au dobu ona riwei menanare ai ġo'apoapoe a nota-tawanei ma a vilawani. *(Isaiah 49:6)*

⁴⁸ Maranai Jentail wei riwana i nonori, tau i vinuiai kua ma BADA Riwana Aiaina i voepaepai, ma tau da God i vinei lawana mamae-nonoana ita vaia, i vitumaġana.

⁴⁹ Ma BADA Riwana Aiaina i vituai nai au paratana. ⁵⁰ Wate mai Jew Jentail waivinei manemane i ma mai Jew ġelau i egari da Paul ma Barnabas ai ġavia i vomairi ma dobonei i viaġaġana-opune. ⁵¹ *Anina ma tau i aei pokauna i rauabuabui da ita viatataiei da BADA eġa ita vinuiai awarii ma i nae au Ikoniam taon. ⁵² Wate Arua Vivivireina kerisiana voui au Antiok orai i oai ma i vinuiai kua.

14

Paul ma Barnabas i jima au Ikoniam.

¹ Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maġamaġau i vitumaġana. ² Wate mai Jew ġelau eġa vivitumaġanai Jentail i kelari ma ai nota i barai da Paul ma Barnabas

i geduaiei. ³ Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babaii ma vivirewapanai maġamaġau i kauiei. Wei i vimataira da ai jima lamna riwa kaua.

⁴ Taon i kai ġelau mai Jew aubaii i mairi ma ġelaui Apasol aubaii i mairi. ⁵ Ma mai Jew ma Jentail ġelau i vioga da Paul ma Barnabas ġaimiei ita virauraei. ⁶ Wate tau i riwana i vaia ma dobuna i ruba-tawanei ma i nae au taon ġaegaei Listara ma Derbi au Laikonía provins ma taon au ririvai. ⁷ Ma weka Riwana Aiaina i jimana-naiei.

Rava i notai da Paul ma Barnabas god

⁸ Au Listara oroto aena ġokokokarana, alona manawanei gwaġaġwaġana i vinatunei ma eġa ita babara dadana. ⁹ Kampa i kiala ma Paul i bababani i rarautaniġanei. Paul matana i tawanei ma i nanai da tauna i vitumaġana da ita lawana ¹⁰ ma i garara awarina, “Aemei ma mairi!” Ma orotona aenei i mairi ma babara i vikarei. ¹¹ Maranai patara i nanai Paul aiwai i kauiei tau ai ave ai ponei i babani vivira, “god ruāġa i ġairai awarita me *rava.” ¹² Tau i riwa da Barnabas lamna mai Greek ai god Zeus† ma Paul i vitauvibabani aubaina i riwa da tauna Hermes. ¹³ Zeus ana pulo gabuna, taon au giana, Zeus ana pirisi patara maiteni bull ma berana ulalul i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tau ai gara i sikai ma i ruba-opu patara awarii ma i garara, ¹⁵ ✠“Aiwai aubaina wei kauana o kaukai? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anatapuna au orai i kauiei. ¹⁶ Wariāġa tauna rava i voterei da ai ġoanei i mae. ¹⁷ Wate marana patapatai e viviatataiemi da tauna e mamea ma ana nuavaina e verevereta, ġarewa marei ma maura ma lam e vereveremi ma au orami nuaiai e oaoai.” ¹⁸ Apasol i bababani ma i kauana-guratei da ravai ita viġaei da tau i avena ita puloi.

Mai Listara Paul ġaimiei i virauraei.

¹⁹ Mai Jew ġelau Antioġ ei ma Ikoniamei i nei ma patarana i egari da Paul ġaimiei i virauraei ma taonei i taina-opunei, i notai da tauna irāġe. ²⁰ Wate maranai vivitumaġanai i ġeta da i mae-kwavi viroi, tauna i vomairi ma i naeme au taon.

Aupom ġelauna tauna ma Barnabas i nae au Derbi.

²¹ Paul ma Barnabas Riwana Aiaina i jime i au Derbi ma ekalesia voui maġamaġau i rui. Ma i nae me au Listara, Ikoniām ma Antioġ. ²² Metauna au dobuna i jimajima kampa tauvitumaġana i ririwana-guratei ma i vovai-virewapani da ina mairi-jijina ai au tumaġana i pa, “Piripiri maġamaġau au orana ona rui wate au murina God ana au vibadana ona rui.” ²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini. ²⁴ Anina ma au Pisidia provins i verautua da i nae me au Pamphilia provins. ²⁵ Au Perga BADA riwana i jime i ma i ġaira au Atalia. ²⁶ Ma kampa i amkuka ma i nae me au Antioġ au Syria provins, weka ai nola i vikarei, maranai ekalesia kampa God i vibaġai da tau i ita viaiaini ai au nola ma i paritawanei ma marina ai nola e vivikwai.

²⁷ Ma kampa i ġeta ma ekalesia i vitagogiei, ma aiwai anatapuna God ana aguei i kaukai rava i vieġei, ma menanare Iesu metaeta i votawanei da Jentail maiteni Tauna i vitumaġanei.

²⁸ Ma kampa tauvitumaġana maiteni i mae guratana.

15

Boru au Jerusalem

¹ Wate nelara ġelau Judeaei i ġairai au Antioġ ma ekalesia i viararamani i pa, “Mepa da eġa inibori ona vaia Moses ana tarawatu e ririwei nanare, God taumi eġa ina vilawanimi.” ² Ma karuwaġawaġa ġaegaei i bauni Paul ma Barnabas maiteni. Ma tau i Paul, Barnabas ma rava ġelau i vinei da i ġae au Jerusalem da Apasol ma babada ita inanai wei babanina aubaina.

³ Ma i paritawanei au Jerusalem, Ma ai au vaġai ekalesia au Phonisia ma Samaria provins i pariverei menanare Jentail i mae-tavirei God awarina. Ma tau i vinuiai i kua maraina wei i nonori. ⁴ Maranai i ġeta au Jerusalem, ekalesia ma Apasol i nei da i nebelei. Tau i pariverei menanare kua anatapui God ana aguei i tupua. ⁵ Wate ekalesia ġelau mai Pharisi, i vomairi

* **14:11:** Paul ma Barnabas Greek ponanei i bababani † **14:12:** Zeus lamna mai Greek ai god ġaegaei. Rava ai vitumaġana da godna e vilawani. Hermes lamna Zeus natuna ma tauna lana Tau-vinolanolana. Zeus ma god ġelau aubaii. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ✠ **14:15:** Exo 20:11

ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i vaboru da wei babanina i okei. ⁷ *Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau i ina nonori ma ina vitumaḡana. ⁸ *God rava anatapui ai nota e araramanei, ma Jentail Aruana Vivivireina i verei me tauta nanare. Wei matairana i vitataieta da God i vianina. ⁹ Tauna Jentail ma tauta e vaivainita da tagogina, ma ata vitumaḡanei orata i viaiaiani. ¹⁰ Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei. ¹¹ Egateni! Tauta anataputa ta vivitumaḡana da BADA Iesu ana aguei tana lawana, ma nanare Jentail maiteni.”

¹² Rava anatapui i genuana ma Barnabas ma Paul i rautaniḡanei, tau i bababani menanare ana au vaḡai God ana aguei kua aniba ma vivirewapana i kauei Jentail awarii.

¹³ Maranai i babani vorovei, James* babani i vikarei, “Au rava ona rautaniḡaneu.

¹⁴ —Peter† au naona i pariveremi menanare God Jentail i raugenari ma ḡelau i vinei da tauna ḡarinei. ¹⁵ Ma Peroveta nununai wei kauai i bababaniei marina nanare e tuputupua:

¹⁶ *Wei au murina ana nememei,*

ma David ana numa gara ana voa-melei.

Ana vituramairini

ma ana kauei da ina virewapana me.‡

¹⁷ *Da rava mamae-terenai*

BADA ina baiei,

Wate Jentail a rauḡorei da ḡariuei, BADAi riwa.

¹⁸ *Wariaḡa da marina wei ta aramanei.*

(Amos 9:11-12)

¹⁹⁻²¹ —*Lamna au baina eḡa tana kauei da ina pipiripi Jentail aubaii, tau i mamae-tavirei God awarina. Wate pepa tana girumi ma tana egari da lam e pulopuloei god morumorui awarii eḡa ina ani, eḡa ina viawawana labalababa, ḡamoḡamo uai e kikiki eḡa ina ani ma sia ana tarana eḡa ina ani. Aubaina wariaḡa da marina Moses ana tarawatu e rauḡugulei boru au numai Sabatena patapatana.”

Pepa i girumi Jentail awarii

²² Ma Apasol, babada ma ekalesia anatapui rava ḡelau i vinei ma i paritawanei au Antiok au Syria provins Paul ma Barnabas maiteni. Tau i babada ruaga i vinei wavai Judas wavana ḡelauna Barsabas ma Sailas. ²³ Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

²⁴ Tauai riwana a vaia da rava ḡelau i ai au boru i ḡairai ma ai viararamani i vinuabolaimi ma i visina-viraviraimi, wate tauai nai ravai eḡa ata paritawanei. ²⁵ Lamna aubaina tauai i vaboru ma a vianina da taupariverena ata paritawaneiai, ata rava Paul ma Barnabas maiteni, ²⁶ tau i verena-melei ma ai lawana eḡa ita vianuabolei BADA Iesu Keriso wavana aubaina. ²⁷ Judas ma Sailas a pariparitawanei da tau i gamoiei ina riwemi aiwai tauai a girumi.

²⁸ Arua Vivivireina ma tauai ai ḡoana da eḡa vita ḡaeḡaena ana veremi, anina wei tarawatuna ava.

²⁹ Lam god morumorui i puloi eḡa ona ani,

Eḡa tara ona umai, Eḡa ḡamoḡamo uana kikikina vioana ana tarana ona ani.

Eḡa ona viawawana labalababa,§

Mepa da wei tarawatu ona vojijina-kauei, taumi kua aiaina o kaukauei.

*Egualau kua.**

³⁰ Ma nelarai i paritawanei da i ḡaira au Antiok, ma ekalesia i rieiai da pepa i verei. ³¹ Ma tau i 'avi ma i vinuaiiai kua pariverena aiaina aubaina. ³² Judas ma Sailas tau i God

* **15:7:** Act 10:1-43 † **15:8:** Act 10:44; 2:4 * **15:13:** Iesu ana tevera † **15:14:** Peter wavana ḡelauna Simon.

‡ **15:16:** Maranai God David ana numagara e bababaniei lamna David ana vidadana vouna e ririwei ma eḡa ana epaepaia. * **15:19-21:** Lev 18:6-23; Lev 17:10-16 § **15:29:** Viawawana labalababa ḡelau wei: Rava ḡelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviaawanei

(Lev 18:22, Rom 1:26-27) Gamogamo e viviaawanei (Lev 18:23) Rava eḡa uta ravaḡi ma e viviaawanei (Eph 5:3) Rava u egari da u viawawanei. (Gen 34:7, Deu 22:25-28) * **15:29:** Kua ḡaeḡaena lamna eḡa ini bori ma Iesu ana aguei, u korosi i take aubaita.

ana peroveta ma i babani guratana awarii ma wei tau i vinuaiaiei ma ai tumaġana i vovai-virewapani. ³³ Ma kampa i mae mara aburuna ma ekalesia ana nuubai i paritawana-melei au Jerusalem. ³⁴ † ³⁵ Wate Paul ma Barnabas au Antioch i mae, ma tau maiteni BADA Riwana Aiaina i viaramani ma i raugugulei.

Paul ma Barnabas i vilamonei

³⁶ Ma muriai Paul, Barnabas i riwei, “Tana nae dobu au anapuna mepa BADA Riwana Aiaina ta raugugulei ma ekalesia tana raugenari, ma tana inana tau anina bo eġa.” ³⁷ Barnabas i ġoei da John-Mark ita taravaini. ³⁸ ✧ Wate Paul wei notana eġa ita ġoei aubaina au naona John tau au Pamphilia i ruba-tawanei ma eġa ita mae da maiteni ita nola. ³⁹ Ai vipariparinigai i apoapoe guratana da tau i vilamonei. Barnabas, Mark i taravaini ma kukei i damana au au Saipras. ⁴⁰ Paul, Sailas i vinei. Ma ekalesia, BADA i vibaġai da ana aguei tau ai au nola ina paini. ⁴¹ Tau Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvotaġotaġo i mae wavana Timothy. Tauna alona Jew ei ma kerisiana, Wate amana Jentail. ² Ekalesia au Listara ma Ikoniam Timothy i voepaepana-kauei. ³ Paul i ġoei da tauna ita taravaini ana au vaġai, lamna aubaina ini bori i verei aubaina mai Jew kampa i aramane i da tauna amana Jentail. ⁴ Maranai taon nununai i nenaeni, ma ekalesia kampa i paripari-verei Aposol ma babada au Jerusalem ai nota, ma i riwei da tarawatu i ririwei ina votaġotaġoi. ⁵ Ma ekalesia ai vitumaġana i vovai-virewapanai ma tauvitumaġana voui i ruiui marana patapatai.

Paul ana rauboni

⁶ Arua Vivivireina Paul ana rava maiteni i viġaei da eġa BADA riwana ita jime i au Eisia provins, ma Pirijia ma Galatia paratana i naeni. ⁷ Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei. ⁸ Ma Maisia i verautuini da i nae au Troas. ⁹ Waguvaraina Paul ana au inana i nanai oroto Macedoniei i maimairi ma i vivibaġai i pa, “Ma damanai au Masedonia da ma voagui!” ¹⁰ Paul ana rauboni au murina tauai a vioga da laġilaġina ana vomairi Masedonia provins aubaina. Tauai a vitumaġana da God i ġorelai da Riwana Aiaina kampa ana jime i.

Paul i nae au Philipai.

¹¹ Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis. ¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ġaeġaena i mae, kampa a veraumae. ¹³ Ma au Sabate taon a opu-tawanei ma a nae au waira, a notanotai da kampa boru gabuna wate eġa. A kiala ma waivine ruaġa ota kampa i rauriei awari a babani. ¹⁴ Taurautaniġana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ġaeġaena taugimareina ma God i vitumaġanei, ma God orana i votawanei da aiwai Paul i bababaniei i rautaniġanana kauei. ¹⁵ Maranai wavine ana numa ravai i babataito ma i raugorelai i pa, “Ona nei au numa mepa da o notanotai da tau kerisiana ririwa kauana.” Ma i egariai da ana au numa a mae.

Paul ma Sailas au panipani numana au Philipai

¹⁶ Mara tagogi a nenaie boru au gabuna ma taunola guguini a nebele, Tauna au orana arua apoapoena i mae ma lamnei aiwai amapo da ina tupua i vivieġai. Ma mane ġaeġaena i kaukaei ana taniwaga aubaina. ¹⁷ Tauna Paul ma tauai i votaġotaġoi ma i garagarara “Wei nelaarai God ġeġetelarana ana taunola! E vivinolanola menanare God e vivilawananei.” ¹⁸ Wei kauana i kauei au pom biaġa da Paul i viamlo-ġaiġaini da i mae-tavirei ma arua apoapoena i riwei, “Iesu Keriso wavane i egaegarim da wavine ma opu-tawanei!” Maratagogi arua apoapoena wavine i opu-tawanei.

¹⁹ Maranai taunola guguini ana taniwaga i aramane i da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii. ²⁰ Tau i nei ai tauruetara awarina ma i riwa, “Wei nelaarai mai Jew wei dobuana ravai e vivinuraġaraġai. ²¹ Tau i ata rava kaua ġelau i viviararamani ma wei ata giu e teretereġairei.”

²² Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui. ²³ I vunua-kauei ma i tawana-ruiei au panipani numana. Ma numana

† 15:34: Buka waduwaduboi au orai vs 34 eġa ita mamee “Wate Sailas i ġoei da kampa ita mae.” ✧ 15:38: Act 13:13

badana i egari da ita paina-kauei da eġa ita ruba. ²⁴ Anina ma Panipani badana tau i tawana-ruei, panipani numana au orana ma aei, ai vivitaini au orana i raġita-jjini.

²⁵ Nubautuvai Paul ma Sailas i rarauari ma i welawela God awarina ma panipani ġelau i rautaniġana. ²⁶ Nanare ma lolo ġaġaetana dobuna i gui. Ma maratagogi pani numana metaetana i wana-tawatawanei ma panipani anatapui ai sein i dabarara. ²⁷ Pani numana badana i vomairi ma ita inana i metaeta wanatawanana ma i notai da panipani i ruba ma lamna aubaina ana sod i lavui da ita viragena-melei. ²⁸ Wate Paul i garara, “Eġa ma vunumelem! Tauai anatapuwei weka!”

²⁹ Pani numana badana ana taunola i ġorei da lalalaina ita neiai ma i ruba-rui ma ana sisisina i mae-peu Paul ma Sailas au naoi. ³⁰ Ma i opunei au doa ma i paridadanei, “Babada aiwai ana kauei da ana lawana?”

³¹ Tau i paribelei, “BADA Iesu Keriso ma vitumaġanei ma ma lawana, am numa ravai maiteni.” ³² Ma God riwana i raugugulei tauna ma ana numa ravai awari. ³³ Nai maranaina avena da waguvarai, pani numana badana Paul ma Sailas i naiei ma keroi i oġai, Ma maratagogi tauna, ana numa ravai maiteni i babataito. ³⁴ Paul ma Sailas i ġaiei ana au numa da i viambagbagi. Tauna ana numa ravai maiteni i vinuaiai kaua da marina God i vitumaġanei.

³⁵ Ma marana i tom ma tauetara ana taunola* i paritawane i pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai eġa ita rautarelai ma i vunukauei patara au matai. Ma avena da tauai mai †Rome, wate marina i ġoei da govogovaġanei ina paritawanelai bo? Eġateni kaua! Ona voterei da taurauetara ina nei weka da ina naiei!”

³⁸ Tau i wei babanina i naiana-melei da babada i riwei ma tau i rovo kaukau maranai riwana i nonori da Paul ma Sailas lamna mai Rome. ³⁹ Ma i nei au pani numana ma i riwa, “Tauai a kauana-boai, ai ġo’apoapoe ona nota-tawane.” Ma i tere-opunei ma i vibaġa-guratei da dobuna ita oputawane. ⁴⁰ Ma Paul ma Sailas pani numana i opu-tawane ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawane.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae. ² Ma i rui au boru numana au Sabate ma mara patapatai i kaukauei nanare, kampa Sabate tonuġa rava awari God riwana i viararamani. ³ Ma God riwanei i viararamana da Keriso ina vinuapoapoe ma iragġei ina vomairi me, “Wei ravana a bababaniei awarimi, tauna Iesu Keriso.” ⁴ Mai Jew ġelau orai i taini ma tau i votaġotaġoi. Ma nanare Jentail nelara maġamaġaġau God taurauduneleina ma waivine wavai naenaei maġamaġaġau.

⁵ Wate mai Jew i unura ma rava ora-potapota maġamaġaġau au etanai i tami ma au taon vikaruwaġaġa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari. ⁶ Wate maranai eġa ita nelaġai tau Jason ma kerisiana ġelau i taina-naiei taon babada i awari, ma i garara, “Wei ravai dobu au anatapuna apoapoe maġamaġaġau i kauei, marina i ġetai ata au dobu.” ⁷ Ma Jason, Paul ma Sailas i taravaini ana au numa. Tau Caesar ana tarawatu e viviaigai ma e ririwa da gulau ġelauna e mamae wavana Iesu.

⁸ Maranai patara ma taon babada i wei babanina i nonori tau i amlai i ġaiġai kaua, ⁹ ma Jason i egari da mane ġaġaena i vimaiei da eġa mae boaboa ġelauna ina vitupui. Ma tau Jason i voterei da i nae.

Au Berea

¹⁰ Ma waguvarai tauvitumaġana Paul ma Sailas i paritawane i au Berea. Maranai kampa i ġeta, ma i rui au boru numana. ¹¹ Mai Berea i viaiaii, eġa me mai Thesalonika. Tau i rautaniġana ma i votelata ma marana patapatana God ana buka i 'aiavi da ita aramane i da Paul aiwai i bababaniei lamna riwa kaua. ¹² Ma lamnei mai Jew maġamaġaġau i vitumaġana, ma nanare mai Greek waivine wavai naenaei ma nelara.

¹³ Maranai mai Jew au Thesalonika paratana i nonori da Paul God riwana i raruugugulei au Berea, tau i maiteni i nae kampa, ma rava i rauegari da ġavia ita vikarei. ¹⁴ Maratagogi

* 16:35: vs. 20 ma inana. † 16:37: Mai Rome ai tarawatu lamna, “Eġa rava Romei ma kwapu labalababai bo ma pani da au naona ma rautare.” Rome Israel i vibadei Iesu ana au mara.

kerisiana Paul i paritawanei au gera wate Sailas ma Timothy au Berea provins i mae. ¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua. ¹⁷ Mai Jew ma mai Greek God tauviborumeina awari i jima guratana au pari numana ma nanare au deba, ai ai da i ḡeta ma i rautaniḡana. ¹⁸ Ma rava ḡelau nuaulaulai i ḡetai ma maiteni i vitarapiri, tau i ḡoreḡorei mai Epicure ma mai Stoic*, tau i lawana ai kaua tauviaramanai. Ma ai rava ḡelau i paridadana, "Wei ravana aiwai e vogavoganei?" ḡelau i riwa, "Mepa da tauna dobu ḡelau ai god e bababaniei." Tau wenanare i babani aubaina Paul Iesu Riwana Aiaina ma ana irage ma ana vomairi me, i raugugulei.

¹⁹ Ma i taravaini ma i naiei ai au boru e ḡoreḡorei Areopagus ma i riwei, "Ma nei ma a ḡoei da am viararamanana vouna e bababaniei, ata aramanei. ²⁰ Kaua ḡelau e babaniei tauai a vivinuanainei, ma a ḡoei da ana aramanei anona aiwai?" ²¹ (Taumana ma mai Athens marana patapatani ai nola eḡa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii, ²³ A bababara ma ami pulo aniapunana a inainanai, ma tagogi a inanai au tepana i giruma, "Wei God eḡa ata araramaneia aubaina." Wei Godna o viviborumei wate eḡa ota aramanei. Tau ana riwemi nai Godna ai ai. ²⁴ *Tauna God mara ma dobu ma aiwai anatapuna au orana i kauai. Ma tauna mara ma dobu badana, ma numa rava uranei e voavoai au orana eḡa ita mamae. ²⁵ Ma eḡa rava ai agu ita paipaini, tauna agu eḡa ita ḡoeḡoei. Aubaina tauna rava lawana ma lavutu ma anatapuna e vereverei. ²⁶ Au karena rava tagogi i kauai ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina irage ma animae paratana i aiterei. ²⁷ God wenanare i kauai da rava tauna ina baii da mepa ina nelaḡai. Wate tauna au ḡereḡereta, eḡa au uama. ²⁸ Taugiruma ḡelauna Greekei i riwai pa, "Tau nei ta mamae ma ta bababara ma anatapuna ta kaukauei."† Ma wate ami taugiruma ḡelauna i girumi i pa, "Tauai nanare tauna natunatuna."‡

²⁹ Ma tauta God natunatuna, eḡa tana notai da God lamna me kokoitau, goldei bo silvei i kauai. Rava uraiei ma ana nuaulaulauei i kauai. ³⁰ Wariaḡa rava God eḡa ita aramanei wate God tau i 'nana-tawanei, wate marina anataputa egaegarita da tana rupena ma tana maetavireta awarina. ³¹ Aubaina mara i vinei maranai rava anatapui aiainei ma jijimaninei ina kovogi. Rava i vinei da taunei ina kovoga. God wei ravana iragelei i vovaimairini lamna ina vimataira rava awari da ravana anina tauna.

³² Maranai Paul iragelei vomairina i babaniei, rava i nonori ma ḡelau tauna i vinamei wate ḡelau i riwa, "Tauai a ḡoei da muriai wei babanina ma babaniana-melei." ³³ Ma Paul ai boru i opu-tawanei ma boru i gudu. ³⁴ Wate ḡelau i vitumaḡana ma Paul i votaḡotaḡoi. Tagogi lamna Dionisius, Areopagus boruna au orana, ma wavine wavana Damaris, ma rava ḡelau.

18

Paul i nae au Corinth da rava awari Iesu ita jime

¹ Paul Athens i netawanei ma i nae au Corinth. ² Kampa Akwila tauna Jew au Pontus i tupua, marinaota au Italy* da i nei awana Prisila maiteni. Aubaina Rome ai gulau Claudius mai Jew anatapui i viaḡaḡei da Rome i opu-tawanei. Paul i nae da tau i ita inanai. ³ Paul tau i maiteni i mae, tau i tauampopo, (ḡamogamo opina ma gara i popopoi numa aubaina ma i gimagimarei) me Paul ai nola tagogina. ⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ḡetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso. ⁶ Wate mai

* **17:18:** Mai Epicure rava wavana Epicurus ana viararamana i votaḡotaḡoi. I viararamana da lawana ana ano lamna nauaii. Da tau aiwai da tupuai ma matai ana rauogara, e vivinuaiaiei. Ma aiwai da e virovorovi bo iniviara e verevereia. Tau i wei lamna e gedugeduaiei. Tau i ririwa da God rava eḡa ita vinuavainei Stoic rava wavana Zeno ana viararamana e votaḡotaḡoi. I viararamana da rava ma ai maiteni au rivivata ta mamae (nature) ita vivirei, Tau ai ḡoana ma ai erawa ita teretawanei ma ita vivinuananota kaua ma avena rava ḡelau ai agu ita raunenelei. Tau i ririwa, "Nuaiaii lamna kaua e vovoterei da mena ina tupua nei nanare ina tupua." * **17:24:** 1Ki 8:27; Act 7:48 † **17:28:** Epimenides Ciritei au 6 century BC. ‡ **17:28:** Aratus Silisie 3 century BC. * **18:2:** Rome taon lamna taon ḡaeḡaena au Italy ma ai kapital AD. 49 au orana kampa viḡaiḡaiawa ḡaeḡaena da wavalatona Claudius mai Jew i riwei da dobu na i netawanei.

Jew Paul i viġaviei ma riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eġa tau ona viwavuiul Marina da e nena, ana nae Jentail awari.”

⁷ Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena. ⁸ Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġgai Paul i rautaniġanei, i vitumaġana ma i babataito.

⁹ Waguvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.” ¹⁰ Aubaina Tau tam maiteni. Ma rava eġa ina rau-iviapoapoelem aubaina au tauvotagotaġo i maġa wei au dobuna. ¹¹ Ma Paul kampa i mae madeġa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagoggie ma Paul i vojijini ma i naei Gavena awarina da ita rautarei. ¹³ Ma tau i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laġi da ita babani ma Galio i babani mai Jew awari i pa, “Mepa da taumi wei ravana o viviwavui da kua ġaeġaei bo kua apoapoe aubaina, lamna tau au nola da ata rau-taniġanemi. ¹⁵ Wate wei taumi ami babani ami wava ma ami tarawatu, ana voterei au urami. Tau eġa wei kauai ana rautarei.” ¹⁶ Ma etara numanei i viaġaġana-opunei. ¹⁷ Taui anatapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

Paul i nae me au Antiok au Syria

¹⁸ Paul i mae mara aburuna tauvitumaġana maiteni au Corinth ma wagei i nae au ġereġere au Cenkirei waga ai au animae. Prisila ma Akwila maiteni. Ma kampa Paul ana parivainuaġana aubaina aparana i ġari, ma anatapui i nae au Syria ¹⁹ Tau i Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima. ²⁰ Rava i vibaġai da ita mae mara aburuna wate tauna eġa ita vianina. ²¹ Wate maranai i opu da ita nae ma tau i riwei, “Ana nememei mepa da God ana ġoana, ma Ephesus i netawanei ma wagei i damana.” ²² Maranai i ġeta au Caesarea ma i nae au Jerusalem da kerisiana i raugenari ma i nae au Antiok. ²³ Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana ġiruma i aramana-kauei ma rava bababanina. ²⁵ Rava ġelau, Apolos BADA ana etanai babanina, i viararamani, ma ana tepatorana i jima ma Iesu ana kua ma ana lawana i viararamana-kauei. Wate tauna John Taubabataito ana babataito babani ava i aramane. ²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ġorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nena e au Akaia, kerisiana Apolos i vovai-virewapani. Ma kerisiana au Akaia ai pepa i ġiruma da ita parivere i da tauna ita nebelei. Maranai au Akaia i ġeta ma tau God ana aguei i vitumaġana, agu ġaeġaena i verei. ²⁸ Tauna ana babanie i au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taġoni da au Ephesus i ġeta. Kerisiana ġelau kampa ² ma i paridadanei i pa, “Arua vivivireina o vaia bo eġa maranai o babataito?”

Tau i paribelei i pa, “Eġa, Tau ai eġa ata aramane i da Arua vivivireina e mamea.”

³ Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

† 18:13: Mai Jew e ririwa da Paul eġa tau ai vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ġoei da Rome ai bada Paul ina kovoġi. Ma inana Act 16:20-21 ma 17:7.

⁴ *Paul i riwa, “John ana babataito lamna mataira da tau i ai gō’apoapoelei i mae-tavirei; ma mai Israel i riwei da Tauna au muriu e nenei ona vitumaḡanei lamna Iesu.” ⁵ Maranai wei i nonori ma i aramanei tau i babataito BADA Iesu wavanei. ⁶ Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei. ⁷ Tau nelara iavana twelve.

⁸ Paul i nae au boru-numana ma kampa nawaravi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei. ⁹ Wate ḡelau kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijiboḡi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom. ¹⁰ Ma nanare i mae madeḡa ruḡa i kwa, da mai Jew ma Jentail ravai maḡamaḡai au Eisia provins maemaei BADA riwana i nonori.

Seva natunatuna

¹¹ Ma God ana rewapanei Paul kaua ḡaeḡaei ma aniba i kaukauei, ¹² lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ḡelaui dobuna i naeni ma arua apoapoei i viviaḡana-opunei ma i raudadana Iesu wavanei da arua apoapoei i viviaḡaeḡei. Tau arua apoapoei i riwei i pa, “Iesu wavanei, taunei Paul e rarauḡugula, Tau a egarim da ma opu.” ¹⁴ Skeva, pirisi ai bada natunatuna nelarai seven wei kauana i kaukauei. ¹⁵ Wate mara tagoḡi arua apoapoena i paribelei, “Iesu a aramanei ma Paul a aramanei ma taumi aiavoi?” ¹⁶ Ma rava au orana arua apoapoena maemaena i auepai ma tau i vunui da eḡa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus maemaei wei riwana i nonori ma rovo orai i ḡaeni ma Iesu wavana i vivirana-kauai.

¹⁸ Maḡamaḡai i vitumaḡana ma inae kerisiana awarii ma ai gō’apoapoe i rupeni. ¹⁹ Tau vitumaḡana voui maḡamaḡai paraparaumai,* ai buka i vidamni au deba ma i apui. Maranai bukai ai maia i ’avi da silver 50,000†. ²⁰ Kaua babai me wei, Iesu riwana i vibabarai nai au dobuna ma rava maḡamaḡai i vitumaḡana.

²¹ Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inana.” ²² Ma Paul ana tauagu ruḡa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Vigaiḡaiawa au Ephesus

²³ Iesu ana babani ma ana kava vouna aubaina, ma vigaiḡaiawa ḡaeḡaena i tupua au Ephesus. ²⁴ Silver taunoleina wavana Demetrius, mai Greek ai god wavinena ana numa taparoro kokoitau i rarau-ḡarogaroēi da i gimagimare, ma wei nolana mane ḡaeḡaena e neinei ai silver taunoleina nai au dobuna aubaii. ²⁵ Ma tau i anatapui ai rava nolana tagogina e kaukauei maiteni i raugoreiai ma i riwa, “Au rava, o aramanei da ata maura wei nolanei ta vaivaia. ²⁶ Ma o inana ma o nonori menanare wei ravana Paul e kaukauei, Rava ai nota i sinavirai da maḡamaḡai god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i raugarogaroēi, lamna eḡa god.’ ²⁷ Tauta tana inana kava da wavata ma ata mane ani kauana eḡa ina apoapoe. Ma ata god ḡetelarana Artemis ana numa taparoro ma wavana eḡa ina vijiboḡi, eḡa au Eisia provins ava ma dobu au anatapuna.”

²⁸ Maranai patara wei babanina i nonori tau i meji kava ma i vigaragarei, “Artemis mai Ephesus ai god i ḡetelera!” ²⁹ Ma tau i garagarara rava nai au dobuna i nonori ma tau i maiteni i garara labalababa. Anina ma patara Gaius ma Aristakas i vojijini tau i ruḡai mai Masedonia Paul ana tauvigiwanigwaniana, ma i rubana-naiei nai dobuna ana boru gabuna.‡ ³⁰ Paul i ḡoei da patara au naoi ita rui da ita babani wate kerisiana eḡa ita vianinei. ³¹ Wate nanare Paul ana rava ḡelau i gabemani tauna i vigaei da eḡa ina nae au boru.

³² Patara i vinuanaina, i logologoi ma i garagarara labalababa ma eḡa ita aramanei aiwai aubaina weka i nei. ³³ Mai Jew oroto tagoḡi i dudu-opunei au naoi wavana Alexander ma patara ḡelau i garara awarina da ita babani. Alexander urana i voepai da tau i ita genuana ma

* **19:4:** Mrk 1:4, 7-8 * **19:19:** Au Deu 18:10-14 God ana rava e vivigaei da eḡa ina parauma. † **19:19:** Dracma coin tagoḡi lamna tau-vobagibagi ana maia au pom tagoḡi aubaina. Marina lamna million biaga. ‡ **19:29:** Dobuna ana boru gabuna lamna numa ḡaeḡaena. Eḡa poewana, ma inanana me nawaravi gebona. Rava maḡamaḡai 26,000, nanare ina kiala **meeting place**. Rava e nenei kampa da kalo tapuna ma e raruubiḡa.

tauna ana rava aubai ita babani. ³⁴ Wate maranai i aramanei da tauna Jew. Tau i anatapui pona tagoginei wenanare i garagarara, “Tauta mai Ephesus ata god Artemis i ġetelera!” da *hour* ruaġa i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god ġeġetelarana Artemis ana numa taparoro ma ana ġaima vivireina marei i peuai aubaina. ³⁶ Eġa aiai wei ina vikaua-moruei. Lamna aubaina orami ina rauei ma eġa aiwai apoapoena ona kauai. ³⁷ Wei ravai o neiai weka wate tau i eġa au numa taparoro aiwai ita danenei bo ata god ita riwana-boei. ³⁸ Mepa da Demetrius ana rava maiteni e viviwavui tau i nae ina rauetara ma ami viwavu ona naei kampa taurauetara awarina. ³⁹ Ma mepa da ami nuabola ġelau i mamae lamna taon babadai ai au boru ona babaniei ma ona tere-jijimani. ⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaġawaġana anona eġa, ma mepa da Rome ina paridadana ma tauta menanare tana paribelananei. ⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaġawaġa au Ephesus taon i kwa ma au murina Paul kerisiana i raukwatueiai da i vinua-terenei, i viegualaei ma i netawanei da i nae au Masedonia provins. ² Ma dobuna ġaeġaenana i naeni ma kua maġamaġau kerisiana i vinua-terenei. Anina ma au Akaiia* i ġeta. ³ Kampa nawaravi tonuġa i mae. Tauna i vokaukua da ita nae au Syria ma wate i nelaġai da mai Jew ġelau i viraġenana i viviogatarei lamna aubaina da i nae me au Masedonia. ⁴ Nelara ġelau i votaġotaġo tau i lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy. ⁵ Tau i wagei i ainae au Troas ma kampa i painiai. ⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

Au Troas, Paul Eutikus iragelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratomna da ita nae. ⁸ Numa vatavatara au tepana a vitagogielai, ma kampa rampa maġamaġau i ararata. ⁹ Orotu laragana wavana Eutikus au windo i kiakiala ma Paul i raruugugula, ma tauna matana i pota kua da i raunuavuru, ma kampa au tepa dewadewana i peu-ġaira da au doa i rauei. Maranai tau i ġaira da ita voepai, tauna irairageina. ¹⁰ Paul i ġaira, i matave-tepani ma i rapai ma rava i riwei i pa, “Eġa ona vinuabola, tauna lawalawaina!” ¹¹ Anina ma Paul i ġae me au numa ma kerisiana maiteni BADA ana amgogona amna i ani ma awari i babani maratom. Ma Paul nai dobuna i netawanei. ¹² Tau i laragana lawalawaina i naiei au numa ma rava orai i rauei.

Paul i amkuka au Miletus

¹³ Paul aenei i nae au Assos ma tauai i riwai da wagei ana nae au Assos da tauna kampa ana vigerui. ¹⁴ Ma au Assos a vigerui ma a nae au Miletus ¹⁵ Maratomna bonabona Kios au ġereġerena a nae. Ma marana i tom au Samos a ġeta, ma maratom ġela au Miletus a ġota. ¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei. ¹⁸ Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai. ¹⁹ Mai Jew i ġoei da ita rau-iviapoepoleu wate tau a vilamolama ma ana toutou BADA awarina a vivitaunola. ²⁰ O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajjini. Au deba a raruugugula rava maġamaġau au naoi, ma ami au numa a viararamanini ²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa aiwai awari ina tupua. ²³ Wate taon nununai awari a nena ma Arua Vivivireina

* 20:2: Marina e ġoreġorei Greek.

e vivieḡeu da amapo ina paniu ma au deri ina tereu ma ina rau-iviapoapoeleu. ²⁴Ma mepa da ina virageniu, wei lamna eḡa kaua ḡaeḡaena tau awariu. Wate kaua ḡaeḡaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

²⁵Maḡamaḡaumi awarimi a nei ma God ana vigulau a raugugulei wate marina a aramanei da amadodo da i nena, naou eḡa ona inana-melei. ²⁶⁻²⁷God ana vilawana ogatarana rava aubaii eḡa ata govaḡi awarimi lamna aubaina riwa bagibaginei a ririwemi da mepa da rava au babani eḡa ina vitumaḡanei ma ana lawana maemae-nonoana ina vine-boai, lamna eḡa tau au wavu. ²⁸Taumi babada ma ona paina-melemi, nanare tauvitumaḡana tau aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Tauti lamna God ana vinevine taranei i gimarai. ²⁹A aramanei da ana nae ma au muriu tauraugugula morumorui ina nei awarimi ma rava ai tumaḡana ina viapoapoeni, me auou moduei sipu au boruna viraḡena aubaina. ³⁰Ma rava ḡelau ami au dam oina ina vomairi ma ina viaramana ma moruei rava orai ina taini da tauti ina votaḡotaḡoi. ³¹Lamna aubaina matami ina kala ma ona aramanei da madeḡa tonuḡa marai ma waguvarai a notanotaimi ma ana toutou a viviararamanimi.

³²Ma marina God au urana a tereteremi. Ana agu e verevereoimi ona vivitumaḡanei. Wei aguina e vovaiwewapanimi, ma ami pulo ina veremi, aubaina taumi God natunatuna viaiainai. ³³Ma tau eḡa rava ana mane bo ana purapura ata rauoḡarei ³⁴Taumi o aramana-kauai da tau nimauei a nola da mane a vaia da tau au taubagibagi turau aubaii. ³⁵Nanare, a viatataiem i da ona nola guratana da mane ona vaia ma molaka ona voagui. Iesu ana babani eḡa nuanuami ina vuru, Tauna i riwa i pa, “Verena i ai kaua eḡa me vainana.” ³⁶Paul i babani vorovei ma anatapu i mae-ḡaira au doa ma i raupari. ³⁷⁻³⁸I vinolanola i pa, “Amapo eḡa naou ona inana-melei.” Wei riwana i vinuabolai da i vitouana, Paul i taragwabai ma i vigia-laḡolaḡonei. Ma i naiei da au waga i vigeruei.

21

Paul ana vaḡai au Jerusalem

¹Ephesus kerisiana babadai a viegualaei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon. ²Weka waga ḡelaua i nena, au Phonisia a gerui, ³da au Saipras bonabonana a rubatawanei, au kelakelauai da a nae au Taia au Syria provins a ḡota, da purapura ita viopuni. ⁴Kampa tauvitumaḡana a baii ma aupom ⁷maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viḡaei da eḡa ina nae au Jerusalem. ⁵Ma mara i ḡetai da ata vomairi, kerisiana awawai maiteni da natunatui taon i voterei ma anatapuiai a ḡaira au gera, a raupari gogona. ⁶A viegualau da tauai au waga a geru ma tauti i nae-me ai au numa.

⁷Au Taia ma a nae au Tolemais taon a ḡeta. Tautitumaḡana kampa a nebelei ma aupom tagogi maiteni a mae. ⁸Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina. ⁹Tauna natunatuna waivinei 4 eḡa tavitavinei, tauti God ana riwa i vivieḡai rava awari.

¹⁰Aupom vomaḡaui i kwa, kerisiana wavana Agabas, tauna nanare God riwana i vivieḡai, Judeaei i ḡairai au Caesarea. ¹¹Ma i nei awariai da Paul ana tairoro i vaia ma tauna urana ma aena i raḡina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raḡini, ma Jentail au urai ina terei.”

¹²Maranai wei riwana a nonori, tauai kerisiana ḡelau maiteni Paul a vibaḡana-guratei, da avena ita nae au Jerusalem. ¹³Wate i pa, “Aiwai aubaina o vitouana ma orau o viviaipoapoeni! Tau a vokaukua nonoa da ina raḡiniu, wate eḡa lamna ava ma ina virageniu au Jerusalem, BADA Iesu a vovotaḡotaḡoi aubaina.” ¹⁴Tauai a vivieḡai ma eḡa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ḡoanei nanare ina tupua.”

¹⁵Wei au murina a vokaukua ma a vomairi au Jerusalem. ¹⁶Kerisiana ḡelau mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaḡona i vikareni maranaina rava vovounai i vikarei da Iesu Riwana Aiaina i rarau-gugulei.

Paul, James i raugenari

17 Maranai au Jerusalem a ġeta kerisiana ana nuaiaii i nebelelai. 18 Maratom ġela Paul maiteni a nae da* James a raugenari,† dogadogara anapupi kampa. 19 Paul tau i viegualauai ma ana au vaġai God aiwai i kaukauei Jentail awari anapupuna tau i pariverei.

20 Maranaina wei riwai i nonori, tau God i voepaepai ma Paul i riwa i pa, “Turaiyai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġo-kauai. 21 Wate rava Jew kerisiana weka au Jerusalem am kaua i vibenabenaie, da tam Jew Jentail maiteni e mamae e viaramani da Moses ana tarawatu ina gedugeduai. Ma u riwei da natunatui ini eġa ina bori ma ai kaua ġelau eġa ina votaġotaġoi. 22 Tau i aramanei da tam u ġetai, Marina aiwai tana kauai? 23 Aiwai a ririwemi ona kauai. Au nelara 4, tau parivainuagana bagibagina God awarina i kauai. 24 Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauai. Anina ma tau kolai ina ġari ma rava anapupi ina aramanei da tam Moses ana tarawatu anina e vovotaġotaġoi, ma babani au naona lamna anapupuna moru kaua. 25 *Ma Jentail marina i vivitumaġana aubaii pepa a girumi ma wenanaro a riwei, sia e pulupuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”*

26 Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai tau i viaiaina ina voterei. Ma maranaina pulo ita terei tau tagotagogi ava aubai.

Paul i pani.

27-29 *Ma aupom 7 aburuna ava da ita kwa ma Jew ġelau au Eisia provins maemae tau Paul i 'nanai Tempol au orana. Au naonei tau Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i rui Tempol au orana. Tau Paul i vojijini ma i garara i pa, “Nelara mai Israel ona nei, ona voagui! Wei orotona dobu anapupuna e nenaeni ma rava anapupi e viaramani da mai Jew ma ata tarawatu ma Tempol i parivirei. Tauna Jentail i neiai gabuna au vivivireina ma i tuvaidoedoei God au matana!”

30 Ma rava anapupi i nonori da au Tempol viġaiġaiawa i tupua ma anapupi kampa i ruba. Ma Paul i vojijini ma i taina-opunei au doa ma Tempol metaetana i gudui. 31 Maranai tau Paul viragenana i kaukauei, Mai Rome sorodia ai bada ġaeġaena i nonori da viġaiġaiawa ġaeġaena i tupua au Tempol. 32 Tauna laġilaġina ana sorodia ma ai babada i vaini ma i ruba kampa, maranai rava tau i 'nanai, Tau Paul vunuaana i voterei.

33 Sorodia ai bada i nei Paul awarina da i vojijini ma ana sorodia ruġa i riwei da seinei Paul urana au urai i pani jijini. Anina ma tauna patara i vitara-virei i pa, “Wei ai ai orotona? Aiwai i kauai?” 34 Patara au orana rava ġelau babani tagoġi i gararei, ma rava ġelau babani tapuna i gararei. Rava were da nare i garagarara da sorodia ai bada menanare ita nelaġai ġaiawa karna aiwai, lamna aubaina ana sorodia i egari da Paul ita naiei, ai au bareki. 35 Maranai Paul bareki tetena i tutuġereġerei, patara i ġaiawa guratana aubaina sorodia Paul i voepai da i avarai da ita ġagaloei. 36 Patara amapo da tau i vovotaġotaġoi ma i garagarara i pa, “Ona virageini, ona virageini!”

Paul patara awarii i babani.

37 Maranai tau aburuna ava da au bareki ita rui, Paul Greekei sorodia ai bada i riwei i pa, “Anina bo eġa da awarim ata babani?”

Ma tauna i auepai ma i riwa i pa, “Tam Greek u aramanei bo? 38 Tau a notai da tam Egyptei, rorova ai babada u viġaviei, Ma rava 4,000 orai potapotai u opunei au mutulua, Tam nai ravana bo?”

39 Paul i paribelana i pa, “Eġa! Tau Jew ei, au taon Tarsus a tupua, au Silisia provins, a vivibaġaim da rava awari ana babani.”

40 Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

* 21:18: Wei lamna Iesu ana tevera. Act 12:17; 15:13 ma Mrk 6:3 † 21:18: Mane anapupi ai au vaġai i tami bo rava i puloi i verei damanai mane taupainina i verei * 21:25: Act 15:29 ‡ 21:25: Viawawana labalababa wei anapupuna e vaivaipei: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana mane bo purapura aubaina (Lev 19:29, 1 Cor 6:15); Natuom maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma ġamoġamo e viawawana (Lev 18:23); Rava ġela, eġa awaom maiteni e viawawana (Eph 5:3); Rava ġelau e gaegari da maiteni ma viawawana. (Gen 34:7, Deu 22:25-28). * 21:27-29: Act 20:4

22

1 “Amamau ma varevareiu, ona rautaniġaneu ma ana viatataiemi da tau eġa aiwai ata kauana-boai.”

2 Maranai patarana Paul i nonori da tau i a ponei i bababani, tau i genuana ma i rautaniġana.

3 [✠]I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma.

Amamata ai tarawatu a girumei ma au tauviararamana Gamaliel.^{*} A ġoana-guratei da God ata voepaepa-kauei me taumi anatapumi nanare. 4 [✠]Tau Iesu ana etanai tauvotagotagoina a rau-iviapoapelei da ġelau i raġe. Nelara ma waivine a pani ma au numa panipani a tawana-ruiei. 5 Pirisi ġeġetelarana ana boru ġeġetelarana[†] maiteni i aramanei da tau a ririwa kaus. Tau ai vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoga ita vaia weka au Jerusalem.

6 Aubenai Damaskas a tuġereġerei ma maratagogi lalaina gamrina ġaeġaena marei i ġairai da i tunuiai. 7 A peu au doa ma pona a nonori i pa, “Saul! Saul! Aiwai aubaina e rarau-iviapoapeleu?”

8 Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapelei.”

9 Rava maiteni a nena lalalaina i nanai wate babani eġa ita nonori.

10 A paridadana a pa, “Bada Aiwai ana kauei?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

11 Lalalaina gamrina i rata guratana ma matau i kamoi da eġa ata inainana. Ma tauviganwiganwiana au urai i voa ma i naieu au Damaskas.

12 Orotu wavana Ananias kampa i mae tauna God i voepaepai ma ana tarawatu i vovojjina-nonoei. Mai Jew tauna i vivirana-kauei. 13 I nei da au ririvau i mairi ma i riwa, “Vareiu Saul ma inana me!” Nai marana a inana me.

14 Anina ma i riwa, “Amamata ai God i rautanim, da ana ġoana ma aramanei, ana Taunola Jijimanina[‡] - matamei ma inanai, ma riwana taniġamei ma nonori. 15 Aiwai u inainanai ma u nononori ma vimatamei rava anatapu awarii. 16 Marina aiwai e paipaini! Tauai ana babataioim ma BADA awarina ma raupari da am ġo’apoapelei ina oġa-tawanei.”

17 Anina ma a nae au Jerusalem. Au Tempol a raruari ma matauei kaus a inanai.

18 A inanai BADA awariu i bababani i pa, “Rava weka am jima tau aubaiu eġa nonorana ita ġoeġoi. Laġilagiina Jerusalem ma opu-tawanei.”

19 Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei. 20 [✠]Ma maranai am peroveta Stephen tarana i toi, tau kampa a maimairi ma ana iraġe a vianinei ma ġaima tautawanai ai gara a paipaini.”

21 Ma BADA i riweu, “Ma nae a paripari-tawanem aueia Jentail awarii.”

Paul e ririwa da tauna Romei

22 Patarana Paul i rautaniġanei ma maranai wei babanina i kauei tau i meji guratana ma i vigaragararei i pa, “Ona viraġena-tawanei, eġa ina mael!”

23 Tau i vigaragararei, ai kwama i kwajikwajiei ma pokau i tawatawanei awarina. 24 Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieġa aiwai aubaina ana rava amloi i ġaiġai ma awarina i garagara. 25 Ma urana ruaga i terepai au aidamo ma i raġiraġini da ita wipi ma Paul sorodia ai bada i riwei i pa, “Tau Rome-ei, Eġa ota etareu ma o vunuvunu-labalababai. Lamna menanare?”

26 Maranai sorodia ai bada wei i nonori ma i nae da ai bada ġaeġaena i pariverei. Ma tauna i vitara-virevirei i pa, “Aiwai e kaukauei? Wei ravana Rome-ei!”

27 Sorodia ai bada i nae Paul awarina ma i paridadanei, “Ma riweu! Riwa kaus da tam Rome-ei bo?”

Ma Paul i paribelei, “Ee, lamna riwa kaus!”

28 Sorodia ai bada Paul i riwei, “Tau mane ġaeġaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

29 Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukaus maranai i aramanei da i kauana-boai da Paul, Rome-ei seinei i pani.

Paul Jew ai boru ġetelarana^S au naoi i mairi.

✠ 22:3: Act 5:34-39 * 22:3: Gamaliel tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana. ✠ 22:4: Act 8:3; 26:9-11 † 22:5: Sanhedrin ‡ 22:14: Rava Jijimanina bo bulubulona, lamna Iesu wavana. Paul eġa Iesu wavana ita latoni mepa da taurautaniġana mai Jew ita vianloġaiġaini.

✠ 22:20: Act 7:58 § 22:29: Wei lamna Sanhedrin

³⁰ Au maratomba sorodia ai bada i goei da ita aramana-kauei mai Jew ai viwavu aiwai Paul awarina. Ma lamna aubaina Paul ana seini i votawatawanei ma i opunei boru getelarana au naona i vimairini.

23

¹ Paul boru getelarana i 'nana-jijini ma i riwa, "Varevareiu tau au nola God awarina i jijimana ma orau aiaina da wei paratana." ² Ma Pirisi getelarana Ananias rava gelauna Paul au ririvana i maimairi i egari da Paul i raunavanavai. ³ Ma Paul Ananias i riwei, "God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai."

⁴ Tau Paul au geregerena i maimairi Paul i riwei, "Aiwai aubaina God ana Pirisi Getelarana e vivijibogi?"

⁵ Paul i paribelei, "Varevareiu ega ata aramanei da tauna God ana Pirisi getelarana. Au buka i terei da *Ega God ana taunola ma parivai-apoapoeni.*" (Exodus 22:27)

⁶ *Anina ma Paul i 'nanai da Sadusi ma Pharisi gelaiu kampa ma ponana i rata ma i riwa, "Varevareiu tau Pharisi, amau maiteni Pharisi. A vitutumašana da God rava iragelei ina vovaimairini wei lamna aubaina taumi o etaetareu!" ⁷ Maranai wei i latoni Pharisi ma Sadusi vipariparinięai i raukarei ma boru i kai da ruaęa. ⁸ *Aubaina Sadusi e ririwa da rava e iriraęe lamna eęa ita vovomairi me, ma anela da aruarua eęa ita vitutumaęanei, wate Pharisi wei anatapui e vitutumaęanei.

⁹ Gaiawa gaeęaena i tupua ma tarawatu babadai gelaiu tau Pharisi, i vomairi ma i babani guratana i pa, "Tauai eęa aiwai apoapoena ata inana wei ravana awarina! Mepa da anela bo Bada Aruana tauna awarina i babani?" ¹⁰ Vigaięaiawa gaeęaena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvarai gelauna, BADA Paul au ririvana i mairi ma i riwei, "Tepam ina tora! Me aubaiu u jima au Jerusalem nanare aubaiu au Rome ma jima."

Mai Jew i vioga da Paul ina viraęeni

¹² Ubaubanai mai Jew gelaiu i vitagogiei ma i viogatara ma i parivainuaęana da eęa ina am bo ina uma da Paul ina viraęeni. ¹³ Nelara 40 nanare i vianina da Paul ina viraęeni. ¹⁴ Taui i nae pirisi babadai ma dogadogara awarii ma i riwei, "Tauai parivainuaęana bagibagina a kauei da eęa ana am da Paul ana viraęeni." ¹⁵ Taumi Boru getelarana maiteni ona moru ma riwa ona pari-tawanei sorodia badana awarina da Paul ina neiai ma ona vitara-virevirei da riwa kaua ona vaia. Tauai ana vipaipai da ana viraęeni muriai da weka ina getai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

¹⁷ Ma Paul sorodia badana i goiei ma i riwei, "Wei laragana laęilaęina ma naiei ami bada awarina da ana riwa ina riwei." ¹⁸ Ma i naiei ai bada gaeęaena awarina ma i riwei, "Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina."

¹⁹ Sorodia ai bada gaeęaena laraga i vinimavoai ma i maeria ma i paridadanei, "Am riwa aiwai ma riweu?"

²⁰ I riwa, "Mai Jew i riwa da ita vibaęaim da au maratomb Paul uta naiei ai au Boru getelarana, Wei anatapuna moru. ²¹ Wate eęa ma rautanięanei aubaina rava 40 nanare pota e paipaini da ina viraęeni. Tau i vioga da eęa ina am da Paul ina viraęeni. Tau i vokaukua ma am vianina ava e paipaini."

²² Ma bada laraga i riwei da eęa ai ai ina riwei ma i paritawanei.

Tau Paul i paritawanei Gavena Felix awarina.

²³ Anina ma sorodia ai bada gaeęaena babada ruaęa i goiei ma i riwei, i pa, "Sorodia sod ravai 200, aiera ravai 200 ma hos ravai 70 ma vaia ma ona vokaukua da waguvarai 9 oklok ona vomairi. ²⁴ Hos biaęa ona vaia Paul aubaina da aiaina ona naiei gavena Felix awarina au Caesarea."

²⁵ Ma sorodia ai bada pepa wenanare i girumi:

²⁶ Tau Claudius Lisias, a girugiruma awarim au bada vinualaulaunam, Gavena Felix. Eęualau.

²⁷ Mai Jew wei orotona i vojijini ma ita viraęeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei. ²⁸ A goei da ata aramanei ana apoapoe aiwai, da ata naiei ai Boru getelerana awarina. ²⁹ Ma a nelaęai

da viwavuna lamna tauiva ai tumaḡana kauai ma Rome ana tarawatuei lamna tauna eḡa aiwai apoapoenā ita kauēi da ata virāḡeni bo ata pani. ³⁰ Maranai riwana a vaia da mai Jew i ḡoei da govagovaḡane i tauna ita vunui. Lamna maratagogi a paritawane i awarim, ma nanare tauviwavu a riwana-guratei da kampa ina ḡetai da ai viwavu ina kauēi.

³¹ Ma sorodia ai babada i ririweia nanare i kauēi ma waguvarai Paul i taravaini ma i naiei da au taon Antipatris i ḡeta. ³² Au maratamna aiera ma sod sorodiai i naeme au Jerusalem ma hosi sorodia Paul i naei au Caesarea. ³³ Maranai hosi sorodiai au Caesarea i ḡeta pepana ma Paul gavena i veredamane i au urana. ³⁴ Gavena pepa i 'avi ma Paul i paridadane i metauna provins-na u tupua ma i riwa, "Silisia." ³⁵ Gavena i riwa i pa, "Am etara ana nonori maranai am tauviwavu ina ḡetai." Ma sorodia i naiei Herod numa i voavoaiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ḡeḡetelarana Ananias ma dogadogara i ḡaira au Caesarea ai taurauetara wavana Tertelus maiteni. ² Ma Paul i ḡoreiai gabemani au naona. Ma Tertelus i vomairi ma viwavuna i vikare:

Au bada Felix *vinualaulaunam, Am vibadane i ta mae ubauba ma ata nota eḡa aiwai. Ma kaua vouii ma aiaii u kaukauei ata dobu voana aubaina i voagu-kaueta. ³ Anatapui ai mepamepa a mamea a vinuai ai kaua tam awarim. ⁴ Wate eḡa ata ḡoei da ana visina-viraviraim. Ma lamna aubaina a ḡeḡoei da uta rautaniḡaneu mara aburuna ava.

⁵ Tauai a nelaḡai da wei ravana lamna orana potapotana ma viḡaiḡaiava tauvikareina mai Jew awarii dobu au anatapuna. Tauna boru vouna e ḡoreḡorei mai Nasaret† ai bada.

⁶ Tau i ḡoei da Tempol maiteni ita tuvaioedoei ma lamna aubaina a pani. ⁷ *⁸ Ma rauetarei ma ma nelaḡai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, "Wei babani anatapui riwa kaua!"

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramane i da tam madeḡa biaḡa wei dobuna ai taurauetara lamna aubaina tau ana nuaubau ana babani aubai. ¹¹ Am rava ina riwem da tau pom ota aupom 12 nanare a ḡeta mēmei au Jerusalem da BADA ata voepaepai. ¹² Au tauviwavu eḡa ita nelaḡaiu ata viḡaiḡaiawa au Tempol bo au boru-numana bo mēpa nanare au Jerusalem.

¹³ Ma ai viwavu tau awariu menanare tana aramane i lamna riwa kaua? ¹⁴ Wate riwa kaua da tau amamata ai God a voepaepai ma BADA Iesu ana etanai, a votaḡotaḡoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vitumaḡane. ¹⁵ Tau God awarina a vitumaḡana guratana me ravai nanare, da tauna muriai rava anatapui irāḡelei ina vilawana-melei, ravai aiaii ma rava apoapoei. ¹⁶ Lamna aubaina a kaukauana guratei da orau ina ai rava ma BADA awarii.

¹⁷ *Jerusalem a netawane i madeḡa biaḡa i kwa ma pom ota a nememei da molamolakai ata puloi ma pulo ata kauēi God awarina. § ¹⁸ Tau aiaiu, maranaina i nelaḡaiu au Tempol viaina pulona a kaukauei. Eḡa patara maiteni ma eḡa visinaviravira. ¹⁹ Wate mai Jew ḡelau Eisia provinse i nei kampa. Tau i mēpa marina! Ita nei au naom da ai viwavu ita terei. ²⁰ Bo babada weka ita riweta au apoapoe aiwai maranai boru ḡeḡetelarana au naona a mairi. ²¹ *Wate mēpa da maratagogi awarii a garara a pa, "A vitumaḡana da God rava anatapui irāḡelei ina vovaimairini! Lamna aubaina tau weka a maimairi."

²² Felix tauna BADA Iesu ana Etanai riwana i aramana-kauēi, boru i gudui ma i riwa, "Maranai sorodia ai bada Claudius Lisias ina nei, ma ina pariblem." ²³ Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viaramani

* **24:2:** Felix ana au vibadana lamna eḡa ita ai. Tertelus lamna Felix i gwalagwalamerui da Paul ita viwavu ma ita pani. Felix rava vita gaeḡaei i verei da madeḡa ruaga i kwa Sisaei Nero wei ravana i viopuni. Gavia gaeḡaena i tupua ma Jew Rome i viḡavie i ma tau i Jerusalem i rikai da eḡa aiwaina ita mae. † **24:5:** Wava Nazarene lamna Iesu ana tauvotaḡotaḡoi e babanie i aubaina tauna Nasaretei. Maranai Tertelus tau i ḡorei Nazarene Lamna Kerisiana e vivijiboḡi. Jew Jerusalem ei ma Judea Provins anatapuna mai Galili provins ravai e inainana ḡairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e vivaigai. ‡ **24:7:** Verse 7 lamna buka waduwaduboi biaḡava au orana e mamea, wate buka Greek ponane i girugirumi maḡamaḡaiui wei ves-na au orana eḡa. ✧ **24:17:** Act 21:17-28 § **24:17:** Madeḡa 5 i kwa ma Paul i nememei au Jerusalem da ita mae mara aburuna da tauvitumaḡana ita vovaiwrewapani ma ana babara ma nolana aiaina ita virarautuei. (Act 18.22) ✧ **24:21:** Act 23:6

²⁴ Aupom biağa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumağana Iesu Keriso awarina i babaniei ma Felix i rautaniğana.*

²⁵ Wate maranai Paul babani i vikarei da God ana ğoana, da rava lawana aiaina ma jijimanina ina maeni, ma erawa kauai ma ğo'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, "Ma nae! Ma maranai ana ğoem lamna ana kwatuem." ²⁶ Ma Felix i ğoeğoei da Paul tauna manelei ita gwalai ma lamna aubaina mara i mağa i raukwatuei ma awarina i babani.

²⁷ Madeğa ruağa au murina Felix i rautom ma ana gabu Posias Festus i vaia. Felix i ğoei da wavana ita ai mai Jew awarii lamna aubaina Paul au numa panipani i votere-tawanei.

25

Paul i vibağa da Sisa au naona ita mairi

¹ Festus i ğeta au Caesarea da ana nola ita vikarei ma aupom vitonuina i ğae au Jerusalem.

² Weka pirişi ğeğetelarana ma dogadogara Festus i nebelei ma ai viwavu Paul awarina tauna i verei. ³ Ma Festus i vibağai da ita voagui da Paul ita paritawanei au Jerusalem. Tau i ava i vioga da Paul au etanai ita virağeni. ⁴ Wate Festus i paribelei i pa, "Paul au deri au Caesarea ma tau a ğaiğaira me kampa aupom ruağa au murina. ⁵ Mepa da Paul aiwai i kauana-boai lamna ami Babada maiteni ana ğaira da kampa ami viwavu ina terei."

⁶ Aupom 8 da 10 nanare au murina Festus i ğaira me au Caesarea ma maratonna au numaetara i kiala ma ana sorodia i eğara da Paul ita ruieiai au naona. ⁷ Maranai Paul i ruieiai, ma Jew babadai Jerusalem ei i ğairai i nei awari ma ina viwavui, kua mağamağau apoapoei aubaii. Wate tau i viwavu anatapui anona ega.

⁸ Paul wei *viwavui i vinua-nainei ma i pa, "Tau eğa aiwai apoapoena ata kauai mai Jew ai tarawatu awarina bo ai Tempol awarina bo Caesar awarina."

⁹ Wate Festus i ğoei da mai Jew ita vinuaiaimi lamna aubaina Paul i paridadanei i pa, "E ğoeğoei bo eğa da tana ğae au Jerusalem ma etara?"

¹⁰ Paul i riwa, "Tau marina Caesar ana au etara gabuna a maimairi, weka ina etareu. Tam u aramana-kauai da tau eğa aiwai apoapoena ata kauai mai Jew awarii. ¹¹ Wate mepa da aiwai apoapoena a kauai lamna ma virağeni. Tau eğa irağe ata rovoei. Wate mepa da wei lamna viwavu moru lamna eğa ai ai ana rewapana ita mamae da ina veredamaneu. Tau a vivibağa Caesar awarina!"

¹² Festus Caesar ana dogadogara ai nota i vaia ma i paribelana i pa, "Tam u vibağa Caesar awarina, Anina Caesar awarina ma nae."

Festus Paul ana babani gulau Agrippa i pariveri

¹³ Aupom biağa au murina gulau Agrippa† novuna Benisi maiteni i nei au Caesarea da gavena vouna Festus i raugenari da ita vieğualaei. ¹⁴ Ma i mae aupom vomağaua ma Festus Paul i raruetaara gulau i pariveri i pa, "Felix panipani tagogi weka i voterei. ¹⁵ Ma maranai a nae au Jerusalem mai Jew ai pirişi babadai ma dogadogara ai viwavu i neiai awariu ma i vibağaiu da Paul ata virağeni.

¹⁶ —Ma a riwei da tauai mai Rome ai tarawatu e ririwa da eğa rava ana kovoğa labalababai da au naona ana ruetarei. Tau i ina ğetai da ai viwavu taurauetara au naona ina mairi da ina gagaloana-melei. ¹⁷ Maranai tauviwavu maiteni weka a ğetai. Tau eğa ata vipaipai ma maratonna a eğara da ravana i neiai da ita etara. ¹⁸ Tauviwavu i vomairi ma a notai da aiwai apoapoena aubaina ita viwavui wate eğa. ¹⁹ Anina kua biağa ava ai taparoro kauaii, ma rava tagogi irairiğena wavana Iesu i vitarapiriei. Wate Paul e ririwa da Iesu lawalawaina. ²⁰ Tau nuanuau i rağarağa menanare riwa kua ana vainei ma Paul a paridadanei da i vianina da maiteni ata ğae au Jerusalem da kampa ata etarei. ²¹ Wate Paul i vibağa da Caesar ana viwavu ina rautaniğanei. Ma sorodia a eğari da au numa panipani ina paini da ana paritawanei Caesar awarina."

²² Ma Agrippa Festus i riwei, "A ğoei da ravana ana babani ana rautaniğanei."

Ma Festus i paribelei, "Anina, au maratoma ma rautaniğanei."

* **24:24:** Mepa da Drusila Jew wavinena awarini Felix wei ravai e ğoreğorei tauvitumağana i aramanei. Drusila lamna Herod Agrippa natuna guğuinina umauna ana madeğa 20. Tauna wavalatona Siriei i ravaği wate i voterei maranai ana madeğa 16 da Felix i ravaği. Wei lamna ana tavine viruina ma Felix ana tavine vitonuina. * **25:8:** Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina nai ei au Rome da Caesar ina ruetarei. † **25:13:** Wei lamna Herod Agrippa 11, Herod Agrippa 1 natuna.

Gulau Agrippa Paul i rautaniġanei

²³ Au maratomna gulau Agrippa ma Benisi gulau garai i oteni ma ana gabemani babadai ġaegae maiteni, i arana-ruiei au boru numana. Festus ana sorodia i egari da Paul i ruieiai. ²⁴ Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoegoei da ina iraġe. ²⁵ Wate tau a nelaġai da tauna eġa aiwai ita kauana-boai da ina iraġe. Wate i vibaġa da Caesar tauna ina rautarei. Lamna aubaina a pariparitawanei Caesar awarina. ²⁶ Wate Caesar aiwai ana riwei, eġa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona veru da aiwai ana girumi. ²⁷ Aubaina eġa ita ai da panipani ana paritawanei Caesar awarina ma ana viwavuna eġa!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei ² i pa:

I ai kava gulau Agrippa da amadodo tam au etara e rarautaniġanei da Jew babadai ai viwavu awariu ana tere-vaijijimani. ³ Tau aramanei da tam mai Jew ai giu ma ai paripariġai u aramanana-kauei. Lamna aubaina a vivibaġaim da au paribelana ma rautaniġanana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem. ⁵ *Tau i rorova ava i aramaneu ma ina riwem da tau ai boru bagibagina ma piriipirina, Pharisi au orana a rui ma tarawatu anatapuna a vojijina-kauei. ⁶ Ma marina a vivitumaġana da God aiwai noinoita i parivainuaġani ina kauei. Ma lamna aubaina tau weka a maimairi. ⁷ Wei parivai-nuaġanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaġanana aubaina mai Jew e vivivavuii. ⁸ Aiwai aubaina o notanotai da God eġa tagotagogina da rava iraġelei ina vovaimairini?

⁹ *Tau au naona a notai da aiwai anatapuna ata kauei da Iesu Nasaretei ata viġaviei. ¹⁰ Ma anina lamna a kauei au Jerusalem. Piri i ġeġetelerana babadai pepa i verei ma lamna i vovai-virewapaniu ma kerisiana vivivirei ma maġamaġai au numa panipani a terei, ma nanare ai iraġe a vianinei. ¹¹ Mara maġamaġai boru numai a naeni da kerisiana a vununaiei da ai tumaġana ita boviei. Amlou i ġaiġai kava da dobu ġelau i naeni kerisiana a baibaiei.

¹² Mara tagogi piri babadai au Jerusalem pepa i veru da rewapana i veru ma a nae au Damaskas. ¹³ Ma aubenai nanare, tau au etanai a nena ma a inana, lalalaina marei i ġairai ma i lalalai, gamrina madeġa i ġetawanei! Au rava maiteni a bababara i lalalai. ¹⁴ Anatapui ai a vipeuana au doa ma pona Hebrewi awariu i bababani. I riwa, “Saul, Saul aiwai aubaina e vivivaġavieu? Tam e ġoegoei da Tau ma viapoapoeniu wate eġa da tam e vivipoapoena-melem!”

¹⁵ Ma a paridadana, “Bada tam aiai?”

Ma BADA i paribelei, “Tau Iesu, ravana tauna e vivivaġaviei. ¹⁶ Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inana ma aiwai ana viatataiem, ma vimatamatei rava awarii. ¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii, ¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ġo’apoapoe ina notatawanei, ma ina taravaini natunatuna rarautani, ai tumaġana awariu aubaina.”

¹⁹ Lamna aubaina Gulau Agrippa, tau riwa marei au inana a inana i voteletei. ²⁰ *Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ġo’apoapoe ina votere-tawanei ma ina maetavirei God awarina, ma ai lawana ina vimataira da ai kava apoapoe i voterei-tawanei.

²¹ Wei babanii aubaina mai Jew au Tempol i vojijiniu ma i ġoei da ita viraġeniu. ²² Wate God i vilawanu da marina, ma weka a maimairi da a vimatamata rava muomuoi ma nanare rava ġaegaei awarii. Aiwai a bababaniei lamna peroveta nununai ma Moses i ririweta ina tupia. ²³ *Tau i riwa da tauvilawana Keriso ina vinuapoapoe. Ma tauna ina iraġe ma ina vinoa da ina vomairi me ma wei matairana ina vinolanala da tauna God lalalaina mai Jew ma Jentail aubaii.

* 26:5: Act 23:6 * 26:9: Act 8:3; 22:4-5 * 26:20: Act 9:20, 28-29 * 26:23: Isa 42:6; 49:6

²⁴ Weka Festus i vionaği ma i garara Paul awarina, “Tam u bua! Am aramana i vibuaim!”

²⁵ Wate Paul i paribelei, “Au bada Festus tau eğa ata bua. Tau aiwai a babaniei lamna riwa kaua ma babani anona. ²⁶ Wei kaua eğa govagovağana ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.”

²⁷ Paul Gulau Agrippa i riwei i pa, “Peroveta e vivitumağanei bo eğa? A aramanei da nanare!”

²⁸ Ma Agrippa i paribelei, “U notai da tau lağilağina ma sinaviraiu da ana vikerisiana!”

²⁹ Paul i paribelei, “Lağilağina bo amapo, a rarau pari God awarina da tam ma rava anatapui wei au boruna ina tupua-vira me tau nanare wate eğa sein maiteni.”

³⁰ Anina ma gulau ma gavena ma Benisi i vomairi ma i nae. ³¹ Ma anatapui i nenaie ma i babani vivira ma i vianina i pa, “Wei ravana eğa aiwai apoapoeni ita kauai da tana virağeni bo tana pani.”

³² Ma Agrippa Festus i riwei, “Mepa da eğa ita vibağa ġae Caesar awarina, lamna marina tata rupeni.”

27

Paul wagei i vağai nae au Rome

¹ Festus mara i tereterei i ġetai da tauai ata nae au Rome. Paul ma tau ma panipani ġelau maiteni au waga a geru ma a vağai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena. ² Waga Adaramitei i nei da a geru ma wagana i ġota-nae au Eisia provins gerana. Oroto wavana Aristakas ana dobu Thesalonika au Masedonia provins tauna maiteni i geru.

³ Au maratomna au Sidon taon a ġota, Julius ivina i ai Paul awarina ma i voterei da i opu au gera da ana rava ita raugenari ma ana ġoana aiwai ita vibaği. ⁴ Muriai wagei a opu da a nenaie ma ive i verau-matamataniai ma lamna aubaina bonabona au Saipras ma dobu ġaeğaeana au pouna au mulağina ambori. ⁵ Ma boga ġaeğaeana a bori da Silisia provins da Pamphilia provins gerai i voterei da au Maira taon a rui au Lisia provins ⁶ Au Maira taon kampa sorodia badana mai Egypt ai waga Alexandriei i nenaie au Italy kampa i vigeruai. ⁷ Ma aupom mağamağai nuatauai a ruba ma a voia guratana da Cinidus taon a tuğereğerei wate ive i verau-matamataniai da kampa waga a virai da Crete bonabonana ma mutu Samone au poui au mulağina a nae. ⁸ Ma kampa nuatauai bonabona Crete gerana a naeni aubaina mara i apoapoe ma a ġeta dobu e ġoreğorei U Aiaina, Lasea taon au ġereğerena.

⁹ Mara ġaeğaeana a vine-boai au vağai* ma Rupena Ujina marana boibogi i kwa,† marina lamna ive ma rabama ai mara ma boga babarana i vinirovorovo. ¹⁰ Ma Paul i riwa, “Nelara, malana a vaivaia da ata vağai ina apoapoe kaua ma waga ma purapura tana vine-boa-pai. Ata lawana maiteni tana vineboai.” ¹¹ Wate sorodia ai bada, kapena ana babani i rautaniğanei ma eğa Paul da kampa ata mae ma eğa ata nae. ¹² Wei gabuna eğa ita ai wei ivena au marana ma rava mağamağai i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ġaeğaeana ma mutuii lavarata ma rauanağa e vinao-vereverei, da au mulağina e mamae.

Kojikojira Ġaeğaeana

¹³ Maranai rauanağa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona gerai i nae. ¹⁴ Ma eğa barana ita uama ma kojikojira‡ olei iveiai. ¹⁵ Ive wagana i verau-matamataniai ma waga eğa tagotagogina da ita vobelei ma i voterei da ive waga i avara-opunei. ¹⁶ Bonabona aburuna Kauda gerana au mulağina a ruba ma kampa a voia guratana da dingy a terepai au waga da a rağita-jijini. ¹⁷ Wei i kauana vorovei ma ġuravei waga au gabaurina da waga adana i rağita-kwaviviroi. Tau i rovo mepa da au maratete ina amğaeana au Syrtis,§ Libya au gerana. Lamna aubaina ġuravei ai da kuka, i rağita-tagogiei ma au boga i viorereni da waga ita bibi. Ma i voterei da kojikojira waga i avara-naiei. ¹⁸ Maratomna kojikojirana i rarau-guratanelei da purapura ġelau i boga a viorereni. ¹⁹ Aupom vitonuina tau i waga purapurai i viorereni au boga. ²⁰ Kojikojira i ruba da aupom biağa da madeğa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniğaneu ma Crete eğa tata oputawanei, amapo waga eğa tata viapoapoeni ma ata purapura eğa tata vineboai. ²² Wate a ririwana-guratemi da eğa orami ina peu! Aubaina avena da waga ina monu wate eğa ina irağe. ²³ God lamna tau au BADA ma ana taunola

* **27:9**: Iri i parei da kojikojira ana mara ma i vağai. † **27:9**: Eng. Atonement bo *Yom Kippur* marana wei lamna September bo October rabama ma ive ai mara ‡ **27:14**: Kariwabu ġaeğaeana § **27:17**: Wei lamna maratete.

tau. Waguvarai God ana anela i paritawaneiai awariu. ²⁴ Ma i riwa, 'Ega ma rovo! Tam anina da Caesar au naona ma etara! Ma gelauna lamna God ana nuavaina maemaena rava anatapui maiteni e va'gava'gāi ina lawana.' ²⁵ Lamna aubaina tepami ina tora! Aubaina tau God a vivituma'gane'i ma menanare i ririweia nanarena ina tupua. ²⁶ Wate tauta au maratete tana am'gaena."

²⁷ Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tau'i gera i tu'gere'gerei. ²⁸ Ma barawa au giana gāima i ra'gini ma au boga i tawanana-gāirei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter. ²⁹ Ma tau'i i rovo mepa da rabama waga au kira ina viairikarikai lamna aubaina waga au ipuna anika 4 i tawana gāirei ma i vipaipai da mara ina tom tawanana. ³⁰ Ma waga ravai ai kaua i kaukauei da ita ruba-gova'ga. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-gāirei au boga, ³¹ Wate Paul sorodia ai bada maiteni i riwei, "Mepa da waga ravai ina rubatawanemi lamna anatapumi ona ira'ge." ³² Ma sorodia dingy guravana i borituini ma dingy kwakwavina i peu au boga ma i avara-naiei.

³³ Ma maratomtomi Paul rava anatapui i egari da ita am, i pa, "Tau'i marina aupom 14 rovo i kauemi ma e'ga ota am." ³⁴ "Tau a viviba'ga-guratem i da ona am da ona viREWAPANA, e'ga ai'ai tagogi ina ira'ge." ³⁵ Paul i babani vorovei ma au matai palawa i vaia, BADA i viegualaei ma i vogimai ma i ani. ³⁶ Ma rava anatapui inana'i ma orai i bagibagi ma am i vikarei. ³⁷ Tau'ai anatapui'ai 276 au waga. ³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita gōta da avena ita am'gana.

Waga au maratete i am'gaena

³⁹ Marana'i mara i tom tawanana tau'i dobu i 'nanai wate gerana e'ga ita aramanei, wate U inana'i da gerana aiaina ma i notai da gerana aiaina da waga kampa ita vi'gaeni. ⁴⁰ Anina ma anika guravai i viaituini, ma labilabi i tere-gāirei, ma waga au naona kuka voaburunei i votawatawanei ma gera aubaina i ruba. ⁴¹ Wate waga au maratete i am'gaena da i tapaiei, ma rabama waga ipuna i viairikarikai.

⁴² Sorodia i goei da panipani ita vira'gēni, da avena ita toa-gaira au gera ma ita viruberubei. ⁴³ Wate sorodia ai bada i goei da Paul ita vilawani ma i vi'gaei, anina ma ai viogatarā e'ga ita kauēi. Ma tau'i aiavo'i toa i aramanei i egari da i viauepa au boga ma i toa-gaira au gera. ⁴⁴ Ma gēlāui aiwai da i tenatenam i vidauei. Ma nanare anatapui lawalawaii au gera i gōta.

28

Paul au Malta bonabonana

¹ Marana'i a gōta au gera ma a aramanei da tau'ai au Malta bonabonana. ² Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tau'i au gera ai i viviri. ³ Ma Paul ai ragorago i gūna da ai au tepana i tereterei ma mota gāigaiawana ai bolana malana i vaia da i opui ma Paul nimana i ani. ⁴ Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauvirāgena ma e'ga ita monu wate ata god*" e ririwa da tauna e'ga ina lawana." ⁵ Wate Paul motana i viaikwajiei da ai au menamenana i rauei ma tauna e'ga ita kero. ⁶ Rava i vipaipai da Paul nimana ita dodo bo ita peu da ita ira'ge. Wate marana'i i vipaipai guratana ma i 'nanai da tauna anina, tau'i ai nota i virai ma i riwa da tauna god gēlauna.

⁷ Au gerana a gōtagōta - lana au gēre'gerena lamna dobuna badana Publius ana wapu gae'gaena. Tauna i taravainiai ma i paina-kauei da aupom tonu'ga ⁸ Publius amana i doria manawa ruba ma inigu'gura i vaia da i matamatave, Paul i rui inana'a aubaina ma urana au tepana i terei ma i raupariei ma i vilawani. ⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonu'ga. Ma ravai i voagu-kauei ma marana'i ata vomairi, ai goana va'gāi aubaina anatapuna i verelai. Ma waga gēlauna a gerui lamna mai Alexandria ai waga bodu aubaina kampa i mae. Waga au naona lamna ai god ru'ga kokoitau'i i tai". ¹² Kampa ma a amkuka-nae da au Sairakius a gōta ma a mae aupom tonu'ga ¹³ Kampa da ambori damana au Regium ma maratomma rauana'ga i wanabauni ma amkuka ma geraei a ruba da maratom gēla au Puteoli a gōta. ¹⁴ Kerisiana kampa a nela'gāi ma i riwelai da maiteni a mae wiki tagogi. Anina ma a babara-nae da au Rome taon a gēta. ¹⁵ Kerisiana au Rome riwai'ai i vaia da a nenei ma i gēi da ita nebelelai, gēlāui i gēi au taon

* 28:4: God wavinena wavana kaua aiaina bo kaua jijimanina (Justice). † 28:10-11: Wei lamna mai Rome ai god ra'gara'ga wawai Castor ma Pollux rua'gāi e gōre'gore Dioscuri bo ra'gara'ga marei, Tau'i lamna god Zeus ma Leda natunatui.

e ġoreġorei Vaġavaġai TONUġa ai Numa ma ġelau i ġae Apius ana au maket. Maranai Paul wei ravai i 'nanai, ma i vinuai ai kua ma God i viegualaei. ¹⁶ Maranai au Rome taon a ġeta tui Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

¹⁷ Ma aupom tonuġa au murina Jew babadai kampa maemaei i raugoreiai ma awarii i babani, "Varevareiu tau eġa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i panu ma i veredamaneu Rome gavena awarina. ¹⁸ Mai Rome i etareiu ma i ġoei da ita rupeniu aubaina eġa aiwai apoapoena ata kau ei da ina viraġeniu. ¹⁹ *Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaeġaena Caesar awarina da ita rauetareiu. Wate lamna eġa au rava ata viviġaviei, eġa. ²⁰ Lamna aubaina a ġoremi weka da tata babani gogona, ma ata riwemi da tau a vipanipani aubaina a vitumaġana da mai Israel ai tauvilawana wariġa i ririwei boiboġi i nei."

²¹ Tui i paribelei, "Tauai eġa pepa Judeaei ata vaia bo ai rava riwa ita neiai. ²² Tauai aramane i ravai anatapui kerisiana boruna e paripari-virevirei. Wate tauai a ġoei da am nota ana vaia."

²³ Ma tui mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I ġoei da orai ita taini da Iesu ita vitumaġanei. ²⁴ Ana babaniei ġelau orai i taini ma ġelau eġa ita vitumaġana. ²⁵ Ma tui ava babanina i viparipariniġaiei ma muriai da ita vilamonei Paul wei riwana tagoġi i latoni i pa, "Arua Vivivireina riwa kua Peroveta Isaiah ponanei amamami i riwei i pa:

²⁶ *Ma nae am rava mai Israel awari da ma riwei,*

ona nononora wate eġa ona araramanei

ona inana i wate eġa anona ona aramanei.

²⁷ *Aubaina wei ravai orai i bado.*

Taniġai i gudui,

Tau matai i vopotai.

Mepa da tui mataiei ita inainana,

taniġaiei ita nononora

oraiei ita araramanei,

ma ita mae-tavirei awariu ma ata vilawani.

(Isaiah 6:9-10)

²⁸⁻²⁹ —Lamna aubaina ona aramane i da God Riwana Aiaina vai-melana aubaina i paritawanei Jentail awarii. Tui ina rautaniġana."

³⁰ Paul kampa numa i vivimaiei ma i mae madeġa ruaga taputapuna. Ma rava maġamaġau i nenei da i raruġenari ma wei i vinuai ai. ³¹ Ana tepatorana God ana vigulau ma Iesu Keriso riwana Aiaina i jimei. Ma eġa ai ai ita viġaei.

* 28:19: Act 25:11